

სახელმწიფო გამომცემლობა
„საბჭოთა საქართველო“
თბილისი



ჩ ~ ნ ბ ~ ზ
ქ ი ც კ ე ტ ო პ ი



ქ თ ე ბ ი ს კ



ქ ე ქ ე ბ ი ს

ქ ო თ ს ს ო ზ ე ბ ი

სახელმწიფო გამომცემლობა

„საბჭოთა საქართველო“

თბილისი

1963

ჩინგიზ აიტმატოვი საბჭოთა მწერლობის ახალგაზრდა თაობის საუკეთესო წარმომადგენელია. ძველისა და ახლის ბრძოლა, ახალი საბჭოთა ადამიანი, მისი მდიდარი სულიერი სამყარო, აი საკითხები, რომლებიც იღვავებს ახალგაზრდა მწერალს.


წინამდებარე კრებულში შესულმა ოთხმა ნაწარმოებმა, საერთო სათაურით „მთებისა და ველების მოთხრობები“ ლენინური პრემია დაიმსახურა; ეს იყო ახალგაზრდა მწერლის დიდი შემოქმედებითი გამარჯვების აღიარება და იმის ნათელი დადასტურება, თუ განვითარების რა მაღალ დონეზე ავიდა ყირგიზეთის კულტურა საბჭოთა ხალხების მრავალეროვან ქმურ ოჯახში.

„ჯამილა“ ამაღლებული, რომანტიული პოემია დიდ ადამიანურ სიყვარულზე; სიყვარულზე, რომელიც დასძლევს ყოველგვარ დაბრკოლებას და ბრძოლით დაიმკვიდრებს თავის ბედნიერებას. „ჯამილა“ საბჭოთა კავშირისა და მსოფლიოს ხალხთა ორმოცზე მეტ ენაზე ითარგმნა და საყოველთაო აღიარება ჰპოვა.

„ჩემო წითელთავსაფრიანო ჩინარო“ — ეს არის მოთხრობა. იმ შესანიშნავ ადამიანურ თვისებებზე, რომელიც ნამდვილი საბჭოთა ადამიანებისათვისაა დამახასიათებელი.

„აქლემის თვალი“ საბჭოთა ახალგაზრდობის ცხოვრებაზე მოგვითხრობს, „პირველი მასწავლებელი“ — იმ დიდბუნებოვან ადამიანებზე, რომელთაც თავიანთი პირადული საზოგადოების კეთილდღეობის დიად საქმეს მოახმარებს.

ჩ. აიტმატოვის მოთხრობათა კრებული პირველად გამოდის ქართულად. ვფიქრობთ, მკითხველს ინტერესით გაეცნობა ნიჭიერი საბჭოთა მწერლის ნაწარმოებებს.



ԻՅՅՄ
ԵՈՕՄԻԷ-
ՕՅՅԵՅՅԵԿՅԵՄ
ԻՈԵՅԿԵՄ



(მოთხრობა ორ აბაღად)

პროლოგის მაგიერ

ჩემი პროფესიის გადაწყვილეს ხშირად მიხდებოდა ტიან-შანზე ყოფნა. ერთხელ გაზაფხულზე, ეს იყო წლინახევრის წინათ, სასწრაფოდ გამომიძახეს რედაქციაში. მაშინ ნარინში ვიყავი, ტიან-შანის საოლქო ცენტრში. მოხდა ისე, რომ ავტობუსი ავტოსადგურში ჩემს მისვლამდე რამდენიმე წუთით აღრე გავიდა. შემდეგი რეისისათვის ხუთი საათი უნდა მეცადა. სხვა გზა არ იყო, რაიმე მანქანას უნდა გავყოლოდი. გავეშურე ქალაქის გარეუბნისაკენ, საიდანაც გზატკეცილი იწყებოდა.

გზის მოსახვევში, ბენზინის მიმღებ. პუნქტთან, სატვირთო

მანქანა იდგა. შოფერს ის იყო დაემთავრებინა ბენზინის აღება. გამეხარდა. კაბინის შუშაზე საერთაშორისო რეისის მანიშნებელი ნიშანი — SU — საბჭოთა კავშირი მოჩანდა. მაშასადამე, მანქანა ჩინეთიდან რიბაჩიეში, ვნეშტრანსის ავტობაზაში მიდიოდა. იქიდან კი ფრუნზეში გამგზავრება იოლი იყო.

ალბათ მალე დაიძრებით? — რიბაჩიემდე წამიყვანეთ! — ეთხოვე შოფერს.

მან თავი ჩემსკენ მოაბრუნა, მხარს ზემოდან გადმომხედა, შემდეგ გასწორდა და მშვიდად მითხრა:

— არა, აგაი¹, არ შემიძლია,

— ძალიან გთხოვთ! სასწრაფო საქმე მაქვს, ფრუნზეში გამომიძახეს.

შოფერმა ისევ წარბაუხსნელად გადმომხედა:

— მესმის, მაგრამ ნუ გეწყინებათ, აგაი, არავინ არ მიმყავს.

გაკვირვებული დავრჩი: კაბინა თავისუფალია, მისთვის სულაც არაა ძნელი ჩემი წაყვანა, თანაც მატყობს, რომ სულს ძლივს ვითქვამ, მეჩქარება.

— ჟურნალისტი ვარ. ძალზე მეჩქარება. გადაგიხდით, რამდენსაც მომთხოვთ.

— საქმე ფულში არაა, აგაი! — მკაცრად შემაწყვეტინა შოფერმა და გაბრაზებით გაჰკრა ფეხი ბალონს. — სხვა დროს უფასოდ წაგიყვანთ, ახლა კი არ შემიძლია. ნუ გეწყინებათ. აქ კიდევ გამოივლიან ჩვენი მანქანები, ყველა წაგიყვანთ, მე კი არ შემიძლია.

ვიფიქრე, ალბათ, გზაზე ვინმე ელოდება-მეთქი და ვუთხარი: — „არც ძარაში შეიძლება?“

— სულერთია... დიდ ბოდიშს ვიხდი, აგაი.

შოფერმა საათს დახედა და აჩქარდა.

გაოცებულმა მხრები ავიჩეჩე და გაკვირვებით შევხედე ბენზინის ჩამომსხმელ ხანში შესულ რუსის ქალს, რომელიც ამ ხნის განმავლობაში ჩუმად გვადევნებდა თვალს თავისი ჭი-

¹ აგაი — (სიტყუასიტყვით უფროსი ძმა) — ზრდილობიანი მიმართვის ფორმა უფროსებისადმი.

ხურიდან. მან თავი გააქნია, თითქოს მითხრა: — „ნუ აწუხებთ, შეეშვიით“. უცნაური ამბავია.

შოფერი კაბინაში შევიდა. პირში მოუკიდებელი პაპიროსი ჩაიღო და მოტორი აამუშავა.

იგი ახალგაზრდა იყო, ოცდაათი წლისა, მალალი, მხრებში ოღნავ მოხრილი. დამამახსოვრდა საჭეს ჩაჭიდებული მისი მოქნილი, დიდი ხელები და სევდადაკრული, ქუთუთოდაშვებული, დაქანცული თვალები. ვიდრე მანქანას ადგილიდან დაძრავდა, ხელი სახეზე ჩამოისვა, ერთი მძიმედ ამოიოხრა და შეშფოთებული გახედა გზას მთებისაკენ. მანქანა დაიძრა.

ტიანშანელი შოფრები ერთი შეხედვით მკაცრი ხალხია. მაგრამ წაყვანაზე უარს არავის ეტყვიან, იყოს კი ადგილი. თუმცა, ამჯერად, უცნაური, სიტყვაძუნწი შოფერი შემხვდა.

ბენზინის ჩამომსხმელი ქალი ჯიხურიდან გამოვიდა. მას ალბათ ჩემი დამშვიდება უნდოდა:

— ნუ დარღობთ, თქვენ ახლავე გაემგზავრებით.

— არ ვიდარდებდი, რომ არ მეჩქარებოდეს! — ჩაეიბუზღუნე წყენით.

— თუკი ასეთი საქმეა...

— რა საქმე?

არაფერი, ისე! — მან გაურკვევლად ჩაიქნია ხელი, თითქოს ვინმეს იცოდებსო. შლანგი ბენზინის ჩამოსასხმელზე დაჰკიდა და ამოიოხრა. — გრძელი ამბავია...

ვღუმედი.

— განიცდის ყმაწვილი... უწინ იგი აქ ცხოვრობდა ჩვენთან, საუღელტეხილო ბაზაში.

ამ დროს „პობედა“ მოგვადგა, ერთი გზა გვექონდა და ბენზინის ჩამომსხმელი ქალის საუბარი ბოლომდე ვეღარ მოვისმინე.

საბარგო მანქანას ჩვენ არცთუ ისე მალე, დოლონის უღელტეხილის მისადგომებთან წამოვეწვიეთ. იგი თვით ტიანშანელი შოფრებისთვისაც კი, რომელთაც ვერაფრით გააკვირვებ, საშინელი, უფრო მეტიც, დაუშვებლად დიდი სისწრაფით მიჰქროდა. მოსახვევებზე სიჩქარეს არ ანელებდა და ღრიალით მიიკვლევდა გზას კლდეებს ქვეშ. აღმართებზე თითქოს აფრინ-

ლაო, წამით გამოჩნდებოდა და გაჰქრებოდა, თითქოს მიწაზე უყო პირი. შემდეგ ისევ გამოჩნდებოდა აფრიალებული ბრეზენტის ბოლოებით, რომელიც ბორტებს ეხეთქებოდა.

„პობელას“ მაინც თავისი გაჰქონდა. ჩვენ უსვე გადავუსწარით კიდევ და მე უკან მოვიხედე: ვინ არის ეს თავზებელაბული კაცი, საით მიჰქრის ასე კისრისტეხით? ამ დროს მოულოდნელად, როგორც ეს ხშირად იცის ჩვენს უღელტეხილზე, წვიმამ და სეტყვამ წამოუშინა. და წვიმის ირიბ ნაკადში, რომელიც ფანჯრის მინას ეხეთქებოდა, შუაგვარჩიე კაცის ფერმკრთალი, დაძაბული სახე, კბილებში გაჩრილი პაპიროსით. მისი ხელები სწრაფად მუშაობდა საკეზე. არც კაბინაში და არც ძარაში არავინ იჯდა.

მალე, ამ შემთხვევითი შეხვედრის შემდეგ, ყირგიზეთის სამხრეთ ნაწილში ოშის ოლქში მიმავლინეს. როგორც მოგეხსენებათ, ჟურნალისტს ყოველთვის სადღაც აგვიანდება, დრო თითქოს მუდამ გამორწყული აქვს. საღამოს, ზუსტად მატარებლის გასვლის წინ, მივეარდი ვოგზალზე, კუბეში შესვლისას პირველად არც კი მიმიქცევია ყურადღება ჩემი თანამგზავრისათვის, რომელიც ფანჯრისკენ სახეშებრუნებული იჯდა. ჩვენს გარდა, ეტყობა, არავინ ფიქრობდა ამ კუბეში შემოსვლას. ის კი შემობრუნებას არ აპირებდა. მინისთვის მიეყრდნო სახე, ალბათ ან ფანჯარაში იყურებოდა, ანდა თავისაზე ფიქრობდა რაღაცას.

მატარებელი სიჩქარეს უმატებდა. რადიოში მუსიკის ხმა ისმოდა: კომუზზე უკრავდნენ ნაცნობ მელოდიას. ეს კლასიკური ყირგიზეული კიუი, მე რატომღაც წარმოდგენილი მქონდა საღამოჟამს ველზე მარტო მიმავალი მხედრის სიმღერად. გზა დაუღეველია, ველი უკიდევანო, შეიძლება იფიქრო უნაგირზე მჯდომმა და ხმადაბლა იმღერო. იმღერო შენთვის, იმაზე, რაც გაწუხებს, განა ცოტა აქვს საფიქრალი ადამიანს, როცა იგი თავისთვის მიიმღერის ცხენის ფლოკეების ხმაურში? სიმები ეღერდნენ ნახევარხმაზე, ისე თითქოს წყალი ეთამაშებოდა გალაპლაპებულ, კრიალა ქვეებს არხში. კომუზი მღეროდა, რომ მზე მალე ბორცვებს მიეფარება, რომ მიწაზე ცისფრად, უჩუმრად გაირბენს სიგრილე და მოწითალო გზისპირებზე ამოსული

მტრედისფერი აბზინდა და ყვითელი ვაციწვერები ოღნავო რხევით მტვერს დაიბერტყავენ. ტრამალი ყურს მიუგდებს მხედრის სიმღერას და ჩაფიქრებული მასთან ერთად ამღერდება.

ვინ იცის, იქნებ ოდესმე უვლია მხედარს ამ გზებზე, სადაც ახლა ჩვენი მატარებელი მიჰქროდა... ისევე, როგორც ახლა, იფერფლებოდა ჩამავალი მზე და სადღაც ტრამალის დასალიერში სიწითლე ემატებოდა, ხოლო მთებზე თოვლი, მზის უკანასკნელი სხივები რომ ეცემოდა, ვარდისფერი ხდებოდა და ისევ სწრაფად იღებდა თავის ფერს.

ფანჯრის მიღმა რჩებოდა ბაღები, ვენახები, მუქმწვანედ აქოჩრილი სიმინდის ყანები. ორთვალა, რომელზეც ახლადმოთიბული იონჯა ეყარა, გადასასვლელისაკენ მიიჩქაროდა. იგი შლაგბაუმთან შეჩერდა. მზემოკიდებული ბიჭი გახუნებულყო, გაქეჩილი მაისურით, მუხლებს ზემოთ დაკარწახებული შარვლით, წამოიწია ორთვალაზე, მეოცნებე თვალებით გახედა მატარებელს, გაიღიმა და ვილაცას დაუქინია ხელი.

მელოდია საოცრად ნაზად ერწყმოდა მიმავალი მატარებლის რიტმს. ფლოქვების მაგივრად რელსების შესაყარზე ბორბლები ხშაურობდნენ. ჩემი მეზობელი მაგიდასთან მიმჯდარიყო, ხელს დაყრდნობილი თვალმოუწყვეტლივ იყურებოდა ფანჯარაში. მე მეჩვენებოდა, რომ ისიც უხმოდ, თავისთვის მღეროდა მარტო მიმავალი მხედრის სიმღერას. სევდა შემოსწოლოდა, თუ ოცნებობდა არ ვიცი, მხოლოდ იგრძნობოდა, რომ მას რაღაც ნაღველი, ჯერ კიდევ ჩაუფერფლავი დარდი აწუხებდა. იგი ისე ღრმად მისცემოდა თავის ფიქრებს, რომ ვერც კი მამჩნევდა. სად შევხვედრივარ ამ კაცს? ხელებიც კი მეცნობა. გარუჯული, გრძელი, მტკიცე თითებით.

და უცებ მომაგონდა: ეს ხომ ის შოფერია, მანქანაში რომ არ ჩამსვა. „მიდის სადღაც თავის საქმეებზე“, — გავიფიქრე და ამით შევიჯერე თავი. წიგნი ამოვიღე, ღირდა განა შემეხსენებინა თავი? მან, ალბათ, აღარც ვახსოვდი. ცოტა ვინმე ხელება შოფერს გზაზე?

ასე ვისხედით კიდევ კარგა ხანს, თვითთული თავისთვის. ფანჯრის იქით ბინდი წვებოდა. ჩემს თანამგზავრს მოწევა მო-

უნდა, პაპიროსი ამოიღო და, ვიდრე მოუყიდებდა, ხმამაღლა ამოიოსრა. შემდეგ თავი ასწია, გაკვირვებით დამაკქერდა და გაწითლდა. მიცნო.

— გამარჯობათ, აგაი, — მითხრა და დამნაშავესავით გაიღიმა. ხელი ჩამოვართვი.

— შორს მიემგზავრებით?

— ღიახ... შორს! — პაპიროსის ბოლი გამოუშვა, ცოტახანს იყუჩა და დაუმატა: — პამირზე.

— პამირზე? ერთი გზა გვექონია. მე ოშში მივლივარ.

— თანამგზავრები ვყოფილვართ.

— ძალიან კარგი, არ მოგვეწყინდება.

— ნამდვილად! — რაღაც გაუბედავად ჩაილაპარაკა.

— შევებულებაში? თუ სამსახური გამოიცვალეთ?

— ჰო, შეიძლება ასეცაა... არ მოსწევთ? — შემომთავაზა. ვაბოლებდით და ვდუმდით. სალაპარაკო არაფერი გვექონდა. ჩემი თანამგზავრი ისევ ჩაფიქრდა. იჯდა, თავი ჩაეჭინდრა და ირხეოდა მატარებლის მოძრაობის ტაქტზე. მეჩვენა, რომ ძალიან შეცვლილიყო იმ შეხვედრის შემდეგ. გამხდარიყო, სახე დაგრძელებოდა, სამ ღრმა ნაოქს დაეღარა შუბლი. გადაბმულ წარბებს თითქოს მკმუნვარე ჩრდილი დაეჩნიათ სახეზე. მოულოდნელად შემომხედა ოდნავ დაელმებული თაფლისფერი თვალებით, ნაღვლიანად გაიღიმა და მკითხა:

— თქვენ, ალბათ, ძალიან გაჯავრდით მაშინ ჩემზე, აგაი, არა?

— როდის? რაღაც არ მახსოვს? — არ მინდოდა, რომ მას ჩემთან უხერხულად ეგრძნო თავი, განა რა მოხდა ისეთი მაშინ. მაგრამ იგი ისეთი წრფელი თვალებით მიყურებდა, რომ მაშინვე გამოვტყდი. — აა, მაშინ? არაფერია, დამავიწყდა კიდევ, განა რა იყო ისეთი... გზაში ყველაფერი ხდება. თქვენ კიდევ გახსოვთ?

— სხვა დროს იქნებ დამვიწყებოდა კიდევ, მაგრამ იმ დღეს არა.

— იმ დღეს რა შეგემთხვათ, ავარია? — ვიკითხე და უნებურად გამახსენდა როგორ მიჰყავდა მანქანა.

— როგორ ვითხრათ, ავარია არ ყოფილა — ჩაილაპარაკა

მან და საჭირო სიტყვას დაუწყო ძებნა, შემდეგ გაიცინა, აიძულა თავი, რომ გაეცინა, — ახლა საითაც გნებავთ იქეთ გაგაქროლებდით, მაგრამ ამ წუთში მეც თქვენსავით მგზავრი ვარ.

— არაფერია, ცხენი თავის ნაკვალევზე კიდე ათასჯერ გაივლის, იქნებ ისევ მოგვიწიოს გზაზე შეხვედრა.

— თუ შევხვდით, ძალით ჩაგსვამთ კაბინაში! — გადააქნია თავი.

— მაშ, შევთანხმდით? — გავიხუმრე მე.

— პირობას გაძლევთ, აგაი, — მიპასუხა და გამხიარულდა.

— მაინც, რატომ არ წამიყვანეთ მაშინ?

— რატომ? — გამეხმაურა და უცებ მოიღუშა.

— გაჩუმდა, თვალები დახარა და გაბოროტებით დაუწყო პაპიროსს ქაჩვა. მე მივხვდი, რომ არ უნდა შევეკითხოდი, ავწრიალდი, მინდოდა საუბარი სხვა თემაზე გადამეტანა, მაგრამ უკვე გვიან იყო. მან ნამწვი ჩააქრო და ძლივს ამოღერდა:

— არ შემეძლო... შვილს ვასეირნებდი...

— შვილს? — გამიკვირდა. — დიღია?

— არა! — გაიღიმა და თვალეში სითბო ჩაუდგა, — ჯერ ნამდვილი სულელია, მეხუთეში გადადგა.

— კი, მაგრამ სადმე გზაზე იყო?

— დიახ, უღელტეხილზე.

— მერე, რა იყო მერე? — ვერაფერს მივხვედრილიყავრა უნდოდა იქ შვილს და, საერთოდ, რა შუაში იყო იგი.

— ასეთი საქმეა... გესმით... როგორ აგისხნათ... შუბლზე ოფლი მოიწმინდა, ისევ მოუკიდა, მღელვარებას ებრძოდა და მერე თითქო რაღაც გადაწყვეტილება მიიღო, მტკიცედ შემომხვედა.

ასე მოვისმინე შოფრის ნაამბობი თავის ბედზე. ღრმად ვარ დარწმუნებული, რომ ის არავის, მით უმეტეს მე—ჟურნალისტს, არ მოუყვებოდა ამ ამბავს. უფრო გვიან კი, როცა კარგად გავიცანი, გავიგე, რომ მის ხასიათს არ შეეფერებოდა გული გადაეხსნა შემთხვევითი თანამგზავრისათვის. მაგრამ მისი ამბავი ისეთი იყო, რომ ნებით თუ უნებლიეთ უნდა გაეზიარებინა ვინმესთვის, ასე იყო საჭირო. სხვანაირად მე ვერაფრით ვერ გავიგებდი რა მოხდა მაშინ ჩვენს შორის ტიან-შანის გზაზე.

დრო ბევრი გვექონდა. ოშამდი ორი დღელამის გზა იყო. მე არ ვაჩქარებდი და არც ვაწყვეტილებდი საუბარს კითხვებით. კარგია, როცა ადამიანი გიყვება და თავიდან განიცდის ყველაფერს, ჩერდება ნახევარ სიტყვაზე. მაგრამ დიდი მოთმინების ფასად დამიჯდა არ ჩავრეულიყავი მის ნაამბობში, რადგან, როგორც გამოირკვა, ბელის წყალობით თუ ჩემი პროფესიის გადამკიდემ, უკვე რალაც ვიცოდი პირადად მასზე კი არა და იმ ადამიანებზე, რომელთანაც შეახვედრა შოფერი ბელმა და რომელთა შესახებაც მან ყველაფერი არ იცოდა. მე შემეძლო გამეგრძელებინა, შემევისო მისი ნაამბობი, ამეხსნა მისთვის ბევრი რამ, რაც არ იცოდა (ამაზეა ამ მოთხრობის მეორე ამბავი), მაგრამ გადავწყვიტე ის გამეკეთებინა მხოლოდ იმის შემდეგ, როცა ბოლომდი მოვუსმენდი. მე მგონი სწორად მოვიქეცი. რატომ? ამაზე ახლა არაფერს გეტყვით, გეტყვით ბოლოს, ამ ამბის ბოლოს.

რადგან ძირითადი თემიდან გადავუხვიე, სჯობს აქვე, ასე ვთქვათ, კიდევ ერთი ლირიკული გადახვევაც გავაკეთო.

შეიძლება მკითხველებმა ყურადღება მიამციეს. უცნაურ ქვესათაურს „მოთხრობა ორ ამბად“. სწორედ ასეა. ეს ავტორის ჭირვეულობად არ მიიჩნით. როგორც ცნობილია, ლიტერატურულ ნაწარმოებებს, თუ ამას საჭიროება მოითხოვს, ყოფენ ნაწილებად, თავებად, კარებად. მოთხრობა კი თავისთავად დამოუკიდებელი ნაწარმოებია. მაგრამ აქ საქმე ფორმაში არაა, და ამაზე არც არის ლაპარაკი.

„გრძელი ამბავი!“—ასე თქვა ბენზინის ჩამომსხმელმა ქალმა. მართლაც, ამბავი, რომელზეც მე მინდა მოგითხროთ, საკმაოდ გრძელი და შეიძლება არაჩვეულებრივიცაა. მე უკვე დავწერე ამაზე პატარა მოთხრობა ავტორის პირით, ე. ი. აღვწერდი მოვლენებს და ადამიანთა ხასიათებს, როგორც გარეშე დამკვირვებელი და ამით, როგორც ავტორი, მონაწილე ვიყავი იმ ამბისა, რომელიც უნდა ამესახა. როცა მოთხრობა ამხანაგებს წასაკითხად მივეცი, თავზე დამატყდა მათი რისხვა და საყვედური. აზრები მკვეთრად განსხვავდებოდნენ: ერთნი ამტკიცებდნენ, რომ მე მართალი ვარ, რომ სწორედ ასეთი უნდა იყოს ავტორის პოზიცია თავისი გმირების მიმართ; მეორენი

ამბობდნენ, რომ არა ვარ მართალი, ჯავრობდნენ და კიცხავდნენ ავტორს, ფიქრობდნენ—ასე კი არა, ასე უნდა გაკეთებულიყო, განსაკუთრებით აღიზიანებდათ მოთხრობის დასასრული. ერთი სიტყვით, დაობდნენ ყველაფერზე, დაობდნენ მორალზე, გმირების საქციელზე, იწონებდნენ ან იწუნებდნენ მათ, მაგრამ ყველა პრეტენზიას, რაც ხანდახან ცხოვრებაზე ადამიანთა მეტად სუბიექტური შეხედულებებით იყო ნაკარნახევი, წარმომიდგენდნენ მე, ავტორს, თითქოს ყველაფერი ეს ხდებოდა ჩემი სურვილით. არ ვკისრულობ იმის გარჩევას, თუ ვინ იყო მათ შორის მართალი, მაგრამ ბევრი ფიქრის შემდეგ იმ დასკვნამდე მივედი, რომ მოთხრობა უნდა დამეწერა ისე, როგორც იყო სინამდვილეში. მე იგი ორმა ადამიანმა მიაშობ და ამიტომაც ეს მოთხრობა ორი ნაამბობისაგან შედგება. ეს არის ორი ადამიანური აღსარება. მე მხოლოდ გადმოგცემთ იმას, რაც მოვიცემინე. დაე თვითონ გმირებმა ილაპარაკონ.

შოფრის ნაამბობი)

.. ყველაფერი მოულოდნელად დაიწყო. ის-ის იყო დავბრუნდი არმიიდან, სადაც მოტორიზებულ ნაწილში ვმსახურობდი, მანამდე კი საშუალო დავამთავრე და შოფრად ვმუშაობდი. ბავშვთა სახლში ვარ გაზრდილი. ჩემი მეგობარი — ალიბეკ ჯანტურიანი ჩემზე ერთი წლით ადრე იქნა დემობილიზებული. იგი რიბაჩიეს ავტობაზაში მუშაობდა. რა თქმა უნდა, მეც მასთან ჩამოვედი. მე და ალიბეკი ყოველთვის ვოცნებობდით მოვხედრილიყავით ტიან-შანზე ან პამირზე. ავტობაზაში კარგად მიმიღეს. საერთო საცხოვრებელში მომცეს ბინა და მანქანა — თითქმის ახალი, ჩამაბარეს, უბრალოდ განაკაწრიც არ აჩნდა სადმე. უნდა გამოგიტყდეთ, ჩემი მანქანა ადამიანივით მიყვარდა. მძღავრი მოტორი ჰქონდა, ერთი სიტყვით, კარგი გამოშვება იყო. მართალია, ყოველთვის სავსე ტვირთს ვერ ვუდებდი, მაგრამ მოგეხსენებათ როგორი გზაა — ტიან-შანი—მსოფლიოს ერთ-ერთი ყველაზე მაღალმთიანი ავტოტრასაა, ხევეები, ქედები და უღელტეხილები. მთებში წყალი რამდენიც გინდა

იმდენია, მაგრამ მგზავრობისას მაინც თან მიგვაქვს. თქვენ ალბათ შეამჩნევდით ძარის წინა კუთხეზე მიმაგრებულ გადაჯვარედინებულ ხეს, მასზე წყლიანი კამერა ქანაობს ხოლმე. ეს იმიტომ, რომ სერპანტინზე მოტორი საშინლად ხურდება, და ფრთხილად უნდა იყო, რადიატორი არ აგიდუღდეს. ტვირთი არც ისე ბევრი მიგაქვს. პირველად სულ ვანგარიშობდი, თავს ვიმტვრევდი, ისეთი რამე მომეგონებინა, რომ რაც შეიძლება მეტი ტვირთი წამელო. მაგრამ არაფერი გამოვიდა. რას იზამ, მთები მაინც მთებად დარჩება.

სამუშაოთი კმაყოფილი ვიყავი. ავტობაზა ზედ ისიკ-ყულის ნაპირთან იყო. როცა უცხოელი ტურისტები ჩამოდიოდნენ და საათობით იდგნენ ტბის პირას მოხიბლულნი, მე გულში ვამაყობდი: „ხედავთ, როგორია ისიკ-ყული! სად ნახავს კიდევ ასეთ სილამაზეს კაცის თვალი“.

მხოლოდ ერთი რამ მწყინდა პირველ ხანებში: იღვა გაზაფხული, პირველი გაზაფხული სექტემბრის პლენუმის შემდეგ, როდესაც კოლმეურნეობებმა საფუძვლიანად მოჰკიდეს ხელი მშენებლობას. კარგად მუშაობდნენ, მაგრამ ტექნიკა არ ყოფნიდათ და ჩვენი ავტობაზის მანქანების ნაწილს მათ დასახმარებლად გზავნიდნენ. ახალბედებს ხომ მოსვენება არ ჰქონდათ, მათ შორის მეც. მოვემზადები რეისისათვის ტრასაზე, მომხსნიან და უნდა შევავლო აულებისაკენ. მესმოდა, რომ დიდი საჭირო საქმე კეთდებოდა, მაგრამ, რაც არ უნდა იყოს, შოფერი ვარ, მანქანა მენანებოდა, თითქოს მე თვითონ მიხდებოდა ოღროჩოღრო გზებზე ჯაყჯაყი და ტალახის ზელვა. გზები კი ისეთია — ღმერთმა დაგიფაროს — სიზმარშიც ვერ წარმოიდგენ.

მედივარ ერთხელ კოლმეურნეობაში. შიფერი მიმაქვს ახლადაშენებული ბოსლისათვის. აული მთისძირასაა და გზაც მთისძირა ტრამალს მიჰყვება. თითქოს ყველაფერი მშვიდობიანად დამთავრდა, საცაა მივალ და ზედ აულთან რაღაც არხში ჩავვარდი. გზა აქ მანქანებმა გაზაფხულის დაწყებიდან აჩიჯგნეს და აატალახეს; აქლემი რომ დაიხრჩოს, ვერ იპოვნი. ვეწვალე, ხან იქეთ ვქაჩე მანქანა, ხან აქეთ, არაფერი გამოვიდა: ჩაიფლო ლაფში და ველარ ამოდის. თანაც საჭე ისე მოვატრია-

ლე, რომ სადღაც რაღაც გაფუჭდა, მეტი რა გზაა, უნდა შეძვრე მანქანის ქვეშ. ვწევარ ტალახში ოფლად გაღვრილი და ვწყევლი, რაც შემიძლია, ამ გზას. მესმის ვიღაც მოდის. ქვემოდან მხოლოდ რეზინის ჩექმებს ვხედავ. მოვიდნენ ჩექმები, გაჩერდნენ ჩემს პირდაპირ და დგანან. ბოლმა მახრჩობს, რა არის საყურებელი, ცირკია თუ რა.

— გაიარე, — ვუყვირი მანქანის ქვემოდან, — რა სულთამხუთავივით დამდგომიხარ თავზე. ცალი თვალით კაბის კალთას ვამჩნევ, ძველს, მთლად ნაკელშია ამოსვრილი. ალბათ ვიღაც ბებრუხანაა, მიცდის, რომ აულამდე ავიყვანო.

— გაიარე, ბებია, — ვეხვეწები, — ბევრი წყალი ჩაივლის. ვიღრე ამას ჭავაკეთებ, დიდხანს მოგიწევს ცლა.

ის კი მპასუხობს:

— მე ბებია არა ვარ.

მეუბნება რაღაც გაუბედავად, ხმაში თითქოს სიცილიც მესმის.

— მაშ ვინ ხარ? — ვბრაზობ.

— ქალიშვილი

— ქალიშვილი? — ირიბად ვუყურებ ჩექმებს. ცოტა არ იყოს შემრცხვა ჩემი ყვირილისა და ახლა უკვე ხუმრობით ვეკითხები:

— ლამაზი ხარ?

ჩექმები ადგილზე ამოძრავდნენ, გადაადგილდნენ, ეტყობა წასასვლელად მოემზადნენ. ვიკადრე და გამოვძვერი მანქანის ქვემოდან. რას ვხედავ, დგას გამხდარი გოგონა, მკაცრად შექმუხვნილი წარბებით, წითელი თავსაფრით და მხრებზე მოსხმული დიდი, ალბათ მამისეული პიჯაკით. ხმას არ იღებს ისე მიყურებს. მე კი დამავიწყდა და ვზივარ მიწაზე, მთლად ამოთხუპნული ტალახსა და თინხაში.

არა გიშავს რა! ლამაზი ყოფილხარ! — ვიცინი და თავიდან ფეხებამდე ვათვალიერებ. მართლაც რომ ლამაზია! — აი, ტუფლები რომ გეცვას — ვხუმრობ და ვდგები.

გოგონამ ზურგი შემაქცია და უკანმოუხედავად, სწრაფად გაუდგა გზას.

რატომ? ვაითუ გაბრაზდა? ახლა უკვე აღარ მხეხმრება.

გამოვერკვიე და გავეკიდე, მინდა დავეწიო, შეძლეგ მივბრუნ-
დი მანქანასთან, შევაგროვე იარაღები, შევვარდი კაბინაში
და ნახტომებით — ხან წინ, ხან უკან, — მოვინდომე მანქანის
ამუშავება. მინდა დავეწიო — მეტზე არაფერზე ვფიქრობ.
მოტორი ღრიალებს, მანქანა ირყევა, მაგრამ არ იძვრის. ის კი
მიდის და მიდის, გვეშორდება. ვუყვირი, თვითონ არ ვიცი ვის.
მანქანის ბორბლებსქვეშ მობუხბუხე ტალახს.

— გამიშვი! გამიშვი, გუებნების გესმის?

მთელი ძალით ვაწვები აქსელერატორს, მანქანა თითქოს
კენესით მიფორთხავს და რალაც სასწაულით უცებ ამოდის
ლაფიდან. როგორ გამიხარდა! მივუშვი და მივუშვი მან-
ქანა გზაზე, ცხვირსახოციტ მოვიწმინდე სახიდან ტალახი, გავი-
სწორე თმები. გავუსწორდი ქალიშვილს, დავამუხრუჭე მანქანა
და, ეშმაკმა იცის, როგორ გამოვიდა ისე მოხერხებულად,
თითქმის საჯდომზე წამოწოლილმა, გავაღე კარი:

— გთხოვთ! — და ხელი მანერულად გავშალე.

გოგონა არ შეჩერებულა. „ესეც შენ!“ — მოვიფხანე კეფა.
ჩემი ვაჟკაცობიდან ნატამალიც აღარ დარჩენილა. ისევე წამო-
ვეწიე, ამჯერად მოვუბოდიშე და ვთხოვე:

— ნუ მიბრაზდებით! მე ისე უბრალოდ... დაბრძანდით!
მაგრამ გოგონას ხმა არ გაუცია.

მაშინ შუ გავუსწარი, მანქანა გზის გარდიგარდმო გავაჩერე,
გამოვედი კაბინიდან, მარჯვნიდან მოვუარე მანქანას, გავაღე
კარი და შევჩერდი ისე, რომ ხელი არ მომიშორებია კარისათ-
ვის. იგი მომიახლოვდა, დამფთხალმა შემომხედა, თითქოს ამ-
ბობდა, რას გადამეკიდა, ვინ არის ეს დამთხვეულიო. ხმას არ
ვიღებდი, რა უნდა მექნა, მორჩილად ვიცდიდი. არ ვიცი შე-
ვეცოდე, თუ ისე უბრალოდ, გადაიქნია თავი — არაფერი
უთქვამს, ჩაჯდა კაბინაში.

დავიძარით.

ხმას არ ვიღებდი, ვფიქრობდი როგორ დამეწყო საუბარი
გოგონებთან ლაპარაკს შეუჩვეველი არ ვიყავი, მაგრამ ახლა
რატომღაც მერიღებოდა. რატომ, საკითხავია? ვატრიალებ სა-
უკეს და თან შეფარვით ვუყურებ. კისერთან ნაზი ბუსუსები
რღნავ ემჩნევა. პიჯაკი მხრიდან ჩამოუვარდა; თვითონ კი

ჩემგან მოშორებით მიმჯდარა, ეშინია, არ შემეხოს. სერიოზულად იყურება, არადა ემჩნევა, ალერსიანია. სახე ნათელი აქვს, გახსნილი, შუბლის შექმუხვანა უნდა და არ გამოსდის მანაც გამოაპარა ჩემსკენ მხერა, ჩვენი თვალები ერთმანეთს შეეფეთა. გამიღიმა. გავბედე დალაპარაკება:

— კი მაგრამ, რატომ გაჩერდით იქ, მანქანასთან? — ვიკითხე რაც პირველად მომივიდა თავში.

— მინდოდა დაგმარებოდით.

— დამხმარებოდით? — გამეცინა. — იცით, რომ მართლა დამეხმარეთ. თქვენ რომ არა, ახლაც იქ ვიქნებოდით... თქვენ სულ ამ გზით დადიხართ?

— დიას. მე ფერმაში ვმუშაობ.

— კარგია! — გამიხარდა, მაგრამ იქვე გამოვასწორე — კარგი გზაა!

— სწორედ ამ წუთში მანქანა ისე შეინჯღრა, რომ მხრეებით დავეჯახეთ ერთმანეთს, შევეყვირე, გაეწითლდი და არ ვიცი საით წავიღო თვალები. მან კი გაიცინა, მაშინ მეც ველარ მოვითმინე და ხმამაღლა გადავიხარხარე.

— მე კი სულაც არ მინდოდა კოლმეურნეობაში წამოსვლა! — გამოვტყდი სიცილით. — მცოდნოდა გზაზე ასეთ თანაშემწეს შევხვდებოდი, დისპეტჩერს უმძრახ სიტყვას როგორ ვეტყვოდი... ეჰ, ილიას, ილიას! — გავკიცხე თავი. ილიასი — ეს მე ვარ — ავუხსენი ქალიშვილს.

— შე კი ასელი მქვია.

აულს ვუახლოვდებოდით. გზა გამოსწორდა. გაზს მოვუმატე. ქარი ფანჯრებს ეხეთქებოდა, თავსაფარს აძრობდა ასელს და თმებს უჩეჩავდა. ვლუმდით. მართლაც რომ კარგი იყო ასე ჯდომა. თურმე რა ადვილი, რა სასიხარულო ყოფილა მანქანის ტარება, თუკი გვერდით, ისე რომ შენი იდაყვი თითქმის იმისას ეხება, გიზის ადამიანი, რომელსაც ერთი საათის წინ არც კი იცნობდი, ახლა კი რატომღაც მხოლოდ მასზე გინდა იფიქრო... არ ვიცი რას ფიქრობდა ასელი, მისი თვალები კი ბრწყინავდნენ, ისინი ქარს უღიმოდნენ. შეიძლება მას უარი არ ეთქვა ევლო ასე დიდხანს, დაუსრულებლად, ისე რომ არასოდეს დაეშორებოდით ერთმანეთს. მე ვლაპარაკობ იმაზე რა-

ზეც მაშინ ვოცნებობდი. მანქანა უკვე აულის ქუჩაზე მიდიოდა უცებ ასელმა, თითქოს გამოერკვაო, შეშინებულმა მითხრა:

— გააჩერეთ, ჩამოვალ!

დავამუხრუჭე.

— რა, უკვე მოვედით? აქ ცხოვრობთ?

— არა, — იგი რატომღაც აღელდა, აწრიალდა— ასე სჯობს, აქ ჩამოვალ.

— კი მაგრამ რატომ, პირდაპირ სახლთან მიგიყვანთ! — მე მას საშუალება არ მივეცი რამე ეთქვა და გზა განვაგრძე.

— აი აქ, — მითხრა ბოლოს ასელმა. — გმადლობთ!

— როგორ გეკადრებათ, — წავიბურტყუნე და იმდენად ხუმრობით კი არა, რამდენადაც სერიოზულად დავუმატე — ხვალაც რომ ასე მომივიდეს, დამეხმარებით?

პასუხიც ვერ მოასწრო. ეზოს ჭიშკარი გაიღო და ქუჩაში, რალაციტ შეწუხებული, ხანში შესული ქალი გამოვარდა.

ასელ! — დაიყვირა მან, მერე ხმას დაუწია და პირზე ხელი აიფარა: — სად იყავი, გაგიწყრეს გამჩენი. ჩქარა გამოიცვალე. მაჭანკლები მოვიდნენ.

ასელი შეცბუნდა. პიჯაკი მხრებიდან ჩამოუცურდა, დაიჭირა და მორჩილად გაჰყვა დედას. ჭიშკართან შემობრუნდა, შემომხედა, მაგრამ კარი სწრაფად დაიხურა.

მხოლოდ ახლა შევნიშნე, იქვე ქუჩის პირას მიბმული შეკაზმული, გაოფლილი, ალბათ შორიდან მოსული ცხენები. საპქეს დავეყრდენი, წამოვიწიე, ყორეზე გადავიხედე. ეზოში კოცონთან ქალები ფუსფუსებდნენ. ბოლავდა დიდი სპილენძის სამოვარი. ორი კაცი ფარდულში ცხვარს ატყავებდა. მაჭანკლებს ყველა კანონის ზუსტი შესაბამისად ხვდებოდნენ. მე აქ უკვე აღარაფერი მესაქმებოდა. უნდა წავსულიყავი, ტვირთი დამეცალა.

დღის ბოლოს დავბრუნდი ავტობაზაში. მანქანა გავრეცხე და გარაჟში დავაყენე. დიდხანს არ წავსულვარ, მანქანას ჩავკირკიტებდი. ვერ გამეგო, რატომ მივიტანე ასე ახლოს გულთან დღევანდელი ამბავი. მთელი გზა თავს ვიმშვიდებდი. ვლანძღავდი: „კი მაგრამ, შენ რა გესაქმება, გიყი ხომ არა ხარ? ბოლოს და ბოლოს, ვინ არის ის შენი, საცოლე? და? დიდი

საქმე, შეგხვდა შემთხვევით გზაზე, მიიყვანე სახლამდე და უკვე ისე განიცდი თითქოს სიყვარული შეგეფიცოთ, იქნებ მას შენი გახსენებაც კი არ უნდა. რაში სჭირდები მას კანონიერი საქმრო ჰყავს, შენ კი ვინა ხარ! შემთხვევით გზად გაცნობილი შოფერი, შენისთანები ასობითაა, ყველას ვერც კი დაიმახსოვრებ... კაცმა რომ თქვას, რა უფლება გაქვს: ადამიანები ინიშნებიან, ქორწილიც ექნებათ, შენ რა შუაში ხარ. მიაფურთხე ყველაფერს. რა შენი საქმეა! ატრიალე შენთვის საჭე და ჩასთვალე, რომ ყველაფერი რიგზეა!...

მაგრამ უბედურება ის იყო, რომ როგორც არ ვარწმუნებდი თავს, იმ გოგოს დავიწყებაც არ შემეძლო.

მანქანასთან აღარაფერი საქმე მქონდა. წავსულიყავი საერთო საცხოვრებელში? ჩვენი საერთო საცხოვრებელი ხმაურია ნია, მხიარული. მაგრამ არა. მარტობა მინდოდა წამოვწეჭი მანქანის ფრთაზე, თავქვეშ ხელები ამოვიდე. იქვე, ჩემს გვერდით ჯანტაი უჩხიკინებდა მანქანას. აჟო ჩვენთან ასეთი შოფერი. მან ორმოდიან თავი ამოჰყო და დამცინავად ჩაიხითხითა:

— ეი, შენ, ლამაზო ჭიგიტო, რაზე ოცნებობ?

— ფულზე! — მივახალე.

მე იგი არ მიყვარდა. ძუნწიო, რომ იტყვიან, სწორედ ის იყო. ეშმაკი და შურიანი. საერთო საცხოვრებელში არ ცხოვრობდა. ვილაცასთან იდგა კერძო ბინაზე. ამბობდნენ, დიასახლისის ცოლად შერთვას დაჰპირდაო — სხვა რომ არაფერი, საკუთარი ბინა მექნებო.

ზურგი შევაქციე. ეზოში, იქვე ახლოს, სადაც მანქანებს ვრეცხავდით, ჩვენი ბიჭები ერთ ამბავში იყვნენ. ვილაც კაბინაზე ასულიყო, ბრანდსპოიტი ეჭირა ხელში და წუწავდა შოფრებს, რომლებიც თავის რიგს ელოდნენ. მთელ ავტობაზას აყრუებდა მათი ხარხარი. შლანგიდან მძლავრი ნაკადი ურტყამდა, თუ მოგვწოდებოდა, შეგატორტმანებდა. უნდოდათ ბიჭი კაბინიდან ჩამოეთრიათ, მას კი მიუშვია წყლის ნაკადი, თითქოს ხელში ავტომატი სჭეროდეს, ქუდი არავის შეარჩინა თავზე. უეცრად წყლის ნაკადი ზემოთ ავარდა და მზის სხივებზე ციხარტყელასავით აელვარდა. ვხედავ, ღვას კადიჩა—ჩვენი დისპეტჩერი. წყლის ნაკადი სწორედ მას აცდა. ასეთი არ გაიქცე-

ვა. კალიჩამ იცოდა თავისი ფასი, ისიც იცოდა რომ ბიჭებს მოსწონდათ. თავს ისე იჭერდა, რომ ადვილად რაიმეს ვერ შეებდავდი. და იგდა ახლად იღვა დაჯერებული, უშიშრად. თითქოს ამბობდა: — ვერ გაბედავთ, ამის ძალა არ შეგწევთ!

იღვა, ჩექმიანი ფეხი წინ წამოეწია, თმებს ისწორებდა, თმის სამაგრები კბილებით ეჭირა და სახე უცინოდა. წვრილი, ვერცხლისფერი შეხედები თავზე ეცემოდა, ბიჭები ხარხარებდნენ და აქეზებდნენ კაბინაზე შემდგარს:

— მიდი, დასცხე!

— მისცხე!

— ვინ მისცა შნო!

— ფრთხილად, კალიჩა!

ბიჭი ვერ ბედავდა, წყლის ნაკადს ათამაშებდა. მე რომ მის ადგილას ვყოფილიყავი, აუცილებლად თავიდან ფეხებამდე დავასველებდი, არც კალიჩა მეტყოდა რაიმეს, გაიცინებდა მხოლოდ. თავს არ ვიწონებ. ყოველთვის ვამჩნევდი, რომ იგი ისე არ მექცეოდა, როგორც სხვებს. ჩემთან იგი სულ სხვა ქალი იყო: დამყოლი, ოდნავ ჭირვეული. უყვარდა, როცა ხუმრობით შევაჯანჯლარებდი და თავზე ხელს გადავუსვამდი, მე მომწონდა, რომ იგი ხშირად მეჩხუბებოდა, ხანდახან მლანძღავდა კიდეც, მაგრამ ბოლოს მაინც მითმობდა, გინდაც მტყუანი ვყოფილიყავ. ხანდახან კინოში დამყავდა, სახლშიც მწვანელებდი ხოლმე, ჩვენსკენ ცხოვრობდა. სადისპეტჩეროში პირდაპირ, მოურიდებლად შევდიოდი, სხვებს ნებას არ აძლევდა, პატარა სარკმლიდან უნდა მიემართათ.

მაგრამ ახლა მისთვის არ მცხელოდა. ჟანდაბას მათი თავი, გაერთონ.

კალიჩამ უკანასკნელი სამაგრი დაიბნია თავზე:

— გეყოთ ლაზღანდარობა! — გასცა ბრძანება.

— მესმის, ამხანაგო დისპეტჩერო! — კაბინაზე მდგარმა ბიჭმა მხედრულად აუღო ხელი, მეტი ვერაფერი მოიფიქრა. იგი ხარხარით ჩამოათრიეს ქვევით.

კალიჩა კი გარაჟისაკენ წამოვიდა. ჟანტაის მანქანასთან გაჩერდა, ეტყობოდა, ვილაცას ეძებდა, მე უცებ ვერ შემნიშნა. ჩვენ ბაღე გვაშორებდა, რომელიც გარაჟის განყოფილებებს ყოფდა ერთმანეთისაგან. ჟანტაიმ ორმოლან თავი ამოყო:

— გამარჯობა, ლამაზო! — შეხშიანა მას.

— აა, ჯანტაი...

იგი ხარბად, უსირცხვილოდ უყურებდა მის ფეხებს. კადიჩამ უქმყოფილოდ აიჩეჩა მხრები.

— რა იყო, რას მომაშტერდი? — უთხრა და მსუბუქად წაჰკრა ჩექმის წვერი ნიკაპში.

სხვა მის ადგილზე გალანძლავდა კადიჩას, ან გაბრაზდებოდა, ეს კი ვითომც არაფერიყო. სახე გაუბრწყინდა, თითქოს აკოცესო და ისევ ორმოში ჩაჰყო თავი.

კადიჩა ძვიდესთან მოვიდა და დამინახა:

— ისვენებ, ილიას?

— ჰო, გეგონება ბუმბულზე ვიწვე!

იგი სახით მოეყრდნო ბადეს, დაკვირვებით დამაკვირდა და წყნარად მითხრა:

— შემოიარე სადისპეტჩეროში.

— კარგი, — ვუპასუხე.

კადიჩა წავიდა. მე წამოვდექი, წასასვლელად მოვემზადე. ჯანტაი ისევ ამოძვრა ორმოდან.

— კარგი დედაკაცია! — მითხრა და თვალი ჩამიკრა, თან ხელები მოიფშენიდა.

— პირს დაგწვავს!

იმედი მქონდა, რომ ის გაბრაზდებოდა, ჩხუბს დამიწყებდა. მართალია ჩხუბისმოყვარული არა ვარ, მაგრამ ახლა ისეთ ხასიათზე ვიყავი, არ ვიცოდი რა მექნა.

ჯანტაის არც უფიქრია გაბრაზება:

— არაფერია, ცხოვრება წინაა, ვნახოთ... წაიღუდლუნა მან.

სადისპეტჩეროში არავინ იყო. საღ ეშმაკშია, მიწამ ხომ არ ჩაყლაპა? ჩემს უკან კარები მიიხურა. მოვტრიალდი და კადიჩა შემრჩა პირისპირ. იგი კარებს მიყრდნობოდა, თავი უკან გადაეგდო, ხშირი წამწამები ვერ მალავდნენ მის ანთებულ თვალებს. ცხელი სუნთქვა სახეს მიწვავდა. ელოდა, რომ მოვეხვეოდი და ვაკოცებდი. თავი ვერ შევიკავე. გავიწიე, მაგრამ უცებ მოვეგე გონს. საოცარი იყო, მაგრამ იმ წუთს მომეჩვენა, რომ ამით ვულალატებდი მას, ჩემს ასელს. აზრადაც არ მომდიოდა, რომ ასეთი რამის გაფიქრებაც კი სასაცილო იყო.

— რისთვის დამიძახებ? — ვკითხე უკმაყოფილოდ.

კადიჩა ისევ ისე, მღუმარედ შემომცქეროდა.

— თქვი! — გავიმეორე, მოთმინება მელეოდა.

— არ იცი? — მითხრა, ხმაში წყენა ჩანდა: არც კი მიყურებ, თუ სხვა მოგივიდა თვალში?

დავიბენი. რატომ მსაყვედურობს? საიდან გაიგო?

ამ დროს სარკმლის საკეტი აჩხაკუნდა. ჭანტაიმ შემოჰყო თავი. დამცინავი ღიმილი უთამაშებდა მოჭუტულ თვალებში. გვითვალთვალებს! მას რომ სცოდნოდა, რა ცეცხლი მენტო გულში?

— გთხოვთ, ამხანაგო დისპეტჩერო! — გესლიანად გააბრტყელა მან და თან რაღაც ქალაღლი მიაწოდა კადიჩას.

კადიჩამ რისხვით შეხედა, ქალაღლი არ გამოართვა და გაჯავრებულმა მომახალა:

— კი მაგრამ საგზურს ვინ მიიღებს შენს მაგივრად? განსაკუთრებით უნდა მოგიპატიჟოთ?

ხელით გვერდზე გამწია და სწრაფად მივიდა მაგიდასთან.

— აჰა! — გამომიწოდა საგზური.

ავიღე. ხვალ ისევ იმავე კოლმეურნეობაში მიწევდა წასვლა.

სუნთქვა შემეკრა: სად წავიდე, როცა ვიცი, რომ ასელი... და საერთოდ, რატომ მაინც და მაინც მე დამარბენინებენ კოლმეურნეობებში?

აფეთქდი, აფყვირდი:

— ისევ კოლმეურნეობაში? ისევ ნაკელი და აგური ვათრიო? არ წავალ! — საგზური მაგიდაზე დავაგდე. — მეყო, რაც ტალახი ვზილე, ახლა სხვები გაგზავნონ!

— ნუ ყვირიხარ! შენ კოლმეურნეობაზე ერთი კვირითა ხარ მიმაგრებული! თუ საჭირო იქნება, კიდევ გაგზავნიან! — მომიჭრა კადიჩამ.

მაშინ მე მშვიდად და მტკიცედ ვთქვი:

— არ წავალ!

და როგორც ყოველთვის, კადიჩა მოულოდნელად დამთანხმდა:

— ძალიანაც კარგი. მოველაპარაკები ხელმძღვანელობას.

მაგიდიდან საგზური აიღო.


„მაშასადამე, არ წავალ, — გავიფიქრე მე — და ველარასოდეს ველარ ვნახავ ასელს?“ — უარესად გავხდი. რატომღაც უცებ გადავწყვიტე, რომ აუცილებლად უნდა წავსულიყავი იქნათლად ვიგრძენი, ასე რომ არ გამეკეთებინა, მთელი ჩემი ცხოვრება უნდა მენანა. „რაც არის არის, მაინც უნდა წავიდე!“

— კარგი, მომეცი! — გამოვგლიჯე საგზური.

ფანჯრიდან ჯანტაის ქირქილი მომესმა:

— აულში ბებიაჩემს გადაეცი მოკითხვა!

არაფერი მითქვამს. მოუხდებოდა კი კარგი სილა! კარები მივიჯახუნე და საერთო საცხოვრებლისაკენ გავწიე.



მეორე დღეს თვალები დამაწყდა გზაზე ცქერით. სად არის? გამოჩნდება ჩინარით ტანკენარი? ჩემი წითელთავაფრიანი ჩინარი! ველის ჩინარი! ალბათ, იტყვიო, რეზინის ჩექმებში და მამისეულ პიჯაკშიო! სისულელეა! მე ხომ ვიცი როგორცაა!

როგორ მომაჯადოვა? რითი ამიფორიაქა სული?

მივდივარ და აქეთ-იქით ვიხედები. არა, არსად ჩანს, ეს მგზავრობა კი არა წამებაა, სად არის, როგორ ვიპოვნო? მივედი აულამდე, ქუჩას გავყევი, მის სახლთან სვლა შევანელე. მერე სულაც შევაჩერე მანქანა. შეიძლება სახლშია? როგორ დავუძახო, დავუძახო და რა ვუთხრა? გამოდის, არ ყოფილა ჩემი ბედი, რომ კიდევ მომეკრა თვალი. მანქანა დავძარი. ტვირთს გადმოვცლი! მანქანა იცლება, მე კი სულ იმ იმედით ვარ, იქნებ უკან დაბრუნებისას შემხვდეს. არ შემხვდა. მაშინ ფერმისკენ გადავუხვიე. ძველი ფერმა აქვთ, მიყრუებულ ადგილას, სოფლიდან მოშორებით. მივედი, ერთ ქალიშვილს შევეკითხე. მეუბნება — არ არის, არ გამოსულა სამუშაოდო. „მაშასადამე, განგებ არ გამოვიდა, მე რომ არ შემხვედროდა“, — გავიფიქრე და ხასიათი გამიფუჭდა. დანალღლიანებული დავბრუნდი ავტობაზაში.

მეორე დღეს ისევ გზაში ვარ. მივდივარ და იმედი აღარ მაქვს რომ ვნახავ. კაცმა რომ თქვას, რა საქმე აქვს ჩემთან, ან

მე რა ხელი მაქვს დანიშნულ ქალიშვილთან? მაგრამ მაინც არ მჯერა, რომ ყველაფერი ასე უნდა დამთავრდეს, აულებში ჯერ კიდევ ხომ ნიშნავენ ისე, რომ ერთმანეთს სულაც არ იცნობენ. რამდენჯერ წამიკითხავს ამაზე გაზეთში. მერედა მე რა? ჩხუბის მერე ხელებს ვინ იქნევს, გაათხოვებენ—უკან დაბრუნება არც ისე ადვილია, მთელი ცხოვრება მოგეწამლება... აი, როგორი აზრები მიტრიალებს თავში...

გაზაფხული ეშხში იყო შესული. მთისძირები ტიტებს დაეფარა. ბავშვობიდანვე მიყვარს ეს ალისფერი ყვავილი. ფეხშიშველი დავირბენდი მთისძირებს, დავკრეფდი და მივართმევდი! სად გინდა, რომ ნახო?

და უცებ, ვუყურებ და თვალებს არ ვუჯერებ. ასელი! ზის გზის განაპირას, ქვაზე, სწორედ იმ ადგილას, სადაც მაშინ ჩემი მანქანა ჩაიფლა. თითქოს ვიღაცას უცდის. შეშინებული წამოხტა, დაიბნა, თავსაფარი თავიდან მოიგლიჯა, ხელში დაჭმუჭნა.. ამჯერად ლამაზი კაბა და ტუფლები ეცვა. ამხელა გზაა, ის კი ქუსლებზე შემდგარა. სასწრაფოდ დავამუხრუჭე, გული ყელში მაწვება.

— გამარჯობა, ასელ!

— გაგიმარჯოს! — მპასუხობს ხმადაბლა.

მინდა შევეშველო კაბინაში ჩაჯდომაში, ის კი შემობრუნდა და ნელა გზის გასწვრივ წავიდა. ე. ი. ჩაჯდომა არ უნდა მანქანა დავძარი, კარები გავაღე და გვერდზე გავყევი. ასე მივდიოდით: ის გზის განაპირას, მე კი საჭესთან. ვდუძდით. ვერ მომეფიქრებინა რა მეტქვა. შემდეგ მკითხა:

— გუშინ ფერმაში იყავით?

— კი, რა იყო?

— არაფერი, არ უნდა მისულიყავით.

— თქვენი ნახვა მინდოდა.

არაფერი მიპასუხა.

მე კი სულ იმ დაწყევლილ ნიშნობაზე ვფიქრობ. მინდა გავიგო როგორაა საქმე, ვკითხო — ენა არ მიბრუნდება. მეშინია. მისი პასუხის მეშინია.

ასელმა შემომხედა.

— მართლა დანიშნე?

თავი დამიქნია. ხელში საკე ამითამაშდა.

— ქორწილი როდისაა? — შევეკითხე.

— მალე, — მიპასუხა ხმადაბლა.

კინალამ არ იყო გავაქანე მანქანა საითაც თვალი მიმიწვდებოდა, მაგრამ სიჩქარის მაგიერ გამორთვის ქურო ჩავრთე. მოტორი აღრიალდა. ასელი გვერდზე გადახტა, მე ბოდიშიც არ მომიხდია. ამისი თავი არ მქონდა.

— გამოდის, რომ ერთმანეთს ველარ შევხვდებით? — ვეუბნები.

— არ ვიცი. სჯობს არ შევხვდეთ.

— მე კი, მე სულ ერთია... როგორც გინდათ, აუცილებლად მოგძებნით!

ჩვენ ისევ გაეჩუმდით. შეიძლება ერთსადამიანებზე ვფიქრობდით, ცალ-ცალკე კი მივდიოდით. თითქოს კედელი იდგა ჩვენს შუა და მე საშუალებას არ მაძლევდა მას მივახლოვებოდი, მაკი — ჩემს კაბინაში ჩამჯდარიყო.

— ასელ! — ვუთხარი მე — ნუ გამირბიხართ. ხელს არ შეგიშლით. შორიდან გიყურებთ მხოლოდ. ნებას მაძლევთ?

— არ ვიცი, შეიძლება...

— დაჯექით, ასელ.

— არა. წადით. აული სულ ახლოსაა.

ამის შემდეგ გზაზე ვხვდებოდით ხოლმე ერთმანეთს და ყოველთვის თითქოს შემთხვევით. მივდიოდით ისევ ისე: — ის გზის პირას, მე კი კაბინაში. გულზე ვსკდებოდნ, მაგრამ რას ვიზამდი, ძალას ხომ არ დავატანდი.

საქმროზე არ ვეკითხებოდი. უხერხულიც იყო და არც მინდოდა. მაგრამ მისი სიტყვებიდან გავიგე, რომ იგი თითქმის სულ არ იცნობდა მას. დედის მხრიდან შორეულ ნათესავად მოხვდებოდა, სატყეო მეურნეობაში ცხოვრობდა, სადღაც მთაში. ეს ოჯახები დიდი ხანია აწარმოებდნენ, თუ შეიძლება ასე ითქვას, ერთმანეთში ქალიშვილების გაცეკვას, ამით თაობიდან თაობაში აგრძელებდნენ ნათესაობას. ჩვენთან, როგორც მოგეხსენებათ, ნათესაობა დიდ პატივშია. ასელის მშობლებს აზრადაც კი არ გაუვლიათ იგი ვინმე სხვისათვის მიეთხოვებინათ. მითუმეტეს, ჩემზე კრინტის დაძვრაც არ შეიძლებოდა.

ვილაც გადამთიელი უთვისტომო შოფერი. ვერც მე გავბედავ-
დი ხმის ამოღებას.

ასელი იმ დღეებში ცოტას ლაპარაკობდა. განიცდიდა, სულ
ჩალაცაზე ფიქრობდა. მე უკვე იმედი გადაწურული მქონდა.
მისი ბედი წყდებოდა, შეხვედრებს არავითარი აზრი ჰქონდა.
მაგრამ ჩვენ ბავშვებივით ამაზე არაფერს ვამბობდით და ვხვდე-
ბოდით იმიტომ, რომ არ შეგვეძლო არ შეხვედრილიყავით.
ორივეს გვეჩვენებოდა, რომ უამისოდ სიცოცხლე არ შეგვეძ-
ლო, ხოლო იმაზე თუ რა მოგველოდა წინ, წარმოდგენაც კი
არ გვექონდა.

ამასობაში ხუთი დღე გავიდა. იმ დილით ავტობაზაში ვიყა-
ვი და რეისისათვის ვემზადებოდი. ამხანაგი მოვიდა და მითხ-
რა — სადისპეტჩეროში გიძახიანო. გავიქეცი.

— გაიხარე!—მხიარულად შემომეგება კადიჩა. — ტრასაზე
გადაგიყვანეს სინძიანში.

გავშეშდი. სინძიანში პირველად არ მიხდებოდა წასვლა. ეს
მოსალოდნელიც იყო, მაგრამ უკანასკნელ ხანებში მეგონა თი-
თქოს მთელი ჩემი სიცოცხლე კოლმეურნეობაში უნდა მევლო.

ჩინეთში რეისები რამდენიმე დღეს გრძელდება; ვინ იცის,
როდის მოვახერხებდი ასელის ნახვას? გავმქრალიყავი მოუ-
ლოდნელად და ის არ გამეფრთხილებინა?

— შენ თითქოს არც კი გიხარია? — შემნიშნა კადიჩამ.

— კი, მაგრამ კოლმეურნეობაში? — ავღელდი მე, — იქ სა-
მუშაოები ჯერ არ დაუმთავრებიათ.

კადიჩამ მხრები აიჩეჩა.

— შენ თვითონ გსურდა ასე!

— „საქმე გამოიკეთა!“ — გავიფიქრე და გავბრაზდი:

— მერე რა, რომ ადრე არ მსურდა!

დავჯექი სკამზე, ვზივარ და არ ვიცი რა ვქნა.

მოირბინა ჯანტაიმ. თურმე ჩემს მაგივრად მას აგზავნიდნენ
კოლმეურნეობაში. ყურები ვცქვიტე. ჯანტაი ალბათ უარს
იტყვის, სასოფლო გზებზე გამომუშავენა ნაკლებია. ეს კი იმას
ნიშნავს, რომ ცოტა ფულს მიიღებ. მაგრამ მან, ვერ გავიგე
რატომ, აიღო საგზური და კმაყოფილმა თქვა:

— სადაც გინდა იქ წავალ, კადიჩა, გინდა ქვეყნის დასალო-

ერსი აულში ახლა სწორედ ბატკნები იქნება, შეიძლება, გამოვიყოლიო კიდევ! შემდეგ მე შემნიშნა:

— ბოდიშს ვიხდი, ვგონებ ხელი შეგიშალეთ?

— გზას ეწიე! — წავისისინე მე, ისე რომ თავი არ ამიწევია.

— რაღას უზიხარ, ილიას? — მხარზე ხელი დამადო კადიჩამ.

— კოლმეურნეობაში უნდა წავიდე, გამიშვი, კადიჩა! — შევეხვეწე.

— ჭკუაზე ხარ? არ შემიძლია, განაწესი არა მაქვს! — მითხრა მან და შემფოთებით ჩამაშტერდა სახეში. — რა მოხდა, რა ძალიან გაგიტკბა იქით სიარული?

არათფერი მითქვამს. ხმისამოულებლად გამოვედი. მივედი გარაჟში. გვერდით ჭანტაის მანქანამ გაიარა, კინალამ ფრთა გამკრა, დამცინავად მიყურებდა კაბინიდან.

მანქანასთან ვჭახირობდი, არ ვჩქარობდი, მაგრამ გამოსავალი არ იყო, წავედი ტვირთის მისაღებად. დიდი რიგი არ იყო.

ბიჭებმა დამიძახეს, მე კაბინიდან თავი არ გამომიყვია. ვხუჭავ თვალებს და წარმოვიდგენ, როგორ ამაოდ მელოდებოდა გზაზე ასელი. მელოდება ერთ დღეს, მეორეს, მესამეს... რას იფიქრებს ჩემზე? იტყვის: შეეშინდა, გაიქცაო.

რიგი კი ახლოვდება. ჩემს წინა მანქანას უკვე ტვირთავენ. ამწე ძარაში უშვებს რაღაც უშველებელ ყუთებს. ერთი წუთის შემდეგ მე დავაყენებ ამწის ქვეშ მანქანას. „მაპატიე, ასელ! — გავიფიქრე. — მაპატიე, ჩემო ველის ჩინარო, ვერ მოვასწარი. შენი გაფრთხილება!“ მაგრამ უცებ თავში სხვა აზრმა გამიელვა: მოვასწარებდი მასთან წასვლას, გაფრთხილებას და უკან დაბრუნებასაც. რა მოხდა, რამოდენიმე საათით გვიან წავალ რეისში? შემდეგ ავუხსნი ავტობაზის უფროსს, გაიგებს ხომ კარგი, ვერა და შემახურებს. დიდი-დიდი საყვედური გამომიცხადოს, ბოლოსდაბოლოს მომხსნის სამსახურიდან — მეტი რა იქნება. დროზე მომეფიქრებინა! უნდა წავიდე.

უცებ ავამუშავე მოტორი, რომ მანქანა უკან დამეწია. მაგრამ უკნიდან მანქანები ზედ არიან მომდგარი. ამ დროს წინა მანქანაც წავიდა. ჩემი რიგია. მე შევაყოვნე.

— ეი, ჩქარა, რას შევები, დადექი!—მიყვირის ამწის მემანქანე.

წინ წავწიე მანქანა. ამწის ისარი მანქანის ძარას გაუსწორდა. ყველაფერი დამთავრდა. საექსპორტო ტვირთით ვერსადაც ვერ წახვალ. რატომ დროზე არ მოვიფიქრე? მოვიდა გამგზავნი, დოკუმენტები შეამოწმა. მე უკანა ფანჯარაში გავიხედე, ძარის თავზე ნელა, ქანაობით ეშვებოდა კონტეინერი. სულ უფრო და უფრო ახლოვდებოდა.

— მაშინ კი დავიყვირე:

— ფრთხილად! — და კონტეინერის ქვეშიდან ადგილიდან მოვწყვიტე მანქანა. მობრთული გამორთული არ მქონდა. უკან ყვირილი, სტვენა და გინება გაისმა. ჩემთვის სულ ერთი იყო! მანქანას საწყობების, ხე-ტყის შტაბელებისა და ქვანახშირის გროვების გვერდით მივაქროლებდი. მიხვეულ-მოხვეული გზებით გავიქროლე ახალშენი, მთებისაკენ გავედი უდაბურ გზაზე, საჭეს მივაკვდი, იფიქრებდი მიწა მოძრაობსო — მანქანას ხან აქეთ მიაგდებდა, ხან იქეთ. ეს სულ არ მაღარდებდა, შეუჩვეველი ხომ არ ვიყავი!

ჩქარა ჯანტაის წამოვეწიე. გასწრება მინდოდა, სიგნალი მივეცი. მან უკმაყოფილოდ გადმოიხედა კაბინიდან და თვალები კინალამ გუგებიდან გადმოუცვივდა — მიცნო. კაცი რომ ბოროტი იქნება. ხელავს ვილაცა ჩქარობს, ე. ი. გზა უნდა დაუთმო. ის კი, გადაწყვიტა გავეწვავლებინე, გზას არ მაძლევს. მაშინ მე გზიდან გადავედი და პირდაპირ მინდორ-მინდორ გავაქროლე მანქანა გადასასწვებად. ჯანტაიც დააწვა. ახლა საშუალებას არ მაძლევს გზაზე ამოვიდე. იცის, ანლომახლო კაციშვილი არაა, რომ პასუხი მოთხოვოს მოძრაობის წესების დარღვევისათვის; იცის, რომ ვერც მე მივწვდები. ასე მივქროდით: ის გზაზე, მე კი მინდორში, საჭეზე დახრილები, ნადირებივით ვუბრიალებთ ერთმანეთს თვალებს და ვილანძლებით.

— საით? რისთვის? — მიყვირის.

მუშტს ვუქნევ, ვემუქრები. ჩემი მანქანა ცარიელი იყო და, რა თქმა უნდა, გავუსწარი. მოვიხედე: ახლა უკვე აღარ ჩქარობს, მოდის წყნარად. ჰირსაც წაუღია, ვინ აჩქარებს.

ასელს ვერსად შევხვდი. შევედი აულში და მანქანა მის

ეზოსთან გავაჩერე. 'ვქშინავდი, თითქოს ფეხით მერბინოს. ძლივს მოვითქვე სული. არც ეზოში, არც ქუჩაში არავინ არ ჩანს. მხოლოდ შეკაზმული ცხენია იქვე მიბმული. რა უნდა ვქნა. გადავწყვიტე მოვიცადო, ვფიქრობ მანქანას დაინახავს და გამოვა ქუჩაში. მოტორს ვუჩხიკინებ, ვითომ რამეს ვაკეთებ. ცალი თვალი ჭიშკრისაკენ მაქვს. დიდხანს არ დამჭირდა ცდა. ჭიშკარი გაიღო, გამოვიდნენ დედამისი და ვილაც შავწვერა ძორძონი მოხუცი, ორი დაბამბული ხალათი მოუსხამს, ქვედა პლუშისა, ზედა კი ველვეტისა, ხელში მშვენიერი მათრახი უჭირავს. ჭარხალივით გაწითლებულა — ეტყობა, ეს-ეს არის ჩაის სვამდა. ცხენთან მივიდნენ. ასელის დედამ პატივისცემის ნიშნად უზანგი დაუჭირა, მოხუცს დაეხმარა უნაგირზე წამოყუდებულებიყო. გამოირკვა, რომ მაქანკალს აცილებდა.

— ძალიან კმაყოფილი ვართ თქვენით! — უთხრა მან. — ჩვენი იმედიც გქონდეთ. ქალიშვილისათვის არაფერს დავინანებთ. ღვთის მადლით, არც ჩვენ ვართ ხელცარიელები.

— ეე, ბაიბიჩე, ნაწყენი არ დაგრჩებით, — უპასუხა მოხუცმა და თან მოხერხებულად ჩაჯდა უნაგირში, — ღმერთმა ჯანმრთელობა არ მოაკლოს ახალგაზრდებს. რაც შეეხება ქონებას, სხვისთვის ხომ არ გვინდა, ჩვენი ბავშვებისათვის. პირველად ხომ არ ვუნათესავდებით ერთმანეთს, კარგად იყავი, ბაიბიჩე, მაშ ასე, გადაწყვეტილია — პარასკევს!

— აუცილებლად, პარასკევს გელით, წმიდა დღეა. ბედნიერი მგზავრობა. მძახლები მომიკითხე.

„რომელ პარასკევზე ლაპარაკობენ? — ვფიქრობ. — რა დღეა დღეს? ოთხშაბათი... ნუთუ პარასკევს წაიყვანენ? ეჰ, სადამდი უნდა გვიფუჭებდნენ ცხოვრებას ეს ძველი ადათები“.

მოხუცმა მთებისაკენ წააძუნძულა ცხენი. ასელის დედამ დაიცადა, სანამ ის საკმაოდ არ მოგვშორდა, მერე მომიბრუნდა და მტრულად შემათვალიერა:

— შენ რალაც ძალიან შემოგვეჩვიე! — მითხრა მან. — ქარვასლა ხომ არ გგონია. შენ აქ არაფერი გესაქმება! — წადი, გესმის? შენ გელაპარაკები!

მაშასადამე, უკვე შემამჩნია.

— მანქანა გამიფუქდა! — ჯიუტად ჩავიბუზღუნე და ახლა

უკვე წელამდე ჩავძვერი კაპოტში. არა, — ვფიქრობ, — არსა-
დაც არ წავალ, სანამ ასელს არ ვნახავ.

ქალმა იბუზღუნა და წავიდა.

მოტორს თავი მივანებე. საფეხურზე ჩამოვჯექი. პაპიროსს
მოვუყიდე. საიდანღაც პატარა გოგონამ მოირბინა. ასკინკილა.
თი შემოუარა მანქანას. ასელს ჩამოგავს, ნეტავ მისი და ხომ
არაა?

— ასელი წავიდა, — მეუბნება, თვითონ კი დახტის.

— სად? — დავიჭირე გოგონა. — სად წავიდა?

— მე რა ვიცი! გამიშვი! — გამიძვრა ხელიდან და გამო-
თხოვების ნიშნად ენაც გამომიყო.

კაპოტს თავი დავახურე, საქვს მივუჯექი. საით წავიდე, სად
ვეძებო? არადა დროა დავბრუნდე. მანქანა მოვატრიალე,
მოვჩოჩავ გზაზე, ტრამალში გავედი. გავაჩერე არხზე გადასასვ-
ლელთან. რა უნდა ვქნა, წარმოდგენა არა მაქვს. კაბინიდან
გაღმოვედი, მიწაზე გავგორდი. საზიზღარ ხასიათზე ვარ. ასე-
ლი ვერ ვნახე, რეისიც ჩავაგდე. დაბრუნება გვიანაა. სულერ-
თია ერთხელ მეტად ხომ ვერ დამსჯიან. რაც იქნება იქნება.
ჩავფიქრდი, ვერც ვერაფერს ვხედავ და არც არაფერი მესმის.
რამდენ ხანს ვიწევი ასე არ მახსოვს. ალბათ, დიდხანს, შემდეგ
თავი ავწიე, რატომ, აქამდე ვერ ამიხსნია. ვხედავ მეორე მხრი-
დან მანქანასთან ქალიშვილის ფეხები შეჩერდა მაღალქუს-
ლიანი ტუფლებით. ის არის, უცებ ვიცანი. ისე გამეხარდა,
მუხლებზე წამოვიწიე, ადგომას ველარ ვახერხებ. და ყველაფე-
რი ეს, ისევ იმ ადგილზე ხდება, სადაც პირველად შევხვდით
ერთმანეთს.

— გაიარე, გაიარე, ბებია! — ვეუბნები „ტუფლებს“, თან
მანქანის ქვეშიდან ვიყურები.

— მე ბებია არა ვარ! — ამიბა მხარი ასელმა.

— მან ვინა ხარ?

— ქალიშვილი!

— ქალიშვილი? ლამაზი?

— შენც ადექი და შემომხედე.

ორივემ ერთად გავიცინეთ. წამოვხტი და მისკენ გავიქეცი,

ის კი ჩემსკენ. შევჩერდით ერთმანეთის პირისპირ. ბედნიერებისაგან ბავშვებივით ვიციინით.

— ყველაზე ლამაზი ხარ! — ვეუბნები. ის კი დგას, როგორც ნორჩი ჩინარი ქარში, აშოლტილი, მოქნილი, მოკლე სახელოებიანი კაბა აცვია, ხელში ორი წიგნი უჭირავს.

— რა იცოდი, რომ აქ ვიყავი?

— ბიბლიოთეკიდან მოვდიოდი, ვხედავ, გზაზე შენი მანქანის ნაკვალევია.

— რას ამბობ? — ჩემთვის ეს უფრო მეტს ნიშნავდა, ვიდრე სიტყვა „მიყვარხარ“. გამოდის, რომ ეს ჩემზე ფიქრობდა და მე მისთვის ძვირფასი ვარ, — თუ ჩემი მანქანის ნაკვალევსაც არ ჩევს. მარცხენა უკანა ბორბალზე ორი ერთმანეთისაგან განსხვავებული საბურავი მქონდა წამოგებული.

— აქეთ გამოვიქეცი, რატომღაც ვიფიქრე, აქ იქნებოდი. შე ხელზე მოვკიდე ხელი.

— დაჯექი, ასელ, გავისეირნოთ.

იგი სიამოვნებით დამთანხმდა. მე მას ვერ ვცნობდი. ვერც ჩემს თავს ვცნობდი. ყველა ფიქრი და მწუხარება თითქოს საღდაც გაქრა. ვიყავით მხოლოდ ჩვენ, ჩვენი ბედნიერება, ცა და გზა. გვალე კაბინის კარები, დავსვი ასელი და თვითონ საქვს მივუჭექე.

ჩვენ მივდიოდით. უბრალოდ მივყვებოდით გზას. არ ვიცოდით საით, რისთვის. მაგრამ ამას ჩვენთვის არც ჰქონდა მნიშვნელობა. ბედნიერები ვიყავით იმით, რომ ერთმანეთის გვერდით ვისხედით, თვალი თვალს ხვდებოდა და ხელი ხელს. ასელმა გამისწორა ჯარისკაცური ქუდი. (მე მას ორი წელი ვატარებდი).

— ასე უფრო გიხდება! — მითხრა და ალერსიანად მომეკრა მხარზე.

მანქანა ჩიტივით მიჰქროდა ტრამალზე. მთელი სამყარო ამოძრავებულყო. ჩვენს შესახვედრად მორბოდნენ მთები, ველები, ხეები... ქარი სახეში გვცემდა — ჩვენ ხომ წინ მივდიოდით, მზე იმიტომ ანათებდა ცაზე, რომ ჩვენ ვიციინოდით, ჰაერში აბზინდისა და ტიტების სურნელი იმიტომ იდგა, რომ ჩვენ გაშლილი მკერდით ვსუნთქავდით...

ტრამალის ძერა, განმარტოებულ კუნბეზის¹ ნანგრევებზე რომ იჭდა, წამოფრინდა, ფრთები გაშალა და გზას გაჰყვა ფრენით, თითქოს გვეჯიბრებო.

ორი მხედარი შეშინებული გვერდზე გახტა. შემდეგ კი საშინელი ღრიალით გამოგვეკიდა:

ეი-ი, გაჩერდი! — მათრახს სცემდნენ ისედაც ისარივით მოწყვეტილ ცხენებს. ვინ იყვნენ, არ ვიცი. შეიძლება ასეღს აულიდან იყო ვინმე. ჩვენ ისინი სწრაფად მოვიტოვეთ უკან, გზაზე წამომდგარი მტერის ღრუბლებში.

წინ მიმავალმა ორთვალამ გზიდან გადაუხვია. ქალ-ვაჟი წამოდგა. ჩვენ რომ დაგვინახეს, ერთმანეთს გადაეხვივნენ და მისალმების ნიშნად ხელი დაგვიქნიეს.

— გმადლობთ! — დავუყვირე მათ კაბინიდან.

ტრამალი დამთავრდა, შარაგზაზე გამოვედით, ბორბლების ქვეშ ასფალტი ახმაურდა.

გზას ტბისაკენ მივყავდით. გზიდან გადაუხვებე და პირდაპირ ყამირზე ბუჩქებსა და ბალახებზე შევაგდე მანქანა, მივაქროლებდი ნაპირისაკენ. ბორცვთან გავაჩერე, ზედ ნაპირზე.

ო, ისიკ-ყული, ყირგიზეთის მიწის მარადიული სიმღერა. განა შეძლება არ დაიჯერო, რომ ეს ტბა მიჯნურთა ლეგენდებმა და სიმღერებმა შექმნეს. იგი ამ წუთში ლაევარდს ეჯიბრებოდა თავისი სიკამკამითა და ფერადოვნებით.

მოლურჯო-თეთრი ტალღები თითქოს ხელიხელჩაკიდებულნი აწყდებოდნენ ყვითელ ნაპირებს. მზე მთებს იქით ჩადიოდა და შორს წყალი ვარდისფერი გეგონებოდა. მეორე მხარეს, ისიკ სადღაც შორს იასამნისფრად იხედებოდა თოვლიანი მთების გრეხილი და ტყვიისფერი ღრუბლები იყრიდნენ თავს მათ მწვერვალებზე.

— ასელ, შეხედე! გედები! — ვიყვირე მე. გედები ისიკ-ყულიზე მხოლოდ შემოდგომობით იცის, ისინი აქ იზამთრებენ. იშვიათად თუ მოხედებიან გაზაფხულზე. ამბობენ, ესენი სამხ-

¹ კუნბეზი — საფლავის ქვა

რეთის გედებიაო, რომლებიც ჩრდილოეთისაკენ მიფრინავენ. იმასაც ამბობენ, რომ მათ ბედნიერება მოაქვთო...

თეთრი გედების გუნდი სალამოს ტბის სარკვეზე დასრიალებდა, ფრინველები ხან ზევით აიჭრებოდნენ, ხან კი ფრთებგაშლილნი დაბლა ეშვებოდნენ. წყალზე ჯდებოდნენ, ხმაურით ფანტავდნენ აქაფებულ წყლის შხეფებს და ისევ აფრინდებოდნენ. შემდეგ მწკრივად დაეწყვნენ, ერთად გაშალეს ფრთები და ყურესთან მდებარე ქვიშიანი ფერდობისაკენ გასწიეს ღამის გასათევად.

ჩვენ კაბინაში ვიჯექით და მღუმარედ გავცქეროდით ტბას. და შემდეგ, მე ვთქვი, ისე თითქოს უკვე ყველაფერი გადაგვეწყვიტოს.

— ხედავ სახურავებს, ნაპირზე, აი იქ, ჩვენი ავტობაზაა. ეს კი — ხელით ვანიშნე კაბინაზე — ეს ჩვენი სახლია — ვთქვი და გავიციინე. მეტი გზა არ მქონდა, არ მეგულებოდა ადგილი, სადაც მისი წაყვანა შემეძლო.

ასეღმა თვალეში შემომხედა, მკერდზე მომეკრა, ხელები მომხვია, თან ტირის, თან იცინის:

ჩემო ძვირფასო, საყვარელო! — არ მინდა არც სახლი, არც კარი! ოღონდ დედამ და მამამ, შემდეგ, როცა იქნება, გამიგონ და მაპატიონ. ეწყინებათ მათ. მომიძულებენ სამუდამოდ, ვიცი... მაგრამ განა დამნაშავე ვარ?

სწრაფად ბნელდებოდა. ცაზე ღრუბლები გაიშალნენ და ტბაზე ჩამოწვნენ. ტბა გაირინდა, გაშავდა. იფიქრებდი მთებში ელექტროშემდუღებელი ჩამქდარაო, ხან აქ იელვებს, თვალს მომჭრის და ჩაქრება, ხან იქ. ქექა-ქუხილი ახლოვდებოდა; ტყუილად კი არ შემოუხვიეს აქეთ გედებმა. წინასწარ იგრძნეს, რომ ავდარს მათთვის შეეძლო მათათა მწვერვალეზე მოესწრო.

დაიქუხა. წამოვიდა შხაპუნა წვიმა. აბუტბუტდა, ათუხთუხდა ტბა და გაბრაზებული მიაწყდა ნაპირებს. ეს გაზაფხულის პირველი ქექა-ქუხილი იყო.

ეს იყო ჩვენი პირველი ღამე. კაბინის შუშებზე წყალი ნაკადულებად ჩამოდიოდა. ტბის შავ უკუნეთ ზედაპირს ეხეთქებოდა ელვის მოთამაშე სხივები. ჩვენ კი ჩავეკართ ერთმანეთს და ვჩურჩულდით, ვგრძნობდი, რომ ასელი ცოტათი შეში-

ნებული იყო, ან სიცივეს აეტანა. ჩემი პიჯაკი მოვახურე და უფრო მაგრად მივიკარი მკერდზე, თავი წარმოვიდგინე ძლიერ, ღილ ადამიანად. არ ვიცოდი თუ ამდენი ალერსი შემეძლო, არც ის ვიცოდი, რომ ასე კარგია ზრუნავდე ვინმეზე, უფროსილდებოდე. ყურში ჩავჩურჩულე: „არასდროს არავის არ მივცემ უფლებას რამე გაწყენინოს შენ, ჩემო წითელთავსაფრიანო ჩინარო!“

მალე გამოიღარა. მაგრამ აბობოქრებული ტბა კიდეც დიდხანს ახმაურებდა ტალღებს, ისევ უინეულავდა.

კაბინის ნიშიდან პატარა ტურისტული რადიომიმღები ამოვიღე — მთელი ჩემი ქონება იმხანად. მიყვარს მუსიკა, ამიტომ მიმღები მუდამ თან დამქონდა. ჩავრთე, ტალღაზე დავაყენე. ახლა ასე მაგონდება, იმ დამეს გადმოსცემდნენ ბალეტ „ჩოლპონს“, ტრანსლაცია იყო თეატრიდან. მთებისა და ქედების იქიდან კაბინაში შემოიჭრა მუსიკა, ნაზი და ძლიერი, როგორც სიყვარული, და რაზეც ეს ბალეტი მოგვითხრობდა. დარბაზი ქუხდა, ტაშს უყრავდნენ, ყვიროდნენ შემსრულებელთა გვარებს, შეიძლება ყვავილთა თაიგულებსაც ჰყრიდნენ ბალერინების ფერხით, მაგრამ, მე ვფიქრობ, არავის თეატრში მჯდომთაგან არ განუცდია იმდენი აღფრთოვანება და მღელვარება, რამდენიც ჩვენ — კოკისპირულ წვიმაში, აბობოქრებულ ტბის ნაპირთან კაბინაში მჯდომთ. ეს იყო ჩვენი ბალეტი, ჩვენი ერთად ცხოვრების პირველ დამეს. ჩვენ მხურვალედ განვიცდიდით ბედს იმ გოგონასას, რომელსაც ჩოლპონი ერქვა, და რომელიც თავისი ბედნიერების საძებნელად წავიდა. ჩემი ჩოლპონი, ჩემი ცისკრის ვარსკვლავი ჩემთან იყო. შუალამისას მას ჩემს მხარზე ჩაეძინა. მე კი დიდხანს ვერ დავმშვიდდი, ვეალერსებოდი ასელს და ვუსმენდი, როგორ ოხრავდა და ბუტბუტებდა მოუსვენარი ისიკ-ყული.

ღილით ავტობაზაში ვიყავით. მაგრად შემახურეს. მაგრამ ასეთი ამბის გამო, მაპატიეს. შემდეგშიც დიდხანს იცინოდნენ, როცა იგონებდნენ როგორ გავრბოდი მე ჩემი მანქანით.

ჩინეთში მიწვევდა წასვლა. ასელიც თან წავიყვანე, ვფიქრობდი გზაზე დავტოვებდი ჩემს მეგობარ ალიბეკ ჯანტურინთან. იგი ოჯახით საუღელტეხილო ბაზაზე, წარინის მახლობლად

ცხოვრობდა. ეს არც ისე შორსაა საზღვრიდან. მიყვარდა ხოლმე მათთან გავლა. ალიბეკის ცოლი კარგი ქალია და მას პატივს ვცემდი.

წავედით. პირველ რიგში ასელისათვის გზისპირა მაღაზიაში ტანსაცმელი ვიყიდეთ. მას ხომ თან ერთადერთი კაბა და ბიბლიოთეკის ორი წიგნი გამოჰყვა. სხვათაშორის, ვიყიდეთ ფერადი თავსაფარი და სწორადაც მოვიქეციეთ. პირველი ვინც გზაზე შეგვხვდა იყო ხანში შესული შოფერი, ჩვენი აქსაკალი ურმატაყე. მან ჭერ კიდევ შორიდან გვანიშნა შეეჩერებულებოდა. დავამუხრუჭეთ. კაბინებიდან გადმოვედით და ერთმანეთს მივესალმეთ:

— ასალოუ-მაღეიკუმ, ურმატაყე!

— ალეკიმ-ასალამ, ილიას! — მტკიცე იყოს საბელი იმ მიმინოსი, რომელიც შენს ხელზე დაჯდა! — მომილოცა მან წესის მიხედვით. ღმერთმა მოგცეთ ბედნიერება და ბავშვები!

— გმადლობთ როგორ გაიგეთ, ურმატაყე? — გამიკვირდა მე.

— ე-ე, ჩემო შვილო, კარგ ამბავს ფრთები აქვს, მთელ ტრასაზე გადასცემენ ერთმანეთს...

— აი, როგორ ყოფილა საქმე! — კიდევ უფრო გამიკვირდა მე.

ვდგავართ გზაზე და ვსაუბრობთ, ურმატაყე მანქანასთან არ მიდის, არც კი უყურებს ასელს. კიდევ კარგი ასელმა მოიფიქრა: თავსაფარი მოიხვია, სახე დაიფარა. მაშინ ურმატაყემ კმაყოფილებით გაიღიმა:

— ახლა ყველაფერი რიგზეა! — თქვა და კაბინასთან მივიდა, ასელს შეხედა. — გმადლობთ, შვილო, პატივისცემისათვის. ამიერიდან შენ ჩვენი რძალი ხარ, ავტობაზის ყველა აქსაკალის რძალი. ისინი კიდევ შეგხვდებიან გზაზე. აილე ილიას, პატარძალს მუქთად არ უყურებენ — მითხრა და ფული მომაწოდა. უარი ვერ ვუთხარი, ეწყინებოდა.

ჩვენ დავშორდით. ასელი თავსაფარს არ იშორებდა, როგორც ეს პატარძლის რიგია ნამდვილ ყირგიზულ სახლში, მორცხვად იფარავდა ხოლმე სახეს უცხოებთან შეხვედრისას.

როცა მარტონი ვრჩებოდით, ვიცინოდით. თავსაფარში ქე-
სელი კიდევ უფრო ლამაზი მეჩვენებოდა.

ავტობაზის რძალო, ასწიე თვალები, შემომხედე და მაკო-
ცე! — ვეუბნებოდი მე.

— არ შეიძლება, აქსაკალები დაგვინახავენ, — პასუხს მაძ-
ლევდა იგი და უკვე სიცილით, ვითომც მალულად მკოცნიდა.

რაც უფრო შორს მივდიოდით, გზა უფრო საინტერესო
ხდებოდა. ავტობაზის ყველა შოფერი ჩვენთან შეხვედრისას
მანქანას აჩერებდა, გვილოცავდა. ბევრ მათგანს ჩვენს მოსართ-
მევად ყვავილების დაკრეფაც მოესწრო გზაზე და საჩუქრებიც
ეშოვნათ. არ ვიცი ვის მოუვიდა თავში პირველად ეს იდეა.
აღბათ, ადგილობრივ ჩვენ რუს ბიჭებს. ისინი ქორწილის დროს
მანქანებს რთავენ. და აი ჰკიდებდნენ ჩვენს მანქანაზე წითელ,
ცისფერ, მწვანე ბაბთებს, აბრეშუმის თავსაფრებს, ყვავილთა
თაიგულებს. აჭრელდა, ნაირფერებით მოირთო ჩვენი მანქანა.
ისე რომ აღბათ ათობით კილომეტრზე შეამჩნევდით. მე და
ასელი ბედნიერები ვიყავით. გულში ვამაყობდი ჩემი მეგობ-
რებით. ამბობენ, რომ მეგობარს ჭირში გამოიცნობო, ჩემის
აზრით კი ლხინშიც.

გზაზე შემოგვხვდა ალიბეკ ჯანტურინიცი, ჩემი ყველაზე
უახლოესი მეგობარი. იგი ჩემზე ორი წლით უფროსია. ჯმუხი,
დიდთავა. ჭკვიანი ბიჭია, სერიოზული და კარგი შოფერიცაა.
ბაზაში დიდ პარტივს სცემდნენ, პროფკომად აირჩიეს. ვფიქრობ,
ნეტავ რას მეტყვის-მეთქი.

ალიბეკმა უხმოდ შეხედა ჩვენს მანქანას და თავი გადაიქ-
ნია, შემდეგ ასელთან მივიდა, მიესალმა, ხელი ჩამოართვა და
მიულოცა.

— აბა, მომეცი შენი საგზური! — მოითხოვა მან. მე არ
მოველოდი ასეთ შეხვედრას. ვერაფერი გამეგო, საგზური ამო-
ვიღე და მივეცი. მან ავტოკალამი აიღო და დიდი ასობით
მთელ საგზურზე დიაგონალურად დააწერა: „საქორწინო რეისი,
№ 167“ — საგზურის ნომერი.

რას შევები? — დავიბენი მე, — ეს ხომ საბუთია.

— საჭიროა ისტორიისათვის! — გაიცინა მან. — შენ რო-
გორ გგონია, ბუხჰალტერიაში ხალხი არ ზის? აბა, ახლა მომე-

ცი ხელი! — მაგრად მომეხვია, მაკოცა. აეხარხარდით. შემდეგ წავედით ჩვენ-ჩვენი მანქანებისაკენ, მაგრამ ალიბეკმა შემაჩერა:

— ცხოვრებას სად აპირებთ?

მე ხელეები გავშალე.

— აი, ჩვენი სახლი! — ვუჩვენე მანქანაზე.

— კაბინაში? იქნებ ბავშვებსაც მანდვე გაზრდით? აი რა, ჩასახლდით ჩვენს ბინაში უღელტეხილზე, ბაზაში უფროსებს მე მოველაპარაკები, ჩვენ კი ჩვენს სახლში გადავალთ.

— კი, მაგრამ დაუმთავრებელი რომაა? — ალიბეკი რიბა-ჩიეში იშენებდა სახლს, ავტობაზის მახლობლად. თავისუფალ დროს მეც მივდიოდი და ვეხმარებოდი ხოლმე.

— არაფერია! იქ რალა დარჩა გასაკეთებელი. მეტის იმედი კი ნუ გექნება, თვითონ იცი, ჯერ ბინები გვიჭირს.

— დიდი მადლობა! ჩვენ მეტი არც გვჭირდება.

— ერთი სიტყვით, ჩვენთან გაჩერდით, უკან რომ დაბრუნდები, დამიცადე. მოგისწრებ, იქვე გადავწყვეტთ ყველაფერს, ცოლებთან ერთად! — მან ასეღზე მანიშნა.

ღიახ, ახლა — ცოლებთან ერთად!

— ბედნიერი საქორწინო მოგზაურობა! — მოგვამახა ალიბეკმა.

— დალახვროს ეშმაკმა! ჩვენ ვერც კი მოვიფიქრეთ, რომ ეს ჩვენი საქორწინო მოგზაურობაა! და მერე როგორი!

ძალიან გვიხაროდა, რომ ყველაფერი კარგად მოეწყო; მხოლოდ ერთმა შეხვედრამ გამიფუჭა ხასიათი.

გზაზე, ერთი მოსახვევიდან ჯანტაის მანქანა გამოვარდა. იგი საიდანღაც მოდიოდა, ყოველ შემთხვევაში არა რეისიდან. მარტო არ იყო. კაბინაში კადიჩა ეჯდა. ჯანტაიმ ხელი დამიქინა. ადგილზევე დავამუხრუჭე. მანქანები თითქმის გვერდი-გვერდ გაჩერდნენ. ჯანტაიმ კაბინიდან თავი გადმოჰყო:

— შენ რა ისე მოგიერთავს მანქანა გეგონება ქორწილიაო?

— ასეც არის! — ვუპასუხე მე.

— არაა? — უნდობლად გასკიმა და კადიჩას შეხედა. — ჩვენ კი შენ გეძებთ — წამოსცდა მას.

კადიჩა კი, როგორც იქნა, ისევე დარჩა, გაფითრებული, დაბნეული.

— საცოლევ თან გახლავს? — მხოლოდ ახლა მიხვდა ჯან-
ტაი.

— არა, ცოლი, — მივუგე მე და ასელს მხრებზე მოვხვიე
ხელი.

— რას ამბობ? — და ჯანტაიმ კიდევ უფრო გადმოკარკლა
თვალები, არ იცოდა გახარებოდა თუ არა. — მოგილოცავ,
გულით გილოცავ...

— გმადლობთ!

1) ჯანტაიმ უწმინდურად გაიღიმა:

— დიდი ეშმაკი ხარ! უყალიმოდ დაითრიე?

— სულელო! — ვუთხარი და მანქანა დაეძარი.

აი უწმინდური კაცი! არიან ასეთებიც. მინდოდა კიდევ ერ-
თი შემეკურთხებინა მისთვის, როგორც საჭირო იყო. კაბინიდან
გადმოვიხედე: წინ მარცხნივ მოსახვევი და აღმართი იყო.
ვხედავ, ჯანტაი მანქანასთან დგას, ცალ ხელს ყბაზე ისვამს, მე-
ორეთი კი კადიჩას ემუქრება. ის კი მირბის სადღაც, გზის გა-
დაღმა — მინდოროში. ირბინა, ირბინა, შემდეგ კი მოწყვეტით დაე-
ცა მიწაზე და ხელებით დაიფარა სახე. მე არ ვიცი რა მოხდა
იქ მათ შორის, მაგრამ ძალიან შემეცოდა კადიჩა, ისე თითქოს
მე ვყოფილიყავი მასთან დამნაშავე. ასელისთვის არაფერი მი-
თქვამს. არ მინდოდა მისთვის ხასიათი გამეფუჭებინა.

ერთი კვირის შემდეგ პატარა ბინაში ჩავსახლდით, უღელ-
ტეხილზე, სადაც ჩვენამდე ალიბეკი ცხოვრობდა ოჯახით.

ჩვენი სახლი პატარა იყო: წინკარი და ორი პაწაწინა ოთა-
ხი. ასეთი სახლები უღელტეხილზე რამდენიმეა, მასში ჩვენი
შოფრები და მუშები ცხოვრობენ. სამაგიეროდ ადგილია კარ-
გი, გზასთან, ზედ ნარინის სიახლოვეს. რაც არ უნდა იყოს
გვერდით საოლქო ცენტრია. კინო, მაღაზიები, საავადმყოფო...
კიდევ იმით არის კარგი, რომ საუღელტეხილო ბაზა ზედ შუა
გზაზეა. ჩვენ ძირითადში რიბაჩიედან სინძიანში დავდიოდით.
უკან დაბრუნებისას შემეძლო სახლში შევჩერებულყავი, და-
მესვენა, ღამე გამეთია. თითქმის ყოველდღე შინ ვიყავი. გზაზე
რომ შემგვიანებოდა კიდევ, შუალამეზე მაინც შინ მივდიოდი.
ჩემს მისვლამდე ასელი არ წვებოდა, მიცდიდა.

ჩვენ უკვე შევიძინეთ ზოგი რამ, რაც ოჯახისთვის იყო საჭირო. ერთი სიტყვით, ცხოვრება თანდათან აეწყო. გადავწყვიტეთ, რომ ასელიც დაიწყებდა მუშაობას. თვითონ სურდა ასე: აულში გაიზარდა, მუშაობას შეჩვეული იყო, მაგრამ მოულოდნელად, ჩვენდა სასიხარულოდ, გავიგეთ, რომ იგი დედა უნდა გამხდარიყო. რატომღაც ეს ჩვენ გვიან გავიგეთ. იმ დღეს, როცა ასელს უნდა ემშობიარა, მე ჩინეთიდან ვბრუნდებოდი. ვჩქარობდი, ვღელავდი. ასელი სამშობიაროში იწვა. ჩამოვდივარ—ვაჟი! მე მასთან არ მიშვებენ, რა არ ვუმტკიცე. არაფერი გამოვიდა. დავჯექი მანქანაზე და მთებისაკენ გავაქროლე, თავის შეკავება ვერ მოვახერხე. მივერეკებოდი რაც შემეძლო. ზამთარი იყო. ირგვლივ კლდეები და თოვლია. თვალები მიკრეღდებოდა: შავი და თეთრი, შავი და თეთრი. ავვარდი დოლონის უღელტეხილის თხემზე: ძალიან მალლა ვარ. ღრუბლები მიწაზე დასცურავენ, მთები კი ქვევით ჭუჭებივით ჩანან, არადა არც ისინი არიან პატარა. გადმოვხტი კაბინიდან. მივირბინე უფსკრულის პირთან, ღრმად ჩავისუნთქე და ავღრიალდი რაც შემეძლო:

— ე, ეი-ი, მთებო! ვაჟი მყავს, ვაჟი
მომეჩვენა, რომ მთები შედრკნენ. ჩემი სიტყვები გაიმეორეს. დიდხანს ჰქუხდა ექო, ტალღასავით გადადიოდა ხეობიდან ხეობაში.

ბიჰს სამატი დავარქვით. მე შევეურჩიე სახელი. სულ იმაზე ვლაპარაკობდით: სამატი, ჩვენი სამატი, სამატმა გაიღიმა, სამატს კბილები ამოსდის. ერთი სიტყვით, ყველაფერი ისე იყო, როგორც ახალგაზრდა მშობლებს შეეფერებათ.

ძალიან მეგობრულად ვცხოვრობდით, გვიყვარდა ერთმანეთი, შემდეგ კი, ცოტა მოგვიანებით დაიწყო ჩემი უბედურება.

* * *

ახლა ძნელი გასარკვევია საიდან მოვიდა ჩემი უბედურება. ყველაფერი აირია, თავდაყირა დადგა... მე კი ვიცი საიდანაც, მაგრამ რას მშველის.

იმ კაცს ჩვენ არასოდეს არ შევხვედრივართ და ის აქ არა-

ფერ შუაშია. ამას იმიტომ ვამბობ, რომ არც მან და არც მე არ ვიცოდით ქვეყნად მეორის არსებობის შესახებ. ერთხელ შემთხვევით შევეყარეთ ერთმანეთს და დავეშორდით, ეჭვდაც არ გავგივლია, რომ ეს ჩვენი უკანასკნელი შეხვედრა არ იყო. ეს არის და ეს.

გვიან შემოდგომაზე რეისში წავედი. საზიზლარი ამინდი იდგა. წვიმდა თუ თოვდა ვერ გაიგებდი. მთებში ნისლი ჩამოწოლილიყო. მთელი გზა შუშის საწმენდები ჩართული მქონდა, მინები იორთქლებოდა, უკვე შორს ვიყავი მთებში, სადღაც დოლონის უღელტეხილთან.

დოლონი, დოლონი, ტიან-შანის ურჩხული ჩემი ცხოვრების დიდი ნაწილი მაკავშირებს მასთან. ყველაზე რთული, ყველაზე სახიფათო მონაკვეთი ტრასაზე. გზა სერპანტინებით მიდის, მარყუჟივითაა დახვეული და სულ მალე მიძვრები სადღაც ცაში, ღრუბლებს ბორბლებით აბიჯებ, ხან საჯდომზე ხარ მიკრული, ვერ წამოიწევ, ხან კი მკლავებით აწვები საჭეს, ზედ რომ მკერდით არ მიეკრა. ამინდიც ხომ ცუდ აქლემს მოგაგონებს. დოლონისთვის სულ ერთია — ზამთარია თუ ზაფხული. უცებ წამოუშენს სეტყვას, წვიმას, ან ისეთ თოვლიან ქარბორბალას დაატრიალებს, რომ ერთ ნაბიჯზე ვერაფერს დაინახავ. ასეთია ჩვენი ჭაღარა დოლონი. მაგრამ ჩვენ, ტიანშანელები, შევეჩვიეთ მას, დამითაც კი დავდივართ. ასე ახლა ვლაპარაკობ, თორემ როცა ყოველდღე გიწევს მუშაობა ამ გზებზე, ამაზე არ ფიქრობ.

ერთ ხეობაში, დოლონის მახლობლად საბარგო მანქანას დავეწიე. ზუსტად მახსოვს ГАЗ-51-ს. უფრო ზუსტად, კი არ დავეწიე, ის იდგა, ადგილიდან არ იძროდა. ორი კაცი რაღაცას უჩხიკინებდა მორტორს. ერთი იმათთაგანი აუჩქარებლად გამოვიდა შუა გზაზე და ხელი ასწია. მე დავამუხრუჭე, ცოტა წინ წავედი, რომ გზა არ გადამეკეტა. მოვიდა ჩემთან კაპიშონწამოხურული კაცი, ტანზე ბრეზენტის სველი ლაბადა აქვს მოსხმული. ასე ორმოცს მიღწეული იქნება, გაბარდნილი, ჯარისკაცური უღვაშებით და მოღუშული, მკაცრი სახით, თვალები კი მშვიდად გიყურებენ.

— მიგვიყვანე, ჭიგიტო, საგზაო უბანზე, — მეუბნება, — ტრაქტორი წამოვიყვანო, მოტორმა გვიმტყუნა!

— რომელთან? — შევეკითხე, იმიტომ რომ საგზაო-სარემონტო უბანი ბევრია. თითქმის ყოველ 15 — 20 კილომეტრზეა.

— დოლონისაზე, ვიდრე მეტეოსადგურამდე მივიდოდეთ. მეტეოსადგური უღელტეხილის ყველაზე მაღალ ადგილასაა, საგზაო უბანი კი ცოტა ქვევით, ასე შვიდი კილომეტრით, შესაყართან, ოდნავ გზის გვერდით.

დაჯექით, — ვეუბნები, — მიგვიყვანთ. თუმცა, შეიძლება ჩვენ თვითონ მოვიფიქროთ რამე? — ვაძლევ წინადადებას და კაბინიდან გადმოვდივარ. მე მომინდა დავეხმარებოდი ამ ხალხს, რომ დაბნელებამდე არ ეჭაყაყათ ტრაქტორზე. უბრალოდ გზის მუშაკებისადმი პატივისცემის ნიშნად: ისინი ხომ ჩვენთვის შრომობენ.

— რას მოიფიქრებ, ხმას არ იღებს, — ნაღვლიანად შემეპასუხა შოფერი და გახსნილი კაპოტი დახურა. თვითონ საცოდავი სულ გალურჯებულია, გაყინული, სიცივისაგან მოკრუნჩხული. ეტყობა ჩვენებური არაა, ალბათ დედაქალაქიდანაა, დაბნეული იყურება აქეთ-იქით. ფრუწხედან მოქპონდათ უბანში რაღაც. რა გავაკეთო? — ვფიქრობ და უცებ მოვიფიქრე. მაგრამ ჭერ უღელტეხილს შევხედე. ცა იქ ჩამუქებულია, ამდვრეული, ღრუბლები დაბლა ჩამოწოლილან. მაინც გადავწყვიტე. დიდი არაფერი იღეა იყო, მაგრამ ჩემთვის იგი მთელ რევოლუციას უდრიდა.

— მუხრუჭების საქმე როგორა გაქვს? — ვეკითხები შოფერს.

ერთი შენცა ხარ... რა, უმუხრუჭოდ ვივლი, თუ! გითხარი მოტორი...

— ტროსი გაქვს?

— მაქვს!

— მოიტანე, მივაბათ.

ისინი გაკვირვებით მომაშტერდნენ, ადგილიდან არ დაიძრნენ.

— შენ რა ჭკუაზე ხომ არ შეიშალე? — წყნარად ჩაილაპარაკა შოფერმა.

მე ასეთი ხასიათი მაქვს. არ ვიცი ცუდია თუ კარგი. თუ თავში რაიმე აზრი მომივიდა, ვენტები, მოვკვდები, მაგრამ ჩემსას გავაკეთებ. შოფერთან მივვარდი, ვეხვეწები:

— გესმის, მეგობარო, მივაბათ! სინდისს ვფიცავარ — აგიყვან!

— თავი დამანებე! — ხელი ჩაიქნია მან. შენ განა არ იცი, რომ აქ ბუქსირის წაყვანა არ შეიძლება. ფიქრალაც არ გავივლებ. წადი, ჯანდაბამდის გზა გქონია.

ისეთი ბრაზი მომივიდა, თითქოს რალაც დიდ სათხოვარზე მითხრეს უარი.

— რა გელაპარაკო, ვირი ხარ, მშიშარა ვირი! — მოვბრუნდი და მივდივარ. — წამოდით! — დაეუძახე გზის ოსტატს. მეორე გზის ოსტატი იყო, შემდეგ გავიგე.

— მოიცადე! — შემაჩერა გზის ოსტატმა. — მე შემომხედა და შოფერს უთხრა:

— მოიტანე ტროსი!

მან პირი დაალო და ოსტატს მიუბრუნდა:

— პასუხს თქვენ აგებთ! მანქანა თქვენს განკარგულებაშია, ბაითემირ-აქე.

— ყველანი ვაგებთ! — მოკლედ მოუქრა მან.

მე ეს მომეწონა. ასეთ კაცს თავიდანვე სცემ პატივს.

და ჩვენ წავედით, ორი მანქანა ერთმანეთზე ბუქსირით გადაბმული. თავიდან ყველაფერი კარგად იყო. მაგრამ დოლონს რომ მივაწიეთ, მოსახვევები დაიწყო, ხან ზევით მივდივართ, ხან ქვევით. მოტორი აკენესდა, აყმუვლდა, ყურებში მხოლოდ მისი გუგუნი მესმის. არაფერი გამოგვივა, ვეუბნები, უკანასკნელ წვეთამდე ამოგქაჩავ ყველაფერს. აღრეც მქონდა შემჩნეული, გზა დოლონზე მართალია ძნელია, მაგრამ წვევის რალაც რეზერვი მულამ მრჩებოდა. ჩვენ ყოველთვის ფრთხილად ვტვირთავდით, ნორმის სამოცდაათ პროცენტზე მეტს არ ვუდებდით. ასეთი იყო მითითება. რა თქმა უნდა, იმ წუთში მე ამაზე არ ვფიქრობდი. იმის თავი არ მქონდა გამერკვია, რა როგორ იყო. რალაც ძალა მამოძრავებდა, სპორტული აზარტის მსგავსი: შევეცადო, მოვახერხო, რალაც არ უნდა დამიჭდეს ჩემსას მივალწიო. არავითარი სხვა მიზანი მე არ მქონდა, გარდა იმისა, რომ

დავხმარებოდი ადამიანებს, მანქანა დანიშნულ ადგილამდე მიეყვანათ. ეს არც ისე ადვილი აღმოჩნდა.

ძაგდაგებს, ღრიალებს მანქანა, ფანჯრებს ტალახი ეკვრის, საწმენდები, ძლივს ასწრებს გასუფთავებას. საიდანღაც ღრუბლები გამოძვრნენ და პირდაპირ ბორბლებს ქვეშ წვეებიან, გზას ფარავენ. დაიწყო დიდი დაკიდებული მოსახვევები. სადღაც, სულ შებგოდე, და უკვე ვაგინებ ჩემს თავს. ეს რა საქმე ავიკიდე, ხალხი არ დავლუპო. მანქანაზე მეტად, ვგონებ, მე გავწვალდი. ყველაფერი გავიხადე, სათბური, პიჯაკი, სვიტრე, მოვიხადე ქუდი. ვზივარ ხალათში და ოფლად ვიღვრები, გეგონება აბანოში ვიყო. სახუმრო საქმე ხომ არ არის, მანქანა ბუქსირით მიმყავს, თანაც ზედ რაღაც ტვირთიც უდევს. კიდევ კარგი, რომ ბაითემირი საფეხურზე იდგა და ჩვენს მოძრაობას ათანხმებდა, მე მიყვირის, იმას კი ხელით ანიშნებს. როცა სერპანტინებზე დავიწყეთ ასვლა, ვიფიქრე, ვერ გაუძლებს, გადახტება-მეთქი, ის კი არც განძრეულა. დაიძაბა, როგორც მიმინო გაფრენის წინ და დგას, კაბინისთვის მაგრად ჩაუვლია ხელი. შევხედე, სახეზე არაფერი ემჩნევა, იფიქრებ ქვისაგანაა გამოთლილი, ულვაშებზე წვიმის წვეთები ეცემა — დავმშვიდდი.

ერთი დიდი აღმართი დაგვრჩა ასათავებელი და სიძნელე დაძლეული იქნება, ამ დროს ბაითემირი ფანჯარასთან დაიხარა და მითხრა:

ფრთხილად, წინ მანქანაა მარჯვნივ აიღე.

მარჯვნივ ავიღე. მთიდან მანქანა ეშვებოდა. ჯანტაის მანქანა. ე-ე,— ვფიქრობ, მომხვდება უსაფრთხოების ინჟინრისაგან: ჯანტაის ენაზე რამე დაამაგრდება? თანდათან ახლოვდება, საჭისთვის ჩაუვლია ხელი. ძირს ეშვება, წარბებს ქვემოდან იხედება. ლამის ერთმანეთს გავეხახუნეთ, ხელით მივწვდით. როცა ერთმანეთს გავუსწორდით, ჯანტაიმ გამკიცხავად გაიქნია თავი, რომელზეც ყვითელი მელის ქუდი ეხურა. „ეშმაკმა წაგიღოს, — გავიფიქრე, — მოიფხანე ენა თუ გეხალისება“.

ავათავეთ აღმართი. ქვევით ციცაბო დაღმართია, შემდეგ დამრეცი გზა და უღელტეხილის უკანასკნელ მისასვლელთან მოსახვევი გზის ოსტატის ბალისაკენ. იქეთ გავუხვიე. მაინც მოვიყვანე! გამოვრთე მოტორი და არაფერი მესმის, დავყრუვდი.

მეჩვენება, რომ დავყრუვდი და ირგვლივ ყველაფერი დამუნჯდა. არანაირი ხმა, მტკნარი სიჩუმე. გავიგე მხოლოდ, როგორ ჩახტა ბაითემირი. ძლივს გადმოვედი კაბინიდან და იქვე კიბეზე ჩავიკეცი. სუნთქვა მეკვრის, დავიღალე, თანაც უღელტეხილზე ჰაერი გაიშვიათებულია. ბაითემირი მომეარდა, სათბური მომანხურა, თავზე ქუდი ჩამომადეხატა. ბარბაც-ბარბაციტ მოვიდა მეორე მანქანის შოფერი, ფერდაკარგული, გაჩუმებული. ჩემს წინ ჩაცუქდა და სიგარეტი გამომიწოდა. ავიღე სიგარეტი, ხელები მიკანკალებს. ყველამ მოვწიეთ, გონს მოვედით. ისევ ათამაშდა ჩემში ის ველური ძალა, რამაც ამ საქმის გაკეთება გამაბედვინა.

— ჰა! — ვიყვირე მე. — ხედავ! — თან ისე დავკარი შოფერს მხარზე ხელი, რომ ჩაჯდა. შემდეგ სამივენი წამოვხტით, ერთმანეთს ზურგზე, მხრებზე ხელებს ვუბარტყუნებთ და ვხარხარებთ, ვყვირივართ რაღაც უაზროს, გვიხარია.

როგორც იქნა დავმშვიდდით, კიდეც მოვწიეთ. მე ჩავიცვი, საათს დავხედე და ავჩქარდი:

— ჩემი წასვლის დროა! — ვამბობ.

ბაითემირი მოიღუშა:

— არა, შემოდი სახლში, ჩემი სტუმარი იქნები! დრო წუთობით მაქვს გამოთვლილი.

— გმადლობთ! არ შემიძლია, შინ ცოლი მელოდება.

— იქნებ დარჩე? თითო ბოთლი დავლიოთ! — დამიწყო ხვეწნა ახალმა მეგობარმა — შოფერმა.

— თავი დაანებე! — შეაწყვეტინა ბაითემირმა, — ცოლი ელოდება. რა გქვია?

— ილიასი.

— წადი, ილიას. მადლობა, რომ გაჭირვებიდან გვიხსენი.

ბაითემირი კიბეზე დადგა და გზამდე გამაცილა. უჩუმრად ჩამომართვა ხელი და ჩამოხტა.

მთაზე რომ ავდიოდი, კაბინიდან გამოვიხედე, ბაითემირი ისევ გზაზე იდგა. ქუდი ხელში მოეკუჭა, თავი ჩაექინდრა და რაღაცაზე ფიქრობდა.

ეს იყო და ეს, ასე დავშორდით.

მაგრამ ყველაფერმა ამან ტყუილად არ ჩამიარა. გაცვივდი, სახლში მისვლისას ეს ვერც კი შევამჩნიე. სწრაფად ვისადილე. ასელისთვის დაწვრილებით არაფერი ამიხსნია. ვუთხარი მხოლოდ, გზაზე ხალხს დავეხმარე და ამიტომ შემაგვიანდა-თქო. ცოლს მე არაფერს ვუმაღავდი, მაგრამ ამის მოყოლა ვფიქრობ არც იყო საჭირო. ის ისედაც ყოველთვის წუხდა ჩემს გამო. და გარდა ამისა, მე სულაც არ ვაპირებდი მსგავსი რამის გამეორებას. ცხოვრებაში ერთხელ უღელტეხილს შევეჯიბრე და ვგონებ საკმარისი იყო. ყველაფერი ეს მეორე დღესვე დამავიწყდებოდა, რომ უკან დაბრუნებისას ავად არ გამხდარიყავი. ძლივს მივადწიე სახლამდე და იმ წუთში ჩავწექი. არ მახსოვს არაფერი, რა არ მეღანდებოდა, ვითომ დოლონზე ბუქსირს მივათრევ. ქარბუქი სახეს მწვავს, მიჭირს, სუნთქვა მეკვრის, საჭე თითქოს ბამბისააო, ხელში მეშლება. უღელტეხილი კი წინაა და გზას დასასრული არ უჩანს. მანქანას რადიატორი ცისკენ აუწევია და ზევით მიფორთხავს, ღმუის, ვარდება ციკაბოზე. ალბათ ეს ავადმყოფობის უღელტეხილი იყო, მესამე დღეს დავძლიე და გამოკეთება ვიწყე. ორი დღე ვიწექი, თავს კარგად ვგრძნობ, მინდა ავდგე, მაგრამ ასელს გაგონებაც არ სურს. მაიძულა ორი დღე კიდევ მეხეხა ლოგინი. დავაკვირდი მას და ვფიქრობ: ვინ იყო ავად — ის თუ მე? ველარ ვცნობ, გაწამებული სახე აქვს, თვალები ჩალურჯებია, გამხდარა, ნიაჟმარომ დაუბეროს, წააქცევს. ამას ბავშვიც დაუმატეთ. არა, ვფიქრობ, ასე არ ივარგებს. არა მაქვს უფლება ლოგინში ვიკოტრიალო. მასაც უნდა მივცე დასვენების საშუალება. ავდექი ლოგინიდან, ჩაცმა დავიწყე.

— ასელი — ხმადაბლა დავუძახე. ბიჭს ეძინა. — სთხოვე მეზობლებს სამატი დაიტოვონ, კინოში წავიდეთ.

იგი მომვარდა, წამაქცია ლოგინზე, მიყურებს, თითქოს პირველად მხედავს, ცრემლების შეკავება უნდა, მაგრამ ისინი უკვე წამწამებზე უბრწყინავენ, ტუჩები უთრთის. შემდეგ მკერდზე დამემხო და ატირდა.

— რა მოგივიდა, ასელ? რა იყო? — დავიბენი მე.

— მიხარია კარგად რომ ხარ.

— მეც მიხარია, მაგრამ რა საჭიროა დეღვა, ვიავადმყოფე

ცოტა, სამაგიეროდ სახლში ვიყავი შენთან, სამატთან თამაშით გული მოვიოხე. ბიჭი უკვე ფორთხავდა, სიარულს ეშურებოდა, ყველაზე სასაცილო ასაკში იყო. — თუ გინდა იცოდე, მე თანახმა ვარ კიდევ ვიავადმყოფო ასე! — გავიხუმრე მე.

— რას ამბობ! არ მინდა! — შემომყვირა ასელმა.

ამ დროს ბიჭმაც გაიღვიძა. ასელმა მოიყვანა, იგი ჯერ კიდევ ძილბურანშია. სამივენი ლოგინში ავფართხალდით. ბიჭი დათვივით დაფორთხავს, ხან მე შემდგება, ხან ასელს.

— ხედავ, რა კარგია! — ვეუბნები. — შენ კი? ცოტაც მოიცადე და შენს მოხუცებას ვეწვევით აულში. ერთი სცადონ და არ გვაპატიონ. ნახავენ ჩვენს სამატს და ყველაფერი დაავიწყდებათ...

მართლაც გვქონდა ასეთი სურვილი: წავსულიყავით აულში, მოხუცებთან ბოდიშის მოსახდელად... როგორც წესია ასეთ შემთხვევებში, მაგრამ ჯერ შვებულება იყო საჭირო. უნდა მოვმზადებულიყავით. საჩუქრები გვეყიდა ნათესავეებისათვის. ცარიელი ხელით იქ მისვლა ჭე არ მინდოდა.

ამ დროს ზამთარმაც მოგვისწრო. ტიანშანის ზამთარი მკაცრია, ქარბუქიანი, მთებში ზვავები იცის. ჩვენ შოფრებს ამ დროს საზრუნავი გვემატება, გზის მუშაკებს კი უფრო მეტი. ამ დღეებში ისინი ზვავის საწინააღმდეგო საგუშაგოზე დგანან, სახიფათო ადგილებში, სადაც შეიძლება თოვლი მოწყდეს. წინასწარ აფეთქებენ, ხელოვნურად იწვევენ ზვავს და შემდეგ გზას წმენდენ. მართალია ის ზამთარი შედარებით წყნარი იყო. ანდა, ალბათ, მე ვერ ვამჩნევდი, შოფერს ყოველთვის საკმარისად აქვს საქმე. თანაც მოულოდნელად ჩვენს ავტობაზას დიდი დავალება მისცეს. უფრო ზუსტად თვითონ ჩვენ, შოფრებმა, ვიკისრეთ მისი შესრულება, ყველაზე პირველმა მე გამოვთქვი სურვილი. ახლაც არ ვნანობ, ვფიქრობ, სწორად მოვიქეცი. მაგრამ სწორედ აქედან დაიწყო ჩემი უსიამოვნებანი. საქმე ასე იყო.

ერთხელ საღამოს ავტობაზაში ვბრუნდებოდი. ასელმა მთხოვა ალიბეკ ჯანტურინის ცოლისთვის პატარა ფუთა გადაემეცა. შევუხვით მათთან, სიგნალი მივეცი. ალიბეკის ცოლი გამოვიდა, გადავეცი ასელის გამოტანებული და ვეკითხები:

- ალიბეკი სახლშია?
- არა, ჯერ არ გამოჩენილა.
- სად არის, რეისში ხომ არაა?

— არა, არ წასულა დღეს, გადაუდეს, სულ დარბის, ამბობს, ჩინეთიდან მუშებმა ავტობაზას დეპეშა გამოუგზავნესო.

- რაო, რაშია საქმე?
- გვთხოვენ სასწრაფოდ ჩავუტანოთ ქარხნის მოწყობილობაო.

— რა მოწყობილობა? მინძიანის სასოფლო-სამეურნეო მანქანების ქარხნისა ხომ არა, ახლა რომ შენდება?

- არ ვიცი, ილიას, თვითონ გაიგებ.
- კი, მაგრამ სად არის ახლა ალიბეკი?
- როგორ თუ სად? სატვირთო სადგურზე, მთელი ხალხი იქაა, ამბობენ ეშელონები ეს-ესაა ჩამოვიდაო.

მეც იქით გავვარდი. გადავწყვიტე ხეირიანად გამეგო ყველაფერი. ჩვენი სატვირთო სადგური ხეობაშია, ტბის მისასვლელთან. ეს რკინიგზის ბოლო სადგურია. სადგურში რაღაც შფოთიანი სიბნელე ჩამოწოლილიყო. ხეობიდან მონაქროლი ქარი ბოძებზე ფარნებს აქანავებდა. ორთქლმავლები ვაგონებს ახარისხებდნენ. ბოლო ლიანდაგზე ამწე ისარს ათამაშებდა და პლატფორმაზე სცლიდა თუნუქითა და მავთულით შეკრულ ყუთებს. მე არ შევემცდარვარ. ეს იყო სინძიანში გასაგზავნი სატრანზიტო ტვირთი. იქ დიდ მანქანათმშენებელ ქარხანას აშენებდნენ. ჩვენ აქამდისაც გადაგვქონდა მათთვის სხვადასხვა მოწყობილობა.

სატვირთო სადგურში ჩვენი ავტობაზის მანქანები ბევრი იყო. მაგრამ არცერთს არ ტვირთავდნენ. ყველა რაღაცას უტდიდა. იჯდნენ კაბინებში, საფეხურებზე, ზოგიერთი ყუთებს მიყრდნობოდა, ქარისაგან იფარავდა თავს. მივესალმე. ხეირიანად არავენი მიპასუხა. დუმან, პაპიროსს აბოლებენ. ალიბეკს მოვკარი თვალი. მასთან მივედი.

- გამარჯობა, ალიბეკ!
- გაგიმარჯოს!
- რა ხდება აქ? დეპეშა მიიღეთ?
- კი, ვადაზე ადრე უნდათ ქარხნის გაშვება.

—მერედა რა?

— ახლა ჩვენზეა საქმე.

— გასაგებია, რომ ჩვენზეა!

— შეხედე რამდენი ტვირთი ყრია გზის გასწვრივ. კიდევ დაემატება. როდის მოვასწრებთ?! წარმოგიდგენია? იქ კი ხალხი გველოდება, ჩვენი იმედი აქვთ!.. იმათ ყოველი დღე ძვირად უღირთ.

— რას მომვარდი მე რა შუაში ვარ?

— როგორ თუ რა შუაში! შენ რა სხვა სახელმწიფოდან ხარ? თუ არ გესმის რა საქმე გაქვს გასაკეთებელი?

— გაგიჟდი, ღმერთმანი! — ვუთხარი გაკვირვებით და განზე გავდექი.

ამ დროს ყუთების გროვიდან ხმა მოისმა. ჩვენი ავტობუსის უფროსი ამანუოლოვი მოვიდა. მან საყულო წამოიწია, პაპიროსს მოუკიდა და ყველანი შეგვათვალიერა.

— მაშ ასე, ამხანაგებო! — თქვა მან. — სამინისტროს დავურეკავ, იქნებ ვინმე დაგვახმარონ. მაგრამ ამის იმედზე არ უნდა ვიყოთ. ჯერჯერობით თვითონაც არ ვიცი როგორ მოვიქცეთ.

— აქ ძალიან ძნელია რამის მოფიქრება, ამხანაგო ამანუოლოვ! — გაისმა ვილაცის ხმა. — დიდი ტვირთია. ორ-სამ ნაპერზე მეტი ძარაში არ ჩავა. სადღეღამისო გადატანაც რომ მოგაწყობ, სამუშაო მაინც ყელამდი იქნება, გაზაფხულამდე ვერც მოვერევი.

— საქმეც ეს არის, — უპასუხა ამანუოლოვმა. — უნდა გავაკეთოთ. ახლა კი ჯერჯერობით სახლებში წავიდეთ და ვიფიქროთ.

იგი მანქანაში ჩაჯდა და წავიდა. ჩვენები ადგილიდან არ დაძრულან. იცდიდნენ. კუთხეში ვილაცამ, არავისთვის არ მიუმართავს ისე, ბოხი ხმით ჩაილაპარაკა:

— ერთბაშად, რამე არ გამოვიდეს. ერთი ცხვრის ტყავიდან ორ ქურქს ვერ გამოჭრის ადრე უნდა გვეფიქრა! — ადგა, პაპიროსის ნამწვი ჩააქრო და მანქანისკენ წავიდა.

მას მეორემ დაუჭირა მხარი. — ჩვენთან ყოველთვის ასეა:

როგორც კი რამე გაჭირდება, ჩვენ მოგვემართავენ, აბა გვიშვე-
ლეთ, ძმებო-შოფრებო!

მას შეუტყის:

— ეს საერთაშორისო საქმეა, შენ კი, ისმაილ, ბაზრის დე-
დაკაცივით ლაქლაქებ!

მე კამათში არ ვერეოდი. მაგრამ უცებ გამახსენდა როგორ
მიმყავდა უღელტეხილზე ბუქსირით მანქანა და ვერ მოვითმინ-
ე, ავენთე. როგორც ყოველთვის.

რა არის აქ საფიქრალში — გამოვევარდი შუაში... — მისაბმე-
ლით უნდა წავიყვანოთ მანქანები.

— არავინ განძრეულა. ზოგმა არც შემომხედა. ასეთი რამ
მხოლოდ უიმედო სულელს შეეძლო წამოეროშა.

ჯანტაიმ ჩუმად დაუსტვინა:

— ხედავთ! — მე იგი ხმაზე ვიცანი.

ვღგავარ, აქეთ-იქით ვიყურები, მინდა მოვყვე ყველაფერი
როგორც იყო, მაგრამ ვიღაც ოყლაყი ჩამოვიდა ყუთებიდან,
ხელთათმანები მეზობელს გადასცა, საყელოში მომკიდა ხელი,
თავისაკენ მიმწია და მითხრა:

— აბა, ამოისუნთქე!

— ჰაი — ჩავასუნთქე მე სახეში.

— ფხიზელია! — გაუყვირდა ოყლაყს და ხელი გამიშვა.

— მაშასადამე, სულელია — წამოეშველა მეგობარი და
ორივემ მანქანებისაკენ გასწია, ჩაჯდნენ და წავიდნენ. დანარ-
ჩენებსაც ხმა აღარ ამოუღიათ ისე წამოიმართნენ, წასასვლე-
ლად მოემზადნენ.

— მოიცადეთ, სად მიდიხართ! — იყვირდა მე, — სერიო-
ზულად გეუბნებით. მისაბმელების წაყვანა შეიძლება...

ერთი ძველი შოფერი, აქსაკალთაგანი, ძალიან აღელვე-
ბული მოვიდა ჩემთან.

— როცა მე აქ შოფრობა დავიწყე, შენ მაშინ უშარვლოდ
დარბოდი, ბიჭუნა. ტიან-შანი საცეკვაო მოედანი როდია. მე-
ცოდები, ხალხს ნუ აცინებ...

ეს ხალხი სიცილ-ჭირჭილით მანქანებისაკენ გაემართა, მა-
შინ ყველას გასაგონად დავიძახე:

— დედაკაციები ხართ, შოფრები კი ირავ — არ უნდა მეთქ-
ვა ეს, ტყუილად ავიტეხე შარი.

ერთი წამით ყველა გაჩერდა, მერე ერთბაშად დაიძრნენ ჩემსკენ.

— რაო, ძაღლიშვილო! სხვისი სიცოცხლით თამაში მოგინდა!

— ნოვატორია! პრემია უნდა — წამოიძახა ჯანტაიმ. ხმები ერთმანეთში აირია, მე ყუთებთან მიმაკრეს.

— დაგვცინი!

— მოუხდება ყბაში!

— ლაწირაკო!

— ვფიქრობდი, თავპირს დამამტვრევდნენ და მიწიდან ფიცარი ავიღე.

— აბა, გამიშვით! — დაუსტვინა ვილაცამ და ხალხი მიფანტ-მოფანტა.

ალიბეკი იყო.

— წყნარად! — იყვირა მან. — შენ კი, ილიას, გაგვაგებინე რისი თქმა გინდა. თქვი ჩქარა!

— რა უნდა ვთქვა! — ვუპასუხე მე და სული მოვითქვი. — ლილები სულ დამაწყვიტეს ვიდრე ხმას ამოვიღებდი. უღელტეხილზე საგზაო უბანზე მიმყავდა მანქანა ბუქსირით, ტვირთიც ედო. ეს არის და ეს.

სიჩუმე ჩამოვარდა, ეტყობა არ ჭეროდათ ნათქვამი.

— მერე, მიიყვანე? — ეჭვით შემეკითხა ვილაც.

— კი, მთელი დოლონის გავლით, ბალამდე.

— კარგი საქმეა! — გაუკვირდა ვილაცას.

— ახეთქებს! — შეაწყვეტინა მეორემ.

— ვახეთქებ? ჯანტაიმ თვითონ ნახა. ეი, ჯანტაი, სადა ხარ? თქვი! გახსოვს, რომ შეგხვდი?

ჯანტაის ხმა ვერ გავიგონე. გაქრა; გეგონება მიწამ უყო პირობა. ტყუილად კი არ მეჭაფრებოდა ეს ბილწი ადამიანი. მაგრამ ახლა მის ხასიათზე არ ვიყავი. ხალხმა დავა დაიწყო. აღმოჩნდნენ ისეთებიც, რომელთაც ჩემი მხარი დაიჭირეს. მაგრამ ვილაც ურწმუნომ ყველა გადააჭერა:

— რა საჭიროა ტყუილად ქაქანი! — თქმა მან მოღუშულმა. — ვილაცამ ერთხელ რაღაც გააკეთა. ცოტა რამ ხდება. ბავშვები ხომ არა ვართ. ჩვენს ტრასაზე მისაბმელების ტარება

აკრძალულია. არავინ ნებას არ მოგვცემს. სცადეთ, ერთი უთხარით უსაფრთხოების ინჟინერს და მაშინ ნახავთ რა დროს გაატარებთ. ეგლა აკლია, პასუხისგებაში წავა თქვენი გულისთვის... მორჩა და გათავდა.

— გეყოფა ერთი — დამიცვა ვილაცამ. — რას ჭვია ნებას არ მოგვცემს. აი, ივან სტეპანოვიჩმა ოცდაათ წელში ტონანახევრიანით პირველმა გადაიარა უღელტეხილი. არავისგან ნებართვა არ აუღია. თვითონ წავიდა. აი ისიც; ჯერ ცოცხალია.

— სწორია, ასე იყო, — დაუდასტურა ივან სტეპანოვიჩმა. — მაგრამ ეჭვი მეპარება. უღელტეხილზე ზაფხულშიც არავის გაუვლია მისაბმელით, ახლა კი ზამთარია...

ალიბეკი ჩუმად იყო, მხოლოდ ახლა ამოიღო ხმა:

— გვეყოფა დავა. მართალია არავის გაუვლია, მაგრამ დაფიქრება მაინც საჭიროა. ისე კი არა, შენ რომ გინდა, ილიას, მომეცით მისაბმელი და წავედიო. ასე არ კეთდება, უნდა მოვემზადოთ. უნდა მოვიფიქროთ ყველაფერი როგორც საჭიროა, ხალხს შევეკითხოთ, საცდელი გადასვლაც მოვაწყოთ. მარტო სიტყვებით ვერაფერს დაამტკიცებ...

— დავამტკიცებ! — ვუპასუხე მე. — სანამ თქვენ იფიქრებთ და იმკითხავებთ, მე დავამტკიცებ. მაშინ დარწმუნდებით! — მოვბრუნდი, ჩავჯექი მანქანაში და ავტობაზისაკენ წავედი.

ყველა ადამიანს თავისებური ხასიათი აქვს. ხასიათი შენ უნდა გემორჩილებოდეს, მაგრამ ყოველთვის ასე არ გამოდის. საჭესთან ვიჯექი: ვერც მანქანას ვგრძნობდი, ვერც გზას. გული მტკიოდა, შიგ ბოღმა მიტრიალებდა. რაც დრო გადიოდა, მით უფრო მაწუხებდა შელახული თავმოყვარეობა. არა, მე თქვენ დაგიმტკიცებთ! დაგიმტკიცებთ, რომ ადამიანს უნდა ენდობოდეთ, რომ არ უნდა დასცინოთ მას, დაგიმტკიცებთ, რომ ზედმეტად ფრთხილობთ. ალიბეკიც კარგი ვინმეა: მოფიქრება უნდა, მომზადება, შემოწმება ის ყოველთვის ასეთი ჭკვიანია, წინდახედული. მე კი ამისთვის მიმიფურთხებია, უბრალოდ გავაკეთებ, მაშინ რას იზამთ, არ შეგარცხვებათ?

მანქანა გარაჟში დავაყენე და კიდევ დიდხანს ვუტრიალებდი მას. გარეგნულად თითქოს დავმშვიდდი, მაგრამ შინაგანად

მთლად დაძაბული ვიყავი. მე მხოლოდ ერთზე ვფიქრობდი: ხვალვე დამემტკიცებინა ჩემი სიმართლე. უფროსებთან მისვლა, მათთვის ყველაფრის ახსნა, მტკიცება, მათგან საწინააღმდეგოს მოსმენა არ მინდოდა. გამოსავალი ერთი იყო: დავძრულიყავი უღელტეხილისაკენ მისაბმელით. მაგრამ ვინ მომცემდა მისაბმელს, ვინ მომცემდა ნებას მისაბმელით წავსულიყავი ტიან-შანისაკენ?

ამ ფიქრებით გამოვედი გარაჟიდან და ეზოს გავყვევი. გვიან იყო. მხოლოდ საღისპეტჩეროში ენთო სინათლე. შევჩერდი: დისპეტჩერი. დისპეტჩერს ყველაფერი შეუძლია. ყველაფერი მის ხელთაა. ფეხს ავუჩქარე. დღეს მგონი კადიჩა მორიგეობდა. მით უკეთესი. ის უარს არ მეტყვის, არც უნდა მითხრას. თუ საქმე საქმეზე მიდგება — დანაშაულს ხომ არ ჩავდივარ, პირიქით, ის მხოლოდ დამეხმარება კარგი, ყველასათვის საჭირო საქმის გაკეთებაში.

საღისპეტჩეროს მივეუახლოვედი და გამახსენდა, რომ დიდი ხანია არ შემიღია ეს კარები. თუ მომიხდებოდა, ფანჯრიდან მივემართავდი ხოლმე. შევცოვნდი. კარი გაიღო. ზღურბლზე კადიჩა იდგა.

— შენთან ვარ, კადიჩა, კარგია, რომ მოგისწარი.

— მე უკვე მივდივარ.

— წავიდეთ, სახლამდე მიგაცილებ.

კადიჩამ გაჟვირვებით შეჰყარა წარბები, უნდობლად შემომხედა. შემდეგ გაიღიმა და მითხრა:

— წავიდეთ.

გარეთ გამოვედით და ქუჩას დავადექით. ბნელოდა. ტბიდან წყლის ხმაური ისმოდა, ცივი ქარი უბერავდა. კადიჩამ ხელი გამომლო, მომეკრა და ქარისაგან დაიფარა თავი.

— გცივა? — ვკითხე.

— შენთან არ გავიყინები! — მიპასუხა.

კიდევ რალაცის თქმას აპირებდა, მაგრამ თავი შეიკავა და უფრო მაგრად მომეკრა მხარზე. აქამდე ვღელავდი; ახლა კი რატომღაც დავმშვიდდი. უკეთეს ხასიათზე დავდექი.

— ხვალ როდის მორიგეობ, კადიჩა?

— მეორე ცვლაში.

— საქმე მაქვს შენთან. დიდი საქმე. ყველაფერი შენზეა დამოკიდებული.

გზაში დაწვრილებით ავუხსენი. ჯერ მოსმენაც კი არ უნდოდა, მაგრამ მე ვარწმუნებდი, შეეჩერდით კუთხეში, ფარანთან. კადიჩას ვერ გადაეწყვიტა.

— ოხ, ილიას! — წაილაპარაკა მან და შეშფოთებით ჩამხედა თვალებში. — ტყუილად ჰკიდებ ამ საქმეს ხელს.

მე უკვე მივხვდი, რომ იგი ყველაფერს გააკეთებდა. ხელზე ხელი მოვკიდე:

— დამიჯერე, კადიჩა ტყუილად არა! ყველაფერი რიგზე იქნება ხომ შევეთანხმდით.

მან ამოიოხრა:

— შენ ვინ გადაგაჯერებს! — და თავი დამიქნია.

მე უნებლიეთ მხრებზე მოვხვიე ხელი:

— ჯიგითად უნდა დაბადებულიყავი, კადიჩა ნახვამდის! — ვუთხარი და მაგრად ჩამოვართვი ხელი: — სადამოსთვის ყველაფერი მოამზადე, გაიგე?

— ნუ ჩქარობ! — მითხრა მან, ჩემი ხელი ისევ ხელში ეჭირა. — შემდეგ მოულოდნელად შებრუნდა. — თუმცა, წადი... საერთო საცხოვრებელში უნდა მიხვიდე?

— კი, კადიჩა!

— ღამე მშვიდობისა!

მეორე დღეს ტექნიკური დათვალეირება გვქონდა. ხალხი ნერვიულობდა. ეს ინსპექტორები ყოველთვის მაშინ გამოჩნდებიან, როცა საჭირონი არ არიან, ყველაფერზე დაობენ, აქტებს ადგენენ. რამდენი შარი, რამდენი დავიდარაბა მოაქვთ თან. მაგრამ ისინი აულელვებლად აკეთებდნენ თავიანთ საქმეს. მათ გეგმაში ჰქონდათ ავტობაზის ტექნიკური შემოწმება და ეს მათთვის ყველაფერს ნიშნავდა.

ჩემი მანქანა სრულ წესრიგში იყო, მაგრამ ცოტა მოშორებით ვიდექი, ვითომ რემონტით ვიყავი გართული. საჭირო იყო დროის მოგება, ვიდრე კადიჩა გამოვიდოდა სამორიგოდ. არავინ გამომლაპარაკებია, არავის მოუგონებია გუშინდელი ამბავი. მე ვიცოდი, რომ ხალხს ჩემთვის არ ეცალა. ყველას ეჩქარებოდა გაეარა ტექშემოწმება და რეისში წასულიყო. დაკარ-

გულ დროს ანაზღაურება უნდოდა. მიუხედავად ამისა, გულში მაინც ნაწყენი ვიყავი.

ტექუმემოწმება მე დღის მეორე ნახევარში გავიარე. ინსპექტორები წავიდნენ. სიწყნარემ და სიცარიელემ დაისადგურა. ეზოს სიღრმეში, ღია ცის ქვეშ მისაბმელები იდგა. მათ ხანდახან იყენებდნენ სწორ გზებზე, თუ ადგილობრივად რამე იყო გადასაზიდი. მე მათთან მისასვლელი გზა შევათვალე და განაპირა ავირჩიე. ჩვეულებრივი ურიკა, ოთხთვალზე შემდგარი ძარა. აი მთელი სიბრძნე. რამდენი კი ვინერვიულე, მაშინ მე ჭერ კიდევ არ ვიცოდი თუ რა მომელოდა და მშვიდად წავედი საერთო საცხოვრებელში. უნდა მესადილა და ცოტაც წამეძინა. წინ ძნელი გზა მქონდა. მაგრამ დაძინება მაინც ვერ მოვახერხე, ხოლო როცა შებინდდა, ავტობაზისაკენ გავწიე.

კადიჩა მოსული დამხვდა. ყველაფერი გაემზადებინა. ტყუილად რომ არ შემეშფოთებინა, უხმოდ ავიღე საგზური და გარაჟისაკენ გავწიე. მივრბივარ და თან ვფიქრობ: „თუ ბიჭები ხართ, დამიდექით!“ დავძარი მანქანა, მისაბმელთან მივაყენე, მოტორი მცირე ბრუნებზე გადავიყვანე, კაბინიდან გამოვედი და მივიხედ-მოვიხედე. არავინაა. მხოლოდ დაზგების გუგუნის იმის სარემონტო სახელოსნოდან და მოქცევის ხმა მოაქვს ნიავს ტბიდან. ცა თითქოს მშვიდია, ვარსკვლავები არ ჩანს მხოლოდ. გვერდით მოტორი გუგუნებს. გაბოლება მომინდა, მაგრამ პაპიროსი გადავავდე. მერე მოვწიე...

გასასვლელთან გუშაგმა გამაჩერა:

— სდექ, საით?

— ტვირთის მისაღებად, აქსაკალო, — ვეუბნები, მინდა გულგრილი ვეჩვენო. — აი საშვი.

მოხუცმა ქალაღში ჩარგო ცხვირი, ვერაფერს არჩევს ფარნის სინათლეზე.

— ნუ მაყოვნებ, აქსაკალო! — ველარ მოვითმინე მე. — საქმე არ იცდის!

დატვირთვა ნორმალურად ჩატარდა. მთლიანად ჩაალაგეს: ორი ყუთი ძარაში, ორიც მისაბმელზე. გვედი ტრასაზე და მხოლოდ მაშინ მოვუკიდე პაპიროსს. მოხერხებულად მივეუქე-ქი საჭეს, ჩავრთე სინათლე და მთელი გაზი მივეცი. გზა თავი-

სუფალი იყო და არაფერი მიშლიდა ხელს მაქსიმალური სიჩქარით მევლო. მანქანა მსუბუქად მიდიოდა, თითქოს არც კი გრძნობდა უკან მიბმულ ბუქსირს. მართალია, მოსახვევებში ცოტა გვერდზე გვაგდებდა და საქის მოტრიალება ჭირდა; მაგრამ ეს შეუჩვევლობის ბრალია, შევეჩვევი, — ვფიქრობდი მე. „იძლევი დოლონს! იძლევი სინძიანს!“ — შემოვუძახე თავს და საჭეზე ისე დავიხარე, როგორც ცხენზე. სანამ გზა საშუალებას იძლეოდა, უნდა დავწოლოდი. ვანგარიშობდი, რომ შუალამისთვის დოლონს მიმეღწია.

დასაწყისში გაანგარიშებულზე ჩქარაც მივდიოდი, მაგრამ როცა მთები დაიწყო, უფრო ფრთხილად წავედი. იმიტომ კი არა, რომ მორტორი ვერ უძლებდა დატვირთვას. იმდენად აღმართები არ მამბრკოლებდნენ, რამდენადაც დადმართები.

მისაბმელი ფერდობებზე ჯაყჯაყებდა, ხმაურობდა, წინ აგდებდა მანქანას და ხელს მიშლიდა მშვიდად დავშვებულისკენ. ყოველწუთს მიხდებოდა სიჩქარის გადართვა, დამუხრუჭება, მოხვევა. დასაწყისში თავს ვიმაგრებდი, ვცდილობდი არაფერი შემემჩნია, მაგრამ რაც დრო გადიოდა, ყველაფერი ეს უფრო მეტად მაწუხებდა, მოთმინებას მიკარგავდა. რამდენია ამ გზაზე აღმართები და თავდაღმართები, უფიქრია ვინმეს დაეთვალა! და მაინც სულით არ ვეცემოდი. აქ მე არავითარი საფრთხე მემუქრებოდა, გარდა დაღლისა. „არაფერია! — ვიმშვიდებდი თავს. უღელტეხილზე გადასვლის წინ შევისვენებ!“ მე არ ვფიქრობდი იმაზე, რატომ მიჭირდა ახლა უფრო მეტად, როცა ამ ადგილებში ბუქსირით გადამყავდა მანქანა.

დოლონი ახლოვდებოდა. სინათლის სხივები ხეობის ჩაბნელებულ პიტალოებზე ათამაშდნენ. გზას თოვლისქუდიანი მთები გადაეფარა. სინათლის შუქზე თოვლის მსხვილი ფანტელები აელვარდნენ. „ალბათ ქარმა თუ გადმოყარა ზევიდან“, — გავიფიქრე. მაგრამ ფიფქები უკვე მინებს ეკვროდნენ და ძირს ცურდებოდნენ. თოვდა. ვერ ვიტყვი ბარდნილა-თქო, მაგრამ სველი თოვლი მოდიოდა. „ესლა მაკლდა!“ — გამოვცერი კბილებში და საწმენდები ჩავრთე.

უღელტეხილის ფრიალოები დაიწყო. მორტორი ნაცნობ მოტივზე ამღერდა. მონოტონური, გულისწამლები გუგუნნი მატ-

ლივით მიხობავდა ბნელ გზაზე. როგორც იქნა, აღმართი უკან მოვიტოვე. ახლა წინ იყო გრძელი ციცაბო დაღმართი. მოტორის ხმა შეიცვალა, ათუხთუხდა. მანქანა თავქვე დაეშვა, უცებ შემაქანა აქეთ-იქით. მე ვგრძნობ ზურგს უკან რა ამბავშია მისაბმელი, როგორ უახლოვდება და ეჯახება მანქანას, მესმის როგორ ხმაურობს და ღრქიანებს ლითონი. ეს ღკრიალი ისე მოქმედებს, გეგონება ზურგი მტეხავსო, ყრუ ტკივილს ვგრძნობ მხრებში. ბორბლები მუხრუჭებს. არ ემორჩილება, მიცურავს სველ თოვლზე. მანქანა ზიგზაგებით წავიდა, მთელი კორპუსით ირყევა, საჭეს ხელიდან მტაცებს, ფერდობზე ვეშვები. სხვა გზა არ იყო, მოვუხვიე და გავჩერდი. მეტი აღარ შემიძლია, ღონე გამომელია. სინათლე გამოვრთე და მოტორი ჩავაქრე. ხელები გამიშეშდა, აღარ მემორჩილება, თითქოს პროტეზები მაქვს. მე თვითონ მესმის ჩემი ხრინწიანი სუნთქვა. რამოდენიმე წუთს ვიჯექი ასე; შევისვენე, პაპიროსი მოვწიე. ირგვლივ საშინელი სიბნელეა და სიჩუმე. მხოლოდ ქარი უსტვენს კაბინის ნაჩვრეტებში. არ მინდა ვიფიქრო იმაზე, თუ რა მელის წინ. აქედან ზევით დამრეცებზე სერპანტინები მიდის. ესაა სწორედ საწვალებელი მოტორისა და ხელებისათვის. ეს დაუსრულებელი ცოცვა მთის ფერდობებზე, ზიგზაგები, წინ — უკან, ისევ წინ — ზევით — უკან და ისევ და ისევ... ფიქრის დრო აღარ არის. თოვას უმატა.

მოტორი ავამუშავე. მანქანა საოცარი ღრიალით დაიძრა მთისკენ. კბილი კბილს დავაჭირე, ერთიმეორის მიყოლებით სულმოუთქმელად ვიღებ სერპანტინებს. დამთავრდა ისინიც. ახლა ციცაბო დაღმართია, შემდეგ დამრეცი საგზაო უბნის მოსახვევამდე და ბოლოს უღელტეხილის უკანასკნელი მისასვლელი. დავეშვი ძირს. დიდი სისწრაფით გავიარე დაახლოებით ოთხი კილომეტრი სწორი გზა და პირდაპირ შევუტეე აღმართს. მივდივარ ზევით, ცოტაც... ეს სისწრაფე დიდხანს არ გამყვა. მანქანამ სახიფათოდ უკლო სიჩქარეს. გადავრთე მეორე, შემდეგ პირველ სიჩქარეზე. საზურგეს მივეყრდენი, ხელები მაგრა ჩავჭიდე საჭეს. ღრუბლებს შუა თვალებში ვარსკვლავები ამითამაშდნენ და გავჩერდი, არ იძვრის, ბორბლები აღ-

გილზე ტრიალებს, გვერდით გამიბრბის, ბოლომდე დავაწეკი აქსელერატორს.

— ცოტაც! ცოტაც კიდევ! გაუძელი! — აუყვირდი მე არააღამიანური ხმით.

მოტორი აკვნესდა, აკანკალდა და გაჩერდა, ჩაქრა. მანქანა ნელ-ნელა დასურდა ძირს. მუხრუჭებს დავაწეკი. არ იჭერს, დაბლა ეშვება მისაბმელის სიმძიმის წყალობით, ბოლოს კლდეს მიეჯახა და გაჩერდა. ყველაფერი დაღუმდა. კარი გავალე და კაბინიდან გადმოვიხედე. ასეა, ღმერთმა დასწყევლოს. მისაბმელი თხრილში ჩავარდა და ახლა ვერანაირი ძალა იმას იქიდან ვერ ამოიღებს. გონდაკარგულმა ხელახლა ჩავრთე მოტორი, მოვწყვიტე მანქანა, ბორბლები გაცოფებულივით დატრიალდნენ, მანქანა დაიჭიმა, დაიძაბა მთელი კორპუსით, მაგრამ ადგილიდანაც ვერ დაიძრა. ჩამოვხტი და მისაბმელისაკენ გავიქეცი. მისი ბორბლები ღრმად ჩაფლულიყვნენ თხრილში. რა ვქნა? გონდაკარგული რაღაც ველური, არააღამიანური ძალით ვეცი მისაბმელს; ხელებით, მთელი ტანით მივაწეკი, შემდეგ ძარის ქვეშ შევძვერი და შევეცადე მხრით ამეწია, დავიღმუვლე, ისე დავიძაბე, რომ თავში ტკივილმა გამიარა, შევეცადე მისაბმელი გზაზე გამომეყვანა, მაგრამ საქმე არა გაქვს. ღონე გამომეცალა, გზაზე დავეცი, თოვლნარევი ტალახი მოვხვეტე და ბოლმისაგან ავტირდი. შემდეგ ავდექი, მივბარბაციდი მანქანასთან და საფეხურზე ჩამოვჯექი.

შორიდან მოტორის ხმა შემომესმა, ორი სინათლე ეშვებოდა ციცაბოდან. არ ვიცი ვინ იყო ეს შოფერი, საით მიაქროლებდა ბედი ამ სიბნელეში, მაგრამ შემეშინდა, თითქოს სინათლეები მე მომდევდნენ, ქურდივით მივეარდი გადასაბმელს, ავხსენი შემაერთებელი ყური, შევვარდი კაბინაში და მანქანა აღმართზე გავაქროლე. მისაბმელი თხრილში დავტოვე.

გაურკვეველი უცნაური შიში დამეუფლა. მეჩვენებოდა, რომ მანქანა უკან მომდევდა და ისეთი სისწრაფით მივქროდი თუ არ დავიმტვერი მხოლოდ იმიტომ, რომ ზეპირად ვიცი ეს გზა. თვალუბიცი რომ აეხვიათ ჩემთვის, მაშინაც იმასვე გავაკეთებდი.

განთიადისას საულელტეხილო ბაზაში მივედი. თავს ანჯარიშს არ ვაძლევდი, ისე გიჟივით მივევარდი კარებს, მუშტები დაუფშინე. კარი გაიღო და ასელისათვის არც კი შემიხედავს, ისე შევედი სახლში, თავიდან ფეხებამდე ტალახში ამოსვრილი. ძლივს ვსუნთქავდი, რაღაც სველზე დავკეჭი. გარეცხილი თეთრეული იყო, სკამზე იდო. პაპიროსის ამოსაღებად ჭიბეში ჩაიყავი ხელი, მანქანის გასაღები მომხვდა ხელში, შორს მოვისროლე, თავი ჩაქვინდრე და გავქვავდი. ვზივარ. დაღლილი, ამოთხუპნული, გაოგნებული. ფეხშიშველა ასელი მაგიდას ირგვლივ ტრიალებს. რა შემეძლო მეთქვა მისთვის? იატაკიდან გასაღები აიღო და მაგიდაზე დადო.

— დაიბან? წყალი გაგიცხელე, ჯერ კიდევ საღამოს, — ჩუმად მითხრა მან.

ნელა ავწიე თავი. შეცივებული ასელი ჩემს წინ დგას ლამის პერანგში, გულზე გამხდარი ხელები დაუწყვია. მისი თვალები შიშითა და თანაგრძნობით მათვალისწინებენ.

— მისაბმელი გადამივარდა უღელტეხილზე, — ვთქვამე უცხო, რაღაც უფერული ხმით.

— რომელი მისაბმელი? — ვერ გაიგო მან.

— რკინის, მწვანე, 02—38! სულ ერთი არ არის რომელიც! — გაბრაზებულმა ვიყვირე: მე ის მოვიპარე, გესმის, მოვიპარე!

ასელმა ჩუმად ამოიოხრა და საწოლზე ჩამოჯდა.

— კი, მაგრამ რატომ?

— რა რატომ? — ნერვებს მიშლიდა, რომ არ ესმოდა. მისაბმელით მინდოდა უღელტეხილი გადამევილო! გაიგე? მინდოდა დამემტკიცებინა... არ გამიმართლა!..

სახე ხელებში ჩავმალე. ერთ ხანს ორივე ვდუმდით. უცებ ასელი ადგა და ჩაცმა დაიწყო.

— რას უზიხარ? — მკაცრად მითხრა მან.

— აბა, რა უნდა ვქნა? — ჩავიბურტყუნე მე.

— დაბრუნდი ავტობაზაში.

— როგორ! მისაბმელის გარეშე?

— იქ ყველაფერს აუხსნი!

— გაგიყდი! — ვიყვირე და ოთახში დავიწყე სირბილი. —

როგორ მივიყვანო, როგორ შევხედო ხალხს თვალებში. რა ვუთხრა: მაპატიეთ, ბოდიშს ვიხდი, შეეცდი-თქო, მუხლებზე დავუჩოქო, ვეხვეწო? არა! რაც უნდათ ის მიქნან! მიმიფურთხები!

ჩემს ყვირილზე ბიქს გამოედვიდა, ატირდა. ასელმა იგი ხელში აიყვანა, ის უფრო აღრიალდა.

— ლაჩარი ხარ! — წყნარად, მაგრამ მტკიცედ მითხრა ასელმა.

— რა-ა! — არათფერი მახსოვდა ისე მივევარდი, ხელი მოვუქნიე, მაგრამ გარტყმა ვერ გავბედე. მისმა გაკვირვებულმა ფართოდ გაღებულმა თვალებმა შემაჩერა. მის თვალებში ჩემი საშინელი, დამახინჯებული სახე დავინახე.

ასელი უხეშად გავწიე გვერდზე, ზღურბლისკენ წავედი და მაგრად მოვიჯახუნე კარები.

უკვე გათენებულყო. დღის სინათლემ ცუდად გამხადა: ყოველივე გუშინდელი უფრო საშინლად, გამოუსწორებლად მეჩვენა. მხოლოდ ერთ გამოსავალს ვხედავდი: გადამეტანა ის ტვირთი, რომელიც მანქანაზე მქონდა. შემდეგ კი არ ვიცი...

უკან დაბრუნებისას სახლში არ შემვივლია. იმიტომ კი არა, რომ ასელს წავეჩხუბე. უიმისოდაც გაბრაზებული ვიყავი. არავის შინდოდა ვჩვენებოდი, არც არავის დანახვა მინდოდა. არ ვიცი ვის როგორ, მე კი ასეთ დროს მარტო ყოფნა მირჩევნია, არ მიყვარს ვინმეს გავუმჟღავნო ჩემი დარდი. ვის ჰირდება? მოითმინე თუ შეგიძლია, მანამ ყველაფერი არ გაივლის...

ღამე გზაზე გავათიე. რა დამაძინებდა, მთელი ღამე საშინელ სიზმრებს ვხედავდი. მესიზმრება ვითომ მისაბმელს ვეძებ უღელტეხილზე. კვალი ჩანს, მისაბმელი კი არა, ვწრივალე, ვკითხულობ: სად გაქტრა მისაბმელი, ვინ წაიყვანა? მართლაც არ დამხვდა დაწყველილ ადგილზე, როცა ვბრუნდებოდი. მარტო ნაკვალევი იყო. წაეყვანათ. შემდეგ გავიგე ალიბეკს მიეყვანა ავტობაზაში.

მისაბმელის შემდეგ მეც მივედი ბაზაში. შავი ფერი დამდებოდა სახეზე, სარკეში ჩავიხედე თავი ველარ ვიცანი.

ავტობაზაში, როგორც ყოველთვის, ცხოვრება ჩვეულებრივ მიდიოდა. მხოლოდ მე, უცხოსავით, გაუბედავად მივაყენე

შანქანა კარებთან, ჩუმად გავიარე ეზო და გარაჟიდან მოშორებით კუთხეში გავჩერდი. კაბინიდან უცებ არ გადმოვსულვარ. მიდამო შევათვალიერე. ხალხმა მუშაობას თავი მიანება, მე მიყურებენ. ეჰ, ჩამსვა ახლა შანქანაში და გამაქროლა, საითაც თვალი მიმიწვდება. მაგრამ ვერსად დავიმალებოდი, კაბინიდან გამოვვდი. ღონე მოვიკრიფე, ეზო გადავჭერი და სადისპეტჩეროსაკენ გავწიე. ვცდილობდი დინჯად, თანაბარი ნაბიჯებით მევლო, სინამდვილეში კი მივდიოდი, როგორც დამნაშავე გაივლის მწყობრის წინაშე, ვიცი, რომ ყველა მოღუშული მიყურებს. მეც მათ ადგილზე ალბათ ასე მოვიქცეოდი.

ზღურბლზე წავიფორხილე. თითქოს გულმაც წაიფორხილა: კადიჩა დამავიწყდა, ცუდ დღეში ჩავაგდე! რა პასუხი გავცე ახლა მას?

დერეფანში შევისვენე, შუბლიდან ოფლი მოვიწმინდე. თავი ავწიე. კედლიდან პლაკატი მიყურებდა. ჩვენი კედლის გაზეთის სასწრაფო ნომერი — „ელვა“ გამოეშვათ. „სირცხვილი“ — დაეწერათ დიდი ასოებით, ქვევით კი დახატული იყო მთებში მიტოვებული მისაბმელი.

შემოვბრუნდი. სახე ისე მეწვოდა, თითქოს ვინმემ სილა გამაწნაო. სადისპეტჩეროში შევედი. კადიჩა ვილაცას ელაპარაკებოდა ტელეფონზე. დამინახა თუ არა, ლაპარაკი შეწყვიტა და ყურმილი დაჰკიდა.

— აჰა! — დავაგდე მაგიდაზე საგზური.

კადიჩამ სიბრაღულით შემომხედა. „ოლონდ ყვირილი არ დაიწყოს, ოლონდ არ ატირდეს, — ვფიქრობ. — შემდეგ, სხვა დროს“, — ვეხვეწები გუნებაში. და მან გამიგო. ხმა არ ამოუღია.

— დიდი ამბავი ატყდა? — ვეკითხები ჩუმად.

კადიჩამ თავი დამიქნია.

— არაფერია! — გამოვცერი კბილებში, მის გამხნევენას შევეცადე.

— ტრასიდან მოგხსნეს, — მითხრა მან.

— მომხსნეს? სულ? — და ცალყბად ჩავიცინე.

— სულ უნდოდათ. რემონტზე გადაყავდით... ბიჭებმა და-

გიცევს... ადგილობრივ რეისებზე გადაგიყვანეს. უფროსთან შედი, დაგიბარა.

— არ წავალ! უჩემოდ გადაწყვიტონი არ ვიღარდები!

გარეთ გამოვედი. თავჩაქინდრული მივდივარ. ღერეფანში ვილაც მოდის. მე განზე გავდექი, გზა დავუთმე. ალიბეკი იყო. იგი გარაჟიდან მოვიდა, ხელები ზეთში ჰქონდა მოთხუპნული. მინდოდა გამევლო, მაგრამ ალიბეკმა გზა გადამიღობა.

— არა, მოიცა! — და კუთხეში მიმაყენა. თვალებში ჩამაშტერდა და ბრაზიანი, მოსისინე ჩურჩულით მითხრა: — რაო, გმირი ხარ? დაამტკიცე? დაამტკიცე, რომ ძაღლის შვილი ხარ!

— მე კარგი მინდოდა, — ჩავიბურტყუნე.

— სტყუი!

— რას ვტყუი?

— თავის გამოჩენა გინდოდა კარგი საქმე კი დალუპე. მიდი ახლა და უმტკიცე, რომ შეიძლება მისაბმელით სიარული! არაფერი გამოვა! მეტიჩარა!

შეიძლებოდა ამ სიტყვებს სხვა ვინმე ჰკუთხე მოეყვანა, მაგრამ ჩემთვის ახლა სულერთი იყო: შეიძლება თუ არა დამტკიცება, გავიტან თუ არა ჩემსას. თუ აქამდე მე მარტო ჩემი სადარდებელი მაწამებდა, ამ წუთში გავიგე მთელი წუხილი და სიმძიმე იმ სირცხვილისა, როდესაც ხალხს ეზიზღები. მე მათ თვალში მეტიჩარა ვიყავი, მეტიჩარა, რომელსაც თავის გამოჩენა, სახელი უნდა. სინამდვილეში ხომ ასე არ იყო. მაგრამ ფაქტი ფაქტად რჩებოდა.

— გამიშვი! — მოვიშორე ილიბეკი. — უშენოდაც ცუდად ვარ!

ზღურბლზე გამოვედი. ცივი, გამჭოლი ქარი გზიდან თოვლს ხვეტავდა. ხალხი გვერდს მივლიდა და უხმოდ მათვალეობდა. რა უნდა მექნა? გათოშილი ხელები ჭიბეში ჩავიწყე და გასასვლელისაკენ წავედი. გაყინული გუბეების თხელი ყინული იმსხვრეოდა ჩემს ფერხთ. ფეხებში მანქანის ზეთის ყუთი წამომედო, გაბრაზებულმა გავკარი ფეხი, ქუჩაში გადავაგდე და თან გავყვი.

მთელი დღე უაზროდ დავხეტილობდი ქალაქში, ცარიელ

ნავსაყუდელში ვეგდე. ისიკ-ყული ბობოქრობდა. კარპაჭები ქანაობდნენ ნავმისაბმელებთან.

შემდეგ საჩაიეში აღმოვჩნდი. ვიჭექი მარტო ფანჯარასთან. მაგიდაზე ჩემს წინ არაყი და თეფშით საუზმე იდგა. პირველივე კიქისაგან გაბრუებული უაზროდ დავშტერებოდი ჩემს ფეხებს. ჩემი გული ისეთივე ამღვრეული და ჩაბნელებული იყო, როგორც ეს საჩაიე, რომელიც შავმთისფრო მძიმე კვამლსა და მთვრალეების უაზრო სადღეგრძელოებში ჩაძირულიყო.

რა ცხვირი ჩამოგიშვია, ჯიგითო? — მომესმა უცებ ვილაცის. ალერსიანი, ოდნავ დამცინავი ხმა. თავი ძლივს ავწიე. ჩემს გვერდით კადიჩა იდგა.

— ვერ სვამ მარტო? — გამიღიმა მან და მაგიდასთან დაჯდა. — მოდი, ერთად დავლიოთ!

კადიჩამ არაყი დაასხა და კიქა მომიწია.

— აილე! — მითხრა და მხიარულად, გამომწვევად ჩამიკრა თვალი, თითქოს აქ უბრალოდ, დროს გასატარებლად შემოვსულიყავით.

— შენ რაღა გიხარია? — ვკითხე უკმაყოფილოდ.

— რაზე ვიდარდო? შენთან ერთად ჩემთვის ყველაფერს სულერთია, ილიას! მე შენ უფრო მაგარი მეგონე. ცოტა რამ გადახდენიათ ჩვენისთანებს! — ხმადაბლა გაიცინა, ახლო მოიწია, კიქა მომიჭახუნა და ალერსიანი დაბინდული თვალებით შემომხედა.

დავლიეთ. პაპიროსს მოვუკიდე. თითქოს უკეთესად გავხდით და მთელი დღის განმავლობაში პირველად გავიღიმე.

— ყოჩალი ხარ, კადიჩა! — ვუთხარი და ხელი ჩამოვართვი. ის იმ საღამოს მართლაც კარგი იყო.

შემდეგ ქუჩაში გამოვედი. უკვე ბნელოდა. ტბიდან მონაბერი ქარი ხეებსა და ფარნებს ეთამაშებოდა. ფეხქვეშ მიწა ირყეოდა. კადიჩას მოვყავდი, ხელით ვეჭირე, მზრუნველობით ამიწია საყულოც.

— დამნაშავე ვარ შენთან, კადიჩა! — წავილაპარაკე მეთან მის წინაშე დანაშაულისა და მადლიერების გრძნობას განვიცდიდი. — მაგრამ იცოდე შენ თავს არავის დავაჩაგვრინებ... მე თვითონ ვაგებ პასუხს...

— დაივიწყე ეს ამბავი, ჩემო ძვირფასო! — მიპასუხებო. — მშფოთვარე ვინმე ხარ... სულ სადღაც მიისწრაფვი, მე კი შენს მაგივრად გული მტკივა, ადრე მეც ასეთი ვიყავი. ცხოვრებას ვერსად გაექცევი, ხელი ჩასჭიდე, რასაც მისწვდები... რა საჭიროა ბედთან თამაში.

— ეს იმაზეა დამოკიდებული თუ როგორ გავიგებთ! — შევეკამათე მე, შემდეგ დავფიქრდი და დავუმატე: — თუმცა იქნებ შენ მართალი ხარ...

ჩვენ კადიჩას სახლთან შევჩერდით.

— აი, მეც მოვედი! — მითხრა მან.

წასვლა მინდოდა, მაგრამ ვაყოვნებდი. ჩვენს შორის უკვე იყო ისეთი რაღაც, რაც მე მაკავებდა. მისი გულახდილობით გამოწვეული გაურკვეველი გრძნობა, რომელიც მაიძულებდა გავჩერებულყავი. გულახდილად რომ ვთქვა, მარტო დარჩენისაც მეშინოდა, არ მინდოდა საერთო საცხოვრებელში წასვლა. სიმართლე კარგია, მაგრამ იგი ხანდახან მეტისმეტად მწარეა და იძულებული ხარ გაექცე.

— რაზე დაფიქრდი, ჩემო კარგო? — შემეკითხა კადიჩა. დაიღალე, შორი გზა გაქვს გასაფლელი?

— არაფერია, როგორმე მივალ. ნახვამდის.

მან ხელი ხელზე მომკიდა:

— უ-უ, გაყინულხარ, შოიცა გაგათბობ! — ჩაილაპარაკა, ჩემი ხელი თავის პალტოში ჩამალა და მკერდით მომეკრა. მე ვერ გავბედე ხელი მეკრა, ვერ გავბედე წინ აღვდგომოდი ამ მხურვალე, ვნებიან ქალურ ალერსს. ჩემი ხელის ქვეშ მისი გული ფეთქავდა. თითქოს მოითხოვდა თავისას, დიდი ხნის ნანატრს. მე მთვრალი ვიყავი, მაგრამ ისე კი არა, რომ ვერაფერი გამეგო. ფრთხილად მოვარიდე ხელი.

— წახვედი? — მითხრა კადიჩამ.

— ჰო.

— კარგად იყავი! — კადიჩამ ამოიოხრა, მობრუნდა და ჰიშკრისკენ წავიდა. სიბნელეში კარები ახმაურდა. მეც ქუჩას გავუყუცი, მაგრამ რამოდენიმე ნაბიჯი გადავდგი და შევჩერდი. თვითონაც არ ვიცი, როგორ მოხდა, მე უკვე ჰიშკართან აღ-

წოვჩნდი. ხელი ვკარი. გაიღო. კადიჩა აქ მელოდებოდა. ყელზე ჩამომეკიდა, მაგრად მომეხვია და ტუჩებში მაკოცა.

— დაბრუნდი! — წაიხურჩულა მან. შემდეგ ხელი მომკიდა და წამიყვანა.

ლამით გამომეღვიძა და დიდხანს ვერ გავარკვიე სად ვიყავი. თავი მტკიოდა. ჩვენ გვერდიგვერდ ვიწექით. ერთ ლოგინზე. თბილი, ნახევრად შიშველი კადიჩა გვერდზე მომხუტებოდა და მშვიდად სუნთქავდა ჩემს მხარზე. გადავწყვიტე ავმდგარიყავი. წამოვიწიე. კადიჩას თვალი არ გაუხელია, ისე მომხვია ხელები; მრგვალი, გლუვი მუხლი ხელისგულზე დამადო.

— არ წახვიდე! — წყნარად ჩამიხურჩულა ყურში. შემდეგ თავი ასწია, სიბნელეში თვალებში ჩამაშტერდა და ალაპარაკდა ჩურჩულით, ნაწყვეტ-ნაწყვეტად — მე ახლა უშენოდ არ შემიძლია! შენ ჩემი ხარ! შენ ყოველთვის ჩემი იყავი! მე მეტი არაფერი არ მინდა ვიცოდე! მხოლოდ შენ გიყვარდე, ილიას! სხვას არაფერს ვთხოულობ... მანგრამ უკან დახევაც არ შემიძლია, გესმის, არ შემიძლია უპრი ვთქვა შენზე! — კადიჩა ატირდა, მისი ცრემლები სახეზე მეცემოდნენ.

მე არ წავსულვარ... განთიადისას ჩაგვეძინა, თურმე საკმაოდ დიდხანს ვიძინეთ. უკვე გათენებულ იყო. სასწრაფოდ ჩავიცვი. უსიამოვნო სიცივე გულს მიკუმშავდა. ქურქი მოვისხი, გამოვედი ეზოში, ჭიშკარში თავი გამოვყავი, თან ქურქის დილებს ვიკრავდი. მივიხედ-მოვიხედე. პირდაპირ ჩემს შესახვედრად მოდიოდა ბეწვის მოწითალო ფაფახიანი კაცი. იმის დანახვას ტყვია მომხვედროდა მერჩინვა! ჯანტაი მიდიოდა სამსახურში. იგი აქვე ახლოს ცხოვრობდა. ისეთი სახე მივიღე, ვითომც არ შემიმჩნევია, ზურგი შევაქციე და სწრაფად გავწიე ავტობაზისაკენ. ჯანტაიმ მრავალმნიშვნელოვნად ჩაახველა ჭემს უკან. მისი ნაბიჯები თოვლზე ჭრაჭუნებდა, არც მიახლოვდებოდა და არც მშორდებოდა. რამდენი შეფარული ღვარძლი იყო ამ ბოროტ ჭრაჭუნში. ასე გავიარეთ მთელი გზა ავტობაზამდე.

შესასვლელში აეჩქარდი. გარაჟისაკენ არ გამიხვევია, პირდაპირ კანტორისაკენ გავწიე. მინდოდა დავწყნარებულიყავი. გონს მოვსულიყავი.

ჯერ ძველებურად მტოვებდნენ. ეტყობა საკითხი საბოლოოდ არ იყო გადაწყვეტილი.

გამოვბრუნდი. ზურგს უკან მომესმა როგორ გაიღო კარი და ჯგუფ-ჯგუფად გამოვიდნენ შოფრები, ნაბიჯს ავუჩქარე. ისინი კიდევ ხმაურობდნენ. ალიბეკი მათ რაღაცას გაცხარებული უმტკიცებდა:

— მისაბმელისათვის მუხრუქებს ჩვენ თვითონ დავამზადებთ ავტობაზაში. სულაც არაა რთული საქმე კომპრესორიდან შლანგის გადაგდება და კალაპოტში ჩასმა! ეს რა, ილიასია თუ? ილიას, მოიცადე! — დამიძახა მან.

არ შევჩერებულვარ, გარაჟისაკენ წავედი, ალიბეკი დამეწია, მხარზე მომქაჩა.

— ეშმაკმა წაიღოს! დავაჯერე როგორც იქნა! მოემზადე, ილიას! წამოხვალ ჩემს მეწყვილედ? საცდელი რეისია! მისაბმელით!

არ მომეწონა: ჩემი ხსნა გადაწყვიტა, ბუქსირზე უნდა აიყვანოს ფათერაკიანი მეგობარი! მეწყვილედ! მხრიდან ხელი მოვიცილე:

— დამეკარგე შენი მისაბმელით!

— რას ბრაზობ? თვითონ ხარ დამნაშავე! ტყუილად კი არ გეუბნები: ჩვენ აქ რაღაც მოვიფიქრეთ, ხალხმა გვირჩია, თანაც მე თვითონ მომყავდა შენი მისაბმელი უღელტეხილიდან... გამოვა...

— როგორც გინდა ისე გააკეთე, მე კი თავი დამანებე, მომშორდი.

— გეყოფა, შუაგზაზე ხომ არ მივატოვებთ საქმეს. სულ დამავიწყდა, ვალოდკა შირიაევს შენთვის არაფერი უთქვამს?

— არა, არ მინახავს. რა იყო?

— როგორ თუ რა! სად დაიკარგე? ასელი გზაზე გელოდება, ყველას ეკითხება, განიცდის! შენ კი...

მუხლთ მომეკვეთა. ისე ცუდად გავხდი, ისეთ ხასიათზე დავდექი, მერჩივნა ადგილზე მოვმკვდარიყავი. ალიბეკი კი სახელოზე მკიდებს ხელს და მიხსნის მისაბმელზე გაკეთებული რაღაც მოწყობილობის შესახებ. და კიდევ ვინ იცის რახ. შორიახლოს, ჯანტაი დგას და ყურს გვიგდებს.

— მომშორდი! — გამოვგლიჯე ხელი. — რა ჯანდაბა გინდათ ჩემგან! პასუხისგებაში მიმეცით! მეყო! არავითარი მისაბმელი მე არ მქირდება! არც არავის მეწყვილედ არ წავეყვები! გასაგებია?

ალიბეკი მოიღუშა, შუბლზე ძარღვები აუთამაშდა:

— თვითონ წამოიწყე, ხალხი ატეხე — ახლა კი ბუჩქებში პირველი გარბიხარ? ასეა არა?

— როგორც გინდა ისე გაიგე! — მოვეუქერი მე, შემოვბრუნდი და გარაჟისაკენ გავწიე.

მანქანასთან მივედი, ხელები მიკანკალებს, არ ვიცი რას ვაკეთებ. რატომღაც მანქანის ქვეშ, ორმოში ჩავხტი, აგურს მივეყრდენი, გაცხელებული შუბლის გაგრილება მინდოდა.

— ყური მიგდე, ილიას! — ზედ ყურთან მომესმა ვიღაცის ჩურჩული.

თავი ავწიე: ეს კიდევ ვინ გამოტყვრა! ჯანტაი თავის წითელი ფაფახით ორმოს თავზე სოკოსავით ჩაცუკქულიყო და მოკუტუთული თვალებით მიყურებდა.

— შენ სწორად დასცხე, ილიას!

— ვის?

— ალიბეკს, აქტივისტს! ქვასავით მოხვდა კბილებში უცებ გაჩუმდა, თორემ რა დააწყნარებდა ნოვატორს!

— შენ რაღა გესაქმება?

— როგორ თუ რა, შენ როგორ ვერ მიხვდი, რომ ჩვენ, შოფრებს, მისაბმელები არაფერში გვქირდება. ვიცით ჩვენ როგორც კეთდება ეს: გაზრდიან გამომუშავების ნორმას, შეამცირობენ გარბენას, მოდი და იწვალე, შეფასებას ტვირთკილომეტრზე ჩამოსჭრიან, რა ხერხია, რომ ჩვენ ჯიბეს დავართყათ. ერთდღიანი სახელი, შემდეგ რა? ჩვენ შენზე ნაწყენი არა ვართ, ეგრევე იყავი...

— კი მაგრამ ვინა ხართ ეს — თქვენ? — რაც შეიძლება და მშვიდად შევეკითხე. თან მოწოლილი ბოლმა მახრჩობს. აი თურმე რატომ არაფერი თქვა, როცა მნახა, ბუქსირით რომ მანქანა გადამყავდა. შორს იყურებოდი, მაგრამ ცხვირს იქით ვერაფერს ხედავ და ფიქრობ, რომ სხვებიც ვერ მიხვდებიან, როგორ სულელად მთვლი?!

— ჩვენ — ეს შენა ხარ? — შევეკითხე.

— მარტო მე რატომ, — თვალები აახამხამა ჯანტაიმ.

— ტყუიხარ! გათახსირებულო! შენს ჭინაზე ვივლი მისაბ-
მელით! თავს დადებ — მოვახერხებ. ახლა კი აქედან გაეთ-
რიე! მე შენ კიდევ მოგწვდები!

— კარგი, კარგი, ძალიან ნუ იჭიმები! — შემომიღრინა ჯან-
ტაიმ. — გიცნობთ რა სულწმინდაცა ხარ... მაინც იფიქრე...
რაც შეესება იმას, დრო ატარე მანამ შეგიძლია...

— ოჰ, შენი! — წამოვიყვირე და თავდავიწყებით, რაც
შემეძლო, ნიკაპში ამოვარტყი.

იგი ორმოს ნაპირზე იჯდა და ისევე გადავარდა ზურგზე,
ფაფახი მიწაზე გაგორდა. მე კატასავით ამოვხტი ორმოდან და
ვეცი, მაგრამ ჯანტაიმ წამოხტომა მოასწორო, გვერდზე გადახ-
ტა და დაქრილივით აღრიალდა:

— ხულიგანო! ბანდიტო! მუშტებით ვერ შემაშინებ! შენც
მოგივლიან! თავი აიშვი, ჯავრს იყრი!..

ყოველი მხრიდან შეგროვდა ხალხი. ალიბეკიც მოვარდა.

— რა მოხდა? რატომ მოარტყი?

— სიმართლისათვის! — აქაქანდა ჯანტაი. — იმიტომ, რომ
სიმართლე პირდაპირ პირში მივახალე, თვითონ მოიპარა მი-
საბმელი, გადაჩეხა, ჩაფუშა საქმე, ხოლო როცა სხვებს უნ-
დათ პატიოსნად გამოასწორონ შეცდომა, ეგ ცხვირ-პირში
ურტყამს! ახლა მას ეს ამბავი ხელს არ აძლევს, სახელი გაუფ-
რინდა.

ალიბეკი მომიბრუნდა. გაფითრებულს ბრაზისაგან ენა და-
ება.

— უნამუსო! — მიბიძგა მან მკერდში. — თავს გაგივიდა,
ულელტეხილი რომ ვერ დაიმორჩილე ჯავრს იყრი? არაფერია,
უშენოდაც. იოლად გავალთ! უგმირებოდ...

ხმას არ ვიღებდი. არ შემეძლო რამე ამეხსნა. ისე ვიყავი
შექრწუნებული ჯანტაის ამ საშინელი, თავხედური ტყუილით,
რომ კრიჭა ვერ გავხსენი. ამხანაგები დაბლვერილნი მიცქე-
როდნენ. ჯანტაი კი განაგრძობდა ყვირილს, თან გახეთქილი
ტუჩიდან გადმონადენ სისხლს ფაფახით იწმენდა.

მე მანქანას მივვარდი. ავტობაზიდან გამოვიქეცი.

გზაში დავთვერი. ძალიან ცუდად ვიყავი. არ ვიცოდი რით დამეოკებინა ბრაზი, ჩემს თავზე რომ მომდიოდა უკანასკნელ დღეებში ჩადენილი საქციელის გამო. სინდისიც მოსვენებას არ მაძლევდა, როგორც კი ასელი გამახსენდებოდა.

ჯერ ერთ გზისპირა მალაზიაში შევირბინე — არ მიშველა. გავჩერდი ისევ, მთელი ჭიქა დავლიე. შემდეგ კი წავიდა — მხოლოდ გაიეღვებდნენ ხილები, საგზაო ნიშნები და შემხედური მანქანები. თითქოს გავმხიარულდი. „ეკ! — ვფიქრობ, — ყველაფერი ჯანდაბას, რა გაკლია, მიჯდომიხარ საქეს — ატრიალე. კადიჩაც არაფერ შუაშია: რა გაგიფუქა, ან რითია სხვაზე უარესი. ახალგაზრდა, მშვენიერი ქალია, ლამაზი, გულკეთილი. უყვარხარ, თავს ურჩევნიხარ. შენი გულისათვის ყველაფერზე თანახმაა, შენ კი მასზე ათასნაირი რამის გაფიქრებას ბედავ. რა ცუდად გაატარე ის ღამე? უმადურო ღორო!

სახლში საღამოსხანს მივედი, კარებთან ვდგავარ და ვბარბაცებ. კურტაკი ცალ მხარეზე მაქვს მოგდებული, ხანდახან ცალ ხელს ვინთავისუფლებ ხოლმე, რომ საქესთან უფრო თავისუფლად ვიყო. დამჩემდა ბავშვობიდან, ქვების სროლისას შევეჩვიე.

ასელი გამოექანა, მერე გაჩერდა — შეშინებული და გაჯვირებული.

— ილიას, რა დაგემართა? — შემდეგ, ვგონებ მიხვდა რაშიც იყო საქმე. — რაღას უდგებარ? დაიღალე, შეგცივდა? გაიხადე!

იგი წამოიწია. უნდოდა დამხმარებოდა, მაგრამ მე უსიტყვოდ გავწიე გვერდზე. სირცხვილი უხეშობით მინდოდა დამეფარა. ბარბაცით შევედი ოთახში, რაღაცა გადავაყირავე და მძიმედ დავეშვი სკამზე.

რა იყო, ილიას, მოხდა რამე? — მოვიდა ასელი და შეშფოთებით ჩამხედა მთვრალ, ამღვრეულ თვალებში.

— რა, არ იცი თუ? — მე თავი დავხარე: უმჯობესია თვალებში არ ჩამხედოს. ვიჭექი და ველოდი, რომ ასელი მოჰყვებოდა საყვედურებს, იწუწუნებდა თავის ბედზე, დაიწყებდა გაჩენის დღეს. მზად ვიყავი მომესმინა ყველაფერი, ყოველგვარი თავის მართლების გარეშე. მაგრამ იგი ხმას არ იღებდა

თითქოს ოთახში არაეინ იყო. თვალი ჩუმად გავაპარე და დავინახე: ასელი ფანჯარასთან იდგა, ზურგშექცეული მის სახეს ვერ ვხედავდი, მაგრამ ვგრძნობდი, რომ იტანჯებოდა, რომ თვალთაგან ცრემლები სდიოდა. სიბრალულმა გული შემიკუმშა.

— ასელ, იცი რა უნდა გითხრა, — დავიწყე გაუბედავად. — მე უნდა გითხრა! — და დავდუმდი, მძიმედ ვსუნთქავდი, გამბედაობა არ მეყო გამოვმტყდარიყავი. არა, მე არ შემეძლო მეთქვა მისთვის, რასაც იგი არასოდეს არ მოელოდა. შემებრალა და სწორედ მაშინ შევცდი. იმ წუთში ვერ მოვახერხე თავი დამეძლია — თქვენებთან აულში წასვლას, ალბათ, მალე ვერ მოვახერხებთ, — გადავიტანე ლაპარაკი სხვა საგანზე. — როგორმე უფრო გვიან. ახლა ამისი თავი არა გვაქვს...

— კარგი, გადავდოთ! საჩქარო არაა! — გამომეპასუხა ასელი. თვალეები შეიმშრალა და ჩემთან მოვიდა. — შენ ახლა ამაზე ნუ იფიქრებ, ილიას. ყველაფერი კარგად იქნება. შენ თავზე იფიქრო უმჯობესია. რალაც უცნაური გახდი. ველარ გცნობ, ილიას...

— კარგი, კარგი! — გავაწყვეტინე გაბრაზებულმა იმით, რომ სულმოკლეობა გამოვიჩინე. — დავილაღე, მეძინება.

უნდა დავწოლილიყავი და თვალეები დამეხუჭა, რომ კიდევ უფრო მეტი ტყუილი არ მეთქვა, რომ არაფერი არ გამეკეთებინა არაგულწრფელი. ასელი თავს არ მამებზრებდა შეკითხვებით. რამდენჯერმე მინდოდა ყველაფერი გულწრფელად მეთქვა, მაგრამ რაც დრო გადიოდა, მით უფრო მიჭირდა ლაპარაკი. თურმე ყველაფერს თავისი დრო, თავისი ჟამი ჰქონია. გამოვფხიზლდი და მივხვდი, რომ აღარასოდეს არ ვეცყვი მას, რაც მოხდა, თუ რატომ, თვითონაც ვერ ამეხსნა ჩემი თავისთვის.

ერთი დღის შემდეგ, უკან დაბრუნებისას უღელტეხილის გადაღმა შევხვდი ალიბეკს. მისაბმელით მოჰყავდა მანქანა. დოლონი აღებული იყო.

რომ დამინახა, ალიბეკი მიმავალი მანქანის მარჯვენა მხრიდან გადმოხტა, ხელი დამიქნია. სიჩქარეს შევეუნეღე. ალიბეკი იდგა გზაზე მხიარული, მოზეიმე.

— გამარჯობა, ილიას! ჩამოდი, მოეწიოთ! — დამიძახა მან.

მე დავამუხრუჭე. ალიბეკს მანქანის კაბინაში საკესთან ხალგაზრდა ბიჭი უჭდა, მეორე შოფერი. მანქანის ბორბლებზე ჭაჭვები დაეხვიათ. მისაბმელისათვის პნევმატური მუხრუჭები დაედგათ. ეს უცებ შევნიშნე. მაგრამ არ გავჩერებულვარ. ძალიან ნაწყენი ვიყავი. მოახერხე — ძალიან კარგი! მე კი თავი დამანებე.

— მოიცა, მოიცა! — გამომეკიდა ალიბეკი. — საქმე მაქვს, შეჩერდი, ილიას! ეხ, მართლაც რომ შეითანი ხარ, რას შევები? კარგი, შენ იცი...

მე გავრეკე მანქანა. ნუ ყვირიხარ. არავითარი საქმე ჩვენ არა გვაქვს. ჩემი საქმე დიდიხანია წასულია. ცუდად მოვიქეცი, მე საუკეთესო მეგობარი დავკარგე. თანაც ის ხომ მართალი იყო, მართალი ყველაფერში, მე ახლა კარგად მესმის, მაგრამ მაშინ არ შემეძლო მისთვის მეპატიებინა, როგორ უბრალოდ და სწრაფად მიაღწია ყველაფერ იმას, რაც მე ამდენი ნერვების, თითქმის სიცოცხლის ფასად დამიჯდა.

ალიბეკი ყოველთვის დაკვირვებული, სერიოზული ბიჭი იყო. არასოდეს არ წავიღოდა უღელტეხილზე პარტიზანივით, როგორც მე. ასეთი რამ მის ხასიათს არ შეეფერებოდა. სამაგიეროდ ეს იყო მისი ძალა. იგი სწორად მოიქცა, როდესაც მანქანა მეწყვილესთან ერთად წაიყვანა. მათ შეეძლოთ ერთმანეთი შეეცვალათ გზაში და უღელტეხილისათვის განახლებული ძალებით შეეტიათ. უღელტეხილზე ხომ მთავარი—მოტორი, ნეზისყოფა და ადამიანის ხელებია. გარდა ამისა, ალიბეკს მეწყვილესთან ერთად ორჯერ უმცირდებოდა გარბენის დრო. ყველაფერი ეს მან გაითვალისწინა და მასთან ერთად მისაბმელს მუხრუჭები მოარგო. არც ჩვეულებრივი ჭაჭვები დავიწყებია წინა ბორბლებზე. ერთი სიტყვით, იგი უღელტეხილს შეიარაღებული შეებრძოლა და არა მარტო „ვაშათი“. აი ასე გახდა დღონი მისაწვდომი მისაბმელიანი მანქანებისათვის.

ალიბეკის შემდეგ ასეთი მანქანების ტირება სხვებმაც დაიწყეს, ყველამ ერთად არა, რა თქმა უნდა, ასეთ საქმეში ყოველთვის მთავარი პირველი ნაბიჯია. იმ ხანებში მანქანებიც შეგვემატა, დაგვეხმარნენ მეზობელი ავტობაზიდან. კვირანახე-

რის განმავლობაში დღედაღამე ბორბლების ქვეშ გუგუნებდა ტიან-შანის ტრაქტი. ერთი სიტყვით, სიძნელეების მიუხედავად, ჩინელი ამხანაგების თხოვნა დროზე შეეასრულეთ, არ დავალატეთ. მეც ვმუშაობდი. ეს ახლა ვყვები ასე, როცა ყველაფერმა გაიარა, როცა ამდენი წელი გავიდა, იმ ცხარე დღეებში კი კოფოზე თავი ვერ შევიმაგრე, სხვანაირად შებრუნდა ჩემი ცხოვრების ეტლი...

როცა ალიბეკთან შეხვედრის შემდეგ ავტობაზაში მივედი, უკვე გვიან იყო. წავედი საერთო საცხოვრებელში, მაგრამ გზაზე ცენტრალურ ქუჩაზე ისევ საჩაიეში შევუხვით. მთელი ამ დღეების განმავლობაში რალაც დაუძლეველი, არაადამიანური მისწრაფება მქონდა — დავმთვრალიყავი უგონოდ, თუნდაც ერთხელ ყველაფერი დამვიწყებოდა და მკვდარივით დამეძინა. ბევრი დავლიე, ძალით ვსვამდი, მაგრამ არაყი თითქოს არ მოქმედებდა ჩემზე. საჩაიედან კიდევ უფრო გაღიზიანებული და ნერვებაშლილი გამოვედი. შუალამისას დავეხეტებოდი ქუჩებში და შემდეგ არც დავფიქრებულვარ, ისე შევუხვით სანაპირო ქუჩაზე, კადიჩასთან. ის თურმე მე მელოდა.

შემდეგ ასე გაგრძელდა. ორ ცეცხლს შუა ვიწვოდი. დღისით სამუშაოზე, საჭეს ვუჯექი, ხოლო საღამოს, როცა ავტობაზაში ვრჩებოდი, კადიჩასთან მივდიოდი. გული მისკენ მეწეოდა, მასთან კარგად ვგრძნობდი თავს, მშვიდად ვიყავი, თითქოს ვემალებოდი ჩემს თავს, ხალხს, სიმართლეს. მეჩვენებოდა, რომ მხოლოდ კადიჩას ვუყვარდი და ესმოდა ჩემი. სახლში მისული, ვცდილობდი ჩქარა წავსულიყავი უკან. ასეღ, ჩემო ძვირფასო ასეღ! მას რომ სცოდნოდა თავისი ნდობით, სულიერი სიწმინდით, სახლიდან მიშორებდა. იგი მაიძულებდა მეძებნა მიზეზი, რომ რაც შეიძლება ჩქარა წავსულიყავი; არ შემეძლო დიდხანს დარჩენა, რადგან ვიცოდი, რომ მისი ღირსი არ ვიყავი, არ ვიმსახურებდი იმას, რასაც იგი ჩემთვის აკეთებდა. რამდენჯერმე მივედი სახლში მთვრალი. მას ერთხელაც არაფერი უთქვამს. აქამდე ვერ მივხვედრილვარ რას ნიშნავდა ეს მისი მხრიდან: სისუსტეს, უნებისყოფობას, თუ პირიქით, ვაჟკაცობასა და რწმენას ადამიანში? დიახ, რა თქმა უნდა, იგი ელოდა, მას სჯეროდა, რომ თავს ხელში ავიყვანდი, რომ

მე მოვერეოდი ჩემს თავს და გავხდებოდი ისეთი, როგორც ვიყავი. მაგრამ უმჯობესი იყო გავეღიანებინებ, იძულებული ვიყავი მეღიანებინებინა სიმართლე. შეიძლება, ასევე მოეთხოვა ჩემთვის პასუხი, რომ ცოდნოდა მარტო სამსახურის საქმეები არ მაწუხებდა. მას წარმოდგენა არ ჰქონდა რა გადამხდა თავს ამ დღეებში. მე კი შეცოდებოდა იგი, ლაპარაკს ყოველთვის მეორე დღისათვის, შემდეგისათვის ვდებდი და ამიტომაც ვერ მოვასწარი გამეკეთებინა ის, რისიც ვალდებული ვიყავი — მისი, ჩვენი სიყვარულის, ჩვენი ოჯახის წინაშე.

უკანასკნელად განხარებული, აღფრთოვანებული დამხვდა იგი წამოწითლებულიყო. თვალები უბრწყინავდა, უცინოდა პირდაპირ შემათრია ოთახში, არ მომცა საშუალება კურთაქვ და ჩექმები გამეხადა.

— შეხედე, ილიას! სამატი უკვე ფეხზე დადგა!

— რას ამბობ! სად არის?

— აგერ, მაგიდის ქვეშ!

— მერედა ხომ ხედავ, რომ დაფორთხავს.

— ახლავე დაინახავ! აბა, შეილო, აჩვენე მამას როგორღა დაგახარ! მოდი, სამატი, მოდი!

სამატი როგორღაც მიხვდა რას მოითხოვდნენ მისგან. მხიარულად გამოცოცდა მაგიდის ქვეშიდან, გაჩერდა ლოგინთან, ხელი წაატანა და ძლივს გაიმართა. იდგა ცოტა ხანს თავის ბუნჩულა ფეხებზე, იღიმებოდა, ბარბაცებდა და შემდეგ ისევე ვაეკაცური ღიმილით დაეცა იატაკზე. მივვარდი, ხელში ავიტაცე, მაგრამ მივიყარი ბიჭუნა, რომლისგანაც რძის სუნის მცემდა. რა მშობლიური იყო ეს სურნელი, ისეთივე როგორც ასელი.

— დაახჩობ, ილიას, ფრთხილად! — ასელმა ბავშვი გამომართვა. რას იტყვი, ჰა? გაიხადე. მალე სულ დიდი გახდება, მაშინ დედაც დაიწყებს მუშაობას. ყველაფერი მოგვარდება, ყველაფერი კარგად იქნება, ასე არაა, შეილო? შენ კი! — ასელმა მომღიმარედ, ოდნავ სევდიანად შემომხედა, მე სკამზე დავჯექი. გავიგე და მივხვდი, რომ ამ მოკლე სიტყვაში მან ჩააქსოვა ყველაფერი რისი თქმაც უნდოდა, ყველაფერი, რაც გულში დაუგროვდა ამ დღეებში. ეს იყო თხოვნაც, საყვედურიც, იმე-

დიც. მე ახლა უნდა მოვყოლილიყავი ყველაფერს, ან დაუყოვნებლივ წავსულიყავი. უმჯობესი იყო წავსულიყავი. იგი ბედნიერი იყო და არაფრის ეჭვი არ ჰქონდა. წამოვდექი.

— მე წავეალ.

— საით? — აწრიალდა ასელი. — დღესაც არ დარჩები? ჩაი მაინც დალიე.

— არ შემძლია. მეჩქარება, — წაეიბურტყუნე მე. — თვითონაც იცი როგორი სამუშაო მაქვს...

არა, სამუშაო არ მეწეოდა სახლიდან. მე მხოლოდ დილით უნდა წავსულიყავი რეისში.

ბნელოდა, მანქანასთან მივედი, მძიმედ დავეხეთქე საჯდომზე და სიმწრისაგან ავკვნესდი. დიდხანს ვწვალობდი, ვიდრე გასაღებს მოვარგებდი. შემდეგ გზაზე გავედი, მივდიოდი, სანამ თვალს არ მიეფარა განათებული ფანჯრები. ხეობაში, ხილთან გზიდან გადავუხვიე, მანქანა ბუჩქებში შევიყვანე და სინათლე ჩავაქრე. გადავწყვიტე აქ დამეძინა. პაპიროსი ამოვიღე. ასანთის ერთადერთი ღერი დამრჩენოდა. გავკარი, აინთო და უცებ ჩაქრა. პაპიროსიანად გადავუძახე ყველაფერს გარეთ. კურტაკი თავზე გადავიფარე და საჯდომზე მოვიკეცე.

მთვარე მიბღვერდა ცივ მთებს ზემოდან. სევდიანად უსტვენდა ხეობაში ქარი, მანქანის გამოღებულ კარებს აქანებდა და ჩუმად აკრაქუნებდა. კაბინაში გაწოლილმა, ძლიერად, ისე როგორც არასდროს, ვიგრძენი ჩემი სიმარტოვე, მოწყვეტილი ვიყავი ხალხისაგან, ოჯახისაგან, ამხანაგებისაგან. ასე ცხოვრება არ შეიძლებოდა. თავს სიტყვა მივეცი: როგორც კი რეისიდან დავბრუნდებოდი, მოველაპარაკებოდი კადიჩას, ბოდიშს მოვუხდიდი, ვთხოვდი დავევიწყებინე და დაევიწყა ყველაფერი, რაც ჩვენს შორის იყო. ეს სწორი იქნებოდა, პატიოსანი და სამართლიანიც.

მაგრამ ცხოვრებამ ყველაფერი სხვაგვარად გადაწყვიტა. არასდროს არ მოველოდი თუ ასეთი რამ მოხდებოდა. ერთი დღის შემდეგ, დილით, როცა საუღელტეხილო ბაზაში მივედი. სახლში არავინ დამხვდა. კარი ღიად იყო მიტოვებული. ჭერ ვიფიქრე, რომ ასელი სადღაც გავიდა შეშისათვის, ან წყლისათვის. მივიხედ-მოვიხედე. ოთახში უწესრიგობა იყო. ღუმელი-

დან, რაღაც ისეთი სიცივე ვიგრძენი თითქოს აქ არავინ ცხოვრობდა. გავწიე სამატის საწოლისაკენ — ცარიელი დამიხვდა.

— ასე! — წავიჩურჩულე შემინებულმა. — „ასე!“ — ჩურჩულითვე მიპასუხეს კედლებმა.

კისრისტეხით გავვარდი გარეთ.

ასე! — დავიყვირე ეზოში. არავინ მიპასუხა. მივეარდო მზობლებთან, ბენზინის ჩამოსასხმელთან, ხეირიანად არავინ არაფერი იცოდა. მითხრეს, რომ გუშინ მთელი დღით საღვაც იყო წასული, ბავშვი ნაცნობებს დაუტოვა, ღამე დაბრუნდა სახლშიო. „წავიდა, ყველაფერი გაიგო!“ — შემაძრწუნა საშინელმა ფიქრმა.

არა მგონია, რომ როდესმე ასე მეტარებინოს მანქანა ტიან-შანის მთებზე, როგორც იმ ჩემთვის უბედურ დღეს. მეჩვენებოდა, რომ რომელიმე მოსახვევში ან ხეობაში, ანდა სადმე გზაზე დავეწეოდი. მიმინოსავით დავაცხრებოდი ხოლმე წინ მიმავალ მანქანას, პირდაპირ მის გვერდზე ვამუხრუჭებდი, ვათვალთვლებდი კაბინას, ძარას და მივეპროლებდი ისევ, თან შოფერთა ლანძღვა-გინება მიმყვებოდა. ასე მივქროდი შეუსვენებლივ სამი საათი, მანამ რადიატორში წყალი არ ამიდუღდა. გამოვვარდი კაბინიდან, რადიატორს თოვლი დავაყარე, წყლის მოსატანად გავიქეცი. მანქანა ხვნეშოდა, როგორც ღონეგამოცლილი ცხენი. ის იყო საჭეს უნდა მოვჯდომოდი, რომ ალიბეკის მანქანა დავინახე. გამეხარდა. თუმცა ერთმანეთს არ ვესალმებოდით და არც ველაპარაკებოდით, მაგრამ თუ ასელი მათთან იყო, ვიცოდი აუცილებლად მეტყოდა. გზაზე გამოვვარდი, ხელი ავწიე:

— ალიბეკ, გაჩერდი! ალიბეკ! გააჩერე!

— შემეცვლელმა, რომელიც საჭეს უჯდა, ალიბეკს გადახედდა. იგი მოღუშული შებრუნდა. მანქანამ გამიქროლა ისე, რომ არ შეჩერებულა. ვიდრე გზაზე თოვლში ამოგანგლული და დიდხანს მქონდა ხელი აწეული. შემდეგ სახე მოვიწმინდე. რას იზამ, ვალს გადახდა უხედება! მაგრამ მე გაბრაზების თავი არ მქონდა. მაშასადამე, ასელი მათთან არ მისულა. გამოდის, რომ თავისიანებთან წავიდა აულში. სხვა გზა არ ჰქონდა. როგორ გადააბიჯებდა იგი ამ სახლის ზღურბლს, რას იტყოდა?

დაუყოვნებლივ აულში უნდა წავსულიყავი.

მანქანის გადმოტვირთვის შემდეგ ავტობაზის ეზოში არ შევსულვარ. მანქანა ქუჩაში დავტოვე და სადისპეტჩეროში გავიქეცი საბუთების ჩასაბარებლად. გასასვლელში ჯანტაის შევეჩხეხე. ჩემად გაძვრა, სახეზე თავხედური, საძულველი ღიმილი გაჰყვა.

აქლოშინებულმა შევყავი თავი სადისპეტჩეროს ფანჯარაში, საგზური კადიჩას დავუგდე მაგიდაზე. მან უცნაურად შემომხედა. რალაც შეშფოთებამ, დანაშაულის მსგავსმა გაიელვა მის თვალებში.

— ჩაიბარე ჩქარა! — ვუთხარი მე.

— მოხდა რამე?

ასელი წავიდა სახლიდან.

— რას ამბობ? — კადიჩა გაფითრდა, მაგიდიდან წამოდგა, ტუჩები მოიკვნიტა და წაილაპარაკა. — მაპატიე, მაპატიე, ილი-ის! ეს მე, მე...

— რა შენ? თქვი, გამაგებინე, მითხარი ყველაფერი! — შევევარდი ოთახში.

— თვითონაც არ ვიცი როგორ მოხდა. გულწრფელად გეუბნები, ილიას! გუშინ გუშაგმა დამიკაკუნა ფანჯარაზე, მითხრა ვილაც ქალიშვილი მოვიდა, შენი ნახვა უნდაო. დაუძახა მას და თვითონ წავიდა. მაშინვე ვიცანი. მან ჩემად შემომხედა და მკითხა: „ეს მართალია?“ და უცებ, ჩემდა უნებურად, თავდავიწყებულმა ვუთხარი: „დიახ, მართალია. ყველაფერი მართალია. ჩემთანაა!“ — იგი ფანჯარას მოწყდა. მე კი მაგიდაზე დავემხე და ავტირდი, თან სულელივით ვიმეორებდი: „ჩემია იგი! ჩემია!“ ასელი გაიქცა და მე აღარ მომიკრავს მისთვის თვალი.

— მოიცა. საიდან გაიგო?

— ჯანტაიმ უთხრა. ეს მან გააკეთა, ის მეც მემუქრებოდა. შენ ხომ იცნობ იმ უსინდისოს!

— ვიცნობ. მხოლოდ ამჯერად სიმართლე თქვა.

— წადი, ილიას, მოძებნე იგი. მე მეტს აღარ შეგიშლით ხელს, წავალ სადმე...

მანქანა მიმაქროლებდა ზამთრის ტრამალზე. შავმოიისფრო,

გაყინულ მიწაზე ძნელი იყო სიარული. ქარი ნამქერს ატრიო-
ლებდა, ამოქჳონდა არხებიდან და ერეკებოდა მინდორში, შორს
კი, სადღაც შორს, მთის ძირში შავად მოჩანდა აულის ქარ-
დაკრული ღობეები და გაშიშვლებული ბალები.

კოლმეურნეობაში სადამოხანს მივედი. გაეჩერდი ნაცნობ
ეზოსთან, სწრაფად მოვუკიდე პაპიროსს, გული რომ დამემ-
შვიდებინა. შემდეგ ნამწვი ჩავაქრე და სიგნალი მივეცი. ასე-
ლის მაგივრად დედამისი გამოვიდა, მხრებზე ქურქი მოესხა.
მე კარები გავაღე, საფეხურზე დავდექი და ჩუმაღ ვთქვი:

— გამარჯობათ, აპა!

— აა, ეს შენ გამოცხადდი! — მიპასუხა გაკაპასებულმა
ქალმა. — შენ ყოველივე იმის შემდეგ ბედავ „აპა“ დამიძახო?
აქედან გაეთრიე, არ გნახონ ჩემმა თვალებმა. მაწანწალავ, გა-
დაიბირე ჩემი შვილი, ახლა კი მობრძანდი. უსირცხვილოვ, თვა-
ლებს როგორღა მისწორებ, ამირიე მთელი ცხოვრება...

მოხუცი პირის გალების საშუალებას არ მაძლევდა. იგი
მლანძღავდა და მათრევდა, რაც შეეძლო. მის ხმაზე მეზობელი
სახლებიდან ხალხი გამოვიდა, შეგროვდა, ბიჭებიც გაჩნდნენ.

— წადი, მანამ ხალხი არ შემიყრია! წადი შერცხვენილი,
რომ არასოდეს გნახო — წამოიწია ჩემზე განრისხებულმა
დედამ, ქურქი მიწაზე დააგდო.

— ეი, წადი აქედან სანამ კარგად ხარ! — პირქუშად ჩაიბუ-
ბუნა ვილაცამ და ხელით მიჩვენა მოვშორებოდი იქაურობას.

სხვა გზა არ იყო, საჭეს უნდა მივჯდომოდი. უნდა წავესუ-
ლიყავი, რადგან ასელს ჩემი ღანახვაც არ უნდოდა. მანქანას
ქვები და ჯოხები დააცვივდა. ეს ბიჭები მაცილებდნენ აული-
დან, რატომ მექცეოდნენ ასე? შეიძლება ფიქრობდნენ, რომ
მე შეურაცხყოფა მივაყენე, რამე ვაწყენინე ამ მოხუც ქალს?
ან გადაწყვიტეს, რომ ვილაც ბანდიტი ვარ...

იმ ღამეს დიდხანს დავზეტილობდი ტბის ნაპირას. იგი ად-
გილს ვერ პოულობდა, ბორგავდა, მთვარის შუქით განათებუ-
ლი. ო, ისიკ-ყულო, მუღამ მხურვალე ტბავ! შენ იმ ღამეს ცივი
და მიუკარებელი იყავი. მე ვიკეჩი გადაბრუნებული ნავის
ფსკერზე. ტალღები მრისხანედ ეხეთქებოდნენ რიყეს, მცემ-

დნენ ჩექმის ყელეებზე და მძიმე ხვნეშით ბრუნდებოდნენ უკან. შემდეგ ვილაც მოვიდა ჩემთან, ფრთხილად დამადო მხარზე ხელი. კადიჩა იყო.



რამდენიმე დღის შემდეგ ერთად წავედით ფრუნზეში, მოვეწყეთ საძიებო ექსპედიციაში, რომელიც ანარხაის ველის საძოვრებს სწავლობდა. მე — შოფრად, კადიჩა — მუშად. ასე დაიწყო ახალი ცხოვრება.

შორს, ანარხაის სიღრმეში, ბალხაშის პირეთამდე მივედით ექსპედიციასთან ერთად. ექსპედიცია რომ კიდევ უფრო შორს წასულიყო, უკან არც მაშინ დავბრუნდებოდი. რახან მოინდომე წარსულთან კავშირის გაწყვეტა, უნდა გაწყვეტო სამუდამოდ.

პირველ ხანებში დარდს მუშაობით ვიქარებდი. საქმე კი ბევრი მქონდა. სამ წელზე მეტი ხნის განმავლობაში აღმა-დაღმა გადავსერე ანარხაი, ქები გავთხარეთ, გზები გავქერით, ბაზები გავმართეთ. ერთი სიტყვით, ანარხაი ძველებურად გაუვალი ველური აღარ არის, სადაც შეიძლებოდა დღისით-მზისით გზა აგბნეოდა, სადაც შეგეძლო მთელი თვე გეხეტიალა და ვერ გაგეგო სად არის ამ ბორცვებიანი, აბზინდით სავსე ტრამალის თავი და ბოლო. ახლა ეს მეცხოველეობის მხარეა, კულტურის ცენტრებით, სახლებით. პურს თესავენ და თივასაც კი ამზადებენ. მართალია, სამუშაო ანარხაიში ახლაც თავსაყრელია, მით უმეტეს, ჩვენი ძმას—შოფრისათვის ხომ არის და არის... მაგრამ მე დავბრუნდი. იმიტომ კი არა, რომ გამიჭირდა უკაცრიელ ადგილებში, ან გამიჭირდა აღმა-დაღმა სიარული უგზო ტრამალზე. ქარბუქიან ზამთარში. ყველაფერი ეს ხომ დროებითი, წარმავალია. თუ აღამიანი მყარად დგას ადგილზე, დაიმორჩილებს ტრამალს, თვითონაც შეეთვისება და მასაც მოარჯულებს. მე და კადიჩას სიძნელეების არ გვეშინოდა, უნდა ითქვას, არც ცუდად ვცხოვრობდით, პატივს ვცემდით ერთმანეთს. მაგრამ პატივისცემა ერთია, სიყვარული კი მეორე. ვინდაც ერთს უყვარდეს და მეორეს არა, ჩემის აზრით, ეს ნამდვილი ცხოვრება არ არის. ან აღამიანი ასეა მოწყობილი, ანდა მე ვარ ბუნებით ასეთი, რომ სულ მუდამ მაკლდა რაღაც ისეთი, რასაც ვერც მუშაობით, ვერც ამხანაგებთან მეგობრობით,

ვერც მოყვარული ქალისადმი სიკეთითა და ყურადღებით ვერ აინაზღაურებ. მე დიდი ხანია, სადაც გულის სიღრმეში ვნანობდი, რომ ერთხელ კიდევ არ შევეცადე ასელს დავბრუნებოდი; უკანასკნელი ნახევარი წლის განმავლობაში ასელს და ბავშვი ძალიან მომენატრენ. ვდარდობდი, ღამეები არ მეძინა. მეჩვენებოდა ფუნჩულა ფეხებზე მდგარი სამატი, მომღიმარი, როგორც მაშინ. მისი ბავშვური ნაზი სურნელი. მე მთელი სიცოცხლის მანძილზე თან გამყვება. გული მეწეოდა მშობლიური ტიან-შანინ მთებისაკენ, ჩემი ლურჯი ისიკ-ყულისაკენ, მთისპირა ტრამალებისაკენ, სადაც შევხვდი ჩემს პირველ და უკანასკნელ სიყვარულს. კადიჩამ იცოდა ამის შესახებ და არაფერში არ მადანაშაულებდა, ისევე როგორც მე არ ვადანაშაულებდი მას არაფერში. უბრალოდ ჩვენ გავიგეთ, რომ ჩვენი ერთად ცხოვრება არ ივარგებდა.

ანარხაიში ადრიანი გაზაფხული იდგა. სწრაფად გადნა თოვლი, ბორცვებმა თეთრი სამოსი მოიშორეს. მიდამო ამწვანდა, ტრამალი სულს ითქვამდა, თბებოდა, აგროვებდა სითბოსა და წყალს. ღამღამობით ჰაერი გამქვირვალე გახდა, ცა ვარსკვლავიანი.

ჩვენ ვიწექით კარავში, კაბურღილის კოშკის გვერდით და, როგორც ყოველთვის, არ გვეძინა. უცებ ტრამალის სიჩუმეში. ვინ იცის საიდან. გაისმა ორთქლმავლის კვილი. არ ვიცი როგორ მოაღწია მან ჩვენამდე. ყაზახეთის რკინიგზა ჩვენგან ნახევარი დღის სავალზე იყო. ან იქნებ მე მომეჩვენა, არ ვიცი. მხოლოდ გული ამიჩქროლდა, გზისკენ გამაწია. და მე ვუთხარი მას:

— წავალ, კადიჩა.

— წადი, ილიას, ჩვენი გზები უნდა. გაიყაროს, — მიპასუხა მან.

დავშორდით. კადიჩა ჩრდილოეთ ყაზახეთში წავიდა. ყაშირზე. ღმერთმა ბედნიერი ჰქნას, მე ეს ძალიან მინდა. მინდა დავიჩქრო. რომ იგი მაინც შეხვდება იმ ადამიანს. რომელიც მას ეძებს, ისე რომ თვითონაც არ იცის ამის შესახებ. არ გაუმართლა მას პირველ ქმართან. გასცილდა. სულ სხვა კაცი გამოდგა. არ გაუმართლა არც ჩემთან. შეიძლება მე დავრჩენილიყავი მას-
6. ჩინგიზ აიტპატოვი

თან, რომ არ მცოდნოდა რას ნიშნავს ნამდვილი, წრფელი სიყვარული. რას ნიშნავს გიყვარდეს და უყვარდე ვინმეს. ეს ხომ ისეთი რამაა, რასაც ვერავის ვერ აუხსნი, რატომაა სწორედ ასე და არა სხვანაირად.

მე იგი პატარა სადგურამდე მივიყვანე, მატარებელში ჩავსვი. მივსდევდი მატარებელს, ვიღრე არ ჩამოვრჩი. — „გზა მშვიდობისა, კადიჩა, ნუ მომიგონებ ცუდად!“ — უქანასკნელად ჩავიჩურჩულე ჩემთვის.

წეროები ანარხაის გავლით სამხრეთისაკენ მიფრინავდნენ, მე კი ჩრდილოეთისაკენ მივდიოდი, მივდიოდი ტიან-შანისაკენ...



ჩავედი, არსად გავჩერებულვარ, აულისაკენ გავწიე. ჩემოდანი რაიონში დაეტოვე. პატარა სასტუმროში. მანქანა დროულად შემხვდა: მთებში მიდიოდა, გეოლოგებთან. ძარაში ვიჯექი და ვცდილობდი არაფერზე მეფიქრა, მეშინოდა და თან მიხაროდა. ჩვენ მივდიოდით იმ ტრამალზე, იმ გზით, სადაც მე და ასელი ვხვდებოდით ერთმანეთს. მაგრამ ეს უკვე აღარ იყო სასოფლო გზა, არამედ ხრეშით დაფარული შარავზა, ბეტონის ხიდებით, საგზაო ნიშნებით. დამენანა კიდევ ძველი უბრალო გზა. ვერ ვიცანი ვერც ის გადასასვლელი არხზე, სადაც ჩემი მანქანა ჩაეფლო, აღარც ის ქვა იყო არსად, რომელზეც ასელი იჯდა.

სოფელს არც ვიყავი მიახლოებული, რომ კაბინაზე დავაბრახუნე.

— რაშია საქმე? — თავი გამოყო შოფერმა.

— გააჩერე, ჩამოვალ.

— მინდორში? ახლავე მივალთ.

— გმადლობთ! აქვია, ახლო, — მანქანიდან ჩამოვხტი, — ფეხით. გავივლი. — რა იცოდა რისთვის მოვდიოდი. ფული შევაქლიე.

— არ მინდა! — მეუბნება. — შოფერებისაგან არ ვიღებ.

— აიღე, შუბლზე ხომ არ მაწერია.

— მაინც გეტყობა.

— თუ ასეა, კეთილი. კარგად იყავი!

მანქანა წავიდა, ქუჩის ბოლოს ეზოებს მიეფარა. მე კი ისევ გზაზე ვიდექი და ძალა ვერ მომეკრიბა. ქარს ზურგი შევაქციე. პაპიროსს მოვუკიდე. თითები მიკანკალებდა, სიგარეტი პირთან რომ მიმქონდა, რამდენჯერმე მოვქაჩე, ნამწვი ფეხით გავსარისე და წავედი. „აი გამოვცხადდი!“ — ეუთხარი ჩემს თავს, მეტი არაფერი მქონდა სათქმელი. გული ახშობდა აზრიბს, იგი ჩქარობდა, ყურებში რეკავდა, თითქოს ჩაქუჩს ურტყამენო.

აული შესამჩნევად შეცვლილიყო, გაზრდილიყო, ბევრი ახალი შიფერის სახურავებიანი სახლი ჩანდა. მათულები დაეკიმათ ქუჩების თავზე. კოლმეურნეობის გამგეობასთან, ბოძზე რადიო ლაპარაკობდა. ბავშვები სკოლაში მირბოდნენ. უფრო მოზრდილები ჯგუფად მიჰყვებოდნენ ახალგაზრდა უნივერსიტეტდამთავრებულ მასწავლებელს (სამკერდე ნიშნით მივხვდი), რაღაცაზე საუბრობდნენ. შეიძლება მათ შორის იყვნენ ისინიც, ვინც მე ქვებსა და ჯოხებს მესროდა. რა ვუყოთ მერე, პატარები იყენენ მაშინ...

ჩქარი ნაბიჯით მივეყვებოდი ქუჩის ნაპირს, ვცდილობდი შეუმჩნევლად მევლო, თუმცა მე აქ არაფინ მიცნობდა.

აი ის ეზოც — ტირიფებით და თიხის ყორით,— შეეჩერდი, სული მოვითქვი. შიშისა და მღელვარებისაგან გული შემეკუმშა, გაუბედავად გავემართე კიშკრისაყენ. დაუუკაცუნე. ენას რომ მიჩვენებდა, იმ გოგონამ გამოირბინა. ხელში პორტფელი ეჭირა, ახლა ის სკოლაში დადიოდა. გოგონას ეჩქარებოდა. მან გაკვირვებით შემომხედა და თქვა:

— სახლში არაფინ არ არის!

— არაფინაა?

— დიახ. აპა სტუმრად წავიდა, სატყეო მეურნეობაში... მამა წყალს უზიდავს ტრაქტორისტებს.

— ასელი სადაა? — გაუბედავად შევეკითხე და ვიგრძენი როგორ გამიშრა ხახა.

— ასელი? — გაუკვირდა გოგონას. — ასელი დიდხანია წავიდა...

— და არასოდეს დაბრუნებულა?

— ყოველ წელს ჩამოდის ჭეძესთან¹ ერთად. აბა ამბობს ძალიან კარგი კაციოა!..

გოგონასათვის მეტი არაფერი მიკითხავს, იგი სკოლაში გაიქცა. მე უკან მოვბრუნდი. ისე მეწყინა, რომ ჩემთვის ახლა სულ ერთი იყო, როდის და ვის გაპყვა იგი ცოლად. ან რა საჭირო იყო ამის ცოდნა? რატომღაც არასოდეს მომსვლია აზრად, რომ შეიძლებოდა ასელი ამ პერიოდში სხვა ვინმეს შეხვედროდა, არადა ეს ხომ მოსალოდნელი იყო. ხომ არ დაჯდებოდა და წლობით არ დამიწყებდა ლოდინს.

აულიდან გამოსული პირდაპირ ფეხით წამოვედი, მანქანებისთვის არ დამიციდია. რომ დამწეოდა კიდეც, არც გავაჩერებდი. უნდა წავსულიყავი, საით — სულ ერთი იყო, ქვეყნის კიდემლი ვივლიდი.

მივიდიოდი იმავე გზით, რომლითაც ოდესღაც მე და ასელი წავედით. მაგრამ გზა სულ შეცვლილიყო. დაეტყუებნათ. ხრეში მოეყარათ. მხოლოდ ტრამალი დარჩენილიყო უცვლელი: მუქი მზრალად ნახნავითა და ღია ფერის. გახუნებული ნაწვერალით. ფართო, დამრეცი ფერდობებით მიიმართებოდა იგი ჰორიზონტისაკენ და წითელი ნაწიბურებით წყდებოდა შორეული ისიკყულის ნაპირებთან. მიწა გაშიშვლებულიყო, მას ახლახან გადაეცალა თოვლის საბურველი. სადღაც უკვე გუგუნებდნენ ტრაქტორები. პირველ კვალს ავლებდნენ გაზაფხულზე.

გვიან საღამოს ჩავალწიე რაიონში, ღამე სასტუმროში გავათენე და დილით ავტობაზაში წასვლა გადავწყვიტე.

სხვაგან წასვლას ახლა არავითარი აზრი არ ჰქონდა. ყველაფერი დამთავრებული, ყველაფერი დაკარგული იყო. უნდა გეცხოვრა და გემუშავა, შემდეგ კი — ვინ იცის...

ტიან-შანის ტრაქტი, როგორც ყოველთვის, ბორბლებქვეშ გუგუნებდა, მანქანები განუწყვეტლივ მიდიოდნენ. მე ვარჩევი ჩემსას — ავტობაზისას. აი რომელიღაც ჩვენიანი მოდის. ხელი ავწიე.

შოფერი კაბინაში ვერ გავარჩიე, მანქანა სისწრაფისაგან წინ გავარდა და უცებ დაამუხრუჭა. მე ჩემოდანი ავიღე. შოფერი კაბინიდან გადმოვიდა. ვხედავ ჩემი თანაპოლკელი, ერ-

¹ ქეძე — უფროსი დის ქმარი.

მეკი, არმიაში ჩემთან გადიოდა სტაჟირებას. მაშინ სულ ახალ-გაზრდა იყო. ერმეკი ჩუმად მიყურებს, გაუბედავად იღიმება.

— ვერ მიცანი?

— სერჟანტი... ილიას, ილიას ალიბაევი! — გამიხსენა მან.

— სწორედ ის! — ჩავიციინე. გულში კი მეწყინა, გამოდის, რომ ჭაგრად შევიცვალე, თუ ხალხს ცნობა უჭირს.

დავიძარით. ვსაუბრობდით ცისაზე, ბარისაზე, ვიგონებდით სამსახურს არმიაში. მე სულ მეშინოდა: ჩემს ცხოვრებაზე რა-მე არ მკითხოს-თქო. მაგრამ ერმეკმა ალბათ არაფერი არ იცო-და. დავმშვიდდი.

— როდის დაბრუნდი შინ? — შევეკითხე.

— უკვე ორი წელია რაც ვმუშაობ.

— ალიბეკ ჭანტურიანი სად არის?

— არ ვიცი, მე მისთვის არ მომიწვრია. ამბობენ, რომ მთა-ვარ მექანიკოსად მუშაობსო ავტობაზაში, სადღაც პამირზე...

„ყოჩაღ, ალიბეკ! ყოჩაღ, მეგობარო! ნამდვილი ჭიგიტი ხარ!“ — გამიხარდა გუნებაში. ალბათ მიაღწია თავისას. ჯერ კიდევ არმიაში ყოფნის დროს დაიწყო დაუსწრებლად სწავლა ავტოსაგზაო ტექნიკუმში. ინსტიტუტის დამთავრებასაც აპი-რებდა დაუსწრებლად.

— უფროსი ამანჯოლოვია?

— არა, ახალია. ამანჯოლოვი დააწინაურეს, სამინისტრო-შია.

— როგორ ფიქრობ მიმიღებენ სამსახურში?

— რატომაც არა, რა თქმა უნდა მიგიღებენ. პირველი კლასის შოფერი ხარ, არმიაშიც ერთ-ერთ საუკეთესოდ ითვლებოდი.

— ვითვლებოდი ოდესღაც, — წავიბუტბუტე ჩემთვის. — ჭანტაის იცნობ?

— ჩვენთან ასეთი არავინაა. არც გამიგონია არასდროს. „ბევრი ცვლილებები მომხდარა ავტობაზაში,“ — ვფიქრობდი გულში, შემდეგ კი შევეკითხე:

— მისაბმელების საქმე როგორაა, გადაგყავთ უღელტე-ხილზე?

— ჩვეულებრივად, — უბრალოდ მიპასუხა მან. — იმის მი-

ხედვით, თუ როგორი ტვირთია. თუ საჭიროა, მოაწყობენ და წაიყვან. მანქანები ახლა მძლავრია... მან არ იცოდა რა ფასად დამიჯდა მე ეს მისაბმელები. ანარხაიზი ცხოვრების დროს ხშირად ვფიქრობდი, რატომ გახდა ჩემთვის საბედისწერო ეს შემთხვევა უღელტეხილზე. მხოლოდ მე ვიყავი დამნაშავე, თუ სხვა მიზეზებიც იყო. არსებითად რომ ვიმსჯელოთ ხომ სულ უბრალო საქმე იყო, არავითარ სიბრძნეს არ მოითხოვდა დოლონზე მისაბმელების ტარება; სიძნელეთა მიუხედავად შესაძლებელი აღმოჩნდა და ახლა ამას აკეთებენ ყოველთვის, თუკი საჭიროა, მაგრამ უბედურებაც ისაა, რომ ჩვენთან ყოველთვის თავის დროზე ვერ ამჩნევენ იმას, რაც უკვე საცაა კარებს შემოგიმტკრევს და მოითხოვს საქმეში გამომიყენეთო. რატომ მოეკიდნენ ასე უნდობლად ჩემს წინადადებას? თუ არ ვილაპარაკებთ იმაზე, რომ ეს მართლაც ძნელი ნაბიჯი იყო მთის პირობებში. იყო კიდევ ინსტრუქცია, რომელიც ეხებოდა ჩვენს გზებზე მანქანების ექსპლოატაციასა და ტვირთის გადატანას. იგი კრძალავდა უღელტეხილზე მისაბმელის ტარებას. როდის შეიმუშავეს ეს ინსტრუქცია? ღმერთმა უწყის! ალბათ ომამდე, როცა ტონანახევრიანი სატვირთო მანქანები დადიოდნენ. მას მისაბმელის ტარება კი არა, თვითონ უჭირდა სიარული სწორ გზაზე. აქ არავითარი ინსტრუქცია არაა საჭირო. გამოჩნდნენ ახალი, თანამედროვე მძლავრი მანქანები, ქალაქებზე კი ყველაფერი ძველებურად რჩებოდა, სანამ ცხოვრებამ არ წაშალა. დავუშვათ, რომ ეს ცალკეული, პატარა ფაქტია, მაგრამ ხომ შეიძლებოდა მსგავსი რამ მომხდარიყო, უფრო მნიშვნელოვან, უფრო დიდ საქმეში. ახლა მე ნაწყენი აღარა ვარ ამხანაგებზე, კინაღამ რომ მცემეს სატვირთო სადგურში, ჩემი, ასე ვთქვათ, თავხედობისათვის. მაგრამ მაშინ მე ამან გამაცხარა და მისაბმელიც უღელტეხილისაკენ სწორედ ამან წამაყვანინა, ისე რომ აღარ დავფიქრებულეარ, რა მოჰყვებოდა ამას...

ერთი სიტყვით. მშობლიურ ავტობაზაში დავბრუნდი. პირველ დღეს ჩრმეკმა მიმიწვია სახლში. კარგად მიმიღო. შეხვედრის აღსანიშნავად დავლიოთო — შემომთავაზა. უარი ვუთხარხარი. დიდი ხანი იყო; რაც არ დამელია და არც ვაპირებდი დალევას.

არც ავტობაზაში შემხვედრიან ცუდად. მიმიღეს სამსახურში, ბინაც საერთო საცხოვრებელში მომცეს. ამხანაგების, რომლებიც ადრევე მიცნობდნენ, ძალიან მაღლიერი ვიყავი, შეკითხვებით თავს არ მამბებდნენ. ხედავდნენ, რომ აღამიანმა ბევრი იხეტიალა, დაბრუნდა და კეთილსინდისიერად, პატიოსნად მუშაობს, ჰოდა ძალიან კარგი. რა საჭიროა ძველის გახსენება? მე თვითონაც ვცდილობდი ყველაფერი დამევიწყებინა, დამევიწყებინა ერთხელ და სამუდამოდ. როცა საულელტეხილო ბაზასთან გავივლიდი ხოლმე, იქით არ ვიხედებოდი, სადაც ადრე ვცხოვრობდი ოჯახითურთ. ბენზინსაც არ ვასხამდი მანქანაში. იოლად გავდიოდი, არ მინდოდა იქ ერთი წამითაც შევჩერებულიყავი. მაგრამ ვერაფერმა მიშველა, ვერ შევძელი თავის მოტყუება.

მე უკვე კარგა ხანია ვმუშაობდი, ტრასას შევეჩვიე, მანქანა შევამოწმე, მოტორი გამოვცადე ყველა სიჩქარესა და აღმართზე. მოკლედ რომ ვთქვათ, ვიცოდი ჩემი საქმე და ვაკეთებდი კიდეც.

იმ დღეს ჩინეთიდან ვბრუნდებოდი. მოვდიოდი მშვიდად, არაფერზე არ ვფიქრობდი, პაპიროსს ვეწეოდი, საჭეს ვატრიალებდი და აქეთ-იქით ვიხედებოდი. გაზაფხული იდგა, მშვენიერი იყო მიდამო. სადღაც მოშორებით უკვე იურტები დაედგათ: მეჭოგეები საზაფხულო საძოვრებზე გამოდიოდნენ. იურტების თავზე შავმოიისფრო კვამლი მოჩანდა. ქარს ცხენების ჭიხვინის ხმა მოჰქონდა. ფარები გზის მახლობლად ძოვდნენ. მომაგონდა ბავშვობა და სევდა შემომაწვია... უცებ ტბის მისასვლელისაკენ გავიხიდე და შეშინებული შევკართი: — გედები!

ჩემს ცხოვრებაში მეორედ ვხედავდი გაზაფხულზე გედებს ისიკ-ყულის ნაპირებთან. ლურჯი-ლაყვარლოვანი ისიკ-ყულის თავზე თეთრი ფრანველები ტრიალებდნენ. თვითონაც არ ვიცი რატომ, მკვეთრად მოვუხვიე გზიდან და როგორც მაშინ, პირდაპირ ყამირით გავემართე ტბისაკენ.

ო, ისიკ-ყულო, ისიკ-ყულო, ჩემო დაუმთავრებელო სიმღერავ! რატომ მომაგონდა ის დღე, როდესაც სწორედ ამ ბორცვთან, ზედ წყლის პირას მე და ასელი გავჩერდი! ყველაფერი ასევე იყო: მოთეთრო-მოლურჯო ტალღები, თითქოს

ხელიხელჩაკიდებულნი მწკრივად აწყდებოდნენ ყვითელ ნაპირებს. მზე მთებს მიღმა ეშვებოდა და შორს წყალი ვარდისფრად მოჩანდა. გედები დაფრინავდნენ ტბის თავზე ალელვებულნი და მოზეიმე. ისინი აიჭრებოდნენ მალა. შემდეგ ძირს ეშვებოდნენ გაშლილი ფრთებით. აქაფებდნენ წყალს, რომელზედაც ჩნდებოდა ფართო წრეები. დიახ, ყველაფერი ისევე იყო. ოღონდ ასელი არ იყო ჩემთან. სად იყო იგი, ჩემი წითელთავსაფრიანი ჩინარი?

დიდხანს ვიდექი ტბის ნაპირთან. შემდეგ შევედი ავტობაზაში. იქიდან გამოსულმა თავი ველარ შევიკავე, ავიწყვიტე... შევედი საჩაიეში, რომ გულში გამოღვიძებული ტკივილი ჩამეკლა. საჩაიედან გვიან გამოვედი. ცა ჩამობნელებულიყო, მოქუფრულიყო. ხეობიდან, როგორც მილიდან, უბერავდა ულანი¹. ხეებს ხრიდა, მავთულებში ზუზუნებდა და სახეში ძლიერად მცემდა. შფოთავდა, ოხრავდა ტბა. ძლიეს მივალწიე საერთო საცხოვრებლამდე და გაუხდელად მივეგდე ლოგინზე.

დილას თავი ვერ ავწიე, ნამთვრალევეზე მთელ ტანში მამტტკრევდა. ფანჯრებს იქით საზიზღრად ცრიდა თოვლში არეული წვიმა. კიდევ სამ საათს ვიწექი, არ მინდოდა სამუშაოდ გასვლა. ასეთი რამ პირველად მემართებოდა: სამუშაოდ არ მახარებდა. შემდეგ შემრცხვა და რეისში გავედი.

მანქანა დუნედ მიდიოდა, უფრო სწორად, მე ვიყავი მოდუნებული. გზად მხვდებოდნენ მანქანები, მათ ძარაზე და კაბინის თავზე თოვლი იდო. ძნელი მისახვედრი არ იყო — უღელტეხილზე ჩამოთოვა. ჩამოთოვა და ჩამოთოვა, თუნდაც იქ ქარტეხილი ყოფილიყო, ჩემთვის სულერთი იყო. რისი უნდა მშინებოდა, ბოლო ხომ ერთია...

ძალიან ცუდ ხასიათზე ვიყავი. ზევით სარკეში ჩავიხედე, გულს მირევდა გაუპარსავი, შეშუპებული სახე. მოთენთილი, თითქო დიდი ავადმყოფობა გადამეტანოს. „მეჭამა რამე, — გავიფიქრე, — დილიდან პირში არაფერი ჩამსვლია“, თუმცა საჭმელი არ მინდოდა, დალევაზე კი არ ვიტყოდნი უარს, ცნობილია, თუ ერთხელ დალიე, მერე ძნელია თავის შეკავება. პირ-

¹ ულანი — ქარის სახელწოდებაა. იგი რიბაჩიეში ბოომის ხეობიდან უბერავს.

ველი ქიქის შემდეგ ხასიათზე მოვედი. მანქანაც უფრო მხიარულად ამუშავდა. შემდეგ გზაზე კიდევ ერთხელ სადღაც შევირბინე, ასი გრამი დაველიე და ბოლოს ერთიცი მიუემატე. გაუტია გზამ, ამოძრავდნენ წინ და უკან ჩემს თვალწინ საწმენდები. მათახივით მოვიკეცე, სიგარეტს ვლექაე. მხოლოდ იმას ვამჩნევ როგორ ჩამიქროლებენ გვერდით შემხვედრი მანქანები, ფანჯრები ტალახის ნაშხეთით იფარება. მეც დავაწექი, უკვე გვიან იყო. მთებში მომისწრო ღამემ, ბნელმა, შუქი არსად ტყდებოდა. აი აქ კი მომეკიდა არაყი. დავილაღე. თვლებში შავი წრეები დამიტრიალდა და გზა დამიფარა. კაბინაში ჩამოცხა, გული მერეოდა. ოფლად გავიღვარე. მეჩვენებოდა, რომ მანქანაში კი არ ვზივარ, არამედ სინათლის სხივებზე და წინ მივემართები. ამ სხივებთან ერთად ხან მოწყვეტით ვეშვებოდი ძირს, ხან მათთან ერთად მივცოცავდი ზევით კლდეებზე მოცახცახე, ანდა ვწრიალებ აქეთ-იქით. ყოველ წუთს ძალა მეცლებოდა, მაგრამ არ ვჩერდებოდი, ვიცოდი საკმარისი იყო საქისათვის ხელი მომეცილებინა, რომ შემდეგ მანქანას ველარ წავიყვანდი, სად ვიყავი მაშინ არ მახსოვს, ვიცოდი, რომ სადღაც უღელტეხილზე. ოხ, დოლონო, დოლონო, ტიან-შანის ურჩხულო! მართლაც რომ ძნელად სავალი ხარ! განსაკუთრებით ღამით, მთვრალი შოფრისათვის.

მანქანა სიმწრით ავიდა რომელიღაც აღმართზე და შემდეგ დაბლა დაეშვა. ღამე დატრიალდა, გადაყირავდა ჩემს თვლებში. ხელები უკვე აღარ მემორჩილებოდნენ. საჭეს ველარ ვიჭერდი, სიჩქარეთა ბერკეტი ჭიუტობდა. მანქანა უფრო და უფრო უმატებდა სიჩქარეს და ეშვებოდა თავდაღმართზე. შემდეგ რაღაც ყრუ დარტყმის ხმა, ღრკვიალი გაისმა, სინათლეები წამით აფეთქდნენ და თვალთ დამიბნელდა. სადღაც გონების სიღრმეში წამით გაიელვა აზრმა: „აი ავარიაც!“

რამდენ ხანს ვიწექი ასე არ მახსოვს. მხოლოდ უცებ სადღაც შორიდან მომესმა ხმა: „აბა მოანათე!“ ვიღაცის ხელებმა გამისინჯა თავი, ხელები, მკერდი. „ცოცხალია, ოლონდ მთვრალია“, — თქვა ხმამ. მეორემ კი უპასუხა: „გზა უნდა გავანთავისუფლოთ“.

— აბა, მეგობარო, შეეცადე გაიწიო, საჭესთან მიმიშვი,

მანქანა გვერდზე გადავყენოთ! ვილაცა მსუბუქად მომაწვა მხარზე.

მე ავკენესდი, ძლივს ავწიე საჭიდან თავი. შუბლიდან სისხლი ჩამომდიოდა. მკერდი დაბეჭილი მქონდა, ვერ ვსწორდებოდი. კაცმა ასანთი გაკრა. შემომხედა. შემდეგ კიდევ გაკრა. ისევ შემომხედა, გაკვირვებით ჩაიღიმა უღვაშებში.

— ეს რა მოგვლია, მეგობარო, როგორ მოგივიდა, ა? — შეწუხებულმა ჩაილაპარაკა მან სიბნელეში.

— მანქანა... მაგრადაა დაღეწილი? — ეს იყო რაც პირველად ვთქვი და სისხლი გადმოვავურთქე.

— არა, არც ისე. ოღონდ გზაზეა გაჩხერილი.

— მაშინ წავალ ახლავე, არ გავჩერდები! — ურჩი აკანკალებული ხელებით მანქანის ამოშავებას შევეცადე.

— მოიცა! — მაგრად მომხვია მან ხელები. — გეყოფა, გადმოდ. გამოიძინებ და დილას ვნახოთ!

მან კაბინიდან გადმომათრია.

— ქემელ, მანქანა გზის პირას დააყენე, ვიდრე არ დაუმტვრევიათ. დანარჩენს შემდეგ გავარკვევთ! — უთხრა მან ამხანაგს, ჩემი ხელი მხარზე გადაიგდო და სიბნელისაკენ წამათრია. კარგახანს მივდიოდით, კაცი ჩუმად მიმათრევდა, მე ვცდილობდი თვითონ მევლო, მაგრამ მალე ვიღლებოდი და იგი ისევ და ისევ მაშველებდა მხარს. ასე მივალწიეთ რომელიღაც ეზომდე. უცნობი დამეხმარა სახლში შევსულიყავი. წინა ოთახში ნავთის ლამპა ენთო. კაცმა ტაბურეტზე დამსვა და კურტაკის გახდა დამიწყო. მაშინ შევხედე მას და მომაგონდა. ეს ეს იყო, გზის ოსტატი ბაითემირი, ის ბაითემირი, რომელთან ერთად უღელტეხლზე მანქანა გადავიყვანე. შემერცხვა და მიუხედავად ამისა, მაინც გამიხარდა, მინდოდა ბოდიში მომეხადა, მადლობა მეთქვა; მაგრამ ამ დროს ძირს დაცვენილი შეშის ნაჭრების ხმაურზე მოვაბრუნე თავი. მე გავიხედე ნელა და მთელი ძალ-ლონე მოვიკრიდე. თითქოს მხრებზე რაღაც დიდი სიმძიმე დამაწვა, ადგილიდან წამოვდექი. დაფანტული შეშის წინ იდგა ასელი. ის იდგა არაბუნებრივად გამართული და მიყურებდა, თვალს არ მაშორებდა.

— რა მოხდა? — ჩუმად წაიჩურჩულა მან. მე კინალამ არ

ვიყვირე: „ასელ!“ მაგრამ მისმა მიუკარებელმა გამოხედვამ უფლება არ მომცა სიტყვა დამეძრა. ოთახში წამით საშინელი სიჩუმე ჩამოწვა. არ ვიცი რითი დამთავრდებოდა ყოველივე ეს, რომ ბაითემირი არა. მან, თითქოსდა აქ არათფერიაო, ადგილზე დამსვა.

— არათფერი, ასელ, — მშვიდად უთხრა მან, — შოთერი ცოტათი დაიმტვრა, დაწვება ერთი დღით... შენ უმჯობესი იოდი მოგვიტანო...

— იოდი? — ამჯერად მისი ხმა საკუთარს დაემსგავსა, სითბო ჩაუდგა. შეშფოთდა. — იოდი მეზობლებმა წაიღეს... ახლავე! — გაახსენდა მას და გარეთ გავარდა.

ჩემად ვიჩქეი, არ ვინძრეოდი, კბილები ტუჩზე დავაპირე. სიმთვრალემ წამის უმაღლესი გამიარა. ახლა სისხლი ხმაურით აწყდებოდა საფეთქლებს.

— ჯერ უნდა მოვწმინდოთ, — თქვა ბაითემირმა, ჩემი დაკარგული შუბლი რომ დაათვალიერა, ამ სიტყვებით მან ვედრო აიღო და გარეთ გავიდა. მეზობელი ოთახიდან. ასე ხუთი წლის ფეხშიშველა ბიჭუნამ გამოიხედა, პერანგის ამარა იყო. ეტყობოდა ლოგინიდან წამოხტა და დიდი, ცნობისმოყვარე თვლებით მათვალიერებდა. უცებ ვიცანი. არ ვიცი როგორ, მაგრამ ვიცანი, გულმა იცნო.

— სამატი! — მოკლოდნელობისაგან ჩახშული ხმით წავიჩურჩულე და შვილისაკენ გავიწიე. ამ დროს კარებში ბაითემირი გამოჩნდა; რატომღაც შეეკრთი. მან, ვგონებ, გაიგონა, რომ შვილს სახელი დაეუძახე. უხერხულ მდგომარეობაში ჩავვარდი, თითქოს ვინმემ ქურდობაზე წამისწრო. უხერხულობა რომ დამეფარა, ხელით დავმალე თვალს ზემოთ ჩალურჯებული ადგილები და უცებ ვიკითხე:

— ეს თქვენი შვილია? — რა საჭირო იყო ასეთი შეკითხვა? დღემდე ვერ მიპატიებია ჩემი თავისთვის.

— ჩემი! — მასპინძლის გულყეთილობით მიპასუხა. ბაითემირმა, ~~ვედრო~~ იატაკზე დადგა და სამატი ხელში აიყვანა. ჩემი, რა თქმა უნდა, საკუთარი, ასეა არა, სამატი! — წაილაპარაკა მან, თან შვილს კოცნიდა და უღვაშებით ყელში უღიტიინებდა. ბაითემირის ხმასა და ქცევაში სიყალბის ნატამალი არ იგრძნობო-

და. იგი ისე ბუნებრივად იქცეოდა, თითქოს ყველაფერ ამას მი ვაკეთებდი — რატომ არ გძინავს? ოხ, ჩემო მოუსვენარო ბიჭო, ყველაფერი გაინტერესებს, აბა. ლოგინში!

— დედა სად არის? — იკითხა სამატმა.

— ახლავე მოვა. აი ისიც. შენ წადი, შეილო.

ასეღმა ჩუმად შემოირბინა. სწრაფად. დაძაბულად შეგვათვალეოდა. იოლიანი პატარა შუშა ბაითემირს მიაწოდა და სამატი გაიყვანა.

ბაითემირმა სველი პირსახოცით სახიდან სისხლი მომწმინდა.

— მოითმინე! — წაილაპარაკა მან. როცა სახეზე იოდს მისვამდა და მკაცრად დაუმატა: „ტყავი უნდა გაგაძროს ამნაირი საქმისათვის კაცმა, მაგრამ ჩვენი სტუმარი ხარ... ახლა ყველაფერი რიგზეა. მალე მოშუშდება. ასეღ, სამოვრით ჩაი მოგეტანა, ა?“

— ახლავე! — გამოგვეხმაურა ასელი, რომელიც ბავშვს აძინებდა.

ბაითემირმა იატაკზე გაშლილ ქეჩაზე ორად გაკეცილი ბამბის საბანი გაშალა, ზედ ბალიში დადო.

— აქეთ გადმოჯექი, — მითხრა. — წამოწექი, ცოტა მოისვენე..

— არაფერია, გმადლობთ! — წავიბურტყუნე მე.

— დაჯექი. ნუ გერიდება, მოიქეცი ისე, როგორც საკუთარ სახლში! — თავისი გაიტანა მან.

ყველაფერს ისე ვაკეთებდი თითქოს სიზმარში ვიყავი. გული მეკუმშებოდა მოლოდინისა და დაძაბულობისაგან, მეშინოდა: — აი ახლა ყველაფერი გაირკვევა და მაშინ სჯობს მიწა გაირღვეს და თან ჩამიტანოს. მე ხომ ვიცოდი რასაც ვგავდი ახლა: მთვრალი, ტალახში ამოქვრილი, გასისხლიანებული და საცოდავი. ეხ. რატომ გავჩნდი მაინც ამ ქვეყანაზე.

ასელი შემოვიდა, ცდილობდა ჩემთვის არ შეეხედა, სამოვარი აიღო და გარეთ გავიდა.

— ახლავე მოგეხმარები, ასეღ! — მიაწვდინა ხმა ბაითემირმა. იგი გაყოლას აპირებდა, მაგრამ სამატი ხელახლა წამოხტა ლოგინიდან. ჩანდა დაძინებას არც ფიქრობდა.

— რა ამბავში ხარ, სამატი? — გულკეთილად გაიქნია თავი ბაითემირმა.

— ძია, თქვენ პირდაპირ კინოდან გადმოხვედით? — სერიოზულად შემეკითხა შვილი და მომიახლოვდა.

მე მივხვდი რაშიც იყო საქმე, ბაითემირმა გაიცინა.

— ეხ, ჩემო პატარა, უჭკუო ბიჭო! — იცინოდა ბავშვის მახლობლად ჩატუცქული ბაითემირი. მოგვეკალი სიცილით და ეს არი. ჩვენ მალაროში დავდივართ კინოს სანახავად! — მითხრა მან. — სამატიც დაგვეყავს.

— კი, მე კინოდან გადმოვედი! — მხარი ავუბი საერთო მხიარულებას.

მაგრამ სამატი მოიღუშა:

— ტყუილია! — განაცხადა მან.

— როგორ თუ ტყუილი?

— მაშინ სად არის შენი ხმალი, რომლითაც იბრძოდი?

— სახლში დავტოვე...

— ძია, მაჩვენებ? ხვალ მაჩვენებ?

— გაჩვენებ. აბა ახლოს მოდი. რა გქვია შენ, სამატი, არა?

— სამატი. შენ რა გქვია, ძია?

— მე... — გავჩუმდი. — მე — ძია ილიასი, — ძლივს ამოვთქვი:

ბაითემირი აჩქარდა:

— თქვენ აქ ისაუბრეთ, ჩვენ კი ახლავე ჩაის მოვიტანთ. — კარებში შეჩერდა. — შენ წადი, სამატი. დაწეჭი. უკვე გვიანაა.

— მამა, თუ შეიძლება ცოტა ხანს კიდევ დავჩები! — სთხოვა სამატიმ.

— კარგი. იყავი! — დათანხმდა ბაითემირი.

სამატი ჩემთან მოვიდა. ხელზე ხელი გადავუსვი: მგავდა, ძალიან მგავდა. ხელებიც ჩემნაირი ჰქონდა და ისევე იციხოდა, როგორც მე.

— რა უნდა გამოხვიდე, როცა გაიზრდები? — ვკითხე მე, ლაპარაკი რომ დამეწყო.

— შოფერი გამოვალ.

— გიყვარს მანქანით სიარული?

— ძალიან, ძალიან... ოღონდ არავინ არ მიჩერებს, როცა ხელს ავუწევ...

— მე გაგასეირნებ ხვალ. გინდა?

— მინდა. მე შენ კოჭებს გაჩუქებ! — იგი მეორე ოთახში გაიქცა კოჭების მოსატანად.

ფანჯრის იქით მოჩანდა როგორ ამოდიოდა სამოვრის მილიდან ალი. ასელი და ბაითემირი რაღაცაზე საუბრობდნენ. „ნეტავი გაგაგონა რას ამბობს ჩვენი სამატი, სიცილით მოკვდები!“ — მხიარულად ამბობდა ბაითემირი, თან შეშას ჩეხავდა. უცნაურია. ასელიც ისევე მშვიდად იძლეოდა პასუხს, თითქოს არაფერი მომხდარიყოს. — „რას ამბობ! იგი ასეთია, რასაც ხედავს, ამბობს კიდევ!“

აქოშინებულმა სამატმა პატარა ტოპრაკით კოჭები შემოიტანა და ჩემს წინ დაყარა.

— ამოირჩიე, ძია! — გადამიშალა თავისი ნაირფერად შეღებილი მეურნეობა.

მე მინდოდა სახსოვრად ერთი კოჭი ამეღო, მაგრამ ვერ გავბედე. კარი გაიღო და ბაითემირი შემოვიდა, მოთუხთუხე სამოვრით ხელში. თან ასელი შემოჰყვა. სანამ იგი ჩაის ხდიდა, ბაითემირმა ჩემს წინ ქეჩაზე პატარა, დაბალი მაგიდა დადგა და სუფრა გადააფარა. მე და სამატმა კი კოჭები შევავროვეთ და ისევ ტოპრაკში ჩავყარეთ.

— თავის სიმდიდრეს გიჩვენებს? აი, შე ტრაბახა! — ბაითემირმა სამატს ალერსით აუწია ყური.

ერთი წუთის შემდეგ სამოვარს ვუჯექით, ჩაის ვსვამდით. ყველაფერი ისე იყო, თითქოს ჩვენ ერთმანეთს არ ვიცნობდით და არც არასოდეს შევხვედროდით. ალბათ ამიტომ ვცდილობდით მშვიდად ვყოფილიყავით, ვღუმდით. მხოლოდ სამატი გრძნობდა კარგად თავს. ბაითემირის მუხლებზე მოკალათებულნი, ~~როგორ~~ მას ეკვროდა და თავს ატრიალებდა:

— უჰ, შენი უღვაშები ყოველთვის იჩხვლიტებიან! — ტოკავდა იგი და თვითონვე მიიწევდა მისკენ, ლოყას უშვერდა.

— ფრთხილად, ჩაის გადაისხამ! — აფრთხილებდა ბაითემირი. ეჭვდაც არ მოსდიოდა პატარას, რომ მის ირგვლივ მჯდომი უფროსები ჩვენ-ჩვენ საფიქრალს ვფიქრობდით. განა არ იყო საფიქრალი? ვის შეეძლო განეჭვრიტა, რომ ჩვენ

დღეს ასე მოულოდნელად შეგვახვედრებდა ბედი. რითი უნდა დამთავრებულყო ეს?

ძნელი იყო მჭდარიყავი საკუთარი შვილის გვერდით. რომელიც სხვა კაცს ეფერებოდა და მამას ეძახდა. ჩემთვის ადვილი არ იყო გამეძლო იმისათვის, რომ ასელი, ჩემი საყვარელი ასელი, რომლისთვისაც მე ამდენი განვიცადე, ჩემს გვერდითაა და მე ვერ ვბედავ შევხედო მას. როგორ მოხვდა იგი აქ? შეუყვარდა და ცოლად გაჰყვა? საიდან უნდა მცოდნოდა, როცა იგი ისე იქცეოდა, თითქოს სავსებით უცხო, უცნობი ვიყავი მისთვის. დამეჭვრებინა, რომ ასე შემიძულა? ბაითემირი? ნუთუ იგი ვერ ხედებოდა ვინ ვიყავი სინამდვილეში მე? ნუთუ მან ვერ შეამჩნია მსგავსება ჩემსა და სამატს შორის? რატომ ერთხელაც არ უხსენებია ჩვენი შეხვედრა უღელტეხილზე, როცა მანქანა ბუქსირით გადაგვყავდა. თუ დაავიწყდა?

უფრო ძნელი ასატანი გახდა ყველაფერი, როცა დავეწყეთ. მე იქვე ქეჩაზე დამიგეს. ვიწვექი კედლისაკენ გადაბრუნებული, ლამპას ოღნავ ჰქონდა ჩაწეული, ასელი ჰურჰელს ალაგებდა.

— ასელ! — წყნარად შეეხმიანა მას ბაითემირი მეზობელი ოთახის გაღებული კარიდან.

ასელი მივიდა.

— გაგერეცხა, — უთხრა მან ასელს.

ასელი სკამთან მივიდა, აიღო ჩემი კუბოკრული ხალათი, რომელიც მთლად სისხლში იყო მოსვრილი და რეცხვა დაიწყო, მაგრამ უცებ შეწყვიტა და ბაითემირთან მივიდა:

— რადიატორიდან წყალი გადმოაქციეთ? — ჩურჩულით ჰკითხა. ყინვა რომ დაიჭიროს...

— გადმოვაქციეთ, ქემელმა გადმოღვარა! — ასევე წყნარად უპასუხა ბაითემირმა, — მანქანას თითქმის არაფერი მოსვლია... დილით დავეხმარებით...

მე კი დამავიწყდა: არც რადიატორის, არც მოტორის თავი არ მქონდა.

ასელმა მოათავა ხალათის რეცხვა, ღუმელის თავზე დაკიდა და მძიმედ ამოიოხრა. შემდეგ ლამპა ჩააქრო და გავიდა.

სახლში სიბნელემ დაისადგურა. ვიცი, ჩვენ არცერთს არ ვვეძინა. თვითელი მარტო დარჩა საკუთარ ფიქრებთან. ბაი-

თემირი სამატთან ერთ საწოლში იწვა. იგი რაღაცას ალერსიანად ბუტბუტებდა, საბანს უსწორებდა სამატს, როდესაც ის ძილში შფოთავდა. ასელი ხანდახან თავშეკავებულად ოხრავდა. სიბნელეში ვხედავდი მის თვალებს, რომლებიც დანამული ქვებივით ბრწყინავდნენ... რაზე ან ვისზე ფიქრობდა იგი? ჩვენ ხომ მას ახლა სამნი ვყავდით... შეიძლება ახლა იხსენებდა ყველაფერს სასიამოვნოსა და სამწუხაროსაც, რაც ჩვენ გვაკავშირებდა. მაგრამ იგი ახლა ჩემთვის მიუწვდომელი იყო. მიუწვდომელი იყო მისი აზრებიც. ასელი შეცვლილიყო, შეცვლილიყვნენ მისი თვალებიც... ეს უკვე აღარ იყო მიმნდობი, სიმინდითა და გულუბრყვილობით აღსავსე თვალები: მათ სიმკაცრე მომატებოდათ და მაინც ასელი ჩემთვის ისევ ისეთად, ტრამალის ჩინარად რჩებოდა. ყოველ მის ნაკვთში, ყოველ მოძრაობაში მე ჩემთვის ნაცნობს, მშობლიურს ვხედავდი. მით უფრო მწარე. საწყენი და მტანჯველი იყო ყველაფერი. სასოწარკვეთილი. კბილებით ბალიშის კიდეს ჩავფრენოდი და ჩუმად ვიწექი. დილამდე თვალი არ მომიხუჭავს.

ფანჯრებს მიღმა ღრუბლებში ცურავდა მთვარე.

დილაადრიან. როცა ბაითემირი და ასელი ეზოში გამოვიდნენ თავიანთი მეურნეობის დასახედავად. მეც ავდექი. უნდა წავსულიყავი. ფეხაკრეფით მივედი სამატთან, ვაკოცე და სწრაფად გამოვედი ოთახიდან.

ასელი ეზოში ქვებზე დადგმულ დიდ ქვაბში წყალს ათბობდა. ბაითემირი შეშას ჩეხდა. ჩვენ მანქანისაკენ წავედით. ჩუმად მივდიოდით, ჰაპიროსს ვეწეოდით.

მანქანა გზისპირა ბოძკინტებს დაჯახებოდა. ორი მათგანი იქვე ეგდო. ამოგლეჯილი თავისი ბეტონის საძირკვლიანად. მანქანას ფარები დამსხვრეოდა, წინარი და ფრთა შექექყოდა, ბორბალი გამრუდებოდა. ყველაფერი ეს, ჩაქუჩისა და ძელაყინის დახმარებით, ასე თუ ისე გავასწორეთ. შემდეგ დაიწყო გრძელი მომქანცველი სამუშაო საქოქავეი სახელურით. მოტორი გაყინულიყო, დამუნჯებულყო. ანთებული ძენძით კარტერს ვახურებდით. ორივენი ვატრიალებდით სახელურს. ჩვენი მხრები ერთმანეთს ეხებოდნენ. ხელისგულები ერთ სახელურზე ხურდებოდნენ. ერთის სუნთქვა სახეს უწვავდა მე-

ორეს, ერთ საქმეს ვაკეთებდით და შეიძლება ერთდამავებზეც ვფიქრობდით.

მოტორი არ გვნებდებოდა. ჩვენ დავილაღეთ. ამასობაში ასეღმა ორი ვედრო ცხელი წყალი მოიტანა. უსიტყვოდ დადგა ჩემს წინ და განზე გადგა. წყალი რადიატორში ჩავესხი. ბაითემირთან ერთად დავატრიალე სახელური, კიდევ, კიდევ ერთხელ და ბოლოს მოტორი ამუშავდა. კაბინაში ჩავჯექი, მოტორი უთანაბროდ, წყვეტილად მუშაობდა. ბაითემირი კაპოტში ჩაძვრა, სანთლები შეამოწმა. ამ დროს სამატმა მოიბრინა, აქლოშინებულმა, პალტოს საკინძე გაღელილმა. იგი მანქანის ირგვლივ აწრიალდა, გასეირნება უნდოდა. ასეღმა დაიჭირა, მერე ხელი აღარ გაუშვია მისთვის, მანქანის გვერდით დადგა. მან ისეთი საყვედურით, ისეთი ტკივილითა და სიბრაღულით შემომხედა, რომ იმ წუთს მზად ვიყავი ყველაფერი გამეკეთებინა, ოღონდ ჩემი დანაშაული გამომესყიდა, ისინი დამებრუნებინა უკან. გაღებული კარებიდან გადმოვიხარე.

— ასეღ! აიყვანე ბავშვი, დაჯექი! წავიყვან როგორც მაშინ, სამუდამოდ! დაჯექი! — შევევედრე მოტორის ხმაურში.

ასეღს არაფერი უთქვამს, ნელა მიაბრუნა ცრემლით დანისხული თვალები და უარის ნიშნად თავი გააქნია.

— წავიდეთ, დედა! — ხელით გამოსწია სამატმა. — გავისეირნოთ! მან მაგრად ჩასჭიდა ხელი ბავშვს და წავიდა. იგი მიდიოდა უკანმოუხედავად, თავდახრილი. სამატი ხელიდან უძვრებოდა, უკან დაბრუნება უნდოდა.

— მზადაა! — დაიძახა ბაითემირმა, კაპოტი დახურა და კაბინაში იარაღი მომაწოდა.

და გავუღექი გზას. ისევ საჭე ხელში, ისევ გზა და მთები, მანქანა მიმაქროლებდა, რა ესაქმებოდა მას ყველაფერ ამასთან...

აი ასე ვნახე ასელი და ჩემი შვილი უღელტეხილზე, ასე შევხვდით და დავშორდით. მთელ გზაზე, საზღვრისკენ და უკან, ვფიქრობდი, მაგრამ ვერაფერი მოვიფიქრე, დავილაღე ფიქრებისაგან... ახლა უნდა წავსულიყავი, წავსულიყავი სადაც თვალი მიმიწვდებოდა, ჩემი აქ დარჩენა არ შეიძლებოდა.

ეს მტკიცედ გადავწყვიტე, ასეთი აზრებით ვბრუნდებოდი

უკან. უღელტეხილი გადავიარე, საგზაო უბანს რომ ჩავუარე, სამატი დავინახე. იგი გზისპირას თამაშობდა ბავშვებთან — გოგონასა და ბიჭუნასთან ერთად, ისინი სულ ოდნავ იყვნენ მასზე უფროსები. ტაშკარგონობანას თამაშობდნენ: ქვისგან სახლებს, ეზოს, საქონლის სადგომებს აკეთებდნენ. შეიძლება მე ადრეც შემომჩნევია გზასთან, მაგრამ ვერ ვცნობდი. გამოდის, რომ მე ყოველდღე მიხდებოდა გავლა ჩემი შვილის გვერდით და არ ვიცოდი. მანქანა გავაჩერე. — სამატი! — დავუძახე. მინდოდა ახლოს მენახა. ბავშვები ჩემსკენ გამოქანდნენ.

— ძია. იმიტომ მოხვედი, რომ ჩვენ გავასეირნო? — მოირბინა სამატმა.

— კი. ცოტას გავასეირნებთ! — ვუთხარი მე.

ბავშვები კაბინაში შემოძვრნენ.

— ეს ჩვენი ნაცნობი ძიაა! — დაიტრაბახა სამატმა ამხანაგებთან. მე ისინი პატარაზე გავატარე, მაგრამ რამდენი სიხარული და ბედნიერება განვიცადე, მგონია უფრო მეტი, ვიდრე ბავშვებმა. შემდეგ ჩამოვსვი.

— ახლა სახლისკენ მოუსვით! — ბავშვები გაიქცნენ. შვილი გავაჩერე:

— მოიცა. სამატი, რაღაც უნდა გითხრა! — ხელში ავიყვანე, მალე თავს ზევით ავწიე. დიდხანს ვუყუარებდი სახეში, შემდეგ მკერდზე მივიკარი. ვაკოცე და მიწაზე დავსვი:

— ხმალი სად არის. მომიტანე, ძია? — მოიგონა სამატმა.

— ოჰ, სულ დამევიწყდა, მეორედ რომ ამოვალ, მოგიტან, შვილო! — შევპირდი მე.

— ახლა არ დავავიწყდება, არა, ძია? ჩვენ ისევ იმ ადგილზე ვითამაშებთ.

— კარგი. ჩქარა გაიქეცი!

ავტობაზაში. საღურჯლო სახელოსნოში სამი სათამაშო ხმალი გამოეთალე და თან წამოვიღე.

ბავშვები მართლაც მქლოდნენ. მე ისევ გავასეირნე ბავშვები მანქანით. ასე დაიწყო ჩემი მეგობრობა შვილთან და მის მეგობრებთან. ისინი მალე შემეჩვიენ. შორიდან მობობდნენ ხოლმე, რომ დამინახავდნენ, ერთმანეთს ასწრებდნენ:

— მანქანა, ჩვენი მანქანა მოდის!

გამოვცოცხლდი, კაცს დავემსგავსე. მივდივარ რეისში და გულს უხარია: თან რაღაც კარგი გრძნობა მიძუვება. ვიცი, რომ გზასთან შეილი მიცდის. ორ წუთს მაინც დავისვამ გვერდით კაბინაში. ახლა მთელი ჩემი ფიქრები და აზრები იქით იყო მიმართული, რომ როგორმე დროზე მიმესწრო შეილისათვის. დროს ისე ვანგარიშობდი, რომ უღელტეხილზე დღისით გამეველო. გაზაფხულის თბილი დღეები იდგა. ბავშვები გამუდმებით თამაშობდნენ ეზოში, ისე რომ მე ხშირად ვხვდებოდი მათ გზის პირას. მეჩვენებოდა, რომ მხოლოდ ამისთვის ვცოცხლობდი და ვმუშაობდი: იმდენად ბედნიერი ვიყავი. მაგრამ ხანდახან შიშისაგან გული მიჩერდებოდა. იცოდნენ თუ არა იქ, საგზაო უბანში, რომ მე ბავშვებს ვასეირნებდი, ხომ შეეძლოთ ჩემი შეილისთვის აეკრძალათ ჩემთან შეხვედრა. არ გამოეშვათ გზაზე სათამაშოდ. ძალიან მეშინოდა და გუნებაში ვევედრებოდი ასეღსა და ბაითემირს არ გაეკეთებინათ ეს. არ წაერთმიათ ჩემთვის ეს პატარა ბედნიერება, ხანმოკლე შეხვედრები. მაგრამ ერთხელ სწორედ ასე მოხდა...

პირველი მისი ახლოვდებოდა. გადავწყვიტე შეილისთვის სადღესასწაულოდ რაიმე საჩუქარი მეყიდა. ვუყიდე მოსამართი მანქანა. საბარგო, სწორედ ისეთი როგორიც მე მყავდა.

იმ დღეს ავტობაზაში შევკოვნიდი, გვიან გამოვედი და ძალიან მეჩქარებოდა. შეიძლება, სწორედ ამიტომ მქონდა ცუდი წინათგრძნობა. ველავდი და ვშფოთავდი სრულიად უსაფუძვლოდ. საგზაო უბანს რომ ვუახლოვდებოდი, მანქანა ამოვიღე და გვერდზე დავიდე. თან წარმოვიდგინე როგორ გაუხარდებოდა სამატს. სათამაშოები მას უყეთესიც ქონდა. მაგრამ ეს განსაკუთრებული იყო — საჩუქარი ნაცნობი შოფრისაგან ბიჭუნას. რომელიც ოცნებობს გახდეს შოფერი. მაგრამ სამატი ადგილზე არ დამიხვდა. ბავშვებმა უიმისოდ მოიბრინეს. კაბინიდან გადმოვედი.

— სამატი სად არის?

— სახლშია. ავად გახდა. — მიპასუხა ბიჭმა.

— ავად გახდა? რა დაემართა?

— არა. ავად არ გამხდარა! — მცოდნის სახით ჩაურთო გოგონამ. დედა არ უშეებს აქ!

— რატომ?

— არ ვიცი. ამბობს, არ შეიძლებაო.

ცუდ ხასიათზე დაედექი: ესეც ასე, ყველაფერი დამთავრდა.

— აჰა, წაუღე, მივეცი ბიკს შეკრული, მაგრამ იქვე გადავიფიქრე. — თუმცა არა, არ გინდა. — უკან გამოვართვი და თავჩაქინდრული გამოვბრუნდი.

— რატომ ჩვენ არ გვასეირნებს ძია? — შეეკითხა ბიკუნა დას.

— ავად გახდა, — მოლუშულმა გასცა მან პასუხი.

ნამდვილად, გოგონა მიხვდა. ყველაზე მძიმე ავადმყოფობამ დამრია ხელი. მთელი გზა ვფიქრობდი როგორ უნდა მომხდარიყო, რომ ასელი ასე გაბოროტებულიყო ჩემზე. დავიჯერო, რომ მასში სიბრალულის ნატამალიც არ დარჩა, რაც არ უნდა ცუდი ვყოფილიყავი. არა, არ მჯეროდა... ასელი ამას არ გააყეთებდა, აქ რალაც სხვა ამბავია... მაგრამ რა? საიდან უნდა მცოდნოდა. და მაშინ შევეცადე თავი დამეჯერებინა, რომ სამატი ავად გახდა, როგორც მისმა მეგობარმა მითხრა. იმდენად დავარწმუნე თავი ამაში, რომ შემდეგ მე თვითონ შემეშინდა. მეჩვენებოდა როგორ წრიალებდა და ბოდავდა სიცხიანი ბავშვი... იქნება რაიმე დახმარება სჭირდება, წამალია მოსატანი, ან საავადმყოფოში წაყვანაა საჭირო. ხალხი უღელტეხილზე ცხოვრობს, ქალაქის რომელიმე პროსპექტზე კი არა! საშინლად გავწამდი. უკან დაბრუნებისას ვჩქარობდი, წარმოდგენა არ მქონდა რა უნდა მექნა, როგორ მოვქეუულიყავი, ვიცოდი მხოლოდ ერთი: ჩქარა მივსულიყავი ადგილზე, მენახა შვილი, თუ ის ჯანმრთელი იყო. მჯეროდა, რომ შემხვდებოდა, გული მეუბნებოდა და თითქოს ჯიბრზე საწვავი გამითავდა, იძულებული გავხდდი საუღელტეხილო ბაზაზე შევჩერებულიყავი. ბენზინის ასაღებად...

* * *

ჩემი თანამგზავრი ილიასი ამ ადგილას შეჩერდა. გახურებულ სახეზე ხელი მოისვა, მძიმედ ამოიოხრა, ღია ფანჯარა დაკეტა და, ვინ იცის, ეს მერამდენედ მოუკიდა პაპიროსს.

შუალამე დიდი ხნის გადასული იყო. მატარებელში ჩვენს

გარდა, ილბათ, ყველას ეძინა, ბორბლები რახრახით ამბობდნენ დაუსრულებელ სიმღერას. ფანჯრებს მიღმა მიჰქროდა ნათელი ზაფხულის ღამე, ოდნავ გაიღვებდნენ პატარა სადგურების მთვლემარე სინათლეები. ორთქლმავალი რიხიანად გაჰყვიროდა სივრცეს.

— სწორედ ამ დროს მოხვედით თქვენ, აგაი. მე კი უარი გითხარით. ახლა თქვენთვის გასაგებია რატომ, — ნაღვლიანად ჩაიციხა ჩემმა თანამგზავრმა და თხრობა განაგრძო. თქვენ ბენზინის ჩამომსხმელ პუნქტთან დარჩით, შემდეგ „პობელით“ გადამისწარიო. მე ეს შევამჩნიე. სწორედ ამ დროს წვიმაც წამოვიდა...

ღიახ, მე მივდიოდი და საშინლად ვღელავდი. წინათგრძნობამ არ მიმტყუნა. სამატი გზასთან მიცდიდა. მანქანა დაინახა თუ არა გამოიქცა:

— ძია! ძია შოფერი!

ჩემი ბიჭი კარგადაა! ო, როგორ გამიხარდა, გული სიხარულს ვერ იტევდა!

მანქანა გავაჩერე, კაბინიდან გადმოვხტი და შევიღისაქენ გავიქეცი.

— რა, ავად იყავი?

— არა, დედა არ მიშვებდა. მეუბნება, რომ არ უნდა ვისეირნო შენი მანქანით. მე კი ვტიროდი, — იჩივლა სამატმა.

— კი, მაგრამ ახლა როგორ მოხვედი?

— მამამ თქვა, თუ კი კაცს უხარია, რომ ბავშვები ასეირნოს, გაუშვი ასეირნოსო.

— აი, თურმე რაშია საქმე!

— მე კი ვთქვი, რომ შოფერი უნდა გავხდე...

— აუცილებლად გახდები, მერე როგორი! იცი რა მოგიტანე? — სათამაშო მანქანა ამოვიღე. — ნახე მოსამართია. ყველაზე შესაფერი პატარა შოფრისათვის!

ბიჭმა გაიღიმა, სახე გაუბრწყინდა.

— მე მუდამ შენთან ვივლი, არა, ძია? — შემომხედა მან და მის თვალებში ვედრება იგრძნობოდა. გული ამიჩუყდა.

— რა თქმა უნდა, ყოველთვის! — დავარწმუნე მე. — გინდა ქალაქში წაგიყვან პირველი მაისის დღესასწაულზე, მან-

ქანას დროშებით მოვრთავთ, შემდეგ კი უკანვე ჩამოგიყვან. ახლაც მიჭირს იმის ახსნა, რატომ ვუთხარი მას ისეთი რამ, რისი თქმის უფლებაც არ მქონდა, რაც მთავარია, რატომ დავიჭერე თვითონვე ჩემი სიტყვები. ესეც არ ვიკმარე. უფრო შორს შევეტოპე. — თუკი მოგეწონება, სულაც ჩემთან დარჩები! — შევთავაზე შეილს სავსებით სერიოზულად. — ჩვენ სულ ერთად ვიცხოვრებთ კაბინაში, მუდამ თან გატარებ და არსადაც არ გაგიშვებ, არ მოგშორდები, გინდა?

— მინდა! — უცებ დამეთანხმა სამატი. — ჩვენ მანქანაში ვიცხოვრებთ! წავიღეთ, ძია, ახლავე წავიღეთ!..

ხდება ხოლმე, როცა უფროსი ბავშვს ემსგავსება. კაბინაში ჩავჯექით. რალაც გაუბედავად გადავატრიალე გასაღები, დავაწეე სტარტერს. სამატს კი უხარია. მიტყაპუნებს, მეაღერსება, საჭდომზე ხტის. მანქანა დაიძრა. სამატს კიდევ უფრო გაუხარდა. იცინის, რალაცას მეუბნება. საკეზე. ხელსაწყოთა დაფაზე მანიშნებს. მეც გავმხიარულდი. მაგრამ უცებ გონს მოვეგე, სიმწრისაგან დამცხა: რას ვშვები?! მანქანა დავამუხრუქე. მაგრამ სამატმა ნება არ მომცა გაეჩერებულყავი:

— ჩქარა, ძია, ჩქარა წავიღეთ! — მთხოვა მან. როგორ შემეძლო უარი მეთქვა ბედნიერი ბავშვური თვალებისათვის. გაზს მოვუმატე. ის იყო გავრეკე, რომ გამოჩნდა გრეიდერი გზაზე, გუდრონს ანახლებდნენ. გრეიდერმა მოუხვია. გაასწორა ფისიანი მასა და ჩვენსკენ წამოვიდა. უკან კი ცოტა მოშორებით ბაითემირი იდგა. იგი მოსახვევში ფოცხით გუდრონს ურევდა. მე დავიბენი. გაჩერება მინდოდა, მაგრამ გვიან იყო. დაბლა დავიხარე და მანქანა რაც შემეძლო გავაქროლე. ბაითემირს არაფერი შეუმჩნევია. იგი თავაულებლად მუშაობდა: განა ცოტა მანქანა გაივლის ყოველწუთს გზაზე. მაგრამ სამატმა დაინახა იგი:

— აი მამაც! ძია, მოდი მამაც წავიყვანოთ! გააჩერეთ, დავუძახებ!

მე ვლუმდი. გაჩერება ახლა შეუძლებელი იყო, რა უნდა მეთქვა! სამატმა უცებ უკან მოიხედა, შეეშინდა, ყვირილი დაიწყო, ატირდა კიდევ:

— მამასთან მინდა! გააჩერე, მამასთან მინდა! გააჩერე, არ მინდა! დე-და!..

მე დავამუხრუჭე. მანქანა მოსახვევში კლდის უკან მოვაფარე და შვილს დამშვიდება დავუწყე:

— ნუ ტირი, სამატი, კარგი, გეყოფა! ახლავე უკან წაგიყვან, ოღონდ ნუ იტირებ!

მაგრამ შეშინებულ ბიჭს არაფრის გაგონება არ უნდოდა.

— არა, არ მინდა! მამასთან გამიშვი! გაალე! — ააბრაახუნა მან ხელები კარებზე. — გამილე, მამასთან გავიქცევი! გამილე! ასეთ ხათაბალაში ჩავევარდი.

— ნუ ტირი! გეყოფა! — ვეხვეწებოდი, ვემუდარებოდი. — ახლავე გავალე, ოღონდ დამშვიდდი! მე თვითონ მიგიყვან მამასთან! გამოდი, წავიდეთ!

სამატი ჩამოხტა და ტირილით უკან გაიქცა. მე გავაჩერე:

— მოიცა! ცრემლები მოიწმინდე. ნუ ტირიხარ. გთხოვ. ჩემო ბიჭო, ნუ იტირებ! შენი მანქანა? რას შევბი, ტოვებ? აი-ლე! — მე ხელი დავტაცე მანქანას და აკანკალებული ხელებით მოვმართე. — შეხედე, როგორ წამოვა შენსკენ, დაიჭირე! მანქანა გზაზე გაგორდა, ქვას დაეჯახა და თხრილში გადაყირავდა.

— არ მინდა! — უარესად აღრიალდა სამატი და უკანმოუხედავად მოკურცხლა.

მე გავშეშდი. ცრემლები ყელში მომეხტინა და შვილს გამოვეკიდე:

— მოიცადე. ნუ ტირიხარ, სამატი! მოიცადე. მე შენი... მე, მე, შენი, გესმის?.. მაგრამ ენა სათქმელად არ მომიბრუნდა...

სამატი უკანმოუხედავად მირბოდა და მოსახვევს მიეფარა. მე კლდემდე მივირბინე, გავჩერდი და გავცქეროდი შვილს, რომელიც თანდათან მშორდებოდა.

დავინახე როგორ მიირბინა მან გზაზე მომუშავე ბაითემირთან. ბაითემირი მის წინ ჩატუცქდა, ხელი მოხვია. მკერდზე მიიკრა. ბიჭიც კისერზე მოეხვია და შეშინებულმა ჩემს მხარეს გამოიხედა.

შემდეგ ბაითემირმა მას ხელი ხელში ჩასჭიდა, ფოცხი

მხარზე მოიგდო და წავიდნენ ერთად — დიდი და პატარა ადამიანი.

დიდხანს ვიდექი კლდეზე მიყრდნობილი, შემდეგ უკან შემოვბრუნდი. სათამაშო მანქანასთან გავჩერდი, იგი თხრილში ეგდო აყირავებული, ბორბლები მალა აეშვირა. ცრემლები ჩამომდინდა. „ყველაფერი დამთავრდა!“ ვუთხარი მე ჩემს დიდ მანქანას და კაპოტზე ხელი გადავუსვი. მოტორის სიმხურვალე ვიგრძენი... რაღაც მშობლიური იყო ახლა ამ მანქანაშიც, შვილთან ჩემი უკანასკნელი შეხვედრის მოწმეში...

* * *

ილიასი იდგა და კარებისაკენ წავიდა.

— სუფთა ჰაერზე გავალ, — თქვა მან.

კუბეში მარტო დავრჩი. განთიადის ცა თეთრ სარტყელეზად ირხეოდა ფანჯრის მიღმა. ბუნდოვნად გაიელვებდნენ ტელეგრაფის ბოძები. უკვე შეიძლებოდა სინათლის ჩაქრობა.

წამოწოლილი ვფიქრობდი, მოვყოლოდი თუ არა ილიასს იმას, რაც ჩემთვის იყო ცნობილი და რაზედაც მან არაფერი იცოდა? მაგრამ იგი კუბეში არ შემოდიოდა. „ხვალ მოვუყვები, დაე დაისვენოს“, — გადავწყვიტე მე და კარგადაც მოვიქეცი, რადგან მეორე დღეს საერთოდ გადავიფიქრე რამის მოყოლა.

გზის ოსტატი ბაითემირი თითქმის სწორედ იმ დროს გავიცანი, როდესაც ილიასმა უკვე იცოდა, რომ ასელი და მისი შვილი უღელტეხილზე ცხოვრობდნენ. პამირზე ყირგიზეთის გზის მუშაკების დელეგაციას ელოდნენ. ერთმანეთს შორის შეჯიბრების შედეგები უნდა შეემოწმებინათ და, რა თქმა უნდა, გამოცდილებასაც გაუზიარებდნენ ურთიერთს. ამასთან დაკავშირებით ტაჯიკეთის რესპუბლიკურმა გაზეთმა მთხოვა :დამეწერა ნარკვევი ყირგიზეთის სამთო გზებზე მომუშავე ადამიანების შესახებ.

დელეგაციის წევრთა შორის იყო ბაითემირ კულოვიც, ერთ-ერთი საუკეთესო გზის ოსტატი.

დოლონში გავემგზავრე, ბაითემირს რომ გავცნობოდი.

მას უცებ შეეხვდი, მოულოდნელად და, ასე ვთქვათ, ჩემდა საბედნიეროდ. სადღაც, ზედ უღელტეხილზე ჩვენი ავტობუსი გააჩერა მუშამ, რომელსაც ხელში პატარა წითელი ალამი ეჭირა. გამოიჩვენა ახლახან ზვაევი ჩამოწოლილიყო და გზას წმენდნენ. მიწისა და ქვის დიდი ნაკადი ჩამოცურებულყო მადლიდან და გზის ნაპირას მდგომი ბოძები მიენგრ-მოენგრია. უბანა ახლა უკვე შემოღობილი იყო. ბულდოზერი მიწას ხრამში ყრიდა. იქ, სადღაც მას მუშაობა არ შეეძლო, მუშები ტრიალებდნენ ნიჩბებითა და სატექანებით ხელში. ბრეზენტის წამოსხმასა და ქირხის ჩექმებში გამოწყობილი კაცი ბულდოზერს დაჰყვებოდა და ტრაქტორისტს უყვიროდა:

— მარცხნივ აიღე! ერთხელ კიდევ მიდი! შემოფიცრულს გადაუარე! ასე! შეჩერდი! უკან!

გზა თოქმის აღდგენილი იყო, გასასვლელი გაწმენდილი. შოფრები ორივე მხრიდან თავგამოდებით აყვირებდნენ მანქანებს, ლანძღავდნენ გუშაგად მდგარ მუშებს, მოითხოვდნენ გზის გახსნას, მაგრამ წამოსასხამიანი კაცი სიმშვიდეს ინარჩუნებდა. იგი ისევ და ისევ აიძულებდა ბულდოზერს გზაზე გაეფლო, მიწა ყალიბში ჩაეტეკნა. „ალბათ, ეს არის ბაითემირი, თავისი საქმის ოსტატი!“ გადაეწყვიტე მე და არც შევმცდარვარ. ნამდვილად ის იყო. ბოლოს გზა გაიხსნა, მანქანებიც დაიძრნენ.

— რაღას უცდით, თქვენი ავტობუსი ხომ წავიდა? — მომმართა ბაითემირმა.

— მე თქვენთან ვარ.

ბაითემირმა თავისი გაკვირვება არ შემამჩნევინა. უბრალოდ და ღირსებით ჩამომართვა ხელი.

— სტუმარი ყოველთვის მახარებს.

— თქვენთან საქმე მაქვს, ბაკე. — მივმართე საპატივეცემულო სახელით. თავი გავაცანი. — თქვენ იცით, რომ ჩვენი გზის მუშაკები ტაჯიკეთში უნდა გაემგზავრონ?

— ყური მოკვარი.

— სწორედ ამიტომ პამირზე გამგზავრების წინ, თქვენთან საუბარი მსურდა.

რაც უფრო ვუხსნიდი ჩემი ჩამოსვლის მიზანს, ბაითემირი

მით უფრო იღუშებოდა და ჩაფიქრებით ისვამდა ხელს ჯაგარა, მოწითალო უღვაშებზე.

— კარგია, რომ ჩამოხვედით, — მითხრა მან, — მაგრამ მე პამირზე არ წავალ და ჩემზე წერაც არ ღირს.

— შეიძლება გკითხოთ, რა მიზეზით? საქმეები გაქვთ? თუ სახლშია რამე?

— რა საქმეები — გზა. თქვენც ხედავთ. სახლში კი — იგი გაჩუმდა და პაპიროსი ამოიღო. — სახლში... იქაც საქმე მაქვს, როგორც ყველა მეოჯახეს. მაგრამ პამირზე მე არ წავალ.

მე ვარწმუნებდი, ვუხსნიდი, თუ რა მნიშვნელობა ჰქონდა დელეგაციის შემადგენლობაში ისეთი გზის ოსტატის გამგზავრებას, როგორიც ის არის, მაგრამ ბაითემირი უფრო ზრდილობის გულისათვის მისმენდა, მისი დაჯერება ვერაფრით ვერ შეეძლო.

ძალიან განაწყენებული ვიყავი და უპირველესად საკუთარ თავზე. პროფესიულმა აღლომ მილაღატა, ისე არ მივუღდექი იდამიანს. უღელტეხილიდან ხელცარიელი უნდა დავბრუნებულყავი, უნდა დავბრუნებულყავი ისე, რომ ვერ შევასრულე მეზობელი რესპუბლიკის გაზეთის რედაქციის თხოვნა და დავალბა.

— რა გაეწყობა, ბაკე, მაპატიეთ, უნდა წავიდე. გამოივლის რამე მანქანა და...

ბაითემირი ყურადღებით დამაცქერდა თავისი ჭკვიანი, მშვიდი თვალებით, შემდეგ უღვაშებში ჩაიღიმა.

— ქალაქელ ყირგიზებს ადათი ავიწყდებათ. მე მაქვს სახლი, ოჯახი, დასტოროკონი¹ და ღამისსათევი. რადგან თქვენ ჩემთან ჩამოხვედით, წახვალთ ხვალ, წახვალთ სახლიდან და არა გზიდან. წამოდით მეუღლესთან და შვილთან მიგიყვანთ. ნაწყენი არ დამრჩებით, მე გათენებამდე შემოვლა უნდა მოვასწრო. მალე დავბრუნდები. ასეთი სამუშაოა...

— მოითმინეთ, ბაკე! — შევაჩერე იგი. — მეც თქვენთან ერთად წამოვალ.

¹ დასტოროკონი — სუფრა, სასმელ-საქმელი სტუმრისათვის.

ბაითემირმა ეშმაკურად მოქუტა თვალეზი და ჩემი ჩაცმულობა შეათვალღრა.

— უხერხულია რქვენთვის ჩემთან სიარული, ერთი ბოლოდან მეორემდე დიდი გზაა. თანაც სულ აღმართ-დაღმართი.

— არათერია! — ვუპასუხე მე.

გზას გავუდექით. ვჩერდებოდით ყოველ ხიდთან, მოსახვევთან, ხრამთან, გზაზე გადმოხურულ კლდეებთან. ყველაფერ ამას გზის ოსტატის დაკვირვებული თვალი ამოწმებდა. ჩემთვის აქამდეც გამოცანად რჩება, როგორ მოხდა, რომელი სიტყვიდან დაიწყო, რანაირად მოვიპოვე ბაითემირის ნდობა, რომ მომიყვა თავისი და თავისი ოჯახის ისტორიას და მხოლოდ ხხლა, როცა ილიასის ამბავი ბოლომდე მოვისმინე, მივხვდი, რომ მე, როგორც ჟურნალისტს, ბედმა გამიღიმა. იმ დღეებში გარეგნულად მშვიდი ბაითემირი განცდების, დარდისა და ფიქრის დიდი მძიმე ტვირთის ქვეშ მოხრილი დადიოდა. შეიძლება მხოლოდ ორიოდ სიტყვის თქმა უნდოდა გულის მოსაოხებლად, შემდეგ თავი ველარ შეიკავა და გულში ნაგროვებმა დარდმა ამოხეთქა.

გზის ოსტატის ნაამბობი

თქვენ მკითხეთ, რატომ არ მინდა პამირზე წასვლა? მე თვითონ პამირელი ყირგიზი ვარ. ჩემი სამშობლო პამირია, მოვხვდი კი აქ. ტიან-შანზე.

თითქმის ბავშვი ვიყავი პამირის ტრაქტის მშენებლობაზე რომ მივედი, კომკავშირის მოწოდებით. მშენებლობა სახალხო იყო, მექანიზმები არ გვეოფნიდა, გვიჭირდა, მაგრამ ბეჭითად და მონდომებით ვმუშაობდით, განსაკუთრებით ახალგაზრდობა. ანდა რა გასაკვირი იყო: გზა პამირისაკენ მიდიოდა. საუკუნეების მანძილზე უკარებად მდგარი პამირისაკენ. დამკვრელი გავხდი, პრემიებსა და ჭილდოებს ვიღებდი. მაგრამ ეს ისე, სიტყვამ მოიტანა.

იქ მშენებლობაზე ერთი გოგონა გავიცანი. შემიყვარდა, ძალიან შემიყვარდა. გარეგნულად კარგი იყო, თან ჰკვიანიც. აულიდან მშენებლობაზე მოსვლა მოახერხა. ეს ყირგიზი ქალა

შვილისათვის იმ დროს ადვილი საქმე არ იყო. არც ახლაა ქალიშვილის გზა წარმოებისაკენ ვარდით ფენილი, თვითონაც გეცოდინებათ, ადათები გვბოჭავენ. ერთი წელი გავიდა, რაც გულბარა გავიციანი. ტრაქტის მშენებლობა დასასრულს უახლოვდებოდა. გზის ექსპლოატაციისათვის საკუთარი კადრები იყო საჭირო. აშენება ერთი საქმეა. საერთო ძალებით შეიძლება, შემდეგ გზას მიხედვა, მოვლა უნდა. ჩვენთან ერთად ახალგაზრდა ინჟინერი მუშაობდა, ხუსაინოვი იყო მისი გვარი, ახლაც საგზაო ხაზით მუშაობს, მინისტრად. სწორედ მან ამაგულიანა საგზაო კურსებზე წავსულიყავი. ვფიქრობდი, გულბარა არ დამელოდება-მეთქი, აულში წაიყვანენ-თქო, მაგრამ არა, დამიციდა. შევეუღლდით და იქვე, საგზაო უბანზე დავრჩით. კარგად, მეგობრულად ვცხოვრობდით. გზის მუშაკებისათვის, რომლებიც მთებში, უღელტეხილებზე ცხოვრობენ, მტკიცე ოჯახი, კოლი — კოდექსის განსაკუთრებული მუხლი, დიდი საქმეა. უფრო გვიან, ეს ჩემს თავზე გამოვცადე. და თუ მე ჩემი საქმე შემიყვარდა, ამაში ჩემს ცოლსაც აქვს წილი. შეგვეძინა ქალიშვილი, შემდეგ მეორე და ამ დროს ომიც დაიწყო.

ახმაურდა პამირის ტრაქტი, როგორც მდინარე დიდი წვიმების შემდეგ. ხალხი დაბლა ეშვებოდა — არმიაში მიდიოდა.

ჩემმა რიგმაც მოაწია. დილით ყველანი გზაზე გამოვედით. უმცროსი გოგო ხელში აყვანილი მყავდა, უფროსი კი გვერდით მომყვებოდა, მაგრად ჩაეკიდა ხელი. ჩემი გულბარა, საბრალო გულბარა! მას ჩემი სალაშქრო ჩანთა მოჰქონდა, გულმაგრობდა, მე მამშვიდებდა. მაგრამ ხომ კარგად ვიცოდი, რას ნიშნავდა ორი ბავშვის ანაბარა უკაცრიელ მთებში, საგზაო უბანზე დარჩენა, ასეთივე მეზობლების იმედით. მინდოდა გულბარა აულში გამეგზავნა, თავის ნათესაებთან, მაგრამ თვითონ არ ისურვა. როგორმე თავს გავიტანთო, მითხრა, დაგელოდებით და თანაც არც გზის მიტოვება შეიძლებაო უპატრონოდ. უკანასკნელად ვიდექით ჩვენ გზის პირას, მე ცოლს და ბავშვებს შევყურებდი, ვემშვიდობებოდი. სულ ახალგაზრდები ვიყავით მაშინ მე და გულბარა, ის-ის იყო, ცხოვრებას ვიწყებდით.

მესანგრეთა ბატალიონში მოვხვდი. ბევრ ტანკსაწინააღმდეგო დაბრკოლებას მოსკოვთან აჩნდა ჩემი ხელი. შემდეგ გადა-

ვიარეთ ღონი, ვისლა, ღუნაი. ვინ მოთვლის, რამდენი გზა, რამდენი ხიდი, გადასასვლელი გავაკეთეთ ომით დასეტყვილ მიწაზე. იყო შემთხვევები წელამდე ყინულივით წყალში დგახარგათოშილი და ცეცხლსა და კვამლში იწვი, ყუმბარები გრგვინავენ ირგვლივ, გადასასვლელს მიწასთან ასწორებენ, ხალხი იღუპება, უკვე დგომის თავი აღარა გაქვს, ფიქრობ, ნეტავი მომკლავდნენ და რაც შეიძლება ჩქარა! მაგრამ ამ დროს მომაგონდებოდნენ ჩემიანები, მომაგონდებოდა, რომ შორს მთებში ისინი მელიან როგორც ღმერთს და რომ იმისთვის კი არ მოვსულვარ აქ პამირიდან, ამ ხიდის ქვეშ ტყუილუბრალოდ დავიღუპო. არ ვიცი საიდან და ძალა მემატებოდა, კბილებით ვღუნავდი აცილებული სამაგრების დასაკავებელ მავთულს, არ მინდოდა სიკვდილს დავნებებოდი. არ დავლუპულვარ. ბერლინამდე ჩავედი თითქმის.

ცოლი ხშირად მწერდა. ფოსტას ხომ ტრაქტის გვერდით უნდა გაველო. მწერდა ყველაფერზე, დაწვრილებით, გზის შესახებაც მწერდა ხოლმე, ჩემს მაგივრად იყო ოსტატად. ვიცოდი, რომ უქირდა, განა ადვილი მოსავლელი იყო გზა? ისიც სად? პამირზე! თანაც მეზობლებიც გაფანტულიყვნენ — ვინ საით.

და უცებ, ორმოცდახუთი წლის გაზაფხულზე, წერილები შეწყდა. ვფიქრობდი: ფრონტზე არც ისე ადვილია წერილის მოტანა, ყველაფერი შეიძლება მოხდეს და ამით ვიმშვიდებდი თავს. ერთხელ პოლკის შტაბში გამომიძახეს. ზემდეგო, — მითხრეს, — საკმარისად იომეთ, დიდი მადლობა, ჭილდობები მიიღეთ. დაბრუნდი სახლში, შენ ახლა იქ უფრო საჭირო ხარ. ოღონდ ჩასვლისთანავე სამხედრო კომისარიატში შეიარე, გამოეცხადე, შემდეგ კი თავისუფალი ხარ. მე, რა თქმა უნდა, გამიხარდა — არ მოველოდი. დეპეშა გავუგზავნე სახლში.

ჩამოვედი შშობლიურ ადგილებში. სამხედრო კომისარიატში არ შემივლია, მოვასწრებ, სად გავიქცევი! გავწიე შინისაკენ რაც შეიძლება ჩქარა! საბარგო მანქანა შემხვდა, იქით მიდიოდა, დავიძარი პამირის ტრაქტისაკენ.

ფრთები მინდოდა მქონოდა, შევეჩვიე ფრონტულ „სტუდობეკერებს,“ შოფერს კაბინაში ვუყვირი:

— დააწეკი, ძამიკო, ნუ გენანება შენი ჯაბახანა! შენ მივ-
ლივარ.!

მივუახლოვდი. მოსახვევი, და ჩემი უბანი დაიწყება. მიმ-
ვალი მანქანიდან ჩამოვხტი, ზურგზე ჩანთა მოვიგდე და სირ-
ბილით განვაგრძე გზა. ვფიქრობდი, ასე უფრო ჩქარა მივიდო-
დი. მანქანას გავასწრებდი. მივრბივარ, მივრბივარ, მოსახვევიც
უკან მოვიტოვე, და... ველარაფერს ვცნობ. თითქოს ყვე-
ლაფერი ადგილზეა: მთები ისევ იქ დგანან, გზაც იგივეა,
ოღონდ არც სახლია, აღარც ეზო, არც კაციშვილი ჭაჭანებს
სადმე. მხოლოდ ქვებია ერთმანეთზე დახორებული. ჩვენი სახ-
ლი ოღნავ განაპირას, ზედ მთის ძირას იდგა. იქ ვიწრო ადგი-
ლებია. ავხედუ მთას და გავშეშდი. თოვლიანი ზევი დაქანებუ-
ლიყო ფერდობზე და ყველაფერი პირწმინდად მოეხვეტა თა-
ვის გზაზე. არაფერი. დაეტოვებინა, თითქოს ბრჭყალებიანი თა-
თებით მოეთხარა ფერდობზე მიწა და იქ შორს, დაბლა ხევში,
უზარმაზარი ხრამი გაეთხარა. ცოლი უკანასკნელ წერილში
მწერდა დიდი თოვლი იყო და უცებ წვიმები მოჰყვაო. ზევი
უნდა აეფეთქებინათ წინასწარ, მაგრამ ეს განა ქალის საქმე
იყო.

აი ასე შევხვდი ჩემს ოჯახს. ათასჯერ შემიხედავს სიკვდი-
ლისათვის თვალებში, ცოცხალი დავბრუნდი ჯოჯოხეთიდან და
ისინი კი თითქოს არც ყოფილანო ამ ქვეყნად. ვდგავარ და
განძრევა არ შემიძლია. მინდა ვიღრიალო, ვიღრიალო ისე, რომ
მთები შეირყნენ და არ შემიძლია. ყველაფერი გამიქვავდა,
თითქოს ამ ქვეყნად აღარ ვარ. ვგრძნობ მხოლოდ, როგორ ჩა-
მოცურდა მხრიდან ზურგჩანთა და ფეხებთან დავარდა. ასევე
მივატოვე იქ. საჩუქრები მომქონდა გოგონებისათვის. ცოლისა-
თვის. გიმნასტურა გზაში შექარყინულზე გადავცვალე. დიდხანს
ვიდექი, თითქოს რაღაც სასწაულს ველოდი. შემდეგ მოვბრუნ-
დი უკან და გავყევი გზას. შევჩერდი ერთხელ, მივიხედე: მთე-
ბი ირწევიან აკვანივით. ერთმანეთს უახლოვდებიან. მთელი
სიმძიმით მაწეებიან ზემოდან. ვიყვირე და გავიქეცი. შორს აქე-
დან! უნდა მოვშორდე ამ დაწყევლილ ადგილებს! აი მაშინ კი
ავტირდი. საშინლად ავღრიადდი.

არ მახსოვს როგორ და სად მივდიოდი, მესამე დღეს სად-

გურში აღმოვჩნდი. დავხეტიალობ ქვეყნის ხალხში დაკარგულივით. ვიღაც ოფიცერმა დამიძახა. შევხედე — ინჟინერი ხუსაინოვი. სახლში ბრუნდებოდა დემობილიზებული. ორიოდ სიტყვით ვუამბე ჩემი უბედურების შესახებ. საით აპირებ ახლა წასვლას?—მკითხა. — „თვითონაც არ ვიცი!“—უპასუხე. არა; ასე არ ივარგებს, უნდა გაუძლო. უფლებას არ მოგცემ ასე მარტოხელამ იხეტიალო. წავიდეთ ტიან-შანზე, გზაა დასამთავრებელი. შემდეგ კი ვნახოთ...

ასე მოვხვდი აქ, პირველად ხილებს ვაშენებდი ტრასაზე. დრო გადიოდა. უნდა გამერკვია სად დავიდებდი ბინას. ინჟინერი ხუსაინოვი იმ დროს სამინისტროში მუშაობდა. ხშირად ჩამოვივლიდა ხოლმე ჩემთან, სულ მარჩევდა ძველ სამუშაოს დავბრუნებოდი, გზის ოსტატობა დამეწყო ისევ. ვერ გადამეწყვიტა. მეშინოდა. როცა ვაშენებდი, მარტო არ ვიყავი. ხალხთან უფრო ადვილად გაუძლებ განსაცდელს. მარტოს კი, ალბათ, დარდი მომკლავდა. წლები გავიდნენ, მე კი გონს ვერ მოვსულიყავი. არ მავიწყდებოდა წარსული. თითქოს ჩემთვის ცხოვრება დამთავრდა და წინ უკვე აღარაფერი მელის. კვლავ ცოლის შერთვა ფიქრადაც არ მამდიოდა. ძალიან მიყვარდა გულბარა და ბავშვები. ვფიქრობდი, რომ მათ ვერასდროს ვერავინ შეეცვლიდა. ხოლო ცოლის მოყვანა იმისათვის, რომ იცხოვრო — რა კაცობაა! ჯობდა მარტო დავრჩენილიყავი.

გადავწყვიტე წავსულიყავი უბანზე ოსტატად. ვფიქრობდი შევეცდები და თუ არაფერი გამომივა, წავალ სადმე-თქო. მომცეს უბანი უღელტეხილზე. თანდათანობით შევეჩვიე. შეიძლება იმიტომ, რომ რთული უბანია. ყოველთვის ბევრი საქმეა. ჩემთვის ეს უკეთესიც არის. თანდათანობით ტკივილი მიუჩრდა. ხანდახან მესიზმრებოდა მხოლოდ: გაქვავებული ვლგაეარ გაპარტახებული სახლ-კარის წინ, ვგრძნობ როგორ ჩამომიცურდა მხრიდან ზურგჩანთა და როგორ დაეცა ფეხებთან. ვბრუნდები და გზაზე მივდივარ. თვალკრემლიანა ვიღვიძებდი ასეთ დღეებში დილიდან მივდიოდი გზაზე და გვიან საღამომდე არ ვბრუნდებოდი. ასე დავრჩი მარტოდმარტო. საღლაც გულის სილოძეში ხანდახან გამკრავდა: „იქნებ ჩემთვისაც გამოჩნდეს ბედნიერება?“

და იგი მოვიდა, მოვიდა მაშინ, როდესაც ყველაზე ნაკლებად ველოდი.

ერთხელ, ოთხი წლას წინათ, ზამთრის მიწურულს ჩემი მეზობლის ავადმყოფი დედა წავიყვანე საოლქო საავადმყოფოში. თვითონ ვერ მოახერხა: სამსახური, ოჯახი, ბავშვები... მრხაცის საქმე დღითიდღე უკან-უკან მიდიოდა. გადავწყვიტე მე წამეყვანა ექიმებთან. სწორედ ამ დროს ჩვენთან უბანზე საგზაო სამმართველოდან მოვიდა მანქანა. რაღაც ამოიტანა, აი ამ მანქანას გაუყევით. ექიმებს გავასინჯე მოხუცი. მითხრეს, საავადმყოფოში უნდა დააწვინო, თორემ მოკვდებაო. მოხუცი საავადმყოფოში პირველად იყო და გაჭიუტდა. არ დაერჩები, თუ სიკვდილი მიწერია, მირჩვენია სახლში მოვეკვდეთ. წამიყვანე, თორემ შეგაჩვენებ, დაგწყევლიო. ვერაფრით ვერ დავაჭერე. იძულებული გავხდი უკან წამეყვანა. გამოვართვი რაღაც უამლები და წამოვედი. უკვე გვიან იყო. ავტობაზის საუღელტეხილო ბაზას რომ გავცდით, შოფერმა უცებ მანქანა დაამუხრუჭა, მესმის ვილაცას ეკითხება — საით მიდიხართ?

ქალის ხმამ რაღაც გაურკვეველად უპასუხა და ნაბიჯები დაგვშორდნენ.

— დაჯექით! — უთხრა შოფერმა. — სად მიხვალთ? — და მანქანა წამოაწია.

ძარასთან ახალგაზრდა ქალი მოვიდა, ბავშვით ხელში და პატარა ფუთით. მე დავეხმარე მალა ამოსვლაში, ქარისაგან დაფარული ადგილი დავუთმე, კაბინის უკან, თვითონ კი კუთხეში მივჯექი.

წავედი. ციოდა. ნესტიანი ქარი ძვლებში ატანდა. ბავშვი ატირდა. ქალი უნანავებდა, მაგრამ ის დაწყნარებას არც ფიქრობდა. აი უბედურება! კაბინაში უნდა ჩავვეჩინა წესით, მაგრამ იქ მოხუცია, ძლივს დაფავს სულს. მაშინ ოდნავ შევეცხე მხარზე:

— აბა, მე მომეცით, იქნებ დაწყნარდეს, თქვენ კი თავი უფრო დახარეთ, ქარი ნაკლებად შეგაწუხებთ.

კურტაკი გავიხსენი; ბავშვს გადმოვახურე და მკერდზე მივიკარი. დაწყნარდა, აქსუტუნდა. კარგი ბავშვი იყო, ათი თვის იქნებოდა ან ცოტა მეტი. მარცხენა მხარეს მეჭირა. უცებ გუ-

ლი ამითრთოლდა, თვითონაც არ ვიცი რატომ, დაქრილი ფრინველივით აფრთხილდა. ვწუხვარ და მიხაოი. „ეჰ, ნუთუ არასოდეს აღარ ვიქნები მამა?“ — გავიფიქრე მე. ბავშვი ეს მომყრდნობია, გათბა, აღარაფერი აწუხებს.

— ბიჭია? — შევეკითხე.

მან თავი დამიქნია. ვხედავ საცოდავი მთლად გაიყინა. თხელი პალტო ეცვა. მე ზამთრობით კურტაკს ზემოდან წამოსახამსაც ვატარებ, არ შეიძლება ჩვენი სამუშაოს მქონე ხალხისთვის უმისოდ. ცალი ხელით ბიჭი მიჭირავს და თავისუფალ სახელოს მას ვუშევრ.

— წამოსახამი გამხადეთ. თორემ გაცივდებით.

— არა, რას ბრძანებთ, ნუ წუხდებით, — უარი მითხრა მან.

— გამხადეთ, გამხადეთ! — მოვთხოვე მე, — ქარისაგან დიფარეთ თავი.

იგი წამოსახამში გაეხვია, მე კალთები შემოვუკეცე ფეხებს ქვეშ. ქარს რომ არ დაებერა.

— ცოტათი მაინც გათბით? — შევეკითხე.

— ღიახ.

— კი, მაგრამ რატომ ასე გვიან?

— ასე გამოვიდა, — ჩუმად მიპასუხა მან.

ამ დროისათვის ხეობაში შევედი. აქ მალაროელთა დასახლებაა. უკვე ყველას ეძინა. ფანჯრები ჩაბნელებული იყო. ძაღლები ყვეფით აედევნენ მანქანას. უცებ გამახსენდა: სად უნდა მიდიოდეს? რატომღაც მეგონა. რომ მალაროში, სხვაგან არსად არ შეიძლებოდა. ზევით უღელტეხილი იყო, შემდეგ კი ჩვენი უბანი.

— თქვენ, ალბათ, მოხვედით? — ვუთხარი მე და კაბინაზე დავაკაკუხე. — ჩვენ უღელტეხილამდე ცოტა დაგვრჩა, იმას იქით კი მანქანა აღარ მიდის.

— აქ რა არის? — იკითხა მან.

— მალარო. რა, თქვენ აქ არ მოდიხართ?

— მე, მე აქ მოვიდიოდი, — გაუბედავად თქვა მან. მაგრამ შემდეგ სწრაფად წამოდგა. მოსახამი მომანოდა და ბავშვი გამომართვა. იგი უცებ ასლუქუნდა. მე ქიმთან მივედი, მინდოდა

ჩამოვმნტარიყავი და დავხმარებოდი, მაგრამ ვიგრძენი ქალს რაღაც სხვა დარდი აწუხებდა. როგორ დამეტოვებინა იგი მართო ამ ცივ ღამეში?

— თქვენ არსად არ გაქვთ მისასვლელი! — პირდაპირ ვუთხარი მე. ცუდს ნურათფერს იფიქრებთ. მომეცით ბავშვი! — თითქმის ძალით გამოვართვი ხელიდან. — ნუ უარობთ. ჩემთან უბანში გაითევთ ღამეს, მერე კი თქვენ იცით თქვენი საქმე. მოვრჩით! წავედით! — ჩავძახე შოთფერს.

მანქანა დაიძრა. იგი ჩუმად იჯდა, სახე ხელისგულებში დავშალა, არ ვიცი, შეიძლება ტიროდა კიდევ.

— ნუ გეშინიათ! — დავამშვიდე ქალი. — არათფერს დაგიშავებთ. მე გზის ოსტატი ვარ — ბაითემირ კულოვი. შეგიძლიათ მენდოთ.

ისინი ჩემთან მოვათავსე. თვითონ კი წავედი. ეზოში გვექონდა პატარა თავისუფალი ოთახი, ტახტზე დავწეკი.

დიდხანს არ დამეძინა, ვფიქრობდი. ვერ მოვისვენე. გამომეკითხა ყველაფერი უხერხული იყო. თვითონაც არ მიყვარს, და მაინც იძულებული გავხდი მეკითხა ზოგი რამ, იქნებ ადამიანს უჭირს, დახმარება უნდა. რაღაც შებოჭილად, უხალისოდ მპასუხობდა. ვხედებოდი, რომ რაღაცას მიმალავდა. როცა ადამიანს დიდი დარდი აქვს, მისი ყოველი სიტყვის უკან ათი უთქმელი იფარება. სახლიდან წამოვიდა, ქმრისგან. ამაყი უნდა იყოს. ეტყობა იტანჯება, ძლიერ განიცდის და არ უნდა შეიმჩნიოს. ყველას უფლება აქვს როგორც უნდა ისე მოიქცეს. თვითონ უკეთ იცის თავისი საქმე. მაგრამ მაინც მეცოდებოდა ახალგაზრდა ქალი. ტანმალაია, სახენათელი. ალბათ ალერსიანი და გულკეთილია ჩვეულებრივ. როგორ შეეძლო კაცს ასეთი ქალი აედულებინა სახლიდან წასულიყო? ჩემთვის გაუგებარი იყო. მაგრამ ეს მათი საქმეა. ხვალ გავაცილებ, დავსვამ რომელიმე მანქანაზე.

დავიღალე იმ დღეს, ჩამეძინა და მომეჩვენა, რომ მანქანით მოვდივარ. კურტაკს ქვეშ კი ბიჭი მყავს შეხიზნული. გათბა პატარა ადამიანი. მკერდზე მეკვრის.

უთენია ავდექი. შემოვლაზე წავედი და სწრაფად დავბრუნდი. ნეტავ როგორ გრძნობენ თავს ჩემი სტუმრები? ფრთხი-

ლად, რომ არ გავაღვიძო, გავახურე წინა ოთახში ღუმელი; სა-
მოვარი დაედგი. იგი კი თურმე ამდგარა და წასასვლელად ემზა-
დება. მადლობას მიხდის. უჩაიოდ არ გავუშვი, ვაიძულე ცო-
ტა დაეცადა. ჩემი ღამეული თანამგზავრი სასაცილო ბიჭუნა
გამოდგა, მიიწევს ყველასკენ პირდაპირ, უბრალოდ, არაფრის
დარდი არ აწუხებს ამ ქვეყნად. ჩემთვის დიდი სიამოვნება იყო
მასთან თამაში. უცებ შევევთვისე. ჩაის სმის დროს შევეკითხე:

— საით უნდა წახვიდეთ? მანქანა გავაჩერო?

იგი დაფიქრდა და მითხრა:

— რიბაჩიეში.

— მშობლები გყავთ იქ?

— არა, ჩემი მშობლები აულში არიან, ტოსორს იქით.

— ოო, გადაჯდომა მოგიწევთ, გაწვალდებით.

— მე იქით მაინც არ ვაპირებ წასვლას. არ მიგვესვლება,—
ჩაფიქრებით უთხრა მან შეილს. — თვითონა ვართ დამნაშავე-
ნი. მივხვდი, რომ იგი მშობლების სურვილის წინააღმდეგ
გაპყვა ქმარს. შემდეგში გავიგე, რომ ასეც იყო.

იგი გზაზე გასვლას აპირებდა, მაგრამ დავითანხმე სახლში
დაეცადა, რომ ბავშვით ქარში არ მდგარიყო. მანქანას კი მე
გავაჩერებდი.

გზაზე რომ გამოვედი, ცულ ხასიათზე დავდექი. არ ვიცი
რატომ და გულზე ნალველი მაწვებოდა იმის გამო, რომ არ ვი-
ცოდი რა მექნა მათი წასვლის შემდეგ. ისევ მარტო უნდა
დავრჩენილიყავი.

თავიდან რიბაჩიესკენ მიმავალი მანქანები არ ჩანდნენ. შემ-
დეგ კი მე არ გავაჩერე, ხელი არ ავწიე. თვითონაც შემეშინდა.
რატომ ვაკეთებ ამას? სწორედ აქედან დაიწყო ჩემი წამება.
მანქანები მოდიან და მე კი არ ვაჩერებ. ვფიქრობ, ახლა რომ
გამოვივლის იმას გავაჩერებ, ხელის აწევა მინდა და ვერ ვწევ.
სიმწრის ოფლი მასხამს. რა გამოდის, ადამიანს ვატყუებ, ვაბრ-
კოლებ. მაქვს ამის უფლება? ის კი მიცდის, ჩემი იმედი აქვს.
გზაზე ბოლთის ცემა დავიწყე. ჩემი თავის მეშინია. რალაც
უცნაური ხდება. თავს ვიძარტლებ: იმ კაბინაში შეცივდება —
შუშები აქვს ჩამტვრეული, ხან მანქანა არ მომწონს, ხანაც
შოფერი — თავზეხელაღებულია, ზოგსაც ნასვამობას ვაბრა-

ლებ. ხოლო, როცა კაბინაში ადგილი არ იყო, ბავშვივით მიხაროდა. ოღონდ ახლა არ წავიდნენ. კიდევ ცოტა ხანს. თუნდაც ხუთ წუთს დარჩნენ სახლში. „თუმცა სად უნდა წავიდეს? — გავიფიქრე მე. — აულში არ მიესვლება, თვითონ თქვა. სხვა კი არავინ ჰყავს. რიბაჩიეში კი ათასნაირი ხალხი ცხოვრობს. სად უნდა შეაფაროს თავი ბავშვიანმა ქალმა? დალუჰავს ბავშვს ზამთარში! სჯობს ჩემთან დარჩნენ. იცხოვროს ცოტა ხანი, მოიფიქროს რა სჯობია. შეიძლება ქმარს დაუბრუნდეს, ანდა თვითონ ის მოძებნის...“

ეკ, უბედურებაა. ჯობდა გამომეყვანა გზაზე და უცებ გამემგზავრებინა. სამი საათი დავდიოდი და ვტყეპნიდი ერთ ადგილს, თავი შემჯავრდა, რატომ ვაკეთებ ასე? არა თვითონ მოვიყვან და მის თვალწინ გავაჩერებ მანქანას. სხვანაირად არაფერი გამოდის. სახლისკენ მოვბრუნდი. იგი უკვე კარიდან გამოდიოდა, ლოდინით დაღლილიყო. შემრცხვა და დამნაშავე ბავშვსავეთ შევაცქერდი.

— ლოდინით დაღალეთ? — წავიბურტყუნე მე. — რიბაჩიესკენ მიმავალი მანქანები არ არის, არა არის, მაგრამ ისეთი არა. რომ გამოდგეს. მაპატიეთ. ცუდად არ გამიგოთ, ერთი წუთით სახლში შემოდით, ძალიან გთხოვთ.

მან გაკვირვებით და ნალვლიანად შემომხედა, ჩუმად შებრუნდა სახლში.

— მე თქვენ გებრალებით? — მითხრა მან, როცა შევედი.

— არა, მაგიტომ არა. გესმით... მეშინია თქვენს მაგივრად. გაგიჭირდებათ. როგორ იცხოვრებთ?

— ვიმუშავებ. შეუჩვეველი არ ვარ.

— სად?

— სადმე მოვეწყობი. მაგრამ უკან არ დავბრუნდები, არც აულში წავალ. ვიმუშავებ და ვიცხოვრებ.

მე გავჩუმდი. ყველაფერს მივხვდი. იგი ახლა არაფერზე არ ფიქრობდა.

წყენა და სიამაყე მას სადღაც მიაქანებდა. მაგრამ განა ადვილი სათქმელია — ვიმუშავებ და ვიცხოვრებ! რა თქმა უნდა, სწორია, მაგრამ განა ასე ადვილად აეწყობა საქმეები. ხოლო ადამიანს რომ ძალა დაატანო არ შეიძლება.

ბიჭმა ჩემსკენ გამოიწია. ხელში ავიყვანე. ვაკოცე და გავიფიქრე: „ეჰ. ჩემო კარგო. ახლა ჩვენ ერთმანეთს დაეშორდებით. და როგორ არ მინდა, ღვიძლი შეილივით შეგვეთვისე...“

— რა გაეწყობა. წავიდეთ. — წყნარად ვუთხარი.

ივლექით, ბავშვი მე მომყავდა, მაგრამ კარებში შევჩერდი:

— სამუშაო ჩვენთანაც მოიძებნება, — ვთქვი მე, — შეგიძლიათ იცხოვროთ და იმუშაოთ კიდევ. პატარა ბინაც არის. დარჩით. ნუ ჩქარობთ. წასვლას ყოველთვის მოასწრებთ. იფიქრეთ...

იგი ჯერ არ მთანხმდებოდა. მაგრამ მერე დაეაჭრე. დავუმტკიცე. რომ სჯობდა ჯერ აქ. ჩვენთან ემუშავა. შემდეგ კი ცხოვრება თვითონ უჩვენებდა, წასვლით ხომ როცა მოისურვებდა მაშინ წავიდოდა.

ასე დარჩნენ ასელი და მისი ვაჟიშვილი სამატი ჩვენთან საგზაო უბანზე.

პატარა ოთახი ეზოში ცივი იყო და დაბეჭითებით მოვითხოვე, რომ ასელს და მის ვაჟს ჩემს ოთახში ეცხოვრათ, მე თვითონ კი იქ გადავსახლდი. ჩემთვის ესეც საკმარისი იყო.

იმ დღიდან ჩემი ცხოვრება სულ სხვანაირი გახდა. თითქოს ირაფერი შეცვლილა, ძველებურად მარტოხელი ვიყავი. მაგრამ ჩემში ადამიანმა გაიღვიძა, მარტოობისაგან გაყინული გული გამითბა, ყველაფერი იმაზეა დამოკიდებული ვის როგორ ესმის მარტოობა. რა თქმა უნდა. ხალხთან ვცხოვრობდი. შეიძლება ხალხში ცხოვრობდე. მუშაობდე, მეგობრობდე. ეხმარებოდე და გეხმარებოდნენ, როცა შენი საათი დარეკავს სხვაზე ცუდად არ გიპატრონონ. მაგრამ არის ცხოვრების ერთი მხარე, რასაც ვერაფრით ვერ შეცვლი, თუ არა სიყვარულით საყვარელი ადამიანისადმი. ბიჭუნას ძალიან შევეთვისე. შემოვლაზე რომ მივდიოდი, თბილად ჩავაცმევდი და ჩვენ გზებზე ხელით დამყავდა. მთელ თავისუფალ დროს მასთან ვატარებდი. ვერ წარმომედგინა, როგორ ვცხოვრობდი აქამდე უიმი-სოდ. ჩემი მეზობლები მიხვედრილი ხალხია და გულთბილად მოეკიდნენ ასელს და სამატს. ბავშვები ვის არ უყვარს. ასელა კი თვითონ არის გულკეთილი. გულთბია და ამიტომ თვითონაც იღვილად შეეგუა და შეეთვისა სხვებს. მე ბავშვი ასელის გამოც

შემიყვარდა. ვერაფრით ვერ დავეუმალე ჩემს თავს, ან როგორ დამეშალა. მე იგი შემიყვარდა. შემიყვარდა ერთბაშად, სულით და გულით, მარტოობაში განვლილი მთელი ჩემი ცხოვრებისათვის, მთელი ჩემი ნაღველისა და ტანჯვისათვის. ყველაფერმა, რაც დავკარგე და განვიცადე, ამ სიყვარულში მოიყარა თავი. მაგრამ ამის თქმის უფლება არ მქონდა. ასელი მას ელოდა. დიდხანს ელოდა, თუმცა კი არ იმჩინებდა. ზშირად შემინიშნავს, როცა გზაზე ვმუშაობდით, როგორ ხედებოდა და აცილებდა თვალებით ყველა გავლილ მანქანას. ხანდახან შეივს აიყვანდა, გზაზე გავიდოდა და დიდხანს, დიდხანს იჯდა იქ. ის კი არ ჩანდა. არ ვიცი ვინ იყო, ან როგორი, მე არ ვეკითხებოდი, თვითონ კი არავის არაფერს ეუბნებოდა.

დრო ნელა გადიოდა. სამატი იზრდებოდა. მკვირცხლი, მართლაც რომ მშვენიერი ბუთხუზა ბიჭუნა დადგა. არ ვიცი ვინმემ ასწავლა, თუ თვითონ მოიფიქრა — მამას მიძახდა. დამინახავს თუ არა, კისერზე ჩამომეკიდება:

„ატა! ატა!“ სამატის შემხედვარე ასელი ფიქრიანად გაიღიმებდა ხოლმე. მე კი მიხაროდა, თან გულიც მტკიოდა. სიხარულით გავუწევდი მამობას, მაგრამ რას იზამ...

იმ წელიწადს, ზაფხულზე გზას ვარემონტებდით. მანქანები გზას გვერდზე უვლიდნენ. ასელმა უცებ ერთ შოფერს დაუძახა:

— ეი, ჭანტაი, გაჩერდი!

ინერციით. მანქანა წინ გავარდა და გაჩერდა. ასელმა შოფერთან მიიღრინა. რაზე ლაპარაკობდნენ არ ვიცი, მხოლოდ გავიგონე როგორ შესძახა ასელმა შოფერს:

— ტყუი! ტყუი! არ მჯერა! გასწი აქედან! ახლავე წადი!

მანქანამ გზა განაგრძო, ასელი კი სახლისაკენ გაიქცა. იგი მგონი ტიროდა.

საქმეს გულს ვერ ვუღებდი. ვინ იყო? რა უთხრა ასელს? ათასნაირი იქვები და ფიქრები მაწვალებდნენ. ვერ მოკითმინე და შინისაკენ წავედი. ასელი შვილთან ერთად შინ იჯდა, გარეთ გამოსვლას არ აპირებდა. საღამოს გავბედე მასთან შესვლა.

—

— სამატი სად არის? მომენატრა! — ვთქვი მე.

— აქაა, — ნაღვლიანად შემესიტყვა ასელი.

— ატა — ჩემსკენ წამოიწია სამატი. ხელში ავიყვანე, ვე-
თამაშები, ის კი ზის ნაღვლიანი და ხმას არ იღებს.

— რა მოხდა, ასელ? — შევეკითხე მე.

ასელმა ღრმად ამოიოხრა.

— წავალ მე, ბაკე. — მითხრა მან. — იმიტომ კი არა, რომ
აქ თავს ცულად ვგრძნობ. თქვენი ათასგზის მაღლობელი ვარ.
მაგრამ რატომ... წავალ, გზას რა დალევს, წავალ სადმე...

ამას ის ტყუილად არ ამბობდა, ვხედებოდი დარდიან გულ-
ზე მართლა შეეძლო წასულიყო. მე კი რალა მრჩებოდა, სი-
მართლე უნდა მეთქვა:

— რა გაეწყობა. ასელ, რომ დაგაკავო ამის უფლება არ
მაქვს. მაგრამ მაშინ მე აქ აღარ მეცხოვრება. ერთხელ უკვე
მივატოვე დაცარიელებული კუთხე. იმის შემდეგ, რაც თით-
ქოს ტკივილს შევეგუე... შემთხვევა იყო, თუ ბედი, მხოლოდ
შენთან, ასელ, და სამატთან... და თუ შენ აქედან წახვალ, აქაუ-
რობა ჩემთვის ისევე საძულველი იქნება, როგორც ის ერთი
აღვილი პამირზე. იფიქრე, ასელ... ხოლო თუკი ის დაბრუნ-
დება და გული გაგიწევს. ხელს არ შეგიშლი, შენ ყოველთვის
თავისუფალი იქნები, ასელ...

ამ სიტყვებით სამატი ხელში ავიყვანე და გზაზე გავედო-
დიდხანს დავდიოდით ერთად. იგი კი, ჩემი პატარა ვერაფერს
ხვდებოდა.

ასელი ჯერ არ მიდიოდა. მაგრამ, ვინ იცის, რაზე ფიქრობდა
იგი? ამ დღეებში ჩამოვხში, სახე გამიშავდა.

ერთხელ, შუაღლისას ეზოში შევდივარ, ვხედავ სამატი და-
ბეჭითებით ცდილობს თვითონ გაიაროს, ასელს ხელით უჭი-
რავს, ეშინია არ დაიმტვრეს.

— ბაკე, ხედავ შენი შვილი უკვე დადის, შეხედე! — ბედ-
ნიერად გამიღიმა ასელმა. რა თქვა? შენი შვილიო! მე ნიჩაბი
გადავაგდე, ჩავცუცქდი და პატარას დაუძახე:

— მოდი, მოდი, ჩემო ბიჭუნა! მოდი ჩემთან, გაბედულად,
ნუ გეშინია!

სამატმა ხელები გაშალა.

— ატა! — მორბის, ფეხები ებლანდება. მე ხელში ავიტაცე, პაერში შევათამაშე და მკერდზე მივიკარი.

— ასელ! — ვუთხარი მე. — მოდი ხვალ ბავშვების ზეიმში მოვაწყობ. შენ თოკი დაგრიხე. თეთრი და შავი შალისაგან.

— კარგი, ბაქე! — გაიცინა მან.

— აუცილებლად თეთრი და შავი შალისაგან...

ცხენს მოვახტი და მეგობარ მეჯოგეებთან გავაქანე. კუმისი და ახალი ხორცი წამოვიღე. მეორე დღეს კი მეზობლები მოვიწვიეთ, ბიჭუნას „ფეხის ადგმას“ ვდღესასწაულობდით.

მე სამატი მიწაზე დავაყენე, ფეხები შავი და თეთრი თოკით შევეკარი, იქვე მაკრატელი დავდე და ვუთხარი ბავშვებს, რომლებიც ეზოს მეორე ბოლოში იდგნენ:

— ვინც პირველი მოიხრბენს და თოკს გაჭრის, იმას პირველს ერგება საჩუქარი, დანარჩენებს კი რიგის მიხედვით.

ბავშვები ყვირილით გამოიქცნენ, ნამდვილი შეჯიბრება გეგონებოდა.

როცა თოკები გადაჭრეს, მე სამატს ვუთხარი:

— ახლა კი, შვილო ჩემო, ირბინე. ბავშვებო, სამატიც თან წაიყვანეთ.

მათ ბიჭუნას ხელი ჩასჭიდეს და მასთან ერთად გაიქცნენ. შე კი ჩემთვის ვთქვი:

— ხალხნო! ჩემმა კეიცმა ფეხი აიღვა! დაე იგი ფრთამალ მერანად გაიზარდოს!

სამატი ბავშვებს მისდევდა, შემდეგ შემობრუნდა, დამიძახა: „ატა!“ და წაიქცა. მე და ასელი ერთად გავიქეციით მისკენ. როცა სამატი ხელში ავიყვანე, ასელმა პირველად მითხრა:

— ჩემო ძვირფასო!

ამ დღიდან ცოლ-ქმარი გავხდით.

ზამთარში აულში მოხუცებს ვეწვიეთ. ნაწყენი იყვნენ, მაგრამ შემდეგ გვაპატიეს შეცოდება, დაგვლოცეს.

დრომ შეუმჩნევლად გაიარა. ახლა სამატი ხუთი წლისაა. კარგად, თანხმობით ვცხოვრობთ. ოღონდ ერთ რამეზე არ ვლაპარაკობთ არასდროს. არ ვიცით იგონებდა ასელი მას თუ არა, როცა მარტო რჩებოდა თავისთავთან, მაგრამ ჩვენს შო-

რის არსებობს უთქმელი მოლაპარაკება: ჩვენს მას არ ვიცნობთ, ის კაცი ჩვენთვის არ არსებობდა და არც არსებობს.

მაგრამ განა ყველაფერი ადამიანის სურვილზეა დამოკიდებული. ხდება ხოლმე ისეთი რამ, რასაც ვერაფრით ვერ დაემალები. სულ ცოტა ხნის წინათ იგი თვითონ გამოგვეცხადა.

გზაზე ავარია მოხდა. ღამე იყო. მე და ჩემი მეზობელი, ჩემი თანაშემწე, გავიქეცი. გვინდოდა გაგვეგო რაშია საქმე. შეიძლება უბედურებაა რაიმე. მივირბინეთ. საბარგო მანქანა გზისპირა ბოძებს დაჯახებია. შოფერი დამტყრეულია, თითქმის გრძნობადაკარგული, უგონოდაა მთვრალი. მე იგი ვიცანი, ოღონდ სახელი ვერ მოვიგონე. ერთხელ გაქირვებიდან ვეიხსნა. ჩვენი მანქანა ბუქსირით უღელტეხილზე აათრია. ეს კი დოლონზე სახუმარო საქმე არაა. ადრე ასეთი რამ არავის გაუკეთებია. გაკეთება კი არა, გაფიქრებაც ქირდა. ის კი შეუპოვარი, თავზეხელაღებული გამოდგა, ჩემს სახლამდის მოგვათრია. ძალიან მომეწონა. ჩქარა ამის შემდეგ, ვილაცამ უღელტეხილზე მისაბმელი ამოიყვანა, სულ ცოტა დარჩენოდა, ეტყობა არ გამოუვიდა. მისაბმელი თხრილში ჩაუვარდა, მიიტოვა და წავიდა. მე მაშინ გავიფიქრე, ნეტავი ის გამბედავი ყმაწვილი ხომ არ იყო-თქო. შემეცოდა, რომ მამაცმა კაცმა საწადელს ვერ მიაღწია. მაგრამ ამის შემდეგ უღელტეხილზე მისაბმელიანმა მანქანებმა დაიწყეს სიარული. ალბათ ბიჭებმა შესაფერისად მოაწყვეს და სწორადაც მოიქცენ.

გულახდილად ვიტყვი, არ ვიცოდი, რომ სწორედ ის კაცი იყო, ვისგანაც ასელი წავიდა. მაგრამ რომ მცოდნოდა კიდევ, იმასვე გავაკეთებდი. სახლში მოვიყვანე და ყველაფერს მივხვდი. ასელს შეშა შემოჰქონდა, როგორც კი იგი დაინახა. ნაჭრები ხელიდან გაუცვივდა. მაგრამ არც ერთმა ჩვენთაგანმა ერთმანეთს არაფერი არ აგრძნობინა. თითქოს პირველად ვხვდებოდით. მით უმეტეს, მე მმართველმა თავის დაქერა. რომ რაიმე სიტყვით. ქცევით მათთვის ტკივილი არ მიმეყენებინა, ხელი არ შემეშალა, რომ ერთმანეთისათვის გაეგოთ. ახლა მე არაფერს არ ვწყვეტდი. წყვეტდნენ თვითონ ისინი: მათ აკავშირებდათ წარსული, აკავშირებდათ შვილი, რომელიც მე მეწვა გვერდზე და რომელსაც მე ვეალერსებოდი.

იმ ღამეს არც ერთს არ გვძინებია. ყველა თავისას ფიქრობდა. მე — ჩემსას.

ასეღს შეუძლია წავიდეს და შვილიც თან წაიყვანოს. ეს მისი უფლებაა, დაე ისე მოიქცნენ, როგორც გული და გონება უკარნახებთ. მე. მე კი. მე რა სახსენებელი ვარ, ჩემზე არაფერი არ არის დამოკიდებული, მე ხელი არ უნდა შევეშალო მათ.

ის ახლაც აქაა, ჩვენს ტრასაზე დადის. სად იყო იგი ამ წლების განმავლობაში, რას აკეთებდა? თუმცა ამას რა მნიშვნელობა აქვს... ეს მათი საქმეა...

მე და ბაითემირი შემოვლიდან ვბრუნდებოდით. უღელტეხილზე სადამო წვებოდა. ცას ნაცრისფერი დასდებოდა. მზე სადღაც მთების იქით იკარგებოდა. გზაზე ორივე მიმართულებით ღრიალით მიექანებოდნენ მანქანები.

— აი, ასეა საქმე, — ცოტა ხნის ღუმლის შემდეგ ჩაფიქრებით წაილაპარაკა ბაითემირმა. — სახლიდან ჩემი წასვლა ახლა არ შეიძლება. თუ ასეღი სახლიდან წასვლას გადაწყვეტს, იგი წმინდა უნდა იყოს თავისი სინდისის წინაშე. მე კი შვილს უკანასკნელად უნდა დავულოცო გზა. იგი ხომ ჩემთვის მშობლიურზე უფრო მშობლიურია. მაგრამ შვილს მე მათ ვერ დავაშორებ. ამიტომაც არსად არ მივდივარ. მითუმეტეს პამირზე... ამ ამბავს, რა თქმა უნდა, გაზეთისათვის არ გიყვებით... ისე, როგორც კაცი კაცს...

ეპილოგის მაგიერ

მე და ილიასი ერთმანეთს ოშში დავშორდით. იგი პამირზე წავიდა. მე კი ჩემს საქმეებს გავყევი.

— ჩავალ, ალიბეკს მოვნახავ, ახალ ცხოვრებას დავიწყებ! — ოცნებობდა იგი გზაზე. — ნუ იფიქრებთ, რომ მე ხელიდან წასული აღამიანი ვარ. მე ყველაფერი კიდევ წინა მაქვს. მოვა დრო, ცოლსაც შევირთავ. ბავშვებიც მეყოლება, მექნება ოჯახი, სახლი, ყველაფერი ისე, როგორც სხვებს. მუშაობას დავიწყებ, მეგობრები და ამხანაგებიც გამომიჩნდე-

ბიან. მხოლოდ ერთი რამ არ მექნება, ის რაც სამუდამოდ, უკანდაუბრუნებლად დავკარგე. — წარსულს ვერაფრით ვერ დაიბრუნებ... მაგრამ ჩემი სიცოცხლის ბოლო დღეებამდე მეხსოვება ასელი და ყველაფერი ის, რაც ჩვენს შორის იყო.

წამოსვლის დღეს ტბასთან მივედი, იმ ციცაბო ბორცვთან. მე იქ ტიან-შანის მთებს ვეთხოვებოდი, ვეთხოვებოდი ისიკ-ყულს. მშვიდობით, ისიკ-ყულო, ჩემო უთქმელო სიმღერავ! წაგიყოლებდი თან შენი ლაქვარდითა და ყვითელი ნაპირებით, მაგრამ არ შემიძლია, ისევე არა, როგორც არ მერგო თან წამელო სიყვარული საყვარელი ადამიანისაგან. მშვიდობით, ასე! მშვიდობით, ჩემო წითელთავსაფრიანო ჩინარო! მშვიდობით, ჩემო სიყვარულო! ბედნიერი იყავი!..

მე ილიასისათვის არ მითქვამს, რაც ბაითემირისაგან გავიგე. განა ის არ არის ამ ორი ადამიანის მშვენიერება და ღრსება, რომ ასე კეთილშობილურად მოეკიდნენ ერთმანეთს, მიუხედავად იმისა, რომ ურთიერთზე არაფერი იცოდნენ. მე რატომ უნდა მოეყოლოდი.





ჩემს თანატოლებს, რომლებიც შაშხებისა და უფროსი ძმების ფარაჯებში გაიზარდნენ.

•ი, ისევ ვდგავარ უბრალო ჩარჩოში ჩასმული ამ პატარა სურათის წინ. ხვალ დილიდანვე აულში უნდა წავიდე და სურათს დიდხანს, დაკვირვებით მიეჩერებივარ, თითქოს შეუძლია გამგზავრების წინ კეთილი რჩევა მომცეს.

ეს სურათი მე გამოფენაზე ჯერ არ გამიტანია. უფრო მეტიც, როცა აულიდან ჩემთან ნათესავეები მოდიან, ვცდილობ რაც შეიძლება შორს გადავმალო. მასში არაფერია სამარცხვინო, არც დიდი ხელოვნების ნიმუშია. იგი ისეთივე უბრალოა, როგორც მასზე გამოსახული მიწა.

სურათის სიღრმეში შემოდგომის მიმქრალი ზეცის ნათლეთი მოჩანს. ქარი შორეული მთაგრეხილებისაკენ ერეკება ღრუბლებს. წინა პლანზე მოწაბლისფრო-წითელი აბზინდე-

ბით აელვარებული ტრამალა. გზა კი შავია, ჯერ კიდევ არ გამ-
შრალა ამასწინანდელი წვიმების შემდეგ. გზის ნაპირას მორ-
ცხვად მიმდგარან ვაცოწვერას გადამხმარი ბუჩქები. გადარეუ-
ხილი ნაურმალის გასწვრივ ორი ნაკვალევია, ნაკვალევი თან-
დათან მკრთალდება, თვითონ მიმავალნი კი გგონია ნაბიჯს გა-
დადგამენ და ჩარჩოს იქით გაჰქრებიან. ერთი მათგანი... თუმ-
ცა, მგონი, ცოტა აეჩქარდი.

ეს იყო ჩემს აღრეულ სიკაბუკეში. ომის მესამე წელიწადს.
შორეულ ფრონტებზე, სადღაც კურსკთან და ორიოლთან. ჩვე-
ნი მამები და ძმები იბრძოდნენ, ჩვენ, თხუთმეტი წლის ბიჭები,
კოლმეურნეობაში ვმუშაობდით. გლეხის ყოველდღიური. ძვი-
მე ჭაფა გვაწვა, მაშინ ჯერ კიდევ სუსტ მხრებზე. განსაყუთრე-
ბით მოსავლის აღების დღეებში გვიჭირდა. მთელი კვირაო-
ბით ვიკარგებოდით, დღედაღამე მინდვრად ვმუშაობდით. ხან
ჯალოზე, ხან კი გზას ვიყავით გაკრული — სადგურში მიგვ-
ქონდა ხორბალი.

ერთ ასეთ პაპანაქება დღეს, როცა ნამგალი მეტი სიმხურ-
ვალისაგან აელვარებულიყო. მე ცარიელი ორთვალით სადგურ-
რიდან ვბრუნდებოდი და სახლში შევლა გადავწყვიტე.

ფონის მახლობლად. მალლობზე. ქუჩის ბოლოს ალიზით
შემოღობილი ორი ეზოა. ეზოებს ირგვლივ ალვის ხეები აკ-
რავს. ეს ჩვენი სახლებია. დიდი ხანია. რაც ერთმანეთის გვერ-
დით ცხოვრობს ჩვენი ორი ოჯახი. მე თვითონ — დიდი სახ-
ლიდან ვარ. ორი ძმა მყავს, ორივე უფროსი, უცოლო. ორივენი
ფრონტზე არიან და უკვე დიდი ხანია არაფერს იწერებიან.

მამაჩემი. ძველი ღურგალი. განთიადისას. ნამაზის შემდეგ
მიდიოდა საერთო ეზოში მდგარ საღურგლო სახელოსნოში.
იქიდან კი გვიან საღამოს ბრუნდებოდა.

სახლში დედა და და რჩებოდნენ.

მეზობელ ეზოში. ან როგორც მას აულში უწოდებენ —
მცირე სახლში — ჩვენი ახლო ნათესავეები ცხოვრობენ. ჩვენი
პაპის პაპები თუ იმათი პაპები, დვიძლი ძმები იყვნენ. მაგრამ
ვამბობ ახლო ნათესავეები-თქო იმიტომ, რომ ერთ ოჯახად
ვცხოვრობდით. ასე დაწესდა მას შემდეგ, რაც ჩვენი პაპები

ერთად მომთაბარობდნენ, ერთად დგამდნენ კარვებს, ერთად უვლიდნენ ჯოგს. ეს ტრადიცია ჩვენც შევინარჩუნეთ. როცა აულში კოლექტივიზაცია დაიწყო, ჩვენმა მამებმა ერთმანეთის გვერდით აიშენეს სახლები. არა მარტო ჩვენ, არამედ მთელი არალის ქუჩა აულსა და მდინარეს შუა, თანატომელები ვართ, ყველანი ერთ გვარს ვეკუთვნივით.

კოლექტივიზაციის დაწყების შემდეგ მალე მცირე სახლის უფროსი გარდაიცვალა. მის ცოლს ორი ბავშვი დარჩა. ძველი საგვარეულო ადათის მიხედვით, რომელსაც აულში მაშინ ჯერ ისევ იცავდნენ, ბავშვებიანი ქვრივის უპატრონოდ დატოვება, სხვა ტომისათვის მისი გატანება არ შეიძლებოდა და ჩვენმა თანატომელებმა მასზე მამაჩემი დააქორწინეს. ამას მოითხოვდა მოვალეობა წინაპართა სულების წინაშე, ისინი ხომ მიცვალებულის უახლოესი ნათესავებიც იყვნენ.

ასე გაგვიჩნდა მეორე ოჯახი. მცირე სახლი დამოუკიდებელ მეურნეობად ითვლებოდა: თავისი კარ-მიდამოთი, საქონლით, მაგრამ ფაქტიურად ჩვენ ერთად ვცხოვრობდით.

მცირე სახლმაც ორი შვილი გააცილა არმიაში. უფროსი სადიკი ქორწინების უმალ წავიდა. მისგან წერილებსაც ვიღებდით, თუმცა იშვიათად.

მცირე სახლში დარჩა დედა, რომელსაც მე „კიჩი-აპას“, უმცროს დედას ვუძახდი და მისი რძალი — სადიკის ცოლი. ორივენი დიდიდან სალამომდე კოლმეურნეობაში მუშაობდნენ. ჩემი უმცროსი დედა კეთილი, გამრჯე და უწყინარი ქალი იყო. შრომაში ახალგაზრდებს არ ჩამოუვარდებოდა. არხების გათხრა იყო თუ მორწყვა, ერთნაირად მაგრად ეჭირა ხელში თოხი. ბედმა თითქოს დააჯილდოვაო, გამრჯე და მუყაითი რძალი არგუნა. ჯამილა დედასავით დაუღლეელი და ფხიანი იყო, ოღონდ ცოტა უცნაური ხასიათი ჰქონდა.

ძალიან მიყვარდა ჯამილა. მასაც ვუყვარდი. კარგადაც ვმეგობრობდით, მაგრამ ვერ ვბედავდით ერთმანეთისთვის სახელით მიგვემართა. მე მას როგორც უფროსი ძმის ცოლს „ჯენეს“ ვუძახდი, ის კი „კიჩინე ბალას“ — პატარა ბიჭუნას, თუმცა, მე სულაც არ ვიყავი პატარა და ჩვენს შორის ასაკობრივი სხვაობა არც ისე დიდი იყო. მაგრამ რა უნდა მექნა — ასეა

მიღებული აულებში: რძლები ქმრის უკცროა ძმებს „კიჩინე ბალას“ ანდა „ჩემო კაინის“ უწოდებენ.

ორივე სახლის საშინაო საქმეებს დედაჩემი აწესრიგებდა. მას ეხმარებოდა ჩემი და, სასაცილო გოგონა, წვრილ-წვრილი ნაწნავები რომ ეყარა. არასოდეს დამავიწყდება, როგორ ბეჯითად მუშაობდა იგი იმ მძიმე დღეებში. ბოსტნის გადაღმა აძოვებდა ორივე ოჯახის ბატკნებსა და ხბოებს, აგროვებდა წივასა და ფიხსს, რომ სახლში ყოველთვის გვექონოდა შეშა. ჩემი ცხვირპაკუა დაიკო უმსუბუქებდა დედაჩემს მარტოობის სიმძიმეს, განარიდებდა მძიმე ფიქრებს უგზოუკვლოდ დაკარგულ შვილებზე.

თანხმობითა და შეძლებით ჩვენი დიდი ოჯახი დედაჩემის მადლიერი უნდა იყოს. ის იყო ორივე სახლის სრულუფლებიანი დიასახლისი, კერიის დედაბოძი. სულ ახალგაზრდა შემოვიდა იგი ჩვენი მომთაბარე პაპების სახლში და შემდეგ წმიდად ინახავდა მათ ხსოვნას და სამართლიანად განაგებდა ოჯახებს. აულში მას პატივს სცემდნენ როგორც ყველაზე დარბაისელ, მოსარიდებელ და ბრძენ დიასახლისს. ყველაფერს ოჯახში დედა განაგებდა, მამას, მართალი რომ ითქვას, აულის მცხოვრებნი ოჯახის უფროსად არც თვლიდნენ. არაერთხელ გამიგონია როგორ ლაპარაკობდნენ აულში: „ეე, უმჯობესია უსტაკესთან ნუ მიხვალ — ასე უწოდებენ პატივისცემის ნიშნად ჩვენთან ხელოსნებს, — მან მხოლოდ თავისი ნაჯახი იცის. იმათთან ყველაფრის თავი უფროსი დედაა — იმას დაეკითხე, ასე აჯობებს“.

უნდა ითქვას, რომ მეც, ჩემი ახალგაზრდობის მიუხედავად, ხშირად ვერეოდი სამეურნეო საქმეებში. ეს მხოლოდ იმიტომ იყო შესაძლებელი, რომ უფროსი ძმები საომრად იყვნენ წასულნი. და მე, ხშირად ხუმრობით, ხანაც სერიოზულად ორი ოჯახის ჯიგიტს, დამცველს და მარჩენალს მიწოდებდნენ. ამით ვამაყობდი და მუდამ თან მსდევდა პასუხისმგებლობის გრძნობა. დედაც ხელს უწყობდა ჩემს დამოუკიდებლობას. მას სურდა, რომ დამოუკიდებელი და გონებამახვილი მეოჯახე გამოვსულიყავი და არ დავმსგავსებოდი მამაჩემს, რომელმაც მხო-

ლოდ ის იცოდა, რომ დღიანდამიანად ხერხავდა და რანდავდა რალაცას.

ორთვალა სახლთან, ტირიფის ჩრდილში გავაჩერე, სადავე-ები მოვუშვი და ჭიშკრისაკენ გავეშურე. ეზოში ჩვენი ბრიგადირი ოროზმატი დავინახე. ის, ჩვეულებისამებრ, ცხენზე იჯდა, ყავარჯენი უნავირზე მიეკრა. მის გვერდით დედა იდგა. რალაცაზე დაობდნენ. ახლოს მოსულმა დედის ხმა გავიგონე.

— ეს არ მოხდება! ღმერთის მოგერიდოს, სად გავიწილა, რომ ქალი ორთვალათი ტომრებს დაათრევდეს? არა, ძვირფასო, შეეშვი ჩემს რძალს, დეე ისე იმუშაოს, როგორც მუშაობდა. ისედაც მზის სინათლე დაკარგული მაქვს, ერთი სინჯე როგორი საქმეა ორი ოჯახის მოვლა-პატრონობა! კიდეც კარგი გოგო წამომეზარდა... მთელი კვირაა წელი ვერ გავმართე, მტკივა. თიტქოს ქეჩა მეთელოს, სიმინდი კი ფუჭდება — წყალსაა დანატრებული. დედა გაცეცხლებული იყო, ლაპარაკის დროს მანდილის ბოლოს კაბის საყელოში იტენიდა. ასე მაშინ იქცეოდა, როცა ბრაზობდა.

— რა აღამიანი ხართ!—ჩაილაპარაკა იმედგადაწყვეტილმა ოროზმატმა. როგორ ფიქრობთ, ფეხი რომ მქონდეს, თქვენ დაგიწყებდით ხვეწნას? განა არ აჯობებდა, წინანდებურად თვითონ დაემჯდარიყავი ორთვალაზე!.. რა ქალის საქმეა ამის კეთება, მაგრამ კაცი სად ვიპოვნო? გადავწყვიტეთ ჯარისკაცების ცოლებს ვთხოვოთ. თქვენ რძალს ნებას არ აძლევთ, უფროსები კი რაიონიდან უკანასკნელი სიტყვებით გვლანძღავენ... ჯარისკაცებს პური სჭირდებათ, ჩვენ კი გეგმას ვერ ვასრულებთ. რას ჰგავს ეს?

მე. მათ ვუახლოვდებოდი; მათრახს მიწაზე მივათრევდი, ბრიგადირმა შემნიშნა და ცას ეწია სინარულით — ეტყობოდა, რალაცა მოიფიქრა.

— რას იზამ, თუკი ასე გეშინიათ რძალი ვინმემ არ მოგტაცოთ, აი მისი კაინი. — გახარებულმა მიუთითა მან ჩემზე, — არავის გააკარებს სათოფეზე. ამაში ეჭვი არ შეგეპაროთ! სეითი ყოჩალი ბიჭია. აი ეს ყმაწვილები არიან ჩვენი მარჩენლები. ძალიან გვეხმარებიან...

დედამ საშუალება არ მისცა დაემთავრებინა.

— რას დამსგავსებინხარ, შე მაწანწალავ! — ავიშვიშდა იგი. — თმები მღვდელივით ჩამოგზრდია, გაბურძღვნილხარ. მამაშენსაც დრო ვერ უპოვნია თმა გადაგპარსოს...

— ასე აჯობებს, დღეს ბიჭმა თქვენთან ინებივროს, თმა გადაიღოს, — მოხერხებულად აუბა დედაჩემს მხარი ოროზმატმა. — სეით, დარჩი დღეს სახლში, ცხენები გამოაძღე, ხვალ დილით კი ჯამილას ორთვალას ჩავაბარებთ და ერთად იმუშავებთ. იცოდე, თვალისჩინივით უნდა გაუფრთხილდე. თქვენ ნუ გეფიქრებათ, ბაიბიჩე, სეითი ჯამილას არავის და-აჩაგვრინებს. თუკი ამაზე მიდგება საქმე, დანიარსაც მაგათთან ერთად გავაგზავნი. ხომ იცნობთ: უწყინარი ყმაწვილია... აი, ის ახლახან რომ დაბრუნდა ფრონტიდან. სამივენი ერთად წაიღებენ ხოლმე ხორბალს სადგურზე. მაშინ კი ვინ გაბედავს თქვენ რძალს ხმა გასცეს! სწორს ვამბობ, სეით? შენ როგორ ფიქრობ, ჯამილა გვინდა ორთვალაზე დაენიშნოთ. დედაშენი წინააღმდეგია, დააჭერე როგორმე.

მესიამოვნა, ბრიგადირმა რომ შემაქო, ისიც მესიამოვნა, რომ მოზრდილივით მეთათბირებოდა. თანაც უცებ წარმოვიდგინე თუ რა კარგი იქნებოდა სადგურზე ჯამილასთან ერთად სიარული. სერიოზული გამომეტყველება მივიღე და დედას ვუთხარი:

— არაფერი არ მოუვა, მგლები შესჭამენ თუ?

და გამოცდილი მებარგულივით, საქმიანად გადმოვაბურჭყე, დინჯად მხრების ქნევით გავუღდექი გზას სახლისაკენ, თან მათრახს მივათრევედი.

— ერთი ამას დამიხედეთ! გაუკვირდა დედას, თითქოს გაუხარდა კიდევ, მაგრამ იმ წუთშივე მომადახა: — მე შენ გაჩვენებ მგლებს, ბევრი გესმის, ძალიან დამიბრძენდი.

— მაშ ვის უნდა ესმოდეს ორი ოჯახის ჭიგიტს თუ არა. უნდა ამაყობდეთ! — გამომესარჩლა ოროზმატი, თანაც შიშით შეხედა დედას, არ გაჭიუტდესო.

მაგრამ დედა არ შეპასუხებია, თავი ჩაქინდრა, მძიმედ ამოიოხრა და ჩაილაპარაკა:

— რა დროს მაგის ჭიგიტობაა, ჯერ სულ ბავშვია და დღე და ღამე გასწორებული აქვს მუშაობით. ჩვენი ჭიგიტები, ჩვენი

თვალისჩინები, ღმერთმა იცის სად არიან! დაცარიელდა ჩვენი სახლები, ნასახლარებს დაემსგავსნენ.

მე უკვე შორს ვიყავი და ვეღარ გავიგე კიდევ რა თქვა დედამ. არ შევჩერებულვარ, ისე მოუუქნიე მათრახი სახლის კიდეს და მტვერი დავაყენე; დისთვის, რომელიც ხელების ტყაპუნით ეზოში კიზიაკს აცხობდა, ღამილზე არც კი მიპასუხია. დინჯად გავიარე ეზო და ფარდულში შევედი. ჩავტუტქდი, აუჩქარებლად დავიბანე ხელები, თვითონ ვისხამდი წყალს დოქიდან. შემდეგ ოთახში შევედი, ჭიქით მაწონი დავლიე, მეორე ფანჯრის რაფაზე დავდგი და პურის ჩაფშვნა დავიწყე.

დედა და ოროზმატი ისევ ეზოში იდგნენ. უკვე აღარ კამათობდნენ, ხმადაბლა დინჯად ლაპარაკობდნენ. ალბათ, ჩემს ძმებზე საუბრობდნენ. დედაჩემი დროდადრო კაბის სახელოთი იწმენდდა წამოწითლებულ თვალებს და დანადვლიანებული უქნევდა თავს ოროზმატს, რომელიც ჩანდა მას ამშვიდებდა. სევდაჩამდგარი თვალებით დედა სადღაც შორს, ხეებს ზევით იცქირებოდა, თითქოს ელოდა, რომ იქ თავის შვილებს დაინახავდა.

ნადველმოკიდებული დედა ეტყობოდა დაეთანხმა ბრიგადირის წინადადებას. მან კი კმაყოფილმა იმით, რომ თავისი გაიტანა, ცხენს მათრახი შემოჰკრა და ეზოდან თოხარიკით გაიყვანა.

არც დედას, არც მე წარმოდგენაც კი არ გვქონდა რითი დამთავრდებოდა ყოველივე ეს.

ღარწმუნებული ვიყავი, რომ ჯამილა მოუვლიდა ორცხენიან საბარგულს. იგი ცხენებს კარგად იცნობდა, ჯამილა ხომ მეჯოგის ქალიშვილი იყო, მაღალმთიან აულ ბაკაირიდან. ჩვენი სადიკიც მეჯოგე იყო. ერთხელ თურმე გაზაფხულზე დოღის დროს, სადიკმა ვერ მოახერხა ჯამილას დასწეოდა. ვინ იცის, მართალი იყო თუ არა, ამბობდნენ, რომ შეურაცხყოფილმა სადიკმა ჯამილა მოიტაცაო. სხვები ამტკიცებდნენ: მათ ერთმანეთი უყვარდათ და ამიტომ შეუღლდნენო. მაგრამ, როგორც

არ უნდა ყოფილიყო, მათ ერთად მხოლოდ ოთხი თვე იცხოვრეს. შემდეგ ომი დაიწყო და სადიკი ჯარში გაიწვიეს.

არ ვიცი რისი ბრალი იყო, იქნებ იმისი, ჯამილა ბავშვობიდანვე ცხენის რემას რომ დასდევდა, ან იქნებ იმისი, რომ მშობლებისათვის ქალიც იყო და ვაჟიც, ჯამილას ხასიათში რაღაცა ჰქონდა მამაკაცური, იგი ხანდახან უკმეხი, უხეშიც კი იყო ხოლმე და მუშაობაც მამაკაცური იცოდა. მეზობლებთან კარგ ურთიერთობაში იყო, მაგრამ თუ ვინმე აწყენინებდა, არავის ჩამორჩებოდა ლანძღვაში და ზოგს თმებიტაც დაითრევდა ხოლმე.

ხშირად შემოუჩივლიათ მეზობლებს:

ეს რა ღვთის რისხვაა თქვენი რძალი, ჯერ სახლში ხეირიანად ფეხი არ შემოუდგამს, ენას კი ისე ატრიალებს, ღმერთმა დაგიფაროს. არც არავისი პატივისცემა აქვს და არც სირცხვილი.

— ძალიანაც კარგი, რომ ასეთია! — პასუხობდა დედა, — ჩემს რძალს პირში სიმართლის თქმა უყვარს. ასე სჯობია, ვიდრე ჩემად იყო და ზურგს უკან იგესლებოდე. თქვენები კი ვითომ წყნარები არიან, საქმე საქმეზე რომ მიდგეს, კისერს წაგატეხინებენ.

მამა და უმცროსი დედა არასოდეს არ ექცეოდნენ ჯამილას ისე მკაცრად, როგორც ეს მამამთილსა და დედამთილს შეეფერებათ. მათ ჯამილა უყვარდათ და მხოლოდ ერთი სურვილი ჰქონდათ: ქმრისა და ღვთის ერთგული ყოფილიყო.

მე ძალიან კარგად მესმოდა მათი. აღამიანები, რომელთაც ოთხი შვილი გააცილეს ჯარში და რომელთაც ერთადერთი რძალი ჰყავდათ, მასში პოულობდნენ ნუგეშს და თვალისჩინივით უფრთხილდებოდნენ. მაგრამ დედაჩემის ვერ გამეგო, იგი არ იყო ისეთი ქალი, რომ უბრალოდ ჰყვარებოდა ვინმე. დედას მკაცრი, მომთხოვნი ხასიათი ჰქონდა, თავისი კანონ-წესებით ცხოვრობდა და მას არასოდეს არ ჰღალატობდა. დედა ზაფხულის დადგომისთანავე ეზოში ღვით ახრჩოლებდა ხოლმე ჩვენს სამომთაბარო იურტას, რომელიც ჯერ კიდევ სიჭაბუკეში გამართა მამამ. იგი ჩვენც შრომისმოყვარეობისა და უფროსებისადმი პატივისცემის გრძნობით გვზრდიდა იმთავითვე. ოჯახის ყველა წევრისაგან უსიტყვო მორჩილებას მოითხოვდა.

ჯამილა ჩვენთან მოსვლის პირველი დღეებიდანვე, სულ სხვანაირი აღმოჩნდა, ვიდრე რძალს შეეფერებოდა. მართალია, იგი პატივს სცემდა უფროსებს, დამჭერეც იყო, მაგრამ მათ წინაშე არასოდეს ქედს არ იხრიდა, სამაგიეროდ სხვა რძლებივით არასოდეს ენაგესლიანობდა ზურგს უკან. იგი ყოველთვის პირდაპირ ამბობდა, რასაც ფიქრობდა და არ ეშინოდა გამოეთქვა თავისი აზრი. დედა ხშირად უჭერდა ხოლმე მხარს, ეთანხმებოდა, მაგრამ საბოლოო სიტყვის თქმის უფლებას ყოველთვის თვითონ იტოვებდა.

მე მგონია, რომ დედა ჯამილას პირდაპირობასა და სამართლიანობაში თავის ტოლფასოვან ადამიანს ხედავდა და ჩუმიად ოცნებობდა ოდესმე მისთვის ადგილი დაეთმო, გაეხადა იგი უფლებამოსილი დიასახლისი, ბაიბიჩე, ოჯახური კერის დამცველი.

— ალას უმადლე, შვილო ჩემო, — უქადაგებდა დედა ჯამილას, — ასეთ შეძლებულ, დალოცვილ ოჯახში მოხვდი. ეს შენი ბედნიერებაა. ქალის ბედნიერებაა ის, რომ ყავდეს შვილები და ჰქონდეს სიკეთით სავსე ოჯახი. შენ კი, ღვთის მადლით, დაგრჩება ყველაფერი, რაც ჩვენ, მოხუცებს შეგვიძენია. თან ხომ არ ჩავიტანთ საფლავში. ოღონდ ბედნიერება მხოლოდ იმასთან რჩება, ვინც თავის ღირსებასა და სინდისს უფროთხილდება. გახსოვდეს ეს და დაიცავი სახელი და პატიოსნება.

მაგრამ ჯამილას მაინც ჰქონდა რაღაც, რაც მოხუცებს აშფოთებდა. იგი პატარა ბავშვივით ზედმეტად მხიარული იყო. ზოგჯერ თითქოს სრულიად უმიზეზოდ იწყებდა ხმამაღალ სიცილს. ხოლო, როცა სამუშაოდან ბრუნდებოდა, სახლში კი არ შემოდიოდა, შემორბოდა ხოლმე, ერთი ნახტომით იტოვებდა უკან არხს. სრულიად უმიზეზოდ ჰკოცნიდა ხან ერთ, ხან მეორე დედამთილს.

ყველაზე მეტად ჯამილას მაინც სიმღერა უყვარდა, იგი მუდამ დიდინებდა; უფროსებსაც არ ერიდებოდა. ყველაფერი ეს არ ეგუებოდა აულში გამეფებულ წარმოდგენას იმაზე, თუ როგორ უნდა იქცეოდნენ რძალი ოჯახში, მაგრამ ორივე დედამთილი თავს იმით იმშვიდებდა, რომ დრო გავა და ჯამილა დადინჯდებო: ახალგაზრდობაში ხომ ყველა ასეთია. ჩემთვის კი

ჯამილაზე უკეთესი ქვეყნად არავინ იყო. როცა ერთად ვიყავით, შეგვეძლო მთელი დღე სრულიად უმიზეზოდ გვეხარხარა, გვერბინა ეზოში.

ჯამილა კარგი შესახედავი იყო, მოხდენილი, ტანკენარი, სწორი სქელი თმებით, რომელიც მძიმე ნაწნავებად ეცემოდა ზურგზე. იგი კონტად იკრავდა ხოლმე თეთრ თავსაფარს, რომელიც ძალიან უხდებოდა და სასიამოვნო ელფერს აძლევდა მის შავგვრემან სახეს. როცა ჯამილა იცინოდა, მისი მოლურჯო-შავი ნუშისებური თვალები ახალგაზრდული ცეცხლით ენთებოდა, ხოლო როცა სიმღერას იწყებდა, მასში ნაპერწკლები კიაფობდნენ.

მე ხშირად ვამჩნევდი, რომ ჯიგიტებს, განსაკუთრებით ფრონტიდან დაბრუნებულებს, თვალი რჩებოდათ მასზე. ჯამილას თვითონაც უყვარდა ხუმრობა, მაგრამ ზედმეტის უფლებას კი არავის აძლევდა. მე ყოველთვის მაბრაზებდა ეს. ვექვიანობდი, როგორც უმცროსი ძმები ექვიანობენ ხოლმე თავიანთ დებზე და თუკი ჯამილასთან ვინმეს შევამჩნევდი, ვცდილობდი ყოველნაირად შემეშალა ხელი. ინდაურივით ვიფხორებოდი და ისეთი ბრაზით ვუყურებდი, თითქოს ვეუბნებოდი: „ტყუილად როხროხებთ. იგი ჩემი ძმის ცოლია და ნუ იფიქრებთ, რომ მას დამცველი არ ჰყავს“.

ასეთ წუთებში მე მოურიდებლად ვეჩრებოდი ხოლმე მათ საუბარში, საჭირო იყო თუ არა, რაღაცას ჩავურთავდი, ვცდილობდი დამეცინა მის აშიყთათვის, ხოლო როცა ეს არ გამომდიოდა, თავს ველარ ვიკავებდი და გამწარებით ვქშინავდი. ბიჭები სიცილით იფხრიწებოდნენ:

— ერთი ამას დამიხედეთ! დავიჯეროთ ჯამილა მაგის რძალია? ჩვენ კი არ ვიცოდით!

თავს ვიკავებდი, მაგრამ ვგრძნობდი როგორ მოღალატურად მიწითლდებოდა ყურები და თვალზე ცრემლი მადგებოდა. ჯამილას კი, ჩემს ჯენეს, ესმოდა ჩემი. იგი ძალით იკავებდა სიცილს, რომელსაც ის იყო უნდა ეფეთქა, და სერიოზულ სახეს იღებდა:

— თქვენ როგორ ფიქრობთ, ჯენე ასე ადვილი საშოვნელია, ქუჩაში იპოვნი? — ეუბნებოდა იგი ჯიგიტებს. იქნებ

თქვენსკენ ჰყრია, ჩვენსკენ კი არა! წავიდეთ, ჩემო კაინი, ერთი მაგათ! — იგი ამაყად ასწევდა თავს, გამომწვევად შეარხევდა მხრებს, ჩემთან ერთად მოდიოდა და თან ჩუმად ილიმებოდა.

მე ამ ღიმილში ვამჩნევდი დარდსაც და სიხარულსაც. შეიძლება იგი მაშინ ფიქრობდა: „ეხ, შე პატარა სულელი ბიჭო, მე რომ რამე მინდოდეს, ვინ დამიშლის? მთელი ოჯახიც რომ ჩამისაფრდეს მაინც მოვახერხებ!“ ასეთ შემთხვევებში მე დამნაშავესავით ვლუმდი, ვეჭვიანობდი ჯამილაზე, ვაღმერთებდი მას, ვამაყობდი იმით, რომ იგი ჩემი ჯენეა, ვამაყობდი მისი სილამაზით, დამოუკიდებელი ხასიათით. ჩვენ გულითადი მეგობრები ვიყავით და ერთმანეთს არაფერს ვუმალავდით.

იმ ხანებში აულში ცოტა იყო მამაკაცები. ზოგიერთი ამით სარგებლობდა, თავხედურად იქცეოდა ქალებთან, აგდებულად ეკიდებოდა მათ, თითქოს ამბობდა: რა გვაქვს მათთან სახვეწარი, თითის დაქნევა საკმარისია, რომელსაც ისურვებ ის გამოგეკიდება.

ერთხელ სათიბზე ჯამილას ჩვენი შორეული ნათესავი ოსმონი შეუჩნდა, ოსმონიც მათ რიცხვს ეკუთვნოდა, ვინც ფიქრობდა, რომ ვერცერთი ქალი ვერ დაუმაგრდებოდა. ჯამილამ ზიზღით მოიშორა მისი ხელი და წამოდგა ზვინის ძირიდან, სადაც ის ჩრდილში ისვენებდა.

— შემეშვი! — ჩაილაპარაკა მან გულისტკივილით და შებრუნდა. — თუმცა თქვენგან მეტს რას უნდა მოელოდეს კაცი, გაუხედნავ კვიცებს გავხართ!

ოსმონმა, რომელიც ზვინის ძირას გაშხლართულიყო, დამცინავად მობრიცა სველი ტუჩები.

— კატა ვერ შესწვდა ძეხვსაო... რას იპრანჭები, ხომ ვიცი შენც ძალიან გინდა, ცხვირს კი მაღლა სწევ.

ჯამილა უცებ შემობრუნდა.

— შეიძლება, მინდა კიდევ! ასეთი ბედი გვარგუნა ღმერთმა, შენ კი სულელი ხარ და იცინი. ას წელს ვიქნები ჯარისკაცის ცოლი, შენისთანებს კი ზედაც არ შევაფურხებ — მე-ზიზღები. ომი რომ არ იყოს, ნეტავი ვიცოდე ვინ დაგელაპარაკებოდა!

— მეც მაგას ვამბობ! ომია — შენ კი მამაკაცის ხელი მოგაკლდა და იმიტომ ხარ გაცოფებული! — ოსმონმა ჩაიცინა. — ერთი ჩემი გქნა, გაგატიტვლებდი და იმდენს გირტყამდი, გნახავდი როგორც ამღერლებოდი.

ჯამილას უნდოდა მივარდნოდა, რალაც ეთქვა, მაგრამ გაჩუმად მიხვდა, რომ თავის გაყადრება არ ივარგებდა, მერე დიდხანს უყურებდა, მის გამოხედვაში მძულვარება იგრძნობოდა. შემდეგ ზიზლით გადააფურთხა, მიწიდან ფიწალი აიღო და გზას გაუდგა.

მე იქვე ვიდექი, ზვინის უკან. ჯამილამ დამინახა და შებრუნდა. მიხვდა რასაც განვიცდიდი. ისეთი შეგრძნება მქონდა, თითქოს იგი კი არა, მე შეურაცხმყვეს, შემარცხვინეს. გულისტკივილით ვკიცხავდი ჯამილას:

— რატომ უყადრებ თავს ამნაირ ხალხს, რატომ ელაპარაკები?

ჯამილა მთელი დღე დაღვრემილი დადიოდა, ჩემთვის სიტყვა არ უთქვამს, არც წინანდებურად იცინოდა. თავაუღებლივ მუშაობდა, რომ საშუალება არ მოეცა მეთქვა რამე იმ დიდ შეურაცხყოფაზე, რომელიც მას მიაყენეს. ჯავრიანად ჩაარქობდა ძნაში ფიწალს, მალლა ასწევდა და სახეს იფარავდა. შემდეგ მოწყვეტილად მოიქნევდა ხოლმე და ახალ ზვინს მიადგებოდა. ურემი სწრაფად ივსებოდა. მივდიოდი და ვხედავდი, როგორ იდგა ჯამილა თავჩაქინდრული, ფიწლის ტარზე დაყრდნობილი და ფიქრობდა, შემდეგ უცებ გამოერკვეოდა და ისევ სამუშაოს მივარდებოდა ხოლმე.

როდესაც ჩვენ უკანასკნელი ურემი დავტვირთეთ, ჯამილა, თითქოს ყველაფრის არსებობა დაავიწყდაო, დიდხანს უყურებდა მზის ჩასვლას. მდინარის გაღმა, სადღაც ყაზახური ტრამალის ბოლოს გავარვარებული ტანდირის¹ პირდაღებულ ორმოსავით ელვარებდა მოთენთილი საღამოს მზე. იგი ნელა მიცურავდა პორიზონტისაკენ, ალისფრად ანათებდა ნაცრისფერ ღრუბლებს და უკანასკნელ მკრთალ სხივებს ესროდა მოლურჯო ტრამალს, სადაც უკვე ჩამოწოლილიყო ნაადრევი მწუხრი.

¹ ტანდირი — მიწაში, სახლის მახლობლად, მოწყობილი ღუმელი, ფართო ნაჩვრეტით, რომელშიც კვერს აცხობენ.

ჯამილა მზის ჩასვლას ისეთი ჩუმი აღფრთოვანებით შესჩერებოდა, თითქოს საოცნებო ზმანება გამოეცხადაო. მის სახეზე სინაზე კრთოდა, ილიმებოდნენ მისი ნახევრადგახსნილი ბავშვური ტუჩები და თითქოს ჩემს გამოუთქმელ საყვედურს, რომელიც მე ისევ ენის წვერზე მადგა, პასუხობსო, მომიბრუნდა და ვითომ დაწყებული საუბარი გააგრძელაო, მითხრა:

— ნუ ფიქრობ, კიჩინე ბალა, ნეტავი შენ! ის ხომ კაცი არ არის?! — ჯამილა დადუმდა, თვალი გაადევნა ჩამავალ მზეს, ამოიოხრა და ჩაფიქრებით განაგრძო: — საიდან უნდა იცოდნენ ისეთებმა, როგორიც ოსმონია, რა აწუხებს ადამიანს? ეს არავინ არ იცის, იქნებ არც არიან ასეთი მამაკაცები ქვეყნად...

სანამ მე ცხენებს მოვაბრუნებდი, ჯამილამ მოასწრო მიერბინა ქალებთან, რომლებიც ჩვენთან შორიანხლოს მუშაობდნენ და ახლა უკვე იქიდან ისმოდა მხიარული ხმები. ძნელი სათქმელია რა მოხდა, შეიძლება გულზე გადაუარა, როცა მზის ჩასვლას უყურებდა, შეიძლება იმიტომაც გამხიარულდა, რომ კარგად იმუშავა. მე ვიჯექი ურემზე, თივის ზვინის თავზე და ვუყურებდი ჯამილას. მან თავიდან მოიძრო თეთრი თავსაფარი და მეგობართან ერთად ხელებგაშლილი გაიქცა, უკვე მოთიბულ, ჩამუქებულ ტრამალზე. ქარი ათამაშებდა მისი კაბის კალთებს და უცებ მეც გულიდან გადამეყარა წყენა. „ღირს კი ვფიქრობდე ოსმონის ნალაყბევზე?“

— აჩუ, წავედით! — ავჩქარდი მე და ცხენებს მათრახი გადავუჭირე.

იმ დღეს, როგორც ბრიგადირმა მირჩია, გადავწყვიტე სახლში დავრჩენილიყავი, მამისათვის დამეცადა და თმა გადამელო. მანამდე კი შევუდექი სადიკისათვის საპასუხო წერილის წერას. ამ საკითხშიაც ჩვენს ოჯახში თავისებური წესები იყო დამკვიდრებული: ძმები წერილებს მამის სახელზე აგზავნიდნენ, აულის ფოსტალიონი მას დედას გადასცემდა ხოლმე, ხოლო წაკითხვა და წერილზე პასუხის გაცემა ჩემს მოვალეობას შეადგენდა. წაკითხვამდეც ზეპირად ვიცოდი თუ რას იწე-

რებოდა სადიკი. მისი წერილები ტყუპი ბატკნებივით ჰგავდნენ ერთმანეთს. ყველა მისი წერილი ერთი და იმავე სიტყვებით — ჯანმრთელობის სურვილით — იწყებოდა. შემდეგ მოდიოდა: „ამ წერილს ფოსტით ვუგზავნი. ჩემს მშობლებსა და ახლობლებს, რომლებიც მშვენიერ, აყვავებულ აულში ცხოვრობენ — ჩემს ძვირფას მამას ჯოლჩუბაის, შემდეგ მოიკითხავდა დედაჩემს, შემდეგ დედამისს და ამის შემდეგ მოვიდიოდით ჩვენ ყველანი — მკაცრი თანმიმდევრობით. ამის შემდეგ იწყებოდა აუცილებელი შეკითხვები გვარის აკსაკალების, ახლო ნათესაების ჯანმრთელობაზე და სულ ბოლოს, თითქოს ნაჩქარევად წერილში მიწერილი იყო: „აგრეთვე მოკითხვას ვუთვლი ჩემს ცოლს ჯამილას...“

რა თქმა უნდა, როცა დედ-მამა გყავს, როცა აულში თავს კარგად გრძნობენ აკსაკალები და ახლო ნათესალები, ცოლის პირველად დასახელება, მით უმეტეს მისთვის წერილის მიწერა უბრალოდ უხერხული, უფრო მეტი — ულამაზოცაა. ასეთვლიდა არა მარტო სადიკი, არამედ ყველა მამაკაცი, რომელიც თავის თავს პატივს სცემდა. აქ სადავოც არაფერია, ასე იყო მიღებული აულში და ვინმე არათუ კამათობდა, უბრალოდ არც ფიქრობდა ამაზე. ამისი დროც არ იყო. ყოველი წერილი ხომ, ნანატრი, სასიხარულო მოვლენაა.

დედა რამდენჯერმე გადამაკითხებდა ხოლმე წერილს, შემდეგ გულაჩუყებული მოწიწებით აიღებდა თავისი დახეტილი ხელებით და ისე მოუხერხებლად ეკირა, თითქოს ჩიტი და ეს-ეს არის გაუფრინდებო. შემდეგ თითებით, რომლებიც ძლივს ემორჩილებოდნენ, ბარათს სამკუთხედად მოკეცავდა.

— ჩემო ძვირფასებო, თქვენს წერილებს ისე შევიწინაზავ, როგორც თილისმას! — ჩაილაპარაკებდა იგი ცრემლნარევი, აკანკალებული ხმით. — თქვენ ხომ გაინტერესებთ როგორ არიან მამა, დედა, ნათესალები... ჩვენ რა უნდა მოგვივიდეს, სახლში ვართ. თქვენ როგორა ხართ? თუნდ ერთი სიტყვა მოგვწერეთ — ცოცხალი ვართ, და ჩვენ მეტი არაფერი გვჭირდება...

დედა კიდევ დიდხანს უყურებდა სამკუთხედად მოკეცილ

წერილს, შემდეგ ტყავის პატარა ტომარაკში დებდა, სადაც სხვა წერილებსაც ინახავდა და სკივრში კეტავდა.

თუ ამ დროს ჯამილა სახლში იყო, წერილს მასაც აძლევდნენ წასაკითხად. ყოველთვის, როცა იგი ხელში აიღებდა სამკუთხა ბარათს, მე ვხედავდი როგორ აენტებოდა ხოლმე სახე. კითხულობდა ჩუმად, ხარბად, სწრაფად ჩათვალთქმობდა. სტრიქონებს. მაგრამ შემდეგ მის სახეს თანდათან ჩრდილი ეფინებოდა და მხრები მოუღუნებოდა. მოქუფრავდა თავის ხშირ, ჭიუტ წარბებს და ბოლო სტრიქონებს აღარც კითხულობდა, ისე უბრუნებდა წერილს დედას. ამ დროს მის გამოხედვაში იმდენი სიცივე და გულგრილობა იყო, თითქოს იმას აბრუნებდა, რაც ცოტა ხნის წინ ვალად აიღო.

დედას, ჩანს, თავისებურად ესმოდა ჯამილას განწყობა და ცდილობდა გაემხნევებინა რძალი.

რა მოხდა, რად მოიწყინე? — ამბობდა იგი და თან სკივრს კეტავდა.—იმის მაგიერ, რომ გავიხარდეს, ცხვირი ჩაშოვიშვია. მარტო შენი ქმარი ხომ არ არის ჯარში. მარტო შენ ხომ არ ხარ ამ დღეში, ყველა ასეა და უნდა მოითმინო. როგორ ფიქრობ, არიან ისეთები, ქმარი რომ არ ენატრებოდეთ, მასზე არ დარლობდნენ... იდარდე, მაგრამ არავინ შეგამჩნიოს, შენთვის იდარდე.

ჯამილა დუმდა. მაგრამ მისი ჭიუტი, სევდიანი გამოხედვა მგონი ამბობდა: „არაფერიც არ გესმით, დედა!“

სადიკის წერილი ამჯერადაც სარატოვიდან მოვიდა. იგი ჰოსპიტალში იწვა. იწერებოდა, ღვთის ნებით, იქნებ შემოღგომაზე შინ დავბრუნდეთ, ამას აღრეც იწერებოდა და ჩვენ ყველას გვიხაროდა, რომ ჩქარა ვნახავდით სადიკს.

იმ დღეს სახლში მაინც ვერ დავრჩი. კალოზე წავედი. ჩვეულებრივ ღამეს იქ ვათევდით. ფეხებდაბორკილი ცხენები საბალახოდ გავუშვი. თავმჯდომარე ნებას არ გვაძლევდა, რომ იონჯაში შეგვეშვა ცხენები, მაგრამ ამჯერად მისი განკარგულებაც დავარღვიე. ვიცოდი ერთი ადგილი, სადაც ღამით ვერავინ ვერაფერს შეამჩნევდა, მაგრამ, როცა ცხენები გამოვხსენი და წინ გავუძეხი, გამოირკვა, რომ ვილაყას უკვე მოესწრო და ოთხი ცხენი გაეშვა საბალახოდ. ამან აღმაშფოთა. მე

ხომ ორთვალას ბატონ-პატრონი ვიყავი და ეს მაძლევდა უფლებას აღვშოთებულიყავი. არც დაფიქრებულვარ, გადავწყვიტე გამერეკა ცხენები, რომ ჰკუა მესწავლებინა თავხედისათვის, რომელმაც ჩემს სამფლობელოში შემოჭრა გაბედა. მაგრამ უცებ ვიცანი დანიარის ორი ცხენი. იმ დანიარისა, რომელზეც ბრიგადირი ლაპარაკობდა ამ დილით. მომაგონდა, რომ ხვალღიდან დანიართან ერთად მომიწევდა ხორბლის ზიდვა სადგურში, მის ცხენებს თავი მივანებე და კალოზე დავბრუნდი.

დანიარი აქ იყო. მას დაემთავრებინა ორთვალისათვის ბორბლების დაზეთვა და ახლა ღერძზე ქანჩებს უჭერდა.

— დანიკე, ეს შენი ცხენებია კალაში? — შევეკითხე მე.

დანიარმა დინჯად მოაბრუნა თავი.

— ორი ჩემია.

— დანარჩენი ორი?

— დანარჩენი ორი, რა ჰქვია. ჯამილა? მისი ცხენებია, რა არის შენი ჯამილა, ჯენე?

— ჯენე.

— თვითონ ბრიგადირმა დამიტოვა, მიბრძანა ყურადღება მიაქციეთო...

— კიდევ კარგი, რომ არ გავრეკე!

ღამე ჩამოწვა. საღამოს მშფოთვარე წიავი, რომელიც მთებიდან უბერავდა, ჩადგა. კალოზეც სიჩუმემ დაისადგურა. დანიარი ჩემს გვერდით მოეწყო, თივის ზვინის მახლობლად, მაგრამ ცოტა ხნის შემდეგ წამოდგა და მდინარისაკენ გასწია. იგი ხრამის პირას გაჩერდა და ასევე დარჩა ზურგზე ხელებდაწყობილი, თავი ოდნავ გვერდზე გადაეხარა, ჩემგან ზურგშექცევით იდგა. მისი გრძელი, მოუხეშავი, თითქოს ნაჯახით გამოთლილი ფიგურა საოცრად გამოირჩეოდა მთვარის მკრთალ სინათლეზე მეჩვენებოდა, რომ ყურს უგდებდა მდინარის ხმაურს. რომელიც ღამით თანდათან უფრო ძლიერდებოდა. შეიძლება იგი ყურს უგდებდა რაღაც შორეულ ხმებს, რასაც ჩემი სმენა ვერ აღიქვამდა. „ისევ მდინარის პირას აპირებს ღამის გათევას, აი მართლაც ახირებული კაცი!“ — ჩავიციინე მე.

დანიარი დიდი ხანი არ იყო, რაც ჩვენს აულში გამოჩნდა. ერთხელ სათიბზე პატარა ბიჭმა მოირბინა და გვითხრა სოფელ-

ში დაჭრილი ჯარისკაცი მოვიდაო. ვინ იყო მან არ იცოდა. რა ამბავი ატყდა! აულში საკმარისი იყო ფრონტადან დაბრუნებულნი გამოჩენილიყო ვინმე, რომ დიდიან-პატარაიანა წაისვეტებოდა ყველა, ვინ ხელს ართმევდა, ვინ თავისიანების ამბავს ეკითხებოდა. ერთის სიტყვით, დიდი ამბავი ატყდა: ყვირილი. ღრიანცელი. ყველა ფიქრობდა შეიძლება ჩემი ძმა დაბრუნდა. ძმა თუ არა, იქნებ ნათლიმამა მაინცო. მთიბავეები გავარდნენ ამბის გასაგებად.

დანიარი ჩვენს აულში დაბადებული, ჩვენი მკვიდრა, თვისტომი, თანამემამულე იყო. ყვებოდნენ, რომ ბავშვობისას ობლად დარჩენილმა სამ წელიწადს იხეტიალა კარიდან-კარად, შემდეგ ყაზახებთან წავიდა ჩაკმაკის ტრამალზე. ყაზახები დედის მხრიდან ნათესავებად მოხვდებოდნენ დანიარს. ასლო ნათესავეები, ბიჭუნა უკან რომ დაებრუნებინათ, მას არ ჰყავდა. ასე დაივიწყეს იგი. როცა ეკითხებოდნენ, თუ როგორ ცხოვრობდა აულიდან წასვლის შემდეგ, იგი სიტყვას ბანზე აგდებდა. მაგრამ შაინც შეიძლებოდა გაგება, რომ ბედმა ბლომად შეასვა ობლობის სამწარის სამსალა, ბევრი მწარე შეახვედრა. ცხოვრებამ ათრია იგი სხვადასხვა მხარეში. დიდხანს აძოვებდა ცხვარს ჩაკმაკის მლაშობებში, როცა წამოიზარდა, უდაბნოში არხები გაჰყავდა. მუშაობდა მებამბეობის ახლადდაარსებულ საბჭოთა მეურნეობებში, ანგარენის შასტებში — ტაშკენტთან და იქიდან კი არმიაში წავიდა.

დანიარის მშობლიურ აულში დაბრუნებას ხალხი კმაყოფილებით შეხვდა. „რამდენი არ ატარა ბედმა სხვა მხარეებში, მაინც დაბრუნდა. დაბრუნდა, რადგან, ალბათ, ეწერა გული მშობელი ქვეყნის წყლით გაეგრილებინა. მას ხომ არც ენა დავიწყნია მშობლიური, ოდნავ უქცევს მხოლოდ ყაზახურად.

„ტულპარი! ცხრა მთის გადაღმაც კი იპოვნის თავის რემას. ვის არ უყვარს მშობელი მხარე, თავისი ხალხი. ყოჩაღ, რომ დაბრუნდა, ჩვენც კმაყოფილნი ვართ და წინაპართა სულებიც. ღვთის შემწეობით დაჯამარცხებთ გერმანიას, მშვიდობიან ცხოვრებას დავიწყებთ და შენც, როგორც სხვები, შეჰქმნი

1 ტულპარი — ზღაპრული რაში.

ოჯახს, შენი კერიიდანაც ავარდება ალი, გაღვივდება ღაღა-
რი!“ — ეუბნებოდნენ ძველი აქსაკალები.

მათ გაიხსენეს დანიარის წინაპრები და ზუსტად დაადგო-
ნეს რომელი გვარიდან იყო იგი. ასე გაჩნდა ჩვენს აულშში
„ახალი ნათესავი“ — დანიარი.

და აი ბრიგადირმა თროზმატმა ჩვენთან სათიბზე მოიყვანა
მალალი, წელში ოდნავ მოხრილი ჯარისკაცი, იგი მარცხენა ფე-
ხით კოკლობდა. ფარაჯა მხარზე გადაეგდო და აჩქარებული
მოაბიჯებდა, ცდილობდა არ ჩამორჩენოდა ჭაკ ცხენს, რომე-
ლიც თროზმატს თოხარიკით მოყავდა, თვითონ ბრიგადირი,
მალალი დანიარის გვერდით, პატარა ტანითა და სიმკვირცხ-
ლით რაღაცით მოგაგონებდა მოუსვენარ მდინარის ტალღას.
ამის შემხედვარეს, გაგვეცინა კიდევ.

დანიარს ნაჭრილობევი ჯერ არ შეხორცებოდა, ფეხის მოხ-
რა უჭირდა და ამიტომ მთიბავად არ გამოდგებოდა, იგი ჩვენ-
თან დანიშნეს სათიბ მანქანაზე. გულახდილად ვიტყვი, ჩვენ
იგი არცთუ ისე ძალიან მოგვეწონა. ვერაფრით ვერ შევე-
გუეთ მის გულჩახვეულობას. დანიარი ცოტას ლაპარაკობდა,
როცა ლაპარაკობდა, გრძნობდი, რომ ამ დროს იგი სხვა რა-
ღაცაზე ფიქრობდა, რაღაცა აწუხებდა და ვერც გაიგებდი გამ-
ჩნევდა თუ არა, თუმცა ამ დროს მისი ჩაფიქრებული — მე-
ოცნებე თვალევი სახეში შემოგჩერებოდნენ.

— საცოდავი ბიჭი, ეტყობა, ჯერ კიდევ ვერ მოსულა გონს
ფრონტის შემდეგ! — ამბობდნენ მასზე.

საოცარი ის იყო, რომ მუდამ ფიქრიანი დანიარი სწრაფად
და ზუსტად მუშაობდა. გარეშე დამკვირვებელი იფიქრებდა,
რომ იგი გულდია, გულგახსნილი კაცი იყო. შეიძლება ობლო-
ბაში გატარებულმა ბავშვობამ ასწავლა მას თავისი გრძნობე-
ბისა და ფიქრების დაფარვა, გახადა ის ასე თავშეკავებული?
შეიძლება.

დანიარის თხელი ტუჩები, კუთხეებში მკაცრი ნაოჭებით,
ყოველთვის მაგრად იყო მოკუმული, თვალევი ნაღვლიანად და
მშვიდად გიყურებდნენ, მხოლოდ მოქნილი, მოძრავი წარბები
აძლევდნენ სიცოცხლის იერს, მის გამხდარ, ყოველთვის
მოდლილ სახეს. ხანდახან იგი მთლად დაიძაბებოდა ხოლმე,

თითქოს სხვისთვის შიუწვდომელი რამ გაიგონაო, მაშინ მისაწარბები მალა აიწვედა და თვალებში გაურკვეველი ალტაცების ალი აუკიაფდებოდა. ჩვენ ყველაფერი ეს უცნაურად გვეჩვენებოდა. არა მარტო ეს, სხვაც ბევრი რამ ჰქონდა მას უცნაური. საღამოთი, როცა ჩვენ ცხენებს გამოვხსნიდით, ფარდულთან შევეგროვდებოდით და ვუცდიდით, როდის მოამზადებდა სადილს მზარეული ქალი, დანიარი საყარაულო ბორცვზე¹ ადიოდა და იქ იჯდა შებინდებამდე.

— რას აკეთებს, მზირად ხომ არ დააყენა ვინმემ? — ვიცინოდით ჩვენ.

ერთხელ მე ცნობისმოყვარეობამ წამძლია და დანიარს ჩუმად ავეყევი ბორცვზე. აქ არაფერი არ იყო არაჩვეულებრივი. ირგვლივ ფართოდ გადაშლილიყო მთისძირა ტრამალი, რომელიც იასამნისფერ წყვილიადში ჩაძირულიყო. ჩაბნელებული ოღნავ შესამჩნევი ველები სიჩუმეში გაუჩინარებულიყვნენ.

დანიარს ჩემი მისვლა არც კი შეუმჩნევია. იგი იჯდა, მუხლზე ხელშემოქდობილი და სივრცეს გასცქეროდა ჩაფიქრებული, მაგრამ ნათელი თვალებით. და კვლავ მომეჩვენა, რომ იგი დაძაბულად უგდებდა ყურს, ჩემი სმენისათვის მიუწვდომელ რაღაც ხმებს. ხანდახან მთლად დაიძაბებოდა, გაინაბებოდა ხოლმე, ამ დროს ფართოდ ჰქონდა გახელილი თვალები. რაღაცა აწუხებდა და ასე მეჩვენებოდა, რომ იგი ადგებოდა, გულს გადაუხსნიდა, რა თქმა უნდა, მე არა — იგი ხომ მე ვერც კი მამჩნევდა, ვიღაცას დიდს, თვალმიუწვდენელს, ჩემთვის შეუცნობს. შემდეგ როცა ისევ შევხედე მას. ველარ ვიცანი. იჯდა თავჩაქინდრული და მოშვებული, თითქოს ისვენებდა შრომით დაღლილი.

ჩვენი კოლმეურნეობის სათიბები მდინარე კურკურეუს ჰალას სავარგულეებზე იყო გაფანტული. ჩვენს აულთან ახლოს მდინარე კურკურეუ თავს აღწევდა ვიწრო ხეობას და ვრცელ ველზე მოედინებოდა დაუოკებელ, მშფოთვარე ნაკადად.

¹ საყარაულო ბორცი — შემალელებული ადგილი, საიდანაც კარგად მოჩანს მთელი არე-მიდამო. ეს სახელწოდება ყირგიზებს შემორჩათ ძველი ღროიდან, როცა მომთაბარეთა შემოსევებს იგერიებდნენ.

თიბვის დრო ხომ მთის მდინარეების მოდიდების პერიოდს ემთხვევა. საღამოდანვე მატულობდა წყალი, ამღვრეული, აქაფებული. შუალამზე მე მდინარის მძლავრი გუგუნი მალეობდა ხოლმე. მოწმენდილი ღამის ცა, ვარსკვლავებით მოჭედილი დასცქეროდა ფარდულს, დროდადრო ცივი ქარი გადაურბენდა ხოლმე მიდამოს, მიწას ეძინა, მხოლოდ აბობოქრებული მდინარე თითქოს მუქარით მოიწევდა ჩვენსკენ. მართალია, ჩვენ მდინარის ნაპირთან არცთუ ისე ახლო ვიყავით, მაგრამ ღამე წყალს სულ ახლო ვგრძნობდით და გულში მაინც უნებლიეთ გვეპარებოდა შიში, ვაითუ წაიღოს, მოიტაცოს ჩვენი ფარდული-თქო. ამხანაგებს ეძინათ მთიბავთა ჯანსალი ძილით, მე კი ველარ ვიძინებდი და გარეთ გამოვდიოდი.

ღამაში და შემაზრზენია ღამე კურკურეუს ქალებზე. ხან აქ, ხან იქ მუქად მოჩანან ცვრიანი ბალახით გამაძლარი დაბორკილი ცხენები. ფხიზლად თვლემენ, ხანდახან თუ წაიფრუტუნებენ ხოლმე. იქვე გადმოხრილა სველი ტირიფი, ნაპირებს აწყდება და გრუხუნით მოაგორებს ქვებს მდინარე კურკურეუ. მძვინვარე, მრისხანე ხმაურით ავსებს ღამეს თავშეუქავებელი მდინარე. კანკალი აგიტანს.

ასეთ ღამეებში მე ყოველთვის ვიგონებდი დანიარს. იგი ჩვეულებისამებრ ღამეს მდინარის პირას დადგმულ ზვინებთან ათევდა. ნუთუ არ ეშინოდა? ან არ აყრუებდა მდინარის ხმაური? ეძინა თუ არა? რატომ რჩება მარტო მდინარესთან? რა სიამოვნებას პოულობს ამაში? უცნაური ადამიანია, არაამქვეყნიური. სად არის ნეტავი ახლა? ვაკვირდებოდი მიდამოს და ვერავის ვხედავდი. დამრეცი ფერდობებით იქარგებოდა ღამის სიბნელეში შორეული მთების გრეხილი. ცა კი წყნარი იყო, ვარსკვლავებით მოჭედილი.

დრო იყო, რომ დანიარს აულში მეგობრები ჰყვლდნენ. მაგრამ იგი წინანდებურად მარტოხელი იყო, თითქოს მისთვის უცხო იყო მეგობრობისა და მტრობის, სიმპათიისა და შურის ცნებები. აულში ხომ ის ჯიგიტები იქცევენ ყურადღებას. რომელთაც შეუძლიათ თავის თავისა და სხვისი გატანა, რომელთაც სიკეთის გაკეთებაც შეუძლიათ და ხანდახან ავისაც,

რომელთაც აქსაკალების მსგავსად უნარი აქვთ ითავაჯონ ლხინსა და ჭირში, ასეთები ქალებსაც მოსწონთ.

ხოლო თუ კაცი, დანიარის მსგავსად, არაფერში არ ერევა, თავისთვის ცოდვილობს, მას ან ვერ ამჩნევენ, ანდა მოწყალებით ამბობენ:

— არც წყალია, არც ღვინო. ცხოვრობს თავისთვის, თავს ირჩენს როგორღაც, ასეც უნდა იყოს...

ასეთი ადამიანი ჩვეულებრივ სიბრალულისა და დაცინვის ობიექტია. ჩვენ, მოზარდები, რომელთაც გესურდა ჩვენს ასაკზე დიდი ვჩვენებოდით ხალხს, ნამდვილ ჭიგიტებად რომ გვეგარძნო თავი, თუ პირდაპირ არა, ერთმანეთთან საუბარში ყოველთვის დავცინოდით დანიარს. ჩვენ ვიცინოდით იმაზეც კი, თუ როგორ რეცხავდა იგი მდინარეზე თავის გემნასტურას, გარეცხავდა და ჩაიცვამდა ჯერ ისევ სველს. მას ხომ მხოლოდ ერთი ხალათი ჰქონდა.

მაგრამ უცნაური ის იყო — ხომ ასეთი წყნარი და მშვიდი ჩანდა დანიარი, მაგრამ ვერცერთი ჩვენგანი ვერ ბედავდა მას ძმბიჭურად მოქცეოდა, იმიტომ კი არა, რომ იგი ჩვენზე უფროსი იყო, რა დიდი საქმეა სამი-ოთხი წელი, ასეთებს ჩვენ არც ვერიდებოდით და შენობით მივმართავდით ხოლმე, არც იმიტომ, რომ ის მკაცრი იყო ან თავს იჭერდა, რაც ხანდახან მოჩვენებითი პატივისცემის მსგავს რაღაცას ჰქმნის, — არა. რაღაც მიუკარებელი იმალებოდა მის მღუმარე, დაღვრემილ გამოხედვაში, ეს გვაკავებდა ჩვენ, ჩვენ, ვინც მუდამ მზად ვიყავით დაგვეცინა ვისთვისაც გნებავთ.

შეიძლება ამის მიზეზი იყო ერთი შემთხვევა. მე ძალიან ცნობისმოყვარე ვიყავი და თავს ვაბეზრებდი ხალხს ათასგვარი შეკითხვებით. ხოლო ფრონტელებთან საუბარი, მათთვის შეკითხვების მიცემა ხომ დაუსრულებელივ შემეძლო. როცა დანიარი ჩვენთან, სათიბზე, გამოჩნდა, მე სულ მოხერხებულ შემთხვევას ვეძებდი გამეგო რამე ფრონტიდან ახლადდაბრუნებული კაცისაგან.

ერთხელ საღამოთი კოცონს ვუსხედით, ვივანშემეთ და ვისვენებდით.

— დანიკე, გვიამბე რამე ომზე, ვიდრე დავწოლილვართ, — ვთხოვე მე.

მან პირველად არაფერი მიპასუხა, თითქოს ეწყინაო, დიდხანს უყურებდა ცეცხლს, შემდეგ თავი ასწია და შემოგვხედა.

— ომზე მეუბნები? — შემეკითხა იგი და თითქოს საკუთარ ფიქრებს პასუხობსო, ყრუდ დაუმატა: — არა, სჯობს თქვენ არაფერი იცოდეთ ომზე.

შემდეგ იგი შებრუნდა, ხელში ხმელი შამბნარის კონა აიღო. კოცონში ჩაუმატა და ცეცხლის გაჩაღებას შეუდგა. იგი არავის უყურებდა.

დანიარს მეტი არაფერი უთქვამს, მაგრამ იმ მოკლე ფრაზიდანაც, რომელიც მან წარმოთქვა, ჩვენთვის გასაგები გახდა. რომ ომზე ასე უბრალოდ ლაპარაკი არ შეიძლებოდა და იგი ვერ მოახერხებდა ძილისწინ ზღაპარივით მოგვეცოლოდა რამეს. ომმა სისხლიანი ნაქდები დააჩინა ადამიანის გულს და მასზე ლაპარაკი არ იყო ადვილი. მე ჩემი თავისავე მრცხვენოდა.

ამის შემდეგ არასოდეს არაფერი მიკითხავს დანიარისათვის ომზე.

დანიარს მხოლოდ ამით არ დაუმსახურებია ჩვენი პატივისცემა. ის სადამო ყველას მალე დაგვავიწყდა, ასევე სწრაფად დაკარგა აულმა ინტერესი დანიარისადმი. მისი მიუკარებლობა და კარჩაკეტილობა ხალხში გულგრილობის, ანდა უბრალოდ სიბრაღულის გრძნობას იწვევდა.

— უსახლკარო, საცოდავი ყმაწვილი, — ამბობდნენ მასზე, — კიდევ კარგი, რომ კოლმეურნეობა არჩენს, თორემ დროა ჩანთა ეჭიროს ხელში და კარდაკარ დადიოდეს. ცხვარივით წყნარი და უწყინარი!

ხალხი თანდათან შეეჩვია დანიარის ხასიათს და მას ველარც ამჩნევდნენ. ეს ასეც უნდა ყოფილიყო. როცა კაცი არაფრით გამოიჩენს თავს, მას თანდათან ივიწყებენ.

მეორე დღეს, დილით ადრე, მე და დანიარმა ცხენები კალოზე მივიყვანეთ, ამ დროისათვის ჭამილაც მოვიდა. მან შორიდანვე დამიძახა:

— ეი, კიჩინე ბალა, აბა ჩემი ცხენები აქეთ წამოიყვანე! გარტულლები რა უყავი? — თითქოს მთელი თავისი სიცოცხ-

ლე ორთვალაზე იჯდაო, ისეთი საქმიანი სახით შეუდგა მის დათვალიერებას, ფეხით სინჯავდა კარგად იყო თუ არა ბორბლები მომჯდარი ლერძზე.

როცა ჩვენ ახლო მივედით, ჯამილას რატომღაც სასაცილო-ნი ვეჩვენეთ. ცხენზე გადამჯდარი დანიარის გრძელი გამზდარი ფეხები ჰაერში ქანაობდნენ, თითქოს ეს არის ფართოყელიანი ქირზის ჩექმებიდან ამოხტებიანო. მე კი ცხენს ფერდებზე ვურტყამდი შიშველ ფეხებს, გამაგრებული, შავი ფეხისგულებით.

უკვე დროა! — ჯამილამ მხიარულად ასწია თავი და სწრაფად დაიწყო განკარგულებების გაცემა: ცოცსლად, მანამ დაცხებოდეს, ტრამალი უნდა გავიაროთ.

მან ცხენებს ლაგამში ჩაავლო ხელი და ორთვალაში დაიწყო შებმა. მხოლოდ ერთხელ მთხოვა მეჩვენებინა, როგორ უნდა გაეწყო აღვირი. დანიარს არ ამჩნევდა, თითქოს იგი არც კი იყო ჩვენს გვერდით.

ჯამილას სიმტკიცემ და გამომწვევმა თვითდაჯერებულობამ დანიარი გააკვირვა. ტუჩებმოკუმული, მტრული, მაგრამ ამავე დროს შეფარული აღტაცებით აკვირდებოდა. როცა მან სასწორიდან ხორბლით სავსე ტომარა აიღო და ორთვალასთან მიიტანა, ჯამილა აყვირდა:

— ეს რას ჰგავს! როგორ, ყველა თავისთვის გააკეთებს რაც მოეხასიათება? ასე არაფერი გამოვა, აბა, მომეცი ხელი! ეი, კიჩინე ბალა, რას უყურებ, ახტი ორთვალაზე და ტომრები დააწყვე!

ჯამილამ თვითონ მოჰკიდა ხელი დანიარს და როცა მათ ხელიხელჩაჭიდებულებმა პირველი ტომარა მოიტანეს, საცოდავი დანიარი სირცხვილისაგან სულმთლად გაწითლდა. შემდეგ ყოველთვის, როდესაც ტომრები მოჰქონდათ, მათი თავები თითქმის ეხებოდა ერთმანეთს და მე ვხედავდი როგორ იტანჯებოდა დანიარი, როგორ იკვნეტდა იგი ტუჩებს და ცდილობდა ჯამილას არ შეეხედა. ჯამილა კი ვითომ არაფერიო, არც კი ამჩნევდა თავის თანამეწყვილეს, მწონავენებს ეხუმრებოდა. შემდეგ, როცა ორთვალეები დავტვირთეთ, ჯამილამ ეშმაკურად ჩამიკრა თვალი და სიცილით თქვა:

— ეი შენ, დანიარი ხარ თუ ვილაცა, შესახედავად მამაკაცს ჰგავხარ, მოდი და პირველმა გაკვალე გზა.

დანიარმა ხმაამოუღებლივ დაძრა ადგილიდან ორთვალა. „ეჰ, შე უბედურო, სხვა სიკეთესთან ერთად, თურმე მორცხვიც ყოფილხარ!“ — გავიფიქრე მე.

წინ გრძელი გზა გვედო. ოცი კილომეტრი უნდა გაგვევლო სადგურამდე ჯერ ტრამალზე, შემდეგ კი ხეობით. ერთი რამ მამშვიდებდა, გზა მშვენიერი იყო, მთესძირს მიუყვებოდა ბოლომდე, ამიტომ ცხენებს დიდი ჯაფა არ დაადგებოდათ.

ჩვენი აული კურკურეუ მდინარის პირასაა გაშლილი მთის ფერდობზე და შავ მთებამდე აღწევს. სანამ ხეობაში არ შეხვალ, აული, მისი ხეების ჩამუქებული ქულებით, ხელისგულივით მოჩანს.

დღეში ერთი რეისის მეტს ვერ ვასწრებდით. დილას გავდიოდით და სადგურში ნაშუადღევს ვიყავით ხოლმე.

მზე უმოწყალოდ აცხუნებდა, სადგური კი გაქედილი იყო, ადვილად ვერ გააღწევდი: იქაურობა სავსე იყო ორთვალეებითა და ურმებით. უზარმაზარი დაბლობის ყველა კუთხიდან მოსულიყვნენ ტომრებით დატვირთულნი, მთის შორეული კოლმეურნეობებიდან ტვირთი საპალნემოკიდებულ ვირებსა და ხარებს ჩამოეთრიათ. ბიჭებსა და ჯარისკაცთა ცოლებს ჩამოერეკათ ისინი. იდგნენ მზეზე გარუჯულნი, გახუნებულ ტანსაცმელში, ქვებზე დაჩეჩქვილი ფეხებით, მზისა და ქარისაგან დახეთქილი ტუჩებით.

„ზაგოტხერნოს“ კარებზე ეკიდა პლაკატი — „პურის თვითეული თავთავი ფრონტს!“ ეზოში ჩოჩქოლი და ხმაური იდგა. გვერდით, პატარა ყორის მიღმა სამანევრო ორთქლმავალი მიმოდინოდა და ცხელი ორთქლის ბოლქვებით ივსებდა იქაურობას. გამაყრუებელი ხმაურით გაიქროლებდნენ მატარებლები. თავგამოდებით ბლადნენ გაბოროტებული აქლემები, ნებივრად წამოწოლილებს ფეხზე წამოდგომა არ უნდოდათ.

მიმდებ პუნქტში, გახურებული თუნუქის სახურავის ქვეშ, ხორბლის მთები იდგა. ტომრები ფიცრის. ტრაპით მალა უნდა აგეტანა. პურის სქელი მტვერი სუნთქვას აძნელებდა.

— ეი, ბიჭო, გესმის თუ არა — ღრიალებდა მიმდები,

რომელსაც უძილობისაგან თვალები დაწითლებოდა — ზევით აათრიე, სულ ზევით, შენ გეუბნები — იგი მუშტს იქნევდა და გინებით იჭაჭებოდა.

რას ივინები? ისედაც კარგად ვიცი, სადაც უნდა ავიტანოთ და ავიტანოთ კიდეც. ეს პური ხომ ჩვენ მოვზიდეთ საკუთარი მხრებით ჩვენი მინდვრებიდან, სადაც მარცვალ-მარცვალ ვზრდიდით, თან ვყვებოდით, იგი ხომ ბავშვებმა, ქალებმა და მოხუცებმა მოიყვანეს და მოიწიეს, იქ ახლაც, ამ ცხარე და ცხელ დღეებში კომბაინერი შესქილებია მრავალტანჯულ კომბაინს, რომელმაც კარგა ხანია მოსჭამა თავისი დღე, გახურებულ ცელებზე წახრილან ქალები და პატარა ბავშვები სათუთად აგროვებენ ყოველ გაბნეულ მარცვალს.

ახლაც კარგად მახსოვს, თუ რა მძიმე იყო ტომრები, რომლებიც მე გადამქონდა. ასეთი სამუშაოს შესრულება მხოლოდ ღონიერ მამაკაცებს შეუძლიათ. მე მივდიოდი ზევით, წონასწორობას ვიცავდი ტრაპის მოჭრიალე ფიცრებზე, რომლებიც ფეხქვეშ იღუნებოდნენ, კბილებით ჩაფფრენოდი ტომრის კიდეს, რომ როგორმე დამეჭირა, არ გადამვარდნოდა, მტვერი ყელში მეჩხირებოდა, სიმძიმისაგან ნეკნები მეღუნებოდა და თვალწინ ცეცხლოვანი წრეები მიტრიალებდნენ. რამდენჯერ ყოფილა. შუაგზაზე მისულს, არაქათგამოცილს შემომჩნევია, რა მოღალატურად მოცურავს ზურგიდან ტომარა, ერთი სურვილი აღმძვრნია მაშინ, დამეგდო და მეც დავგორებულეყავი მასთან ერთად. მაგრამ უკან ხალხი მოდიოდა, ტომრებქვეშ მოხრილი, მოდიოდნენ ჩემი ტოლები, ჯარისკაცთა ცოლები, რომელთაც ჩემნაირი შვილები ჰყავდათ. რომ ომი არა, ვინ მისცემდა მათ უფლებას ეთრიათ ასეთი ტვირთი! არა, მე არ მქონდა უფლება შევჩერებულეყავი, როდესაც ისეთსავე სამუშაოს, როგორსაც მე, ასრულებდნენ ქალები.

აი წინ მიდის ჯამილა, კაბის კალთები მუხლებს ზემოთ ამოუყეცავს და მე ვხედავ როგორ აწიხ დაჭიმული მისი ყოველი კუნთი, ვხედავ რა ძალდატანების ფასად მოძრაობს მისი მოქნილი ტანი, ზამბარასავით რომ დაძაბულა მძიმე ტვირთის ქვეშ. მხოლოდ ხანდახან შეჩერდება ჯამილა, შეჩერდება, როდესაც გრძნობს, რომ მე ძალამ მიმტყუნა.

— გამაგრდი, კიჩინე ბალა, ცოტალა დარჩა!

მისი ხმა აღარ რეკავს ზარივით, რალაც მოგუდულად ის-
მის.

როცა უკან ვბრუნდებოდით, ჩვენს შესახვედრად დანიარი მოდიოდა ხოლმე. იგი მოდიოდა ოდნავი კოჭლობით, თანაბარი, მოზომილი ნაბიჯით, როგორც ყოველთვის მდუმარე და მარტოხელი. გაგვისწორდებოდა, ჯამილას პირქუშ, მწველ თვალებს შეაფეთებდა. და ჯამილაც ნაჭაფავ წელს გამართავდა, დაქმუქნულ კაბას გაისწორებდა ხოლმე. იგი ისე ათვალეირებდა ხოლმე ჯამილას, თითქოს პირველად ხედავსო, ჯამილა კი ვითომც კვლავ ვერ ამჩნევდა მას.

ასე დამკვიდრდა: ჯამილა ან დასცინოდა, ან არავითარ ყურადღებას არ აქცევდა დანიარს. ეს დამოკიდებული იყო ჯამილას განწყობაზე. მივიღივართ გზაზე, უცებ მოეხასიათება და დამიყვირებს: „გავრეკეთ“, თავს ზემოთ მათრახს დაატრიანებს და მიერეკება ცხენებს. ჩვენ გადავუხსწრებდით დანიარს და ვტოვებდით მას მტკრის ღრუბლებში, რომელიც დიდხანს იდგა გზაზე. მართალია ამას ხუმრობით ვაკეთებდით, მაგრამ ყველა არ მოითმენდა, დანიარს კი ვგონებ არ წყინდა. როდესაც ჩვენ გვერდზე გავუქროლებდით, იგი პირქუში ალტაცებით შესჩერებოდა ორთვალაზე წამომდგარ მოხარხარე ჯამილას. მე უკან ვიხედებოდი. დანიარი სქელი მტკრის ბოლქვების მიღმაც ჯამილას დანახვას ცდილობდა. მისი კეთილი გამონხედვა, იფიქრებდი, ყველაფერს გაპატიებსო, მაგრამ ამავე გამონხედვაში მე ვგრძნობდი სიჭიუტეს, შეფარულ ნაღველს.

არც დაცინვას, არც ჯამილას სრულ გულგრილობას დანიარი წონასწორობიდან არ გამოჰყავდა. მან თითქოს ფიცი დაღო — აეტანა ყველაფერი. თავდაპირველად მეცოდებოდა და რამდენჯერმე ვუთხარი ჯამილას:

— რატომ დასცინი დანიარს, ჯენე, ხომ ხედავ როგორი უწყინარია!

— ნეტავი მაგის პატრონსი — იცინოდა ჯამილა და ხელს ჩაიქნევდა ხოლმე, — მე ხომ ვხუმრობ, მაგ უკარებას კი ხუმრობა არაფერს უზამს.

შემდეგ კი, შემდეგ მეც დავცინოდი ხოლმე, ჯამილაზე არა-
ნაკლებად. მაწუხებდა მისი უცნაური, ჭიუტი გამოხედვა, რო-
გორ უყურებდა იგი ჯამილას, როცა უკანასკნელი ტომარას მო-
იგდებდა მხარზე! და მართლაც გუგუნსა და ჩოჩქოლში ამ ბაზა-
რით ახმაურებულ-აფუსფუსებულ ეზოში, დაფეთებულ,
ხმაჩახლეჩილ ხალხში ჯამილა უცებ გეცემოდა თვალში დაჭე-
რებული, მსუბუქი სიარულით, თითქოს იგი სადღაც გაშლილ,
სწორ სივრცეზე მიაბიჭებდა.

მართლაც, არ შეიძლებოდა თვალი მოგეწყვიტა მისთვის.
ორთვალადან რომ ტომარა ჩამოეღო, ჯამილა თითისწვერებზე
დგებოდა, შემდეგ მოიხრებოდა, მხარს შეუშვერდა ტომარას,
თავს ისე ასწევდა, რომ ყველას შეეძლო დაენახა მისი ლამაზი
ყელი, მზისგან გაწაბლისფერებული მძიმე ნაწნავები თით-
ქმის სწვდებოდა მიწას, დანიარი კი შეჩერდებოდა და თვალს
გააყოლებდა ხოლმე, ვიდრე იგი კარს იქით არ მიიმ-
ლებოდა, ალბათ ფიქრობდა, რომ ამას სხვისთვის შეუმჩნევე-
ლად აკეთებდა, მაგრამ მე ვამჩნევდი და არ მომწონდა. თი-
თქოს ყველაფერი ეს შეურაცხყოფდა კიდევ ჩემს გრძნობებს:
მე ხომ დანიარი არაფრით არ მიმაჩნდა ჯამილას ღირსად, მის
ტოლად.

„ერთი უყურე, ისიც კი თვალს არ აშორებს, მაშინ რაღა
უნდა ქნან სხვებმა!“ — ებრაზობდი გულში. ბავშვური ეგო-
იზმი, რომელიც მაშინ ჩემში ბობოქრობდა, მწვავე ეჭვებში
გადაიზრდებოდა ხოლმე. ეს ხომ ასეა, ბავშვებს სხვაზე მეტად
შეუძლიათ იეჭვიანონ და სიბრაალულის მაგიერ მაშინ ჩემში
ისეთი მტრული გრძნობა ღვივოდა დანიარის მიმართ, რომ მი-
ხაროდა კიდევ, როცა მას დასცინოდნენ.

მაგრამ ჩემი და ჯამილას ოინები ერთხელ მეტად სამწუხა-
რო შედეგით დასრულდა. იმ ტომრებს შორის, რომლითაც
ხორბალი გადაგვქონდა, იყო ერთი დიდი, უხეში შალისაგან
შეკერილი შვიდფუთიანი ტომარა. ჩვენ საერთოდ ის ორ-ორს
გადაგვქონდა ხოლმე, ერთი მას ვერ მოერეოდა. ერთხელ კა-
ლოზე გადავწყვიტეთ ოინი გვეყო დანიარისათვის. ხორბლით
სავსე დიდი ტომარა დანიარის ორთვალაში ჩავაგდეთ და ზე-

მოდან სხვები დავაწყეთ, გზაზე ჩვენ რუსულ სოფელში შევი-
რბინეთ, ვაშლები დავკრიფეთ და სადგურში მისვლამდე ვხარ-
ხარებდით. ჯამილა დანიარს ვაშლებს ესროდა, შემდეგ კი, რო-
გორც ეს წესად გვქონდა, გადავუსწართ და მტერის ღრუბ-
ლებში უკან მოვიტოვეთ. იგი ხეობის გადაღმა დაგვეწია, რკი-
ნიგზის გადასასვლელთან გზა დაკეტილი იყო. აქედან უკვე ერ-
თად მივდიოდით და ასევე ერთად მივედით სადგურში. ჩვენ
დაგვაეწიყდა კიდევ შვიდღუთიანი ტომარა და მხოლოდ მაშინ
მოგვაგონდა, როდესაც გადმოტვირთვას ვამთავრებდით. ჯა-
მილამ ეშმაკურად გამკრა მხარი და დანიარისაკენ გამახედა.
იგი ორთვალაზე იდგა და შეწუხებული დასცქეროდა ტომარას,
აღბათ ფიქრობდა რა ელონა. შემდეგ მიიხედ-მოიხედა და რო-
დესაც ჯამილას სახეზე შეკავებული სიცილი შენიშნა, გა-
წითლდა: მიხვდა რაშიც იყო საქმე.

— ჯამარი მაგრად შემოიჭირე, გზაზე შარვალი არ ჩაგვარ-
დესი — დაუძახა ჯამილამ.

დანიარმა გაბოროტებული მზერა გვესროლა და გამორკვე-
ვაც ვერ მოვასწართ, რომ ტომარა გამოაჩოჩა, ძარის ძგიდეზე
შეაყენა, ჩამოხტა, ცალი ხელით ტომარას იჭერდა, შემდეგ
ზურგზე შეიგდო და წავიდა. პირველად თავი ისე დავიჭირეთ,
თითქოს არაფერი მომხდარა განსაკუთრებული. სხვებმა ხომ,
მითუმეტეს, ვერაფერი შეამჩნიეს. — მიდის ადამიანი, ზურგზე
ტომარა მოუგდია. ამას ხომ ყველა აკეთებს. მაგრამ, როცა და-
ნიარი ტრასს უახლოვდებოდა, ჯამილა წამოეწია.

— დააგდე, გესმის? მე ვისუმრე!

— მომეცალე! — გამოკვეთილად თქვა დანიარმა და ტრაპ-
ზე შედგა ფეხი.

— ხედავ, მიაქვსი — თითქოს თავს იმართლებსო წაილა-
პარაკა ჯამილამ.

იგი ჯერ კიდევ იცინოდა, იცინოდა ხმადაბლა, მაგრამ სი-
ცილი თანდათან არაბუნებრივი, ნაძალადევი უხდებოდა.

ჩვენ შევამჩნიეთ, რომ დანიარმა ჩვეულებრივზე უფრო
ძლიერ დაიწყო კოჭლობა. რატომ არ ვიფიქრეთ ამაზე ადრე?
აქამდე ვერ მიპატიებია ჩემი თავისათვის ეს სულელური ხუმ-
რობა, ეს ხომ მე მოვიფიქრე, მე სულელმა!

— დაბრუნდი! — დაუყვირა ჯამილამ, იგი ისევ იცინოდა, მაგრამ ეს უკვე სიცილი არ იყო.

დანიარს კი უკვე აღარ შეეძლო დაბრუნება: უკან ხალხი მოდიოდა. კარგად არ მახსოვს რა მოხდა შემდეგ. ვხედავდი დანიარს, უზარმაზარი ტომრის ქვეშ წელში მოღუნულს, მის დაბლა დახრილ თავს და მტკიცედ მოკუმბულ ტუჩებს. მიდიოდა დინჯად, ფრთხილად ადგამდა ნაჭრილობევ ფეხს. ყოველი ახალი ნაბიჯი ჩანდა მას იმდენ ტკივილს აყენებდა, რომ თავს იქნევდა და წამით შეყოვნდებოდა ხოლმე. რაც უფრო მალლა აღიოდა, მით უფრო უჭირდა. შიშისა და სირცხვილისაგან ხახვა გამიშრა. საშინელებამ გამაშეშა. თითქოს მე ვგრძნობდი ტვირთის სიმძიმესა და აუტანელ ტკივილს დაჭრილ ფეხში. აი იგი ერთხელ კიდევ შექანდა, თავი გადააქნია და ჩემს თვალწინ ყველაფერი შეიჩრცა, ჩამოხვდებოდა, მიწა გამომეცალა ფერხთ.

გამოვერკვიე მხოლოდ მაშინ, როდესაც ვიღაცამ ძლიერად, ისე რომ ძვლები ატკაცუნდნენ, მომიჭირა ხელზე. უცებ ვერც კი ვიცანი ჯამილა. გადაფითრებული, ფართოდ გახელილი თვალებით, ტუჩები ისე უთრთოდა, თითქოს ისევ იცინისო. ახლა უკვე მარტო ჩვენ კი არა, ყველამ, მიმღებმაც მიიჩინა ტრაპის ძირთან. დანიარმა კიდევ ორი ნაბიჯი გადადგა, უნდოდა ტომრის შესწორება ზურგზე და ნელა დაიწყო მუხლზე დაშვება. ჯამილამ სახეზე აიფარა ხელები.

— დააგდე! ტომარა დააგდე! — დაიყვირა მან.

მაგრამ დანიარი რატომღაც ხელს არ უშვებდა. თუმცა უკვე შეიძლებოდა მისი გვერდზე გადაგდება, ისე რომ უკან მომავალნი არ წაექცია. ჯამილას ხმაზე წამოიწია, მუხლი გამართა. ნაბიჯი გადადგა და ისევ დაბარბაცდა.

— გადააგდე! გესმის, გადააგდე, ძაღლის შვილო! — აღრი-
აღდა მიმღები.

— გადააგდე! — აყვირდა ხალხი.

— დანიარმა ამჯერადაც შეიმაგრა თავი.

— არა, არ დააგდებს! — დარწმუნებით წაიჩურჩულა ვი-
ღაცამ.

და ყველამ, ტრაპზე მიმავალმა თუ დაბლა მდგომმა, ირ-
წმუნა, რომ იგი ტომარას არ დააგდებს, თუ მასთან ერთად არ

ჩამოვარდა დაბლა. სიჩუმე ჩამოწვა. კედლის გადაღმა გამყვიანად დაიკვილა ორთქლმავალმა.

დანიარი კი, გაბრუებულივით მობარბაცე მიიწვედა მალა. მიიწვედა გავარჯარებული სახურავისაკენ, მის ფეხქვეშ იღუნებოდა ტრაპის ფიცრები. ყოველი ორი ნაბიჯის გადადგმის შემდეგ ჩერდებოდა, ძალას იკრეფდა და გზას აგრძელებდა. უკან მიმავალნიც ჩერდებოდნენ, რომ მისთვის დასვენების საშუალება მიეცათ. ეს ღლიდა ხალხს, ძალას აცლიდა მათ, მაგრამ არავინ ხმას არ იღებდა, არავის არ უთქვამს მასზე ძვირი. თითქოს უხილავი ძაფით გადაბმულნი მიდიოდნენ ადამიანებო ტვირთით სახიფათო, მოლიპულ გზაზე, სადაც ერთი კაცის სიცოცხლეზე დამოკიდებულია ყველას სიცოცხლე. მათ შეთანხმებულ მღუმარებაში და ერთფეროვან რხევაში იყო რაღაც მძიმე რიტმი. ნაბიჯი, კიდევ ნაბიჯი, ისევ ნაბიჯი. როგორც ვედრებით, განცდით შესცქეროდა მას ჯარისკაცის ცოლი. რომელიც უკან მიყვებოდა. ქალს თვითონაც ებლანდებოდა ფეხები, მაგრამ მე მჯერა, რომ იგი დანიარზე ვევედრებოდა ღმერთს.

კოტა დარჩა და ტრაპის დახრილი ნაწილიც დამთავრდება. მაგრამ დანიარი ისევ დაბარბაცდა, დაქრილი ფეხი უკვე აღარ დაემორჩილა. სადაცაა მოწყდება, თუ ტომარა არ გადააგდო.

— გაიქეცი, ჩქარა, შეეშველე! — მიყვირა ჯამილამ და დაბნეულმა ხელები გაშალა, თითქოს ამით შეეძლო დანიარს დახმარებოდა.

მალა ავევარდი. გავძვერი ტომრებწამოკიდებულ ადამიანებს შორის და მივირბინე დანიარამდე. მან იდაყვის ქვემოდან გამომხედა. ჩამოშავებულ, ოფლიან შუბლზე ძარღვები დაბერვოდა, მისმა ჩასისხლიანებულმა თვალებმა რისხვა შემომაფრქვეის. მე მინდოდა შევშველებოდი.

— წადი! — რისხვით წაიხრიალა დანიარმა და დაიძრა.

როცა აქოშინებული დანიარი კოჭლობით ჩამოვიდა ძირს, ხელები აღარ ემორჩილებოდნენ. ყველამ უჩუმრად დაუთმო გზა, მხოლოდ მიმდებმა ვერ შეიკავა თავი და აყვირდა:

— შენ რა, გაგიყდი? თუ შენ გგონია მე კაცი არა ვარ? ვინ

დაგიშლიდა ძირს დაგეყარა ხორბალი? რატომ მიათრევდი მალა ამ სიმძიმე ტომარას?

— ჩემი საქმეა, — ხმადაბლა უპასუხა დანიარმა.

მთელი ღამე უჩუმრად ვიარეთ. დანიარისთვის ეს ჩვეულებრივი ამბავი იყო. ამიტომ ჩვენ ვერ გავიგეთ განაწყენებული იყო, თუ უკვე დაივიწყა ყველაფერი. ცუდ ხასიათზე ვიყავით, სინდისი გვაწუხებდა.

დილით, როდესაც კალოზე ორთვალებს ვტვირთავდით, ჯამილამ აიღო ის ცოდვიანი ტომარა, კიდეზე ფეხი დაადგა და დახია.

— აჰა შენი ჩვარი — ესროლა მან გაკვირებულ მწონავს. — ბრიგადირს უთხარი, რომ მეორედ ამნაირი არ შემოგვაჩეჩოს.

— რა მოხდა? რა დაგემართა?

— არაფერი.

მეორე დღეს დანიარს არაფრით არ გამოუმჯღავებია თავისი წყენა, ხმას არ იღებდა ისე დადიოდა, ოღონდ ჩვეულებრივზე მეტად კოჭლობდა, განსაკუთრებით როდესაც ტომარები გადაჰქონდა. ალბათ, მაგრად ატკივდა გუშინ ნაჭრილობევი. ეს ყოველ წუთს მოგვაგონებდა ჩვენს გუშინდელ დანაშაულს მის წინაშე. კარგი იქნებოდა, რომ გაეცინა, ან გაგვხუმრებოდა, გულზე მოგვეშვებოდა, უკეთესად ვიგრძნობდით თავს — ამით ჩვენი წყენაც გაივლიდა.

ჯამილაც ცდილობდა ისე დაეჭირა თავი, თითქოს განსაკუთრებული არაფერი მომხდარიყოს, იგი თუმცა იცინოდა კიდეც, სიამაყე არ აძლევდა უფლებას გრძნობა გაემჯღავებინა, მაგრამ მე ვამჩნევდი, რომ მთელი დღე ხასიათზე არ იყო.

სადგურიდან გვიან ვბრუნდებოდით. დანიარი წინ მიდიოდა. შესანიშნავი ღამე დგებოდა. ვის არ უნახავს აგვისტოს ღამე თავისი მაღალი ცით, შორიდან მოკიაფე ვარსკვლავებით, რომლებიც ხანდახან გგონია მეტად ახლოს არიანო. ყოველ მათგანს გარკვევით ხედავ. აი ერთიც, თითქოს დათრთვილული კიდეებით, ცივი, ყიხულივით ცივი სინათლით გაცისკროვნებული, ჩამუქებული ციდან რალაც გულუბრყვილო გაკვირ-

ვებით დასცქერის დედამიწას. ჩვენ ხეობაში მივდიოდით და მე ღიღხანს შევცქეროდი ცაში მოკიაფე ვარსკვლავს. ცხენებს თითქოს სახლისაკენ მიეჩქარებოდათ, ბორბლებს ქვეშ ხრეში ღრქიალებდა. ქარს ტრამალებიდან მოჰქონდა აყვავებული აბ-ზინდის მომწვანო მტვერი, გადამწიფებული ხორბლეულის ოდნავ საგრძნობი სურნელი, ყველაფერი ეს ირეოდა კუპრისა და ცხენის გაოფლილი მოსართავების სუნში და თავპარუს გახვევდა.

ერთი მხრიდან წამომართულიყვნენ ასკილით დაფარული კლდეები, მეორე მხარეს კი, შორს დაბლა ტირიფისა და გარეული ქადრების იქით შფოთავდა მოუსვენარი კურკურეთ-ხანდახან სადღაც უკან ხიდზე გრუხუნით მიქროდნენ მატარებლები და განშორებულთ თან მიჰყვებოდათ ბორბლების ხმაურის გამოძახილი.

ქარგი იყო მგზავრობა ღამით სიგრილეში, წინ მონავარდე ცხენების ცქერა, აგვისტოს საამო ღამის დამათრობელი სურნელის- შეგრძნება და ამ უჩვეულო ღამის მოსმენა. ჯამილა ჩემს წინ მიდიოდა. აღვირისაღვის ხელი შეეშვა, აქეთ-იქით იყურებოდა და თავისთვის რაღაცას ღიღინებდა. მე მესმოდა, რომ მას აწუხებდა ჩვენი დუმილი. ასეთ ღამეს ძნელი იყო სიჩუმის ატანა, გული სიმღერას ითხოვდა.

და იგი ამღერდა. ამღერდა იქნებ იმიტომაც, რომ უნდოდა დაებრუნებინა ის უშუალობა, რაც აქამდე დანიარისა და ჩვენს ურთიერთობას ახასიათებდა, უნდოდა განთავისუფლებულიყო დანიარის წინაშე დანაშაულის გრძნობისაგან. მისი ზარივით ხმა ლაღად ჟღერდა. იგი ჩვეულებრივ სიმღერას მღეროდა, ჩვენს აულში რომ მღეროდნენ ხოლმე, იმის მსგავსს: „განშორებისას მე დაგიქნევ ცხვირსახოცს ცისფერს“, ანდა „შორეულ გზაზე, ჩემო ძვირფასო“... მან ბევრი სიმღერა იცოდა და უბრალოდ, გულწრფელად მღეროდა, მოსმენა გესიამოვნებოდა. უცებ შესწყვიტა სიმღერა და დანიარს გასძახა:

— ეი, დანიარ, რა იქნებოდა გემღერა რამე! ბოლოს და ბოლოს ხარ თუ არა ჯიგიტი?

— იმღერე, ჯამილა, იმღერე! — შეტბუნებული გამოეპასუხა დანიარი და ცხენები შეაჩერა. — სიამოვნებით გისმენ.

— შენ როგორ ფიქრობ, ჩვენ ყურები არ გვაქვს! დიდი საქმე, თუ არ გინდა, ნუ იმღერებ — და ჯამილა ისევ ამღერდა.

ვინ იცის, რატომ შესთხოვდა იგი დანიარს ემღერა რამე იქნებ, ისე უბრალოდ, ანდა იქნებ სურდა ლაპარაკში გამოეწვია? უფრო კი მასთან ლაპარაკი უნდოდა, იმიტომ რომ ცოტახნის შემდეგ ისევ გასძახა:

— დანიარ, გყვარებია ოდესმე ვინმე? — შეეკითხა და გაიცინა.

დანიარმა არ უპასუხა. ჯამილაც დადუმდა.

„ნახა რა მომღერალი!“ — გამეცინა მეც.

პატარა მდინარესთან, რომელიც გზას ჰკვეთავდა, ცხენებმა სვლა შეანელეს, მათი ფლოქვები სველ ქვებზე აკაკუნდა. როცა ფონი გავიარეთ, დანიარმა ცხენებს მათრახი გადაჰკრა და მოულოდნელად წამოიწყო სიმღერა. მღეროდა გაუბედავად, ხმა უთრთოდა:

„სამშობლოს მთებო, ბინდგადაკრულნო,
მამებისა და პაპების მიწაე!

უცებ ხმა ჩაუწყდა, ხველება აუვარდა, მაგრამ შემდეგი ორი სტრიქონი ოდნავ ხრინწიანი, სამაგიეროდ ღრმა, გულისმიერი ხმით წამოიმღერა:

„სამშობლოს მთებო, ბინდგადაკრულნო,
აკვანო ჩემო....

აქ ისევ ხმა ჩაუწყდა, თითქოს რალაციის შეეშინდაო და გაჩუმდა.

მე კარგად წარმოვიდგინე როგორ გაწითლდა იგი. მაგრამ ამ მოკრძალებულ, ნაწყვეტ-ნაწყვეტ სიმღერაშიც იყო რალაც არაჩვეულებრივი, ამაღელვებელი, ხმაც კარგი უნდა ჰქონოდა. არც კი მჭეროდა, რომ ეს დანიარი იყო.

— უყურე შენ! — ვერ შევიკავე თავი.

ჯამილამ კი გაკვირვებით წამოიყვირა:

— სად იყავი აქამდე? იმღერე კიდევ, იმღერე ისე როგორც
საქირთა.

წინ მკრთალი სინათლის ზოლი გამოჩნდა. ხეობა მთავრდებოდა. ტრამალზე გავდიოდით. ნიავემა წამოუბერა. დანიარი ისევ ამღერდა. მან კვლავ გაუბედავად წამოიწყო, მაგრამ ხმას ძალა თანდათან ემატებოდა, სიმღერამ აავსო ხეობა და გამოძახილად გადადიოდა კლდიდან კლდეზე.

ყველაზე უფრო მე გამაოცა იმ განცდამ, გრძნობამ, რომელიც მელოდიაში უღერდა. არ ვიცოდი, არც ახლა ვიცი რა მეწოდებინა მისთვის, არ ვიცი ეს ხმა იყო, თუ რაღაც სხვა, რაც პირდაპირ ადამიანის გულიდან მოდის და, რასაც შეუძლია ააღელვოს სხვა, გააცოცხლოს, აახმოვანოს მასში ყველაზე დაფარული გულისნადები.

ეჰ, ნეტავ შემეძლოს როგორმე აღვადგინო დანიარის სიმღერა! სიმღერას თითქმის არ ჰქონდა სიტყვები, იგი თვითონ იყო გრძნობა და ღიდ ადამიანურ განცდებს გადმოგვცემდა. არც მანამდე, არც მის შემდეგ მე ასეთი სიმღერა არ მომისმენია. იგი არც ყაზახური იყო და არც ყირგიზული, მაგრამ თითქოს ერთი იყო და მეორეც. დანიარის მელოდიაში ერთ განუმეორებელ სიმღერად იყო შერწყმული ამ ორი ხალხის ყველაზე საუკეთესო მელოდები. ეს იყო მთებისა და ტრამალების სიმღერა, რომელიც ხან მალლა-მალლა მიიწევდა ყირგიზეთის მთებივით, ხან კი სივრცეს ეფინებოდა ყაზახეთის უკიდვანო ველებივით.

ვუსმენდი და მიკვირდა: „აი თურმე როგორი ყოფილა დანიარი! ვინ იფიქრებდა?“

ჩვენ უკვე ტრამალზე მივდიოდით, რბილ, გაკვალულ გზაზე, დანიარის სიმღერა ახლა გაშლილ ველს ეფინებოდა, მელოდები საოცარი სისწრაფით ცვლიდნენ ერთმანეთს. ნუთუ ასეთ სიმდიდრეს მალავს გულში? რა დაემართა? თითქოს იგი თავის ღღეს, საათს უცდიდა.

და ჩემთვის უეცრად გასაგები გახდა მისი უცნაური თვისებები, ხალხის გაცეხასა და დაცინვას რომ იწვევდა, ახლა მივხვდი რატომ უყვარდა მარტოობა, მეოცნებე და მუდამ მღუ-

მარე დანიაარს. მიეხვდის, რატომ იჯდა საღამოობით მარტო საგუშაგო ბორცვზე, რატომ რჩებოდა მარტო მდინარესთან და რატომ უსმენდა სსვისთვის მიუწვდომელ ბგერებს, რატომ აენტებოდა ხოლმე ხანდახან მისი თვალები და რატომ აიზიდებოდნენ მალა მისი, ისედაც აზიდული წარბები. ეს იყო ღრმად შეყვარებული ადამიანი და შეყვარებული არა ვინმე მეორეზე. ეს უფრო დიდი სიყვარული იყო. სიყვარული სიცოცხლისა, მიწისა. იგი ამ სიყვარულს გულით ატარებდა, ეს სიყვარული იყო მის მუსიკაში. თვითონ დანიაარიც ამ სიყვარულით ცოცხლობდა. გულგრილ ადამიანს არ შეეძლო ასე ემღერა, როგორი ხმაც არ უნდა ჰქონოდა.

როცა გეგონა სიმღერის უკანასკნელი ბგერა ჩაქრაო, ახალი მთრთოლვარე მოძახილი აახმიანებდა ხოლმე გარინდებულ ტრამალს და იგიც ნაალერსები მშობლიური მოტივებით, თითქოს მხარს უბამდა სიმღერას. ირხეოდა, ნამგლის მომლოდინე, თავთავებდამძიმებული პურის ყანა და დილის მომასწავებელი ათინათები ვერცხლის ზოლებად თამაშობდნენ მის თავზე. წისქვილის პირას ბებერი ტირიფები ჩურჩულით ეუბნებოდნენ ერთმანეთს თავიანთ სათქმელს, მდინარის გაღმა იღველფებოდა კოცონი კოლმეურნეთა სადგომებთან, ვიღაც ლანდივით გაპკროდა მიმქროლავ ცხენს, რომელიც ხან დაიკარგებოდა მდინარის პირა ბაღებში, ხან ისევ გამოჩნდებოდა. ქარს ბაღებიდან ვაშლის, ახლადყვავებული სიმინდისა და წივის თბილი სურნელი მოჰქონდა.

დიდხანს, თავდავიწყებით მღეროდა დანიაარი. სულგანაბული უსმენდა მას მოხიბლული აგვისტოს ღამე. ცხენები დინჯი ნაბიჯით მიდიოდნენ, თითქოს ამ დიდებულ სიმღერის მსმენელთათვის ხელის შეშლა არ უნდათო.

და უცებ ყველაზე მაღალ, ზარივით მოწკრიალე ნოტაზე დანიაარმა სიმღერა შეწყვიტა, ცხენებს შეეხმიანა და ორთვალა გააქანა. ფიქრობდა, რომ ჯამილაც მას აედევნებოდა და მოვემზადე, მაგრამ იგი არც განძრეულა. დარჩა ისევ, როგორც იყო, თავი გვერდზე დაეხარა, თითქოს კიდევ უგდებდა ყურს საღდაც ჰაერში მოფარფატე ბგერებს. დანიაარი წავიდა, ჩვენ კი აულამდე სიტყვაც არ წამოგვეცდენია. ანდა რა საჭირო იყო ლა-

პარაკი, განა სიტყვებით ყოველთვის მოახერხებ იმის თქმას რაც გაღელვებს...

ამ დღიდან ჩვენს ცხოვრებაში თითქოს რაღაც შეიცვალა. მე ერთთავად რაღაც კარგის, სასურველის მოლოდინში ვიყავი. დილიდან კალოზე ვტვირთავდით ორთვალებს, სადგურში მივდიოდით და ერთი სული გექონდა, რაც შეიძლება ჩქარა დავბრუნებულიყავით, რომ გზაზე უკან დაბრუნებისას დანიარის სიმღერისათვის გვესმინა. მისმა ხმამ თითქოს ჩემს გულში დაიბუღა, სულ თან დამსდევდა: ეს ხმა მესმოდა, როცა დილით ცხენების ასახსნელად მივბობდი ცვარდაკრულ ველზე და მზე სიცილით, თითქოს მე მხვდებოდა, ამოიწვერებოდა ცის კიდეზე, მესმოდა ეს ხმა მოხუცების მიერ გასანიავებლად აქნეულ ოქროსფერი ხორბლის შრიალა წვიმაში, ტრამალის თავზე დაკიდებულ ძერის ამაყ ფრენაში, — ყველგან და ყველგან მესმოდა და მელანდებოდა დანიარის მუსიკა.

სალამოქამს, როდესაც ჩვენ ხეობით უკან ვბრუნდებოდით, მიჩვენებოდა, რომ სხვა სამყაროში ვსახლდებოდით. თვალდახუჭული ვუსმენდი დანიარს და ჩემს წინ ცოცხლდებოდა ბავშვობიდანვე საოცრად ნაცნობი, მშობლიური სურათები: ჩემს წინ სულ მაღლა, ზევით, წეროების სამფლობელოში, იურტების თავზე წამოყუდებულნი მიცურავდნენ გაზაფხულის ნაზი, მოხეტიალე, მონაცრისფრო—მტრედისფერი ღრუბლები, ხან საზაფხულო საძოვრებისაკენ ხმაურითა და ფრუტუნით გაიქროლებოდა ცხენის რემა, კვიცები, მოკლედ შეკრეპილი ფაფარით, თვალელებში ჩამდგარი ველური ცეცხლით, ამაყად ყელდადერილნი კუნტრუშით უსწრებდნენ წინ დედებს: ან დინჯ ნაკადად იშლებოდა ბორცვებზე ცხერის ფარა; ანდა კლდიდან გიჟივით ეშვებოდა ჩანჩქერი და თეთრი შეფხვებით აბობოქრებულა თვალს გჭრიდა თავისი ბრწყინვალეობით, ხანდახან მდინარის გაღმა, ვაციწვერებით დაფარულ ტრამალზე მსუბუქად ეშვებოდა მზის სხივი და მარტოხელა შორეული მხედარი ცეცხლოვან ჰორიზონტზე თითქოს მას მისდევდა, იფიქრებდი დაეწევა, საცაა მისწვდებოდა და შემდეგ ისიც მწუხარში იძირებოდა.

ფართოდ გადაშლილ ყაზახეთის ტრამალს ერთმანეთისაგან

დაეშორებინა ჩვენი მთები და თვითონ კი გაწოლილიყო მკაცრი და უკაცრიელი.

მაგრამ იმ ზაფხულს, როცა ომმა დაიქუხა, ტრამალზე კოცონები აინთო, ცხენთა რემებმა მტერის ღრუბლით დაჰფარეს ტრამალი, ყველა მხარეს სერავდნენ მას მაცნეები, რომელთაც ამბავი მიჰქონდათ შორეულ კუთხეებში, ახლაც მახსოვს როგორ ყვიროდა ცხენზე ამხედრებული ყაზახი ყელისმიერი ძლიერი ხმით მდინარის მეორე ნაპირიდან.

— ცხენებზე, ყირგიზებო, მტერი დაგვესხა! — და მიჰქროდა უფრო შორს, მტერის ღრუბლებში მოჩვენებასავით ქრებოდა.

ყველანი ფეხზე დააყენა ტრამალმა, მკაცრი-საზვიამო გუგუნით დაიძრნენ მთებიდან ველებისაკენ ჩვენი პირველი ცხენოსანი პოლკები. წკრიალებდა ათასობით მოსართავი, ტრამალს გასცქეროდა ათასობით ჭიგოტი, წინ წითელი დროშები ფრიალებდნენ, უკან კი ცხენების ფლოქვთა ხმაურში იკარგებოდა დედებისა და ცოლების მოთქმა: „გფარვიდეთ ტრამალი, გფარვიდეთ ჩვენი გმირის მანასეს სული!“.

იქ, სადაც ომში მიმავალმა ადამიანებმა გაიარეს, მწარე, სევდის მომგვრელი ბილიკები გაიკვალა.

მიწიერი სილამაზისა და წუხილის ამ სამყაროს გადაშლიდა ხოლმე თავისი სიმღერით ჩემს წინაშე დანიარი. სად ისწავლა, ან ვისგან გაიგო მან ყველაფერი ეს? მე მესმოდა, რომ ასე მხოლოდ იმას შეეძლო ჰყვარებოდა თავისი მიწა-წყალი, ვისაც წლების მანძილზე აწუხებდა სევდა მშობელი მიწისაგან განშორებისა, ვინც სათუთად ინახავდა ამ განცდას. როცა დანიარი მღეროდა, მე ვხედავდი თვითონ მას, პატარა ბიჭუნას, ბედის საძიებლად ტრამალზე მოხეტიალეს. შეიძლება ეს სიმღერები მაშინ დაიბადა? ანდა იქნებ მაშინ, როდესაც ომის გზებზე სისხლიან, ცეცხლით განათებულ კილომეტრებს ითვლიდა.

ვუსმენდი და მინდოდა დავმხობილიყავი მიწაზე, მაგრად ჩავხვევოდი, ჩავკონებოდი მას, მხოლოდ იმისათვის, რომ ადამიანს შეუძლია ასე ძლიერად უყვარდეს მშობელი მიწა. პირველად მაშინ ვიგრძენი, რომ ჩემს გულში გაჩნდა რაღაც ახალი გრძნობა, რომლის სახელიც მე არ ვიცოდი. ეს იყო რაღაც დიდი, დაუძლეველი სურვილი გამომესახა ჩემი თავი, სწორედაც

გამომესახა, არა მარტო თვითონ დამენახა და შემეგრძნო სამყარო, არამედ სხვებისთვისაც გამეგებინებინა ჩემგან დანახული, განცდილი, მომეთხრო ადამიანებისათვის ჩვენი მიწის მშვენიერებაზე, ისევე შთაგონებულად, როგორც ეს დანიაარს შეეძლო. მე გულს მიკუმშავდა გამოურკვეველი შიში და სიხარული, რაღაც გამოუცნობის წინაშე. მაგრამ მაშინ ჯერ კიდევ არ ვიცოდი, რომ ამის გადმოსაცემად ხელში ფუნჯი უნდა ამელო.

ბავშვობიდანვე მიყვარდა ხატვა. სახელმძღვანელოებიდან სურათებს ვიხატავდი და ამხანაგები ამბობდნენ: ზუსტად ჰგავსო. სკოლაში მასწავლებლები მაქებდნენ, როდესაც კედლის გაზეთისთვის ნახატები მიმქონდა. შემდეგ კი ომი დაიწყო, ძმები არმიაში წავიდნენ, მე სკოლას თავი დავანებე და ჩემი ტოლების მსგავსად კოლმეურნეობაში დავიწყე მუშაობა, დამავიწყდა საღებავებიცა და ფუნჯიც, არც ვფიქრობდი, რომ ოდესმე გავიხსენებდი. დანიარის სიმღერებმა სული ამიფორიაქა. სიზმარეულივით დავდიოდი და ქვეყანას გაკვირვებული თვალებით ვუცქერდი, თითქოს პირველად ვხედავდი.

გამოიცვალა ჯამილაც! თითქოს არასოდეს ყოფილიყოს ყოჩადი, ენამწარე და დამცინავი. გაზაფხულის ნაზი სევდა გადაეკრა მის მიმქრალ თვალებს. გზაზე იგი გამუდმებით ფიქრობდა რაღაცაზე, ბუნდოვანი, მეოცნებე ღიმილი უკრთოდა ტუჩებზე, გამოუთქმელად ახარებდა რაღაც კარგი, რის შესახებაც მხოლოდ მან იცოდა. ხშირად, შეიგდებდა ტომარას მხარზე და იდგა რაღაც გაურკვეველი მოკრძალებით გარინდებული. თითქოს მის წინ დიდი ნაკადი მოაგვლევს ტალღებს და არ იცის გადადგას ნაბიჯი თუ არა. დანიარს იგი ერიდებოდა, თვალს ვერ უსწორებდა.

ერთხელ კალოზე უთხრა უძლური, განაწამები წყენით:

— გაგეხადა ეგ შენი გიმნასტურა, გაგირეცხავდი!

შემდეგ, როცა ხალათი მდიხარეში გარეცხა და გასაშრობად მიწაზე გააფინა, თვითონაც იქვე ჩამოჯდა და დიდხანს მონღომებით ასწორებდა ხელისგულებით, მზეზე აკვირდებოდა გაცვეთილ მხრებს, თავს იქნევდა და ისევე ასწორებდა წყნარად და სევდიანად.

მთელი ამ ხნის განმავლობაში მხოლოდ ერთხელ ვნახე, რომ ჯამილა იცინოდა გულიანად, გადამდებად, მას თვალებიც უცინოდნენ. კალოზე მხიარული ხმაურით შემოუხვციეს ქალებმა, გოგონებმა და ჭიგიტებმა, ყოფილმა ფრონტელებმა, რომლებიც თივის დაზვიანებაზე მუშაობდნენ.

— ეი, ბატონებო, მართო თქვენ გეკმევეათ ხორბლის პური? გავემასპინძლდით, თორემ მდინარეში გადაგყრიო! — და ჭიგიტებმა ხუმრობით ფიწლები შემართეს.

— ვის აშინებთ! მე ჩემს მეგობრებზე ვიზრუნებ, თქვენი გამასპინძლება კი რა ჩემი საფიქრებელია?! — სიცილით გამოეპასუხა ჯამილა.

— თუ ასეა, მოგიწევთ წყალში ბანაობა!
ატყდა ხარხარი, აურზაური, ხელის კვრა.

— სტაცე ხელი და გადაუძახე წყალში! — ყველაზე ხმა-მალლა ჯამილა იცინოდა, თან სწრაფად და მოხერხებულად იცავდა თავს. ყველა ცდილობდა ჯამილასათვის ჩაეველო ხელი და მისკენ იქაჩებოდნენ. სამმა ჭაბუკმა ერთად დაატანა ხელი და მდინარისაკენ წაიყვანა.

— გვაკოცე, თორემ მოგიწევს ბანაობა!

— აბა, ბიჭებო, ერთი... ორი... და...

ჯამილა ცდილობდა ხელიდან გასხლტომოდა, ხარხარებდა კისერგადაგდებული, მეგობარ გოგონებს უხმობდა საშველად. მაგრამ მათ არ ეცალათ, ნაპირ-ნაპირ მისდევდნენ წყალს და მდინარეში ჩავარდნილ თავსაფრებს იჭერდნენ, საერთო ხარხარში ჯამილამ წყალში მოადინა ტყაპანი და ამოვიდა იქიდან გაწეწილი, დასველებული თმებით, უფრო ლამაზი და მიმზიდველი, ვიდრე ადრე. სველი ჩითის კაბა შემოტმასნოდა მრგვალ, ძლიერ თეძოებს, ლამაზ ქალურ მკერდს, ის კი ვერაფერს ამჩნევდა და იცინოდა, წამოწითლებულ სახეზე მხიარული წყლის წვეთები ჩამორბოდნენ.

— გვაკოცე! — აჯინდებოდნენ ჭიგიტები.

ჯამილა კოცნიდა მათ და ისევ და ისევ წყალში ადენდა ტყაპანს, ამოსული კი თავის გადაქნევით უკან აგდებდა სველ, დამძიმებულ კულულებს.

ახალგაზრდების ხუმრობამ კალოზე მყოფნი გაამხიარულა,

მოხუცმა გამნიავებლებმა ნიჩბები მიატოვეს და სიცილისაგან თვალზე მომდგარ ცრემლებს იწმენდნენ. ნაოქები სიხარული-საგან გაბრწყინებოდათ და ასე იფიქრებდით თითქოს წამით ახალგაზრდული იერი დაუბრუნდათო. მეც გულით ვიციხნოდი. ყველაფერი დამავიწყდა, ჩემი მოვალეობაც კი — დამეცვა ჯამილა ჭიგეტებისაგან.

მხოლოდ დანიარი არ იციხნოდა. მე ეს შემთხვევით შევნიშნე და დავდუმდი. იგი განმარტოებით იდგა კალოს განაპირას, ფეხები ფართოდ გაეშალა და მომეჩვენა, რომ იგი მივარდება ჭიგეტებთან, გამოსტაცებს მათ ჯამილას, ისე თვალმოუშორებელივ უყურებდა, სევდიანი, აღფრთოვანებული გამოსხდვით, რომელშიც სიხარულიც იყო და ტკივილიც; როცა ჭიგეტები ჯამილას აიძულებდნენ ეკოცნა მათთვის, იგი თავს დაბლა ჰხრიდა, წასასკლელად იწევდა, მაგრამ ვერ მიდიოდა.

ამასობაში ჯამილამაც შეამჩნია იგი. სწრაფად შეწყვიტა სიცილი და თვალები დახარა.

— ვილაზლანდარეთ და გვეყოფა! — უცებ მიუჩინა მან ადგილი თავგასულ ჭიგეტებს.

ვილაც კიდევ შეეცადა მოხვეოდა მას.

— შემეშვი! — და ჯამილამ ხელისკვრით მოიშორა ახალგაზრდა, ამაყად ასწია თავი, სწრაფად დამნაშავესავით გაიხედა დანიარისაკენ და კაბის გასაწურავად გაიქცა.

მაშინ ჩემთვის ჯერ კიდევ არ იყო ნათელი ყველაფერი, რაც მათ ურთიერთობას შეეხებოდა. მართალი გითხრათ, მეშინოდა კიდევ მეფიქრა ამაზე. თავს ცუდად ვგრძნობდი, როცა ვატყობდი, რომ ჯამილას თანდათან ეძალება სევდა იმის გამო, რომ დანიარს გაურბის. უკეთესი იყო, რომ მას წინანდებურად ემხიარულა, გულკეთილად დაეცინა მისთვის. მაგრამ ამავე დროს მიპყრობდა რაღაც უცნაური სიხარული, როდესაც ღამით აულში ვბრუნდებოდი და დანიარის სიმღერებს ვისმენდით.

ხეობაში ჯამილა მუდამ ორთვალაზე იჯდა ხოლმე, ხოლო როცა ტრამალზე გამოვდიოდით, ფეხით მოდიოდა. მეც ფეხით მოვდევდი, ასე უკეთ შემეძლო მესმინა. პირველად თვითნებური ჩვენგანი თავის ორთვალას მოჰყვებოდა, შემდეგ კი ნაბიჯ-ნა-

ბიჭ, ვერც კი ვამჩნევდით, ისე ვუახლოვდებოდით დანიაარს. რაღაც გამოუცნობი ძალა გვეწეოდა მისკენ, სიბნელეში გვინდოდა დაგვენახა მისი თვალები, გაგვერკვია მისი სახის გამომეტყველება, ნუთუ მართლა ის მღერის — მოუკარებელი, მოღუშული დანიაარი!

და ყოველთვის ვამჩნევდი, რომ აღელვებული და გრძნობამორეული ჯამილა ნელ-ნელა უწვდენდა ხელს დანიაარს, მაგრამ იგი ამას ვერ ხედავდა, ზემოთ იყურებოდა, კეფაზე ხელებზემოწყობილი და ირხეოდა სიმღერის ტაქტზე, ჯამილას ხელი კი უღონოდ ეშვებოდა ორთვალის კიდეზე. იგი უცებ შეკრთებოდა ხოლმე, გამოწვედა ხელს და შეჩერდებოდა. იდგა შუაგზაზე თავჩაქინდრული, გაოგნებული და დიდხანს, დიდხანს შესცქეროდა წინ მიმავალ დანიაარს, შემდეგ ისევ აგრძელებდა გზას.

ხანდახან მეჩვენებოდა, რომ მე და ჯამილა შეშფოთებულნი ვართ რაღაც საერთო, ერთნაირად გაურკვეველი გრძნობით. შეიძლება ეს გრძნობა დიდხანს იყო დაფარული ჩვენს სულში და ახლა მისი გამჟღავნების დღეც დადგა.

მუშაობისას ჯამილა კიდევ ახერხებდა ყველაფერი ამის დაფარვას, მაგრამ დასვენების იმ იშვიათ წუთებში, როდესაც კალოზე გვიწევდა გაჩერება, იგი ადგილს ვერ პოულობდა. გამნიავებლების გვერდით დაწრიალებდა, უნდოდა მათ დახმარებოდა, ხელს ჰკიდებდა ნიჩაბს, ჰაერში რამდენიმეჯერ აისროდა ხორბალს, შემდეგ ნიჩაბს მიაგდებდა და თივის ზვინებისაკენ მიდიოდა. ჩრდილში დაჯდებოდა და თითქოს მარტოობისა ეშინიაო, დამიძახებდა.

— კიჩინე ბალა, მოდი აქ დაჯექი!

მე ყოველთვის ველოდი, რომ იგი მეტყოდა რაღაც მნიშვნელოვანს, ამიხსნიდა რა აშფოთებდა. მაგრამ ჯამილა არაფერს ამბობდა. უჩუმრად მადებინებდა თავს მუხლებზე, იყურებოდა სივრცეში, მიჩეჩავდა ზღარბივით თმებს და ნაზად მიალერსებდა მხურვალე, აკანკალებული თითებით. ვუყურებდი შეფარული შეშფოთებისა და სევდის გამომხატველ მის სახეს და თითქოს ჩემს თავს ვხედავდი. მასაც რაღაცა აწუხებდა, მის სულშიც რაღაც ბობოქრობდა და გამოსავალს ეძებდა. ჯამილას ამისი ეშინოდა. მას საშინლად უნდოდა და ამავე დროს არც უნდოდა

გამოტყდომოდა თავს, რომ შეყვარებულია, ისევე როგორც მე მსურდა და არც მსურდა, რომ მას დანიარი ყვარებოდა. ბოლოსდაბოლოს ის ხომ ჩვენი რძალი, ჩემი ძმის ცოლი იყო.

ასეთი აზრი მე მხოლოდ წამით მომდიოდა და მაშინვე ვიშორებდი თავიდან. ჩემთვის ნამდვილი სიამოვნება იყო მეტყვიანა მისი ბავშვურად გაღებული, მგრძნობიარე ტუჩებისათვის, დამენახა მისი ცრემლით დაბინდული თვალები. რა კარგი, რა მომხიბლავი იყო იგი, როგორი ნათელი შთაგონება და გრძნობა იყო გამოხატული მის სახეზე. მაშინ მხოლოდ ვხედავდი ამას და ბევრი რამ არ მესმოდა. ახლაც ხშირად ვეკითხები ხოლმე თავს: შეიძლება სიყვარული ისეთივე აღმაფრენაა, როგორც პოეტისა და მხატვრის აღმაფრენა? ჯამილას შემხედვარეს მიჩნდებოდა სურვილი გაქცეულიყავ ტრამალზე, მეყვირა, შევკითხვოდი ცასა და მიწას, რა მექნა, როგორ დამეძლია ეს გაურკვეველი შეშფოთება, გაურკვეველი სიხარული და ერთხელ, ვგონებ, პასუხიც ვიპოვნე.

ჩვეულებრივ სადგურიდან ვბრუნდებოდით. ღამე წვებოდა. ცაზე ვარსკვლავები ირეოდნენ, ტრამალს ძილი მოსძალებოდა, მხოლოდ დანიარის სიმღერა არღვევდა სიჩუმეს და იკარგებოდა შორს, სიბნელეში. მე და ჯამილა მის უკან მივდიოდით.

არ ვიცი რა აწუხებდა ამ დღეს დანიარს. — მის სიმღერაში იმდენი გულში ჩამწვდომი, ნაზი სევდა და სიმარტოვე იყო, რომ ყელზე მომდგარი ცრემლი მახრჩობდა, მისდამი თანაგრძნობითა და სიბრალულით გამსჭვალულს.

ჯამილა გვერდით მიყვებოდა მის ორთვალას, ხელი ჩაეჭიდა ძვიდისათვის. როდესაც დანიარის ხმა ისევ მაღლა და მაღლა ავიდა, ჯამილამ თავი ასწია, ორთვალაზე შეხტა და დანიარს გვერდით მიუჭდა. იგი იჭდა გაქვავებული, გულზე ხელებდაკრეფილი. მე ორთვალას გვერდით მივყვებოდი, ხან წინ გადავუსწრებდი და მათ შევცქეროდი. დანიარი მღეროდა, თითქოს ვერც ამჩნევდა მის გვერდით მჯდომ ჯამილას. მე დავინახე როგორ მოთენთილად დაეშვნენ ჯამილას ხელები, როგორ მიეკრა იგი დანიარს და როგორ მსუბუქად მიაყრდნო თავი მხარზე. მხოლოდ ერთხელ შეთრთოლდა მისი ხმა, თითქოს დაოთხილმა

ცხენმა წამით ქროლვა შეაჩერაო, და ისევ ახალი ძალით აელერდა. იგი სიყვარულზე მღეროდა.

უცნაური გრძნობა დამეუფლა. მიდამო თითქოს აყვავილდა, შეიჩხა, სიბნელე გადაიყარა და ვრცელ ტრამალზე მე დავინახე ორი შეყვარებული ადამიანი. ისინი ვერც კი მამჩნევდნენ. თითქოს არც ვარსებობდი ამ ქვეყნად. მივდიოდი და ვხედავდაროგორ ერთად ირხეოდნენ სიმღერის ტაქტზე, ქვეყნად ყველაფერი დავიწყებოდათ. მე მათ ვერ ვცნობდი. ეს დანიაჩი იყო. თავის გაცვეთილ, ჭარისკაცურ გიმნასტურაში, მაგრამ თვალები იყო სხვა, თვალეები სიბნელეში ცეცხლს კვესავდნენ. ეს იყო ჩემი ჭამილა, წყნარი და მორცხვი, წამწამებზე აბრწყინებული ცრემლით. მაგრამ ესენი მაინც სულ სხვა ადამიანები იყვნენ. უბედნიერესი ადამიანები. თავის მთელ სიყვარულს მშობელი მიწისადმი, რომელიც მის მუსიკას ასაზრდოებდა, დანიაჩი ჭამილას აძლევდა მთლიანად, უკანასკნელ წვეთამდე, იგი მისთვის მღეროდა, მას უმღეროდა.

ისევ დამეუფლა გაურკვეველი მღელვარება, რომელსაც დანიაჩის სიმღერა იწვევდა ჩემში. და უცებ მივხვდი თუ რა მინდოდა, რა მაწუხებდა. მე უნდა დამესატა ისინი.

ჩემივე აზრების შემეშინდა. მაგრამ სურვილი შიშზე ძლიერი იყო. მე მათ დავხატავ ისეთსავე ბედნიერებს, როგორნიც ახლა არიან! შევძლებ კი? სუნთქვა მეკვროდა შიშისა და სიხარულისაგან. რალაც ტკბილ ბურანში გავეხვიე. მეც ბედნიერი ვიყავი, რადგანაც არ ვიცოდი რამდენი სირთულის წინაშე დამაყენებდა მომავალში ეს ჩემი თავხედური სურვილი. საკუთარ თავს ვეუბნებოდი: მიწას ისევე უნდა გრძნობდე, როგორც გრძნობს დანიაჩი. მე საღებავებით გადმოვეცემ დანიაჩის სიმღერას, ჩემს სურათშიც იქნება მთები, ტრამალი, ადამიანები. ბალახი, ღრუბლები და მდინარეები. მაშინ გავიფიქრე კიდევ: „სად ვიშოვნო საღებავებს? სკოლაში არ მომცემენ — მათ ხომ თვითონ სჭირდებათ!“ თითქოს მთელი სირთულე მხოლოდ ეს იყო.

დანიაჩის სიმღერა მოულოდნელად შეწყდა. ჭამილამ შეაწყვეტინა. უცებ მოეხვია, მაგრამ უცებვე გონს მოეგო, წამით გაშეშდა, გაშორდა და ორთვალისგან გადმოხტა. დანიაჩმა

გაუბედავად მოსწია სადავეს. ცხენები გაჩერდნენ. ჯამილა გზაზე იდგა, მისკენ ზურგშებრუნებული, შემდეგ თავი ასწია, ნახევრად მოაბრუნა, ძლივს შეიკავა თვალზე მომდგარი ცრემლები და ჩაილაპარაკა:

— რას მიყურებ? — ცოტა ხნით დადუმდა და მკაცრად დაუმატა: — ნუ მიყურებ, წადი! — შენ რაღას მომაშტერდი? — ახლა მე მეცა. — ჩქარა აღვირს მოჰკიდებ ხელი — ეჰ, რა მეშველება თქვენს გადამკიდეს.

„ნეტავი რამ წამოუარა?“ — ვერ გამეგო მე და თან ცხენებს ვაჩქარებდი. მიხვედრა კი არ იყო ძნელი: მას ხომ ქმარი ჰყავდა ცოცხალი, იგი სადღაც სარატოვის ჰოსპიტალში იწვა. მაგრამ მე არაფერზე ფიქრი არ მინდოდა. ვბრაზობდი საკუთარ თავზე, ვბრაზობდი ჯამილაზეც და იქნებ იგი სამარადელად შემძულებოდა კიდევ, რომ მცოდნოდა დანიარი არასოდეს აღარ იმღერებდა და მე კვლავ არასოდეს მომეცემოდა საშუალება მესმინა მისი სიმღერისათვის.

დაღლილობისაგან ფეხზე ძლივს ვიდექი, ჩქარა მინდოდა მივსულიყავით ადგილზე, დავედებულიყავ თივაზე და აღარაფერზე მეფიქრა. ცხენები სიბნელეში მიიკვლევდნენ გზას, აუტანლად ჯაყჯაყებდა ორთვალა და აღვირი ხელიდან მივარდებოდა.

კალოზე, როგორც იქნა, ცხენებს მარტულლები მოვხსენი, ორთვალის ქვეშ შევავადე, ძლივს მივალწიე თივამდე და პირდაპირ დავენარცხე ზედ. ამჯერად დანიარმა გარეკა ცხენები საბალახოდ.

დილას რაღაც სიხარულის გრძნობამ გამომალღიძა. მე დავხატავ ჯამილას და დანიარს. დავხუჭე თვალები და წარმოვიდგინე ჯამილა და დანიარი ისეთნი, როგორსაც დავხატავდი. თითქოს მხოლოდ ფუნჯის ალებალა იყო ხელში საჭირო.

მდინარისაკენ გავიქეცი, პირი დავიბანე და ცხენებისაკენ გავვარდი. სველი, ცივი იონჯა ტიტველ ფეხქვეშ მედებოდა, დახეთქილ ფეხის გულებს მიჩხვლეტდა, მაგრამ ვერაფერს ვგრძნობდი. მივრბოდი და ვიმახსოვრებდი ყველაფერს, რაც ირგვლივ ხდებოდა. მზე ამოდიოდა მთების გადაღმიდან, არხის პირას შემთხვევით ამოსული მზესუმზირა მზისკენ მიიწევდა.

მას მზეს უფარავდნენ ირგვლივ ჯგროდ შემოხვეული თეთრთავა ველური ყვავილები, მაგრამ იგი არ ნებდებოდა, იჭერდა, ეპოტინებოდა მზის სხივს და უშვერდა გადაყვითლებულ გულს. მე მივრბოდი მშობლიურ მიწაზე და ჩემს ზევით მერცხლები ეჩიბრებოდნენ ერთმანეთს. ეპ, ნეტავი საღებავები მქონოდა, რომ დამეხატა დილის მზე, თეთრი-მოლურჯო მთები, ცვარმორეული იონჯა და არხის პირას ობლად ამოსული მზესუმზირა.

კალოზე დაბრუნებულს ხასიათი უცებ შემეცვალა. დავინახე მოლუშული, გაცრეცილი ჯამილა. მას ალბათ ღამით არ ეძინა, შავი ჩრდილები ჩადგომოდნენ თვალებში. არც გაუღიმია ჩემთვის, არც დამლაპარაკებია. როდესაც ბრიგადირი ოროზმატი დაინახა, მასთან მივიდა და არ მისალმებია ისე უთხრა:

— წაიყვანე შენი ორთვალა! სადაც გინდა გამიშვი, სადგურში აღარ წავალ!

— რას ამბობ, ჯამილტაი, რა ბზიკმა გიკბინა?— გულკეთილად გაიკვირვა ოროზმატმა.

— ბზიკმა შენ გიკბინა ენაზე! მე კი ნუ შეკითხები! გითხარი არ მინდა და მოვათავე!

ოროზმატს სახეზე ღიმილი ჩაუქრა.

— გინდა თუ არ გინდა, ხორბლის ზიდვა მაინც მოგიწევს! — მან ყვარჯენი მიწაზე დაარტყა. — მითხარი თუ ვინმემ გაწყენინა და თავზე გადავამტვრევე ამ ყვარჯენს. შენ კი თავნებობას შეეშვი. ჯარისკაცებისთვის გადაგაქვს პური, თვითონაც ქმარი ფრონტზე გყავს! — სწრაფად შემობრუნდა და ყვარჯენზე ხტუნაობით უკან მოუხედავად გაშორდა იქაურობას.

ჯამილა დაიბნა, წამოწითლდა, დანიაარისკენ გაიხედა და ჩუმად ამოიოხრა. დანიარი ოდნავ მოშორებით იდგა, მისკენ ზურგშექცეული. იგი ცალკულლის თასმებს ამაგრებდა და საუბრიდან სიტყვაც არ გამოჰარვია. ჯამილა კიდევ ცოტა ხანს იყო გაჩერებული, მათრახს ატრიჟლებდა, შემდეგ ხელი ჩაიქნია და თავის ორთვალისაკენ წავიდა.

ამ დღეს ჩვენ ჩვეულებრივზე ადრე დავებრუნდით. დანიარი მთელი გზა თავგამეტებით მოერეკებოდა ცხენებს. ჯამილა დაღვრემილი იყო და ხმას არ იღებდა. ჩემს წინ გადამწვარი, გაშა-

ვებულის ტრამალი გადაშლილიყო. ჯერ კიდევ გუშინ ის სხვა-ნაირად მეჩვენებოდა. თითქოს ყველაფერი ეს ზღაპრიდან მახსოვდა და თავიდან ვერ ვიცილებდი ბედნიერების სურათს, რომელმაც ჩემს გონებას ცხოვრების სულ ახალი გზები დაანახა. თითქოს ცხოვრების ყველაზე ნათელ მონაკვეთს მივაგენი. მე აგი წარმოდგენილი მქონდა თავისი ყოველგვარი წვრილმანით და მხოლოდ ეს მალეღებდა. მანამდე ვერ დავმშვიდდი, ვიდრე მწონავ ქალს თეთრი ქალაღლის სქელი ფურცელი არ მოვპარე. თვის ზვინის უკან დაეწევი, ქალაღდი გაპრიაღებული ნიღბის პირზე დავდე და გულის კანკალით ალაღს დახმარება შევთხოვე. შევთხოვე ისევე, როგორც მამაჩემი შესთხოვდა, როღესაც პირველად შემსვა ცხენზე, და ქალაღდზე პირველი ხაზები გავავლე. ეს იყო პირველი გაუბეღავი შტრინები, მაგრამ როღესაც ქალაღდზე დანიარის ნაკვთები გამოისახა, ყველაფერი დამავიწყდა. უკვე მეჩვენებოდა, ქალაღდზე გაწვა აგვისტოს ის შესანიღნავი ღამე, ვხეღავდი წყნარ და საოცარ ღამაზე ტრამალს, მესმოღა დანიარის სიმღერა. ვხეღავდი დანიარს მკერღგარუჯულს, თავი რომ უკან გაღაეღო, და მის მხარეზე მიკრულ ჯამიღას. ეს ჩემი პირველი დამოუკიღებელი ნახატი იყო: აი ორთვღა, თვითონ ისინიც, კოფოზე მიღღებული საღავე, ცხენტა ზურგები ირხევიან სიბნელეში, წინ კი ტრამალია და შორეული ვარსკვღავები.

ისეთი გატაცებით ვხატავდი, რომ ვერაფერს ვამჩნევდი. მხოლოდ მაშინ გამოვერკვიე, როღესაც ზედ ჩემს თავზე ვიღაცის ხმა გაისმა:

— რა დავემართა, დაყრუღვი?

ჯამიღა იყო, დავიბენი და სურათის დამაღვა ვერ მოვასწარი.

— ორთვღები კარგა ხანია რაც დავტვირთეთ, მთელი საათია გიყვირით და ვერ გაგაგონეთ, აქ რას აკეთებ? ეს რაღაა?— შემეკითხა და სურათი ხელში აიღო. — ჰმ! — მან გაჯავრებულმა შეათამაშა მხრები.

მერჩივნა მიწა გამსკღომოღა. ჯამიღა დიღხანს, დიღხანს ათვღიერებღა სურათს, შემდეგ სევღიანი, ცრემღმორეული თვღლები მომაპყრო და წყნარად მიხოვღა:

— მომეცი, კიჩინე ბალა... სახსოვრად შევინახავ... — ფურცელი ორად გაჰკეცა და უბეში ჩაიდო.

ჩვენ უკვე გზაზე ვიყავით გასულები, მე კი ჭერ გონება ვერ მომეკრიბა. თითქოს სიზმარში მოხდა ყოველივე ეს. არ მჭეროდა; ოღნავ მაინც თუ მივამსგავსე ნანახს და განცდილს, მაგრამ სადღაც გულის სიღრმეში გულუბრყვილოდ ვზეიმობდი, იქვე ისახებოდნენ სიამაყე და ოცნებებიც — ერთიმეორეზე უფრო გაბედული, ერთიმეორეზე უფრო მომხიბლავი და თავბრუს მახვევდნენ. ახლავე მსურდა უამრავი რამ დამეხატა, ოღონდ არა ფანქრით, არამედ საღებავებით. არავითარ ყურადღებას არ ვაქცევდი იმას, რომ ძალზე სწრაფად მივდიოდით. დანიარი მიერეკებოდა ცხენებს, არც ჯამილას უნდოდა ჩამორჩენილიყო. იგი აქეთ-იქით იხედებოდა და ხანდახან რაღაცას უღიმოდა გულუბრყვილოდ, დამნაშავესავით. მეც ვიღიმებოდი: მაშ, იგი უკვე აღარ გვიბრაზდება მე და დანიარს, და თუკი სთხოვს, დანიარი დღეს კვლავ იმღერებს...

სადგურზე ჩვეულებრივზე გაცილებით ადრე მივედი. ცხენებს ხვითქი გადასდიოდათ. დანიარმა შეუჩერებლივ დაიწყო ტომრების გადმოცლა. სად ეჩქარებოდა, რა ფიქრი უტრიალებდა ძნელი გასაგები იყო. როდესაც მატარებელი ჩაგვივლიდა, იგი შეჩერდებოდა და ხანგრძლივ, ჩაფიქრებულ მზერას გააყოლებდა, ჯამილაც იქით იხედებოდა, საითაც ის, თითქოს ცდილობდა გაეგო რას ფიქრობდა დანიარი.

— მოდი ერთი წუთით, ნალი მოძრობაზეა, დამეხმარე სულ მოვაცილოთ, — დაუძახა ჯამილამ დანიარს.

როდესაც დანიარმა ცხენს ნალი ააძრო და წელში გაიმართა, ჯამილამ მას თვალეში ჩახედა და ჩუმად ალაპარაკდა:

— შენ რა, არაფერი გესმის? თუ ამ ქვეყანაზე მარტო მე ვარ?

დანიარმა უსიტყვოდ მოარიდა თვალეში.

— ფიქრობ ჩემთვის იოლია? — ამოიოხრა ჯამილამ.

დანიარს წარბები შეუტოკდა, მან ჯამილას შეხედა სევდიანად, სიყვარულით და რაღაც უთხრა წყნარად, ძალიან წყნარად, შემდეგ სწრაფად წავიდა თავისი ორთვალისაკენ, რაღაცით კმაყოფილი. მე ვუცქერდი და ვერ მომეფიქრებინა: რო-

გორ უნდა დაემშვიდებინა იგი ჯამილას სიტყვებს? რა ნუგეშია, როცა ადამიანი გეუბნება: „ფიქრობ ჩემთვის ადვილია?“ და თან მძიმედ ოხრავს.

დატვირთვა უკვე დამთავრებული გვექონდა და წასასვლელად ვემზადებოდით, როდესაც ეზოში დაჭრილი ჯარისკაცი შემოვიდა. მას ძველი, გაქეპილი ფარაჯა ჰქონდა წამოსხმული, მხარზე ზურგჩანთა მოეგდო. რამდენიმე წუთით უფრო ადრე სადგურში მატარებელი ჩამოდგა. ჯარისკაცმა მიიხედ-მოიხედა და დაიძახა:

— ვინ არის აქ კურკურეუდან?

— მე ვარ კურკურეუდან! — გამოვეპასუხე და თან ვფიქრობდი, ვინ შეიძლებოდა ყოფილიყო.

— ვისი ხარ, ძამიკო? — შემეკითხა და ჩემსკენ წამოვიდა, შემდეგ ჯამილა დაინახა და სახეზე გაკვირვება და ღიმილი აუთამაშდა.

— ქერიმ, საიდან? — წამოიძახა ჯამილამ.

— ჯამილა, დაიკო! — ჯარისკაცი მას მივარდა და ორივე ხელით ჩაბღუჯა მისი ხელი.

ქერიმი ჯამილას თანასოფლელი გამოდგა.

— რა კარგი ვქენი, რომ აქეთ შემოვეუხვით! სწორედ რომ გულმა მიგრძნო! — აღვზნებულნი ლაპარაკობდა იგი. — მე და სადიკი ხომ ერთად ვიწექით ჰოსპიტალში — ისიც მალე დაბრუნდება. როცა მოვდიოდი ვუთხარი: დაწერე წერილი, შენ ცოლს წავეულებ-მეთქი, აჰა ჩამიბარებია. — ქერიმმა ჯამილას სამკუთხედად მოკეცილი ბარათი გადასცა.

ჯამილამ წერილი ჩაბღუჯა, წამოენთო, შემდეგ გადაფითრდა და ფრთხილად გააპარა მზერა დანიარისაკენ. იგი ორთვალასთან იდგა მარტომმარტო, როგორც მაშინ კალოზე, ფართოდ გაეშალა ფეხები და უყურებდა ჯამილას, მის თვალეში სასოწარკვეთა იყო.

ჯარისკაცის ირგვლივ უცებ მოიყარა ხალხმა თავი. გამოჩნდნენ მისი ნაცნობები, ახლობლები, შეკითხვები დააყარეს. ჯამილამ მადლობის თქმა ვერც კი მოასწრო, რომ მის გვერდით ჩაიქროლა დანიარის ორთვალამ, ეზოდან გავარდა, ოღროჩოდროებზე ხტუნვა დაიწყო და გზაზე ბული დააყენა.

— ხომ არ გაგიყდა ნეტავ! — გაჰყვა მას გაბრაზებული შეძახილი.

ჯარისკაცი სადღაც წაიყვანეს. მე და ჯამილა ისევ შუა ეზოში ვიდექით და ვუყურებდით გზაზე წამოვარდნილ მტერის ღრუბლებს, რომელიც თანდათან გეშორდებოდა.

— წავიდეთ, ჯენე! — ვუთხარი მე.

— წადი, მარტო დამტოვე! — ნალვლიანად მითხრა მან.

მთელი ამ ხნის განმავლობაში პირველად მივდიოდით ცალ-ცალკე. სიცხე ტუჩებს, გამომშრალ ტუჩებს მწვავდა. გამომშრალი, დახეთქილი მიწა, მთელი ღლის სიცხისაგან გავარვარებული, თითქოს ახლა გრილდებოდა და მარილს იღებდა გულზე ჭაღარად. ასევე თითქოს მარილმოკიდებულ, უფორმო შირაყს ჰგავდა მზე, რომელიც მოჩვენებასავით ჰქრებოდა პორიზონტზე. იქვე თავს იყრიდნენ მონარინჯისფერო-წითელი, ქარიშხლის მომასწავებელი ღრუბლები. ეამიდან-ეამად წამოუბერავდა მშრალი ქარი, რომელიც თეთრ ნალექებად რჩებოდა ცხენების ღრუნჩზე, უწეწავდა მათ ფაფარს, გზას აგრძელებდა და მთისძირებში წამოზრდილ აბზინდებისაკენ იწევდა საომრად.

„აღბათ გაწვიმდება“, — ვფიქრობდი ჩემთვის.

როგორ მიუსაფარად ვგრძნობდი თავს, როგორი სევდა შემომწოლოდა გულზე! ცხენებს გამეტებით ვურტყამდი მათრახს და არ ვაძლევდი საშუალებას ნელა ევლოთ. შეშფოთებით გარბოდნენ ხეობისაკენ გრძელფეხა, გამხდარი გარეული ინდაურები. ქარი გზაზე ათამაშებდა ოროვანდის ფერდაკარგულ ფოთლებს, ასეთებს პირველად ვხედავდი, იგი აღბათ ყაზახეთის მხრიდან მოიტანა ქარმა. მზე ჩავიდა. ირგვლივ არავინ იყო. დუმდა მთელი ღლის განმავლობაში განაწამები ტრამალი.

როცა კალოზე მივედი, ბნელოდა. სიჩუმე იყო, არც ქარი უბერავდა. დანიარს დავუძახე.

— არ არის, მდინარისაკენ წავიდა, — შემეხშიანა დარაჯი. — ჩამოიხუთა ჰაერი და ხალხიც გაიფანტა სახლებში. ქარი თუ არ არის, რა უნდა აკეთოს კაცმა კალოზე!

ცხენები საბალახოდ გავრეკე და გადავწყვიტე მდინარისაკენ გამეხვია. ვიცოდი სადაც უნდა ყოფილიყო დანიარი.

იგი იჯდა ხრამის პირას, მოკუზული, მუხლებში თავჩარგული. მომინდა მივსულიყავი, მოვხვეოდი და რაღაც კარგი მეტქვა მისთვის. მაგრამ რა უნდა მეტქვა? ასე ვიდექი ერთ ხანს, შემდეგ მოვბრუნდი. მერე დიდხანს ვიწექი თივაზე, შეეცქეროდი ღრუბლებით ჩამუქებულ ცას და ვფიქრობდი: „რატომ არის ცხოვრება ასე რთული და გაურკვეველი?“

ჯამილა არ ბრუნდებოდა. სად წავიდა, სად დაიკარგა? ვერ ვიძინებდი, თუმცა საშინლად ვიყავი დაღლილი. მთების იქით, საღრაც იციალებდა რაღაც და გააპობდა ხოლმე ჩამუქებულ ღრუბლებს.

მე ჯერ კიდევ არ მეძინა, როდესაც დანიარი დაბრუნდა. იგი უმიზნოდ დაბორილობდა კალოზე და თვალი გზისკენ ეჭირა. შემდეგ კი ჩემს ახლოს დაემხო თივაზე. ალბათ, წავა საღნე, აღარ დარჩება აულში? ან კი სად უნდა წავიდეს? ვის სჭირდება მარტოხელი და უსახლკარო? და უკვე ძილმორეულმა გავიგონე მოახლოებული ორთვალის ხმაური. ალბათ ჯამილა იყო...

არ მახსოვს რამდენ ხანს მეძინა... უცებ ზედ ჩემს ყურთან, თივაზე ვილატის ნაბიჯები აშრიალდა. თითქოს სველი ფრთა შემეხო მხარზე. თვალი გავახილე. ჯამილა იყო. იგი მდინარიდან მოდიოდა, სველი, გაწურული ტანსაცმლით. ჯამილა შეჩერდა, შეშფოთებით მიმოიხედა ირგვლივ და დანიარის გვერდით დაჯდა:

— დანიარ, მოვედი, მე თვითონ მოვედი, — წყნარად თქვა მან. სიჩუმეს დაესადგურებინა ირგვლივ. საღრაც დაბლა ელვამ დაჰკვესა.

— გეწყინა? ძალიან გეწყინა, არა?

ისევ სიჩუმე, მხოლოდ მსუბუქი ხმაურით ჩაეარდა მდინარეში ხრამის კიდეს მოწყვეტილი კოლბოხი.

— განა მე ვარ დამნაშავე? არც შენ ხარ დამნაშავე...

მთები გრუხუნმა შეაზანზარა, ჯამილას პროფილი ელვამ გაანათა. მან ისევ მიიხედ-მოიხედა და დანიარს ჩაეკრა. დანიარის მკლავებში მოქცეულ ჯამილას მხრები უთრთოდა. შემდეგ გასწორდა და გვერდით მიუწვა.

მსუსხავმა ქარმა გადაურბინა ტრამალს, ჰაერში აიტაცა თივა და უმოწყალოდ დაეძგერა კალოს განაპირას მდგომ, წაფერღე-

ბულ იურტას, შემდეგ გზაზე გავარდა და ბზრიალასავით დატრიალდა. ისევ ათამაშდა ღრუბლებში ელვის ნაპერწკლები და ზედ ჩვენს თავზე გავარდა მეხი. შიში და სიხარული შეენაცვლა ერთმანეთს, ეს იყო ზათხულის უკანასკნელი ქექა-ქუხილი.

— რამ გაფიქრებინა, რომ საღიჟში გაგცვლიდი? — მხურვალედ ეჩურჩულებოდა დანიარს ჯამილა. — არა, არა! მე მას არასდროს არ ვყვარებივარ. ჩემს მოკითხვასაც კი წერილის ბოლოში აწერდა. არ მინდა მე იგი თავისი დაგვიანებული სიყვარულით, რაც უნდათ ის ილაპარაკონ! ჩემო ძვირფასო, შენ თავს არავის დაეუთმობ! მე დიდიხანია მიყვარხარ, მიყვარდი მაშინაც, როდესაც არ გიცნობდი, თითქოს შენ გელოდი და მოხვედი კიდევ!

ელვის ცისფერი სხივები ერთიმეორის მიყოლებით იკლანებოდნენ და მდინარეში ტყდებოდნენ. თივაზე წვიმის წვეთები აშრიალდნენ.

— ჯამილამ, საყვარელო, ძვირფასო ჯამილტაი! — ეჩურჩულებოდა დანიარი. იგი ჯამილას უძახდა ყველაზე ნაზ ყაზახურ და ყირგიზულ სახელებს. — მეც ხომ დიდიხანია მიყვარხარ, შენზე ვოცნებობდი სანგრებში, მე ვიცოდი, რომ ჩემი სიყვარული სამშობლოში მელოდა და ეს შენ იყავი, ჩემო ჯამილა!

— მობრუნდი, თვლებში ჩაგხედო!

წვიმამ დაუშვა.

თითქოს დაჭრილი ჩიტიაო, ფრთების ფართხუნით დაბლა დაეშვა იურტიდან მოგლეჯილი ქეჩა. მძვინვარებდა წვიმა, თითქოს მიწას კოცნისო, ხან კოკისპირულად დაუშვებდა, ხანაც ქარი ამოუბერავდა და წვიმის ნაკადი ირიბდებოდა. ცაზე მძლავრად გადაიქუხებდა ხოლმე მეხი. თითქოს გაზათხულზე ტიტები ელვარებენო, მთების თავზე იელვებდნენ ნაპერწკლები. ღმუოდა, ბობოქრობდა ქარი.

წვიმდა, მე კი ვიწექი. თივაში თავჩარგული და ვგრძნობდი რა ძლიერად მიცემდა გული. ბედნიერი ვიყავი. ისეთი შეგრძნება მქონდა, თითქოს დიდი ხნის ავადმყოფობის შემდეგ პირველად შეგხედე მზეს. კარავში წვიმა ჩამოდიოდა, კვესავდა ელვის ნაპერწკლები, მაგრამ მაინც კარგად ვგრძნობდი თავს,

ვთვლემდი, ღიმილი არ მშორდებოდა და ვერ გამეგო ეს ჯამილა და დანიაჩი ჩურჩულებდნენ, თუ წვიმის წვეთები შრიალებდნენ თივაზე.

ახლა კი გადაუღებლად იწვიმებდა, შემოდგომისპირი იყო. ჰაერში იგრძნობოდა ნესტით გაყენთილი აბზინდისა და სველი თივის სურნელი. რა მოგველოდა შემოდგომაზე? ამაზე რატომღაც არ ვფიქრობდი.

იმ შემოდგომაზე, ორწლიანი შესვენების შემდეგ, მე ისევ წავედი სკოლაში. გაკვეთილების დამთავრებისას ხშირად მივდიოდი მდინარის ნაპირზე, მორევთან, იქ, სადაც ზაფხულში კალო იყო, აქ მე მოწაფის საღებავებით ვხატავდი ჩემს პირველ ეტიუდებს. მიუხედავად იმისა, რომ მაშინ ბევრი რამ არ გამეგებოდა, მაინც ვხვდებოდი ყველაფერი ისე არ გამომდიოდა, როგორც მინდოდა.

„საღებავები არ მივარგა, ნამდვილი რომ მომცა, მაშინ!“ — ვამბობდი ჩემთვის, თუმცა წარმოდგენა არ მქონდა როგორი უნდა ყოფილიყო ნამდვილი საღებავები.

მხოლოდ ძალიან გვიან მომიწია მენახა ნამდვილი ზეთის საღებავები ტყვიის ტუბებში.

საღებავები საღებავებად, მაგრამ მასწავლებლები მართალნი იყვნენ, როცა ამბობდნენ: სწავლაა საჭიროო. მაგრამ იმ დროს ამაზე ოცნებაც ჰქონდა. რა დროს ეს იყო, როცა ძმებისაგან არაფერი ისმოდა და დედა მე, „ორი ოჯახის მარჩენალსა და ჯიგიტს“ არსადაც არ გამიშვებდა, ამაზე ხმის ამოღებასაც ვერ ვებედავდი. შემოდგომა კი ისეთი ლამაზი იყო, თითქოს გთხოვდა დამხატვო.

გათავთხელდა მდინარე კურკურეუ, ლოდებზე ხავსი გაჩნდა. ნაადრევმა სუსხმა წითლად შეაფერადა ტირიფი, მაგრამ ალვის ხეები კიდევ ინარჩუნებდნენ გაყვითლებულ სქელ ფოთლებს.

მეჯოგეების გაჭვარტლული, წვიმისგან გადარეცხილი იურტები შავად მოჩანდნენ აქვიტებისაგან აწითლებული ჭალის ფონზე, საკვამურებიდან ცისკენ მიიწევდა შავი-მოიისფრო კვამლი. ისმოდა ძარღვმაგარი კვიცების ხმამალალი ჰიხვინი, თავაწყვეტილი დარბოდნენ ჭაკები, ახლა უკვე გაზაფხულამდე ძნელად თუ მოიძევდა მათ კაცი რემაში. საზაფხულო საძოვ-

რებიდან დაბრუნებული საქონელი ჯგროდ დაეხეტებოდა ნამკალზე. წამოწითლებულ ტრამალს აღმა-დაღმა სერავდნენ საქონლის ჩლიქებდაჩნეული ბილიკები.

მალე ტრამალიდან ქარმაც წამოუბერა, ცა აიძვრა, დაიწყო თოვლის მომასწავებელი ცივი წვიმები. ერთხელ კარგი ამინდი გამოვიდა, მდინარისაკენ გავწიე. მე იქ დიდხანია შეთვალთვალეებული მქონდა მთის ცირცელის ცეცხლისფრად მოელვარე ბუჩქი. საღამოხანი იყო, ვიჯექი ფონთან, ტირიფნარში. უცებ შევამჩნიე ორი ადამიანი, რომელნიც ალბათ ფონზე ფეხით გადავიდნენ. დავაკვირდი: დანიარი და ჯამილა ვიცანი. თვალი ვერ მოვაშორე მათ მკაცრ, შეშფოთებულ სახეებს. მხარზე ზურგჩანთა მოგდებული დანიარი სწრაფად მიაბიჯებდა, გახსნილი ფარაჯის კალთები ქირზის ჩექმებზე ეფართხუნებოდნენ. ჯამილას თეთრი თავსაფარი წაეკრა, ჩაეცვა თავისი საყვარელი კაბა, რომლითაც ბაზრობის დროს იწონებდა ხოლმე თავს, ხოლო კაბის ზემოდან დალიანდაგებული ეაკეტი მოესხა. ცალ ხელში პატარა ფუთა ეჭირა, მეორე დანიარისათვის ჩაეჭიდებინა. მიდიოდნენ და რალაცაზე საუბრობდნენ.

მათ ვიწრო ბილიკით გადაიარეს ტირიფებიანი ქალა, მე კი კვლავ ვუცქეროდი და არ ვიცოდი რა მექნა. იქნებ დამეძახა? მაგრამ ენა თითქოს გამიშეშდა.

უკანასკნელად ათამაშდნენ წითელი სხივები ღრუბლებით ჩამოქუფრულ ცაზე და მთების გადაღმა დაეშენენ. ჩამობნელდა. დანიარი და ჯამილა კი მიდიოდნენ უკანმოუხედავად, მიდიოდნენ რკინიგზის გადასასვლელისაკენ. ერთი-ორჯერ კიდევ გამოჩნდა მათი თავები ტირიფნარში და შემდეგ საბოლოოდ მიიშალა.

ჯამილა-ა-ა! — დავიყვირე მთელი ძალით.

ა-ა-ა-ა! — ობლად გამომეხმაურა ექო.

ჯამილა-ა-ა-ა!—ვიყვირე ისევ და გონდაკარგულმა პირდაპირ გაგტოპე მდინარეში.

ყინულივით ცივი შხეფები სახეში მცემდნენ. ტანსაცმელი დამისველდა, მე კი მივბობოდი, არ დავეძებდი არც გზას, არც ბილიკს, შემდეგ რალაცას წამოვედე და მოწყვეტილივით

დავეცი მიწაზე. ვიწექი ასე თავაულებლად, სახეს ცრემლი მისველებდა, სიბნელე თითქოს მხრებზე დამწოლოდა, ჩემთან ერთად ტიროდნენ ქარისაგან აწრიალებული ტირიფის ტოტები.

— ჯამილა! ჯამილა! — ვსლუჯუნებდი და ცრემლი მახრჩობდა. ვეთხოვებოდი ყველაზე —ახლობელ, ყველაზე საყვარელ ადამიანებს. მხოლოდ ახლა, აქ მიწაზე დაგდებული, უცებ მიეხვდი, რომ ჯამილა მიყვარდა. ეს იყო ჩემი პირველი, ჩემი ბავშვობის სიყვარული.

დიდხანს ვიყავი ასე ჩამხობილი. ვეთხოვებოდი ჯამილასა და დანიარს, მათთან ერთად მე ჩემს ბავშვობას ვემშვიდობებოდი.

უკვე ბნელოდა, როცა სახლამდის მივალწიე; ეზოში აურზაური იყო, წკრიალებდა უზანგები, რახტავდნენ ცხენებს, ცხენზე შესკუბებული მთვრალი ოსმონი მთელი ძალით ბლაოდა:

— დიდიხანია უნდა გაგვეგდო აულიდან ეგ უჯიშო, მოხეტიალე ძაღლი! მთელი გვარი შეგვარცხვინა, თავს ლაფი დაგვასხა! ერთი მომაგდებინა ხელში, ადგილზევე ჩავაძაღლებ, გამასამართლონ, —ამაზე დიდი სირცხვილი შეიძლება, მოთრეულმა მაწანწალამ ქალი წაგვართვას! ჯიგიტებო, ცხენებზე! ვერსად გაგვექცევა, სადგურამდე დავეწევით.

შიშისაგან ამბურძგლა, მხოლოდ მაშინ დავმშვიდდი, როცა დავინახე, რომ მდევარმა სულ სხვა მხარეს გააქროლა ცხენები, ჩუმად შეეძვერი სახლში; თავიდან ფეხებამდე გავეხვიე მამაჩემის ქურქში, რომ არავის დაენახა ჩემი ცრემლები.

რამდენი ლაპარაკი, რამდენი მითქმა-მოთქმა იყო აულში! ქალები ერთმანეთს ეჯიბრებოდნენ ჯამილაზე ძვირის თქმაში!

— სულელი! როგორი ოჯახი მიატოვა! თავისი ბედნიერება თვითონვე გათელა ფეხქვეშ!

— საკითხავია, რამ მოხიბლა, რას დახარბდა? მას ხომ გაქეჭილი ფარაჯისა და ძირგავარდნილი ჩექმების მეტი არაფერი გააჩნია.

—საქონელი უმტვრევს თავლის კარებს! რა უნდა ჰქონდეს

უსახლკარო მაწანწალას. რაც აბადია ტანზე აცვია! არაფერია, გონს მოეგება, მაგრამ გვიან იქნება!

— სწორედ, სწორედ, კვეციანი ქალი სადიკს როგორ უღალატებდა! ჩვენი აულის პირველ ჯიგიტს!

— დედამთილი? განა ყველას აძლევს ღმერთი ასეთ დედამთილს? წადი და იპოვე მეორე ასეთი ბაიბიჩე! სულელმა, რა ტყუილუბრალოდ დაიდუპა თავი!

შეიძლება მხოლოდ მე არ ვკიცხავდი ჯამილას, ჩემს ყოფილ ჯენეს. რა ვუყოთ, რომ დანიაჩს გაქექილი ფარაჯისა და ძირგავარდნილი ჩექმების მეტი არაფერი გააჩნდა, მე ხომ ვიცოდი რა მდიდარი სული ჰქონდა მას. მჯეროდა, რომ ჯამილა მასთან ბედნიერი იქნებოდა. დედა მეცოდებოდა მხოლოდ. მეჩვენებოდა, რომ ჯამილას წასვლასთან ერთად, მას ძალ-ღონემაც უღალატა. იგი დანაღვლიანდა, გახდა და როგორც ახლა მგონია, ვერაფრით ვერ ურიგდებოდა იმას, რომ ცხოვრება ასე ამსხვრევდა ძველ ადათ-წესებს. თუ მძლავრ ხეს ქარიშხალი ამოძირკვავს, იგი ვერასოდეს ველარ წამოიძარტება. ადრე დედას არაეისთვის უთხოვია ნემსში ძაფის გაყრა, სიამაყე არ აძლევდა ნებას. ახლა კი ერთხელ სკოლიდან დაბრუნებულმა შევამჩნიე როგორ უკანკალებდა ხელები დედას, როგორ ვერაფრით ვერ მოახერხა ნემსის ყუნწში ძაფის გაყრა და როგორ ტირიდა ჩუმად.

— გამომართვი, ამიგე! — მთხოვა მან და მძიმედ ამოიოხრა, — დაიღუპება ჯამილა... ეპ, რა დიასახლისი დადგებოდა კარგ ოჯახში! წავიდა... შიგვატოვა... რატომ შიგვატოვა? ნუთუ ცუდად ვექვეოდით?

მინდოდა მოვხვეოდი, დამემშვიდებინა იგი. მოვყოლოდი თუ როგორი ადამიანია დანიაჩი, მაგრამ ვერ გავბედე, ვიცოდი რომ სასტიკად შევეურაცხოფდი.

და მაინც ჩემი უნებლიე მონაწილეობა ამ ისტორიაში საიდუმლოდ არ დარჩა.

მალე სადიკი დაბრუნდა. იგი, რა თქმა უნდა, დარდობდა, თუმცა ერთხელ მთვრალმა უთხრა ოსმონს:

— წავიდა — გზაც იქით ჰქონია. ჩაძაღვდებოდა სადღაც. ქალები კი რამდენიც გინდა იმდენია. უღამაზესი ქალიც კი არ ღირს ყველაზე უშნო მამაკაცის ფეხის ფრჩხილად.

— რაც მართალია მართალია! — პასუხობდა ოსმონი. — მარტო ის მწყინს, რომ მაშინ არ ჩამივარდნენ ხელში. ძალღვივით წავაგდებინებდი თავს, ჯამილას კი ცხენის კუდზე გამოვაბამდი. ალბათ სამხრეთით წავიდნენ, ანდა ყაზახებს შეეხიზნენ. მისთვისაც რა, მაწანწალობა ახალი ხელობაა თუ? ოღონდ ვერაფრით ვერ გამიგია, როგორ მოხდა ყველაფერი. ეს ყველაფერი გათახსირებულმა ჯამილამ მოაწყო! მე იმას ვუჩვენებდი!..

ამ სიტყვების მოსმენისას მინდოდა მეტქვა ოსმონისთვის: „ვერაფრით ვერ მოგიხელეგია სათიბზე რომ შეგახურა, ხომ? მართლაც, რომ ბინძურო აღამიანო!“

და აი ერთხელ სახლში ვიჯექი, სკოლის კედლის გაზეთისათვის ვხატავდი რალაცას. დედა ღუმელთან საქმიანობდა. უცებ ოთახში სადიკი შემოვარდა. ფერდაკარგული, ბოროტად მოჭუტული თვალებით ჩემსკენ გამოქანდა და ზედ ცხვირზე მომაფარა ქალაღის ფურცელი.

— შენ დახატე?

გავშეშდი. ეს იყო ჩემი პირველი ნახატი. იმ წუთში, ნახატიდან ცოცხალი დანიარი და ჯამილა მიყურებდნენ.

— მე.

— ეს ვინაა? — დაადო თითი ფურცელს.

— დანიარი!

— გამყიდველო! — მომახალა სადიკმა.

მან ნაკუწ-ნაკუწად აქცია ფურცელი და კარი მიიჯახუნა. ხანგრძლივი სიჩუმის შემდეგ დედამ მკითხა:

— იცოდი?

— ვიცოდი.

როგორი საყვედურითა და გაკვირვებით მიყურებდა ღუმელზე მიყრდნობილი დედა. და როდესაც ვთქვი: „მე მათ კიდევ დავხატავ!“ — მან მწუხარებით, უძლურად გადაიქნია თავი.

მე კი ვუყურებდი იატაკზე დაყრილი ქალაღის ნაკუწებს და ბოღმა მახრჩობდა. დაე მოლაღატედ ჩამთვალონ. ვის ვულატე? ოჯახს? ჩვენს. გვარს? მაგრამ სიმართლისათვის, ცხოვრების, ამ ორი აღამიანის სიმართლისათვის არ მილაღატნია. არა-

ვინ მყავდა ვისთვისაც შემეძლო ეს მეთქვა. დედაც კი ვერ გამოგებდა ვერაფერს.

ქალაღის ნაკუწებს ბუნდოვნად ვხედავდი, ისინი ცოცხლებივით წრიალებდნენ და მახსენდებოდა წამი, როდესაც ნახატიდან ცოცხლებივით შემომანათეს დანიაჩმა და ჯამილამ, მეჩვენებოდა თითქოს მესმის დანიაჩის სიმღერა, რომელსაც აკვისტოს იმ დიდებულ ღამეს მღეროდა. მაგონდებოდა როგორ მიდიოდნენ ისინი აულიდან და მეც მომინდა გამოვსულიყავი ჩემს საკუთარ გზაზე, გაბედულად და ვაჟკაცურად შევდგომოდი საკუთარი ბედნიერების რთული გზის ძებნას.

— სასწავლებლად წავალ... ვუთხარი მამას. მხატვარი უნდა გავხდე! — მტკიცედ განვუცხადე დედაჩემს.

მე დარწმუნებული ვიყავი, რომ იგი დაიწყებდა საყვედურებს, ატირდებოდა, მოაგონდებოდა ფრონტზე დაღუპული ჩემი ძმები, მაგრამ, ჩემდა გასაკვირად, არ ატირებულა. მხოლოდ ნაღვლიანად და ჩუმად მითხრა:

— წადი... წამოიჩიტეთ და ფრთებსაც თქვენებურად იქნევთ... ჩვენ საიდან გვეცოდინება რა სიმალღეზე აფრინდებით? შეიძლება თქვენ მართალიც ხართ. წადი... თუმცა, იქნებ, გადაიფიქრო. რა ხელობაა ხატვა და თხაპნა. ისწავლი და გაიგებ... სახლი, საკუთარი სახლი არ დაივიწყო...

იმ დღიდან მცირე სახლი გამოგვეყო. სულ მალე კი მეც წავედი სასწავლებლად.

აი მთელი ამბავი.

აკადემიაში, სადაც მე სამხატვრო სასწავლებლის დამთავრების შემდეგ გამგზავნეს, წარვადგინე ჩემი სადიპლომო ნაშრომი — ეს იყო სურათი, რომელზეც დიდიხანია ვოცნებობდი.

ძნელი მისახვედრი არაა, რომ ამ სურათზე გამოსახულნი იყვნენ დანიაჩი და ჯამილა. ისინი მიდიან ტრამალზე, შემოდგომის გზაზე. მათ წინ ფართო, ნათელი ტრამალი გაშლილა.

ჩემი ნახატი არ არის სრულყოფილი, აკლია ოსტატობა — მაგრამ ეს ნახატი ჩემთვის უსაზღვროდ ძვირფასია, იგი ხომ ჩემი პირველი შემოქმედებითი წუხილი იყო.

ახლაც მომეცარება ხოლმე ხელი, ახლაც მაქვს წუთები, როდესაც საკუთარი თავის რწმენა მეკარგება და მაშინ გული გამიწვევს ჩემი საყვარელი სურათისაკენ, დანიარისა და ჯამილასაკენ. დიდხანს ვუყურებ მათ და მათთან ვსაუბრობ.


„სად ხართ ახლა, რომელ გზებზე მიაბიჯებთ. ჩვენთან ტრამალზე ბევრი ახალი გზაა. გზებითაა დასერილი მთელი ყაზახეთი ალტიამდე და ციმბირამდე. ბევრი მამაცი ადამიანი იკვლევს ახლა ამ გზებს, შრომობს. იქნებ თქვენც ამ მხარეებში მოხვდით. შენ, ჩემო ჯამილა, წახვედი ფართო ტრამალით, წახვედი ისე, რომ უკან არ მოგიხედავს. იქნებ დაიღალე, შეიძლება საკუთარი თავის რწმენა დაკარგე? მიეყრდენი მაშინ დანიარს. იგი გიმღერებს თავის სიმღერას სიყვარულზე, მიწაზე, სიცოცხლეზე! აფორიაქდება და ათასფერებით ათამაშდება ტრამალი. მაშინ შენ მოგაგონდება აგვისტოს ღამე! იარე, ჯამილა, იარე, ნუ ინაღვლებ, შენ იპოვნე შენი ბედნიერება!“

ვუყურებ მათ და მესმის დანიარის ხმა. მე იგი მიხმობს გზისკენ, მაშასადამე, დროა მოვემზადო. მე წავალ მშობლიურ სოფელში, გავივლი ტრამალზე და უამრავ ახალ ფერს დავინახავ.

დაე, ჩემს ყოველ ნახატში ეღერდეს დანიარის სიმღერა! ჩემს ყოველ ნახატში ძგერდეს ჯამილას გული!



THE
MUSIC



„არ გათელილა ჟერ იქ ბილიკი,
არ გამტვრეულა ფიჩხისა წკირი,
ორმოცი დღეა ცხენს მიაქროლებს,
შეუჩერებლევ ვილაყა მწირი...“

(ყირგიზული ხალხური თქმულებიდან)

5

წყაროდან ნახევარი ვედრო წყლის ამოდებაც ვერ მოვასწარი და ტრამალი გააყრუა ყვირილმა:

— ე-ე-ე! აკადემიკოსო, ცხვირ-პირს დაგამტვრევ!

გავშეშდი. ყური მივუგდე. სხვათაშორის, მე ქემელი მქვია, მაგრამ აქ აკადემიკოსი შემარქვეს. ნამდვილად ასეა: გაღმა ბოროტად დამუნჯებულა ტრაქტორი. ის, ვინც ცხვირ-პირის დამტვრევას მპირდება, — აბაკირია. ისევ ამიღრიალდება, გამ-

ლანძღავს, იქნებ ცემაც დამიპიროს. წყლის შიტანას ვერ ვასწრებ. ტრაქტორი ორია, მე კი ერთი, მე მათ ჩემი ერთცხენიანი ორთვალათი წყალი, საწვავი, საცხი და, ვინ იცის, რა არ უნდა მივუზილო. ტრაქტორები კი ყოველდღიურად სულ უფრო შორდებიან ერთადერთ წყაროს მთელს ოლქში, სულ უფრო შორდებიან ჩვენს საველე ბანაკს, რომელიც ერთადერთია ამ ქვეყნად და სადაც ინახება საწვავიანი ცისტერნა. უნდოდათ იგი ახლო გადმოეტანათ, არაფერი გამოვიდა — ისიც წყალსაა მიჯაჭვეული. აბაკირს კი არ უნდა გაიგოს. „ცხვირ-პირს დაგიმტვრევ, შენი მიზეზით ვცდები! — ესაა და ეს. — იმიტომ კი არ ვმუშაობ ვირივით, რომ ვილაც ცხვირმოუხოცელი სტუდენტისათვის დავკარგო დრო!“.

მე კი სულაც არა ვარ სტუდენტი. ინსტიტუტში შესვლაც არ მიცდია, პირდაპირ სკოლის დამთავრებისთანავე მოვედი ანარხაიში. როდესაც გეაცცილებდნენ, კრებაზე ამბობდნენ, რომ ჩვენ, მათ შორის მეც: „ყუპირის მამაცი დამპყრობნი, განახლებული მხარის პიონერები ვართ“. აი, ვინ ვიყავი მე თავდაპირველად. ახლა კი?.. მრცხვენია კიდეც: — „აკადემიკოსი“. ასე მომნათლა აბაკირმა. თვითონ ვარ დამნაშავე. არ მეხერხება ჩემი აზრების დაფარვა, ხმამალლა ვოცნებობ პატარა ბავშვივით, ხალხი კი დამცინის. თუმცა კაცმა რომ თქვას, ისე მე არ ვარ დამნაშავე, როგორც ჩემი ისტორიის მასწავლებელი ალდიაროვი, მხარეთმცოდნე! ამიყოლია და ახლა სამაგიეროს ვზღავ...

ხევიდან გზაზე ისე გამოვედი, რომ ხეირიანად ვერც გავავსე კასრი. თუმცა აქ გზა არც არასოდეს ყოფილა, მე გავტკეპნე ჩემი ორთვალით.

ტრაქტორის კაბინა ძლივს მოჩანს გადაშავებული მინდვრის ბოლოში. კაბინაში კი აბაკირია. იგი ალბათ ისევ მუშტებს. იქნევს და უღმერთოდ მლანძღავს.

ცხენს მათრახი გადაეუჭირე. წყალი ზურგზე მესხმება, მე კი მივაქროლებ, რაც შემიძლია. მომხვდება აბაკირისაგან.

მე თვითონ მოვითხოვე აქეთ წამოსვლა, არავის დაუტანებია ძალა. სხვები ყაზახეთში წავიდნენ, ნამდვილ ყამირზე. რომელზეც გაზეთებში წერენ. ანარხაიში კი მარტო მე წამო-

ვედი. პირველი გაზაფხულია რაც აქ მუშაობენ და ისიც ორი ტრაქტორით. შარშან აგრონომმა სოროკინმა — ის აქ ყველაზე უფროსია — პატარა ფართობზე გამოსცადა ურწყავი ქერი-ამბობენ, კარგად გაიხარაო. თუ ასე გაგრძელდება, საცვების პრობლემა ანარხაის ტრამალზე შეიძლება გადაწყდეს.

ჯერ კი სიფრთხილეა საჭირო. გვალვიანი და მცხუნვარეა ზაფხულობით ანარხაი. ხანდახან ნარეკალი-ტაშ-ტიკენიც ძირიანად ხმება. ის კოლმეურნეობები, რომლებიც შემოდგომით აქეთ ერეკებიან საქონელს, არაფერს თესავენ, სხვებს ელოდებიან, ვნახოთ რა გამოვაო. იმიტომაც ვართ ასე მცირერიცხოვანნი: ორი ტრაქტორისტი, ორი მიმბმელი, მზარეული ქალი, მე — წყლისშიდავი და აგრონომი სოროკინი. აი ყამირის დამმორჩილებელთა მთელი არმია. ვეკვობ, ვინმემ რამე, ცოდეს ჩვენზე და არც ჩვენ ვიციტ ბევრი რამ, რაც ამ ქვეყნად ხდება. სოროკინი თუ მოიტანს ახალ ამბავს. იგი ხანდახან ცხენით მიდის ხოლმე მწყემსებთან, მწყემსებს რადიოსადგური აქვთ, იქიდან ეჩხუბება უფროსებს და ცნობებს აწვდის. ხოლმე ანგარიშგებისათვის.

მე კი ვფიქრობდი — ყამირი, მასშტაბები! თუმცა ამის მიზეზი ისევ ჩვენი ისტორიკოსი ალდიაროვია, ის ასე გვიხატავდა მოწაფეებს ანარხაის:

„საუკუნოობით ხელუხლებელი, აბზინდებით აფერადებულ ტრამალი, კურდაის ქედებიდან ბალხაშის ლერწმებამდე გადაშლილი! გადმოცემით, წინათ ამ ტრამალში უგზო-უკვლოდ იკარგებოდნენ შემთხვევით მოხვედრილი რემები და შემდეგ დიდხანს დაეხეტებოდნენ გაველურებული ცხენები. ანარხაი — წარსული ეპოქების უტყვი მოწმე, გრანდიოზული ბრძოლებისა და მომთაბარე ტომების არენა იყო. ჩვენს დღეებში კი ანარხაი სამომთაბარო მეცხოველეობის უდიდესი ცენტრი უნდა გახდეს“. და ასე დაუსრულებლივ...

კარგი სანახავი იყო მაშინ ანარხაი რუკაზე, იგი ხომ სულ ხელისგულის ოდენაა. ახლა კი? განთიადიდან დავაქროლებ აქეთ-იქით ამ სულელურ წყალსაზიდს. საღამოთი ძლივს გამოვხსნი ხოლმე ცხენს, დაუწყარი დაწნეხილ თივას, ჩვენთან რომ მანქანებით მოაქვთ. შემდეგ უგემურად ვჭამ იმას,

რასაც მაძლევს ჩვენი ალღვი, მივეგდები იურტაში და მკვლარით ვიძინებ.

ის, რომ ანარხაი აბზინდებით აფერადებული ტრამალია — სწორია. შეიძლება საათობით იხეტილო და დატკბე მისი სილამაზით, მაგრამ ვის აქვს ამის დრო.

ყველაფერ ამას არა უჭირს რა, მაგრამ ერთი ვერ გამიგია. რატომ არ მოვეწონე აბაკირს, რატომ შემიძულა ასე? ნეტავ ვიცოდე რა მელის აქ. მზად ვიყავი ყოველგვარი განსაცდელი. სათვის, რასაც ბუნება გვიმზადებდა, რადგან სტუმრად კი არა, საცხოვრებლად მივდიოდი, მაგრამ ადამიანებზე, რომლებთანაც მომიწევდა ცხოვრება და მუშაობა, რატომღაც არ მიფიქრია. ადამიანები ყველგან ადამიანები არიან...

მე აქეთ ორი ღლე-ღამე მოვდიოდი მანქანით. მანქანას ძარაში წყალსაზიდი ეგდო. რას ვიფიქრებდი, რომ სწორედ ის გამიმწარებდა სიცოცხლეს.

მე ხომ მიმბმელი უნდა ვყოფილიყავი. ვფიქრობდი, ვიმუშავებ ერთ გაზაფხულს, ვისწავლი და მერე თვითონ გავხდები ტრაქტორისტი. ასე მითხრეს რაიონში. ამ ოცნებით გამოვეშურე ანარხაისაკენ. როცა აღვიღე მოვედი, გამოირკვა, საბმურის მიმბმელები უკვე არიან და რომ მე წყლის მზიდავად ვარ გამოგზავნილი. რა თქმა უნდა, იმ წუთში უნდა დავბრუნებულყავი სახლში. მითუმეტეს, რომ არასოდეს არ მქონია საქმე მარტულელსა და ხელნებთან. და საერთოდ, არსადაც არ მიმუშავნია, ხანდახან დედას თუ ვეხმარებოდი შაქრის ქარხანაში მოწყობილი შაბათობების დროს. მამა ფრონტზე დამელუბა. მე იგი არც მახსოვს. და აი გადავწყვიტე დამეწყო დამოუკიდებელი ცხოვრება... თუმცა, სჯობდა მაშინვე დავბრუნებულყავი უკან. შემრცხვა. იმდენი ხმაური იყო იმ კრებაზე! დედაც არ მიშვებდა, უნდოდა, რომ ექიმი გავმხდარიყავი. მაგრამ მე ავიჩემე, დავარწმუნე — დაგეხმარები-თქო. თვითონ მინდოდა, ერთი სული მქონდა, ვიდრე ჩამოვიდოდი. როგორ შემეხება ხალხისათვის, უცებ რომ დავბრუნებულიყავი? რა გზა იყო, დავჯექი წყალსაზიდაზე. თუმცა ჩემი უბედურება აქედან არ დაწყებულა.

ჯერ კიდევ გზაზე გაფაციცებით ვათვლიერებდი ყველაფერს. აი ისიც, ლეგენდარული ანარხაის მანქანა მიჰქროდა ძლივს გასარჩევ გზაზე, რომელიც იკარგებოდა ბორცვებიან, ამწვანებულ ტრამალზე, მსუბუქად რომ ჩამოსწოლოდა მოლურჯო ნისლი. მიწა ისევ გამოსცემდა გამდნარი თოვლის სურნელს. ნესტიან ჰაერში კი უცვვე იგრძნობოდა სუნთქვა ანარხაული აბზინდისა, რომლის ყლორტებიც გზას იკვლევდნენ მიწის პირისაკენ. ქარს, რომელიც სახეში გვცემდა, თან მიჰქონდა მოგუგუნე ხმაური გაშლილი სივრცისა და გაზაფხულის სიფაქიზე. ჩვენ ჰორიზონტს მივსდევდით, ის კი გაგვიბოდა ფერდობებს მიღმა და შემდეგ ისევ გადაგვიხსნიდა ხოლმე თავის ფართო გულს.

მეჩვენებოდა, თითქოს ვისმენდი გარდასულის ხმას. ირხეოდა და გუგუნებდა მიწა ცხენთა ათასეულების ფლოქვებქვეშ აკანკალებული. აბობოქრებული ოკეანის ტალღასავით, ველური ღრიალითა და შეძახილებით, მოჰქროდნენ შუბებით შეიარაღებული ამხედრებული მომთაბარეები. ჩემს თვალწინ გაიეღვებდნენ საშინელი ხოცვა-ყლეტის სურათები. ეღარუნებდა ფოლადი, ღრიალებდნენ ადამიანები, ერთმანეთს ერკინებოდნენ ყალყზე შედგარი ცხენები. მეც სადღაც ამ მშფოთვარე ბრძოლის შუაგულში ვიყავი... მაგრამ აი შეწყდა ბრძოლები, გაზაფხულის ანარხაი თეთრმა იურტებმა დაფარა. სადგომების თავზე დადგა დამწვარი წივის კვამლი. ცხვრის ფარები და ცხენის ჯოგები ძოვდნენ ბალახს, ზარების ეღარუნით მიიკვლევდა გზას აქლემების ქარავანი. ვინ იცის, საიდან მოდიოდა, ან საით ჰქონდა გზა.

ორთქლმავლის გაბმულმა კივილმა გაძომარკვია. იგი ვაგონებს ხვევდა კვამლში, ქარს რომ მთელ სიგრძეზე გაეჭიმა და მოგაგონებდა გაქენებულ ცხენს, რომელიც ფაფარაყრილი და კუდაპრეხილი შესჭიდებოდა სივრცეს. ასე მეჩვენებოდა შორიდან. მატარებელი კი სულ უფრო პატარავდებოდა და პატარავდებოდა, შემდეგ მუქ შავ წერტილად გადაიქცა და ბოლოს სულ მიეფარა თვალს.

ტრამალში ჩაკარგულ გადასასვლელთან რკინიგზა გადავსერეთ და გზა გავაგრძელეთ.

ჩამოსვლის პირველ დღესვე გაგეცი თავი. ჯერ კიდევ გზაში განცდილის შთაბეჭდილებით ვიყავი გარემოსილი. საველე სადგომის მახლობლად იდგა ქვის ქალი. რუხი, უხეშად გამოჯორკილი გრანიტის ლოდი საუკუნეების მანძილზე იდგა აქ, როგორც მზირი, და, მიწაში ღრმად ჩამჯდარს, სიერცისათვის მიეშტერებინა თავისი უსიცოცხლო მზერა. მისი ოდნავ მოელამო მარჯვენა თვალი წვიმისა და ქარისაგან გამოშრეტილი, უსიცოცხლო, თითქოსდა წამწამების სიმძიმისაგან ოდნავ მოხუჭული, შიშის გრძობას იწვევდა. დიდხანს ვაკვირდებოდი, შემდეგ მივედი სოროკინთან და ვკითხე:

— როგორ ფიქრობთ, ამხანაგო აგრონომო, ვინ დადგა აქ ეს ფიგურა?

სოროკინს საღდაც მიეჩქარებოდა.

— ალბათ ყალმუხებმა, — მითხრა მან, ცხენს მოახტა და წავიდა. რა იქნებოდა დავჯერებოდი ამას. არა! თითქოს ვიღაცა მეწეოდა ენაზე, მოვუბრუნდი ტრაქტორისტებსა და მიმბმელებს, რომელთა ხეირიანად გაცნობა ვერც კი მოვასწარი და ვუთხარი:

— არა, ეს არცთუ ისე ზუსტი პასუხია. ყალმუხები აქ მეჩვიდმეტე საუკუნეში მოვიდნენ. ეს საფლავის ქვა კი მეთორმეტე საუკუნის ძეგლია. იგი, ალბათ, მონღოლებმა დადგეს თავიანთი დიდი შემოსევის დროს დასავლეთისაკენ. მათთან ერთად ენისეიდან ტიან-შანის მხარეებში მოვედით ჩვენც, ყირგიზები. ჩვენამდე აქ ყივჩაღთა ტომები ბინადრობდნენ, მათზე წინ კი წითური და ღია ფერის თვალებიანი ადამიანები.

მე კიდევ უფრო ღრმად შევიჭრებოდი ისტორიაში, მაგრამ შემაწყვეტინა კომპინეზონში გამოწყობილმა კაცმა, რომელიც ტრაქტორთან იდგა.

— ეი, შენ, ჭაბუკო! — მესროლა მან გაბრაზებული მზერა. ძალიან ნასწავლი ჩანხარ. წადი, იურტიდან ტაოტიანი შპრიცი მოიტანე.

მე კი თურმე სოლიდოლიანი შპრიცი მოვიტანე.

— ეხ, აკადემიკოსო! — ზიზღით გამოსცრა მან, თან შემომხედა დაწითლებული, მსუსხავი თვალებით. ჩვენ, გაუნათ-

ლებლებს, ლექციებს გვიკითხავ და ჰაკ ცხენს აქლემისაგა
ვერ არჩევ.

აქედან წამოვიდა და გავხდი „აკადემიკოსი“.

აი ახლაც, მე უკვე ვუახლოვდები ჩემი წყალსაზიდიტ და
ის კი არ ცხრება. მსუბუქად ჩამოხტა კაბინიდან და ჩემსკენ
წამოვიდა. მორბის და ფეხები ხნულში ეფლობა.

— რა მატლივით მოხობავ! რამდენი უნდა გელოდოთ! და-
გახრჩობ, ძაღლის ლეკვო, ერთი ცხვირმოუხოცელი აკადემი-
კოსით ნაკლები იქნება!

უხმოდ ვუახლოვდები ტრაქტორს, ან რა ვთქვა? რით ვი-
მართლო თავი? ჩემი მიზეზით ტრაქტორები ცდებიან, ფაქტია.
კიდევ კარგი, რომ მიმბმელი კალიბა მაწევს ხმას:

— კარგი, დამშვიდდი, აბაკირ! ყვირილით საქმეს ვერ
უშველი. შეხედე კაცის ფერი არ ადევს. გაიტანჯა საცოდავი.—
იგი მართმევს ვედროს, რომელსაც ძლივს ვიმაგრებ აკანკაღე-
ბულ ხელებში და წყალს ასხამს რადიატორში. — ისედაც
გაწვალდა, ხედა, სულ სველია, გასაწურადაა მოქცეული...

— მერე მე რა! — იღრინება აბაკირი. — მკდარიყო სახლ-
ში და ეკითხა თავისი წიგნები.

— გეყოფა! — ემუდარება კალიბა. — რამდენი სიბოროტე
გაქვს. არ ვარგა ასე.

— ასეთებს რომ ყველაფერი შეუნდო და აპატიო, ჩაღის
ფასად უნდა იმუშაო. გეგმის შესრულებას მე მთხოვენ. შენ
კი არა. შენ გგონია, ვინმეს აინტერესებს, ეს განსწავლული
სულელი რომ მღუპავს!

რას გადაეკიდა ამ ჩემს სწავლას! რად მინდოდა სწავლა,
ანდა რა ჰირად მომეველინა ისტორიკოსი აღდიაროვი?

ვცდილობ, რაც შეიძლება სწრაფად გავშორდე აქაურობას.
მე ხომ მინდვრის მეორე ბოლოშიც მელიან. იქ ტრაქტორისტი
სადაბეკია — ხანში შესული, სერიოზული კაცი, ისიც ბრაზობს,
მაგრამ არ ყვირის.

ზურგს უკან მოტორი ათუხთუხდა. აბაკირის ტრაქტორი
იდგილიდან დაიძრა. თავისუფლად ამოვისუნთქე. მოვიბუხე
სველ სათბურში. რამ გააჩინა ასეთი მავნე და ბოროტი კაცი

ამ ქვეყნად? ჯერ ხომ სულ ახალგაზრდაა, ოცდაათს თუ იქნება გადაცილებული. მართალია ცოტა. მძიმე, დაკუნთული სახე აქვს, მოქნილი, მარწუხისებური ხელები, მაგრამ ისეთი კაცია, შეამჩნევ. ოღონდ თვალები აქვს ცუდი, ბოროტი. ცოტა რაპ და სისხლით აევსება, თუ ბიჭი ხარ, დაუდექი, მაშინ არაფერს დაგიღვეს.

ერთხელ ჩვენთან ასეთი ამბავი მოხდა. საღამოს წვიმა წამოვიდა, მთელი ღამე ცრიდა, აწვიმდა ქეჩას, თითქოს მონოტონურ, ნაღვლიან სიმღერას ჩურჩულდებო. დილითაც არ გადაიღო. იურტაში ვიჯექით უსაქმოდ. აგრონომი სოროკინი წავიდა — მას წვიმიან ამინდშიც ბევრი საქმე ჰქონდა. ის ხომ მეცხოველეობაზეც აგებდა პასუხს. გადაწყვიტა პირველად ანარხაის პირობებში ჩაეტარებინა ადრეული დოლი და წუთი მოსვენება არ ჰქონდა; დღეღამე ცხენზე იჯდა.

როცა წვიმამ ოდნავ გადაიღო, მიმბმელმა ესირკეჰმა, საღაბეკის უმცროსმა ძმამ, ჩემი ცხენი შეკაზმა და მწყემსებთან წავიდა. აღდემ და კალიბამ კი ვედროებს წამოაველეს ხელი და წყაროსაკენ გასწიეს. იურტაში სამნი დავრჩით — აბაკირი, საღაბეკი და მე.

პირქუშად ვდუმდით, ყველა თავის საქმით იყო გართული. აბაკირი წამოწოლილიყო და პაპიროსს ეწეოდა. საღაბეკი ცეცხლთან მიმჯდარიყო და ჩექმას აკერებდა. მე კუთხეში ჩემთვის ვკითხულობდი.

სინოტივესა და მოწყენილობას დაესადგურებინა იურტაში დასველებული ქეჩა ცხვრის ოდნავ საგრძნობ სუნს გამოსცემდა. ხანდახან ზემოდან მსხვილი, ჩაის წყალივით ყვითელი წვეთები ეცემოდა მიწას. გარეთ კი წვიმა ისევ ბუტბუტებდა და ჩიფჩიფებდა რაღაცას.

აბაკირმა მოწყენით დაამთქნარა, გააზმორა, მოიღუშა და არც გაუხედია ისე ისროლა პაპიროსის ნაძწვი, რომელიც ქეჩის კიდებზე დაეცა. უცებ აბოლდა შეტრუსული მატყლი. საღაბეკმა ნაძწვი აიღო და ნაცარში ჩაავდო.

— ცოტა ფრთხილად, — ჩაილაპარაკა მან და ძლივს გამოაძრო ტყავში გაჩხერილი მახათი. — გაგიჭირდა ფეხზე აღგომა?

— რა მოხდა? — გამომწვევად ასწია თავი აბაკირმა.

— ქეჩას წაეკიდა.

— დიდი საქმე, ეგეც სიმდიდრეა? — აგდებულად გაიცინა აბაკირმა. — აკერებ მაგ ძირგავარდნილ ჩექმას და დააკერე, შენ მეტი არაფერი გეკითხება!

— საქმე სიმდიდრეში არაა. შენ აქ მარტო არა ხარ და არც საკუთარ სახლში.

— ვიცი, რომ არა ვარ! ჩემთან სახლში შენ არც დაგელაპარაკებოდრი, ტყავის შარვლიანო საფრთხოებელავ! ალბათ, ღმერთმა დამსაჯა აქ ამ დაწყევლილ ანარხაიში რომ ვზივარ, სადაც მხოლოდ კატორღელები და შენი და შენი ცოლის მსგავსი სულელები უნდა იყვნენ.

სადაბეკმა მთელი ძალით გამოგლიჯა მახათი. სადგისი ხე¹ ლიდან გაუვარდა და სადღაც ზურგს უკან გაგორდა. იგი დიდხანს უყურებდა აბაკირს ზიზღიანდგარი თვალებით, შემდეგ მრისხანედ წამოიწია, ცალხელში ჩექმა ჩაებლუჯა, მეორეში კი სიმივით დაჭიმული გასაჩთლული ძაფი.

— დაეუშვათ მე სულელი ვარ, ჩემი ცოლიც სულელია, ჩემთან ერთად, რომ წამოვიდა აქ და ყველას რომ გვიმზადებსა საქმელს! — ამოთქვა როგორც იქნა სადაბეკმა, იგი მძიმედ ქშინავდა. — დანარჩენი ანარხაელებიც შენი აზრით კატორღელები არიან? ის მწყემსებიც ზამთარ-ზაფხულ რომ ცხვრის ფარებს დაქანკალებენ სუსხიან ტრამალში! ისინია კატორღელები? რა, შენ მორეკე აქ? ხმა ამოიღე, ძაღლისწვილო! — დაიყვირა სადაბეკმა და ადგილიდან წამოხტა, დაქვილილ ჩექმას ყელში წაავლო მარჯვენა ხელი.

აბაკირი ქანჩის გასაღებს ეცა, რომელიც იქვე გვერდით იდო, თავი მხრებში ჩარგო და დარტყმისათვის მოემზადა.

შემეშინდა. მართლაც რომ საშინელი სანახავი იყო ყველაფერი ეს. მათ შეეძლოთ ერთმანეთი დაეხოცათ.

— რას შევები, აბაკირ! — ვეცი მათ. — არ დაარტყა! სადაბეკ, არ გინდა, არ ღირს თავის გაყადრება! — ვევედრებოდრი მე და თან ფეხებში ვებლანდებოდრი.

სადაბეკმა გვერდზე მიმაგდო და ისინი იურტაში დატრიალდნენ, როგორც აფთრები ბრძოლის წინ, ერთმანეთზე თვალებმისტერებულნი. შემდეგ შეხტნენ და ქანჩის გასაღებმა ჰაერში

გაიქროლა ზედ სადაბეკის თავთან. მან უკანასკნელ წამში მოახერხა დარტყმა აეცდინა და ორივე ხელით ეცა გასაღებს. მაგრამ აბაკირი უფრო ღონიერი იყო, მოწინააღმდეგე ქვეშ მოიქცია და ისინი იატაკზე დაგორდნენ ხრიალითა და გინებით. მე მათ ვეცი, მთელი ტანით გადავეფარე გასაღებს, როგორც იყო, ხელთ ვიგდე და გარეთ გამოვვარდი.

— ალღეი! კალიპა! — ავღრიალდი მე. — ჩქარა, ჩხუბობენ, ერთმანეთს დასიაცავენ.

ქალებმა ვედროებს თავი მიანებეს და ჩემსკენ გამოიქცნენ. როცა ჩვენ იურტაში შევევარდით, ისინი ისევ იატაკზე გორავდნენ. ძლივს დავაშორეთ ერთმანეთს დასისხლიანებულნი, ნაცემ-ნაგვემნი. ალღეიმ ქმარი გასასვლელისაკენ წაიყვანა. მაგრამ აბაკირი კალიპას დაუსხლტა:

— დამაცადე, შე კოქლო ძაღლო! კიდევე შემთხოვ პატიებას, მე გაგავებინებ ვინ არის აბაკირი!

ტანმორჩილი გამხდარი ალღეი მივიდა მასთან და უთხრა: ო

— აბა გაბედე და ხელი ახლე! თვალებს ამოგჩიჩქნის! ისე რომ თავი ველარ იცნო!

სადაბეკმა დინჯად მოჰკიდა ცოლს ხელი:

— არ გინდა, ალღეი. ეგ მაგადაც არ ღირს...

ამასობაში გარეთ გამოვედი, მოვნახე ჩემს მიერ სადღაც მიგდებული გასაღები და იურტისგან მოშორებით მიწაში ჩაფეხილი. თვითონ კი ქვის ქალის მახლობლად ჩამოვჯექი და აეტირდი. ქვითინი მახრჩობდა, ვცახცახებდი. ვერაფერს მხედავდა, ვერ გამეგო რა მემართებოდა. მხოლოდ ქვის ქალი, თითქოს ყურს მიგდებსო, ბოროტად მითვალთვალებდა თავისი ჩაშავებული, სინათლეგამოშრეტილი თვალით. გადაშლილიყო სველი, დანისლული ტრამალი, წყნარი და დაღლილი. არაფერი არღვევდა მის მარადიულ ღრმა მყუდროებას, მხოლოდ მე ვსლუკუნებდი და ვიწმენდდი ცრემლებს. დიდხანს ვიჯექი აქ, დიდხანს, ვიდრე არ ჩამობნელდა.

აი ასე ვცხოვრობ ამ აბზინდებით აფერადებულ ტრამალში. ვცდილობ ყოველნაირად და არაფერი გამომდის. ახლაც მომხვდა აბაკირისაგან. როგორ მოვიქცე, ვერ გამიგია. მაგრამ

სულმდაბლობაც არ შეიძლება. უნდა იდგე იქ, სადაც დაგაყენეს, ვიდრე არ წაიქცევი.

— აბა, წამოდექი! ცოცხლად ჩვენ დარდის დრო არ გვაქვს: საქმე არ ითმენს...

II

განთიადს ავასწარი, ჩვეულებრივზე ადრე ავდექი. ჭერ კიდევ წუხელის გადაწყვიტე; რაც არ უნდა მომივიდეს, მოვიქცევი ისე, რომ ვერავინ გამიბედოს არათუ ლანძღვა, ჟებრალო საყვედურიც კი, ბოლოს და ბოლოს ხომ უნდა დავამტკიცო, რომ სხვაზე ნაკლები არა ვარ.

ჭერ საწვავი მოვიტანე და თვითონვე ჩავასხი ბაკში. შემდეგ ჩემი ორთვალით წყაროსაკენ წავებრივინდი, რომ მუშაობის დაწყებამდის რადიატორები წყლით ამევსო. მერე საუზმე უნდა მომესწრო და ისევ წყალზე წავსულიყავი. წუთი არ უნდა დამეკარგა. ჭერ ყველაფერი ისე მიდიოდა, როგორც ვივარაუდე.

ამ დროისათვის ჰორიზონტზე მზეც ამოცურდა. იგი დიდხანს არ ამოდიოდა, იგვიანებდა, თითქოს ეშინოდა ანარხაის ტრამალისათვის მოევლო თვალი. შემდეგ მორცხვად გადახედა მიდამოს. რა შეიძლება იყოს ცისკრის ქამს ტრამალზე უფრო ლამაზი. გეგონება გადმოიღვარაო ლაევარდისფერი ზღვა და გაშეშდაო თავისი დიდი ცისფერი ტალღებით, რომლებიც სადღაც შორს მუქმწვანე ფერსა და სიყვითლეში გადადიან.

ო, ანარხაი, დიდებულო ტრამალო! რატომ დადუმებულხარ, რაზედ ფიქრობ? რას მალავ შენს წიაღში და რა გელის მომავალში?

სულაც არაა უბედურება, რომ მხოლოდ წყლისმზიდავი ვარ. მე კიდევ ვიბატონებ ამ მიწაზე, მანქანებზე. ჩვენი ორი ტრაქტორი და ის რასაც ვაკეთებთ, საქმის მხოლოდ დასაწყისია. სადღაც ამოვიკითხე, თითქოს გეოლოგებმა ანარხაიში აღმოაჩინეს დიდი წყალქვეშა მდინარეები. შეიძლება ეს ჭერ მხოლოდ ჰიპოთეზაა? მაგრამ როგორც არ უნდა იყოს, მე მჯერა რომ ადამიანები დაარწყულებენ ანარხაის გულდაღარულ მიწას, აქ ქარი ქოჩორს შეურხევს თვალუწვდენელ ბალებში

გადაქიმულ ხეხილს, წყალი არაკრავებდა ცივ არხებში და ნიავე გადაზომავს ოქროსფრად გაშლილ პურის ყანებს. აშენდება ქალაქები, სოფლები და ჩვენი მემკვიდრეები ამ ტრამალს დალოცვილ მხარედ მონათლავენ. მრავალი, მრავალი წლის შემდეგ, როდესაც აქ ჩემნაირი ვინმე მოვა, მას არ მოუწევს წყალსაზიდი წყლის თრევა და ვიღაც საკუთარ თავზე შეყვარებული რეგენისაგან ლანძღვა-გინების მოსმენა.

და მაინც არ მშურს მისი, იმიტომ რომ პირველად მე მოვედი აქ.

გავაჩერე წყალსაზიდი და დილის ტრამალს გადავხედე. მე იმ წუთას ყველაზე ბედნიერი, ყველაზე ძლიერი და, წარმოდგინეთ, ყველაზე ლამაზი ადამიანიც კი ვიყავი ქვეყნად.

მზე, როგორც იქნა, მთლიანად ამოგორდა ჰორიზონტიდან, დიდი და მომღიმარი.

დღე კარგად დაიწყო. ყოველ შემთხვევაში, მტორი არ ქრებოდა, წყლის მიზიდვას ვასწრებდი. საღამომდე ჯერ კიდევ ბევრი დრო იყო.

როცა კიდევ მოვბრუნდი წყაროსთან, პატარა ფარა დამხვდა ბატკნებით. ფარა ვიღაც ქალიშვილს მოერეკა. ნაკადულიდან ასმევდა წყალს ცხვარს, ოღონდ წყაროსთან არ უშვებდა. საიდან გაჩნდა ნეტავი აქ? ალბათ, იმ ორთავიანი ბორცვის გადაღმა მხრიდან, ჩვენგან მოშორებით რომ მოჩანდა. იქ ხომ მეცხვარეებს ედოთ ბინა. გოგონას სახე მეცნო. რომელიღაც ურნალში ვნახე ერთხელ ჩინელი ქალიშვილის სურათი, მასაც ისევე ჰქონდა თმები შუბლზე ჩამოყრილი, როგორც ჩემს ახალ ნაცნობს. ალბათ, ამიტომაც მომეჩვენა, რომ სადღაც მენახა.

მდუმარედ შევცქეროდით ერთმანეთს. ჩემი გამოჩენა მისთვის ისეთივე მოულოდნელი იყო, როგორც ჩემთვის მისი აქ ყოფნა. მაგრამ, ვითომც აქ არაფერიყო, ისე ჩამოვხტი ორთვალისგან და საქმიანად დავიწყე წყლის ამოღება და კასრში ჩასხმა.

ამასობაში ცხვარმა წყურვილი მოიკლა და გოგონამ ფარა გარეკა. გვერდით რომ ჩაიარა, მკითხა:

— რა ჰქვია ამ წყაროს?

დაფიქრდი, ვუყურებდი წყალსაცავს, სადაც მუქად ბრწყინავდა ჩემს მიერ ამღვრეული წყალი. მართლაც, ხომ რაღაც უნდა რქმეოდა ამ ერთადერთ წყაროს. ვიდრე ვფიქრობდი, წყალი დაიწმინდა, ზედაპირი გაკრიალდა, ფსკერი კი ჩამუქდა.

— აქლემის თვალი — ვთქვი მე და ქალიშვილისავენ მოვბრუნდი.

— აქლემის თვლის წყარო? — მან ჩამოშლილი თმები შეარხია და გაიღიმა.

— ლამაზი სახელია! იგი მართლაც მოგაგონებს აქლემის თვალს. გეგონება ჩაფიქრებულიაო...

გამოველაპარაკეთ ერთმანეთს. იგი ჩვენი მხარიდან გამოდგა. ჩემს მასწავლებელ აღდიაროვსაც კი იცნობდა. ო, რა კარგი იყო საყვარელი მასწავლებლის სახელის გაგონება, ამ ტრამალში, უცნობი ქალიშვილისაგან, რომელიც ალბათ მისი წყალობით მოხვდა აქ — ანარხაიში. მას შარშან დაემთავრებინა საშუალო სკოლა და აქ მწყემსის თანაშემწედ უნდა ემუშავნა დოლის დროს.

— ჩვენს ფარეხთან ქის წყალი მლაშეა, — ამბობდა იგი, — მე მითხრეს რომ აქ სადღაც წყარო იყო, თვითონაც დამაინტერესა და გადავწყვიტე ბატკნებსაც დავარწყულებ-მეთქი, დაე მათაც იცოდნენ ნამდვილი წყლის გემო. გამოვზრდა ბატკნებს, ჩავაბარებ და შემოდგომისათვის უნივერსიტეტში შევალ...

— მეც ვფიქრობ სწავლის გაგრძელებას, — ვუთხარი მე, — ოღონდ მექანიზატორობა მინდა. მე ხომ ტრაქტორზე სამუშაოდ გამომგზავნეს, ეს კი ისე... — მივუთითე კასრზე, — დროებით ვეხმარები. სხვა წყლისმზიდავი უნდა გამოგზავნონ.

ეს კი დავახეთქე! თვითონაც ვერ შეეპაჩინე, როგორ დამცდა ენის წვერიდან. სირცხვილისაგან დამცხა, შემდეგ შემცივდა.

— ეი-ი-ი, აკადემიკოსო, ცხვირ-პირს დაგამტვრევი! — მოაღწია შორიდან აბაკირის საძულველმა ხმამ.

— დამაგვიანდა, ლაპარაკს შევრჩი! — ავწრიალდი მე.

— რა მოხდა? — ვერ გაერკვა გოგონა.

— არაფერი, — წავიბურტყუნე გაწითლებულმა, — წყლის მიტანა დავაგვიანე.

გოგონამ ფარა გარეკა, თავისი გზით წავიდა. აბაკირი კი სადღაც მინდვრის ბოლოში იდგა და მთელი ხმით ღრიალებდა, მუშტებს იქნევდა.

— მოვდივარ! დაწყნარდი! არ შეიძლება ყვირილი უცხოების თანდასწრებით! — წავიჩურჩულე განწირულივით და ცხენი გავაქროლე.

კასრში წყალი ბუყბუყებდა, იღვრებოდა და ხანდახან თავიდან ფეხებამდე მასველებდა. თუნდაც სულ დაიღვაროს, წვეთიც ნუ დარჩება! აღარ შემიძლია მოვითმინო ასე აბუჩად აგდება.

აბაკირი კაბინიდან ჩამოხტა და ისევ მომვარდა. მე ცხენი შევაჩერე:

— თუ ასე იყვირებ, სამუშაოს მიატოვებ და წავალ!

იგი მოულოდნელობისაგან დაიბნა, შემდეგ დაუსტვინა და დედა შემომიკურთხა.

— უშენოდაც, ცხვირმოუხოცელი აკადემიკოსის გარეშეც იყო აქ ანარხაი და არც ახლა მოუვა არაფერი ამ დასაწყევს! წადი, შეაყოლე სახლისაკენ! ამანაც ყალყზე შედგომა მომინდომა, გულამშიერმა სტუდენტმა.

ორთვალიდან ჩამოვხტი, მათრაზი გადავაგდე და წავედი.

— შეჩერდი, ქემელ! არ შეიძლება! შეჩერდი! — მომადახა კალიპამ.

ამან უფრო გამაღიზიანა და ნაბიჯს აფუჩქარე.

ნუ აჩერებ, წაეთრეს! — მომესმა აბაკირის ხმა, — უში-სოდაც იოლად გავალთ.

კაცი კი არა, მხეცი ხარ, რა ჩაიღინე! — არცხვენდა კალიპა. კიდევ დიდხანს მესმოდა როგორ ჩხუბობდნენ ისინი.

ნაბიჯს არ ვუნელებდი, მივდიოდი შეუჩერებლივ, სულერთი იყო საით, ოღონდ გაველოდი იქაურობას, ირგვლივ კაცის ქაჭანება არ იყო, გზა კი ყოველმხრივ ვრცელი და თვალშეუდგამი იყო. გავიარე წყარო, საველე ბანაკი, ბორცვი, სადაც ქვის ქალი იდგა. ბოროტად მომღიმარე დედაბერი მატილებდა თავის გამოშრეტილი მძიმე მზერით, საუკუნეთა მანძილზე მდუმარედ მდგარი.

მიედიოდი და არაფერზე არ ვფიქრობდი. მხოლოდ ერთი სურვილი მამოძრავებდა, გავცლოდი აქაურობას, რაც შეიძლება სწრაფად, რაც შეიძლება შორს. დაე, ეს დაწყვეტილი ანარსაი დატკბეს ჩემი კეფის ცქერით.

უგულოდ, უგრძნობლად გადაშლილიყო ტრამალი ჩემს წინ; ბორცვები, გორაკები, ხევები გულისამრევად ჰგავდნენ ერთმანეთს. ვინ შეჰქმნა ეს მომაკვდინებელი ერთფეროვნება? რატომ უნდა ვზომავდე მე, შეუურაცხყოფილი და დამცილებული, მწარე აბზინდით დაფარულ, გაუთავებელ სიერცეს? რა უნდა ბოლოსდაბოლოს აქ ადამიანს? ცოტაა ადგილ დედამიწაზე? ჩემი დილანდელი ოცნება სისულელემდე უაზროდ მეჩვენებოდა.

„აი ესეც შენი აბზინდებით აფერადებული ტრამალი, აი შენი ანარსაი!“ — დაცინოდი თავს და მთელი არსებით ვგრძნობდი საკუთარ უძლურებასა და მიუსაფრობას.

დამცქეროდა მაღალი ცა, გადაშლილიყო უკიდევანო სიერცე და ჩემი თავი მეჩვენებოდა პატარა უმწეო კაცუნად, დალიანდაგებულ სათბურსა და ქირზის ჩექმებში, თავზე ჩამოფხატული მრავალქირნახული, გახუნებული კეპით.

ასე მივამიჯებდი. არ ვეძებდი არც ზილიკს, არც გზას. უბრალოდ მიედიოდი. „სადღაც რკინიგზაზე გავალ, აბა რა იქნება, — ვფიქრობდი, — გავყვები შპალებს და შემდეგ სადმე შევახტები საბარგო მატარებელს. წავალ ადამიანებთან“...

როცა ჩემს უკან ცხენის ფლოქვების ხმა და ფრუტუნის მოისმა, არც მომიხედია. სოროკინი იქნება სხვა არავინ. დამიწყებს შერცხვენას, თხოვნას; ეშმაკსაც წაუღია, არ დავბრუნდები, არც გავიფიქრებ.

— მომიცადე! — წყნარად დამიძახა მან.

გავჩერდი. სოროკინი მომიახლოვდა, ცხენი ოფლში ცურავდა. ჩუმად შემომხედა ცისფერი, დაკვირვებული თვალებით, გამოხუნებულ წარბებს ქვევიდან; საველე ჩანთაში ჩაყო ხელი და ამოიღო წითელი ფურცელი — ჩემი კომკავშირული საგზური, რომელიც ასე ამაყად გადავეცი მას ჩამოსვლის დღეს.

— გამომართვი, ამის დატოვება არ შეიძლება, — მშვიდად გამომიწოდა საგზური.

მის გამოხედვაში არ იყო არც ყვედრება და არც ზიზღი. იგი არც მკიცხავდა და არც ვეცოდებოდი. ეს იყო საქმეებით დამძიმებული, სერიოზული კაცის შემოხედვა, რომელიც დიდხანია შეეჩვია ყოველგვარ მოულოდნელობას. მან ხელისგულით მოიწმინდა მოღლილი, წითური წვერით დაფარული სახე.

— თუ რკინიგზაზე გინდა — მარჯვნივ წადი, ხევს გაუყევი, — მიჩვენა და ნელა მოაბრუნა ცხენი, დინჯად გაუყვა გზას.

თავგზააბნეული მივშტერებოდი. რატომ არ გამლანძლა, რატომ თხოვნა არ დამიწყო? რატომ არის ასე დაღლილი? ცოლ-შვილი, ოჯახი სადღაც შორს მიუტოვებია და თვითონ კი წლობით დატრიალებს ტრამალს. რა ადამიანია, რა აჩერებს ამ უდაბნოში?

თვითონ არ ვიცი, როგორ გამოვყევი უკან.

სალამოს ყველამ იურტაში შევიყარეთ თავი. ვლუმდით. სიჩუმე იდგა, მხოლოდ შეშა ტკაცუნებდა ცეცხლში. ყველაფრის მიზეზი მე ვიყავი. ლაპარაკი ჯერ არ დაწყებულა, მაგრამ სოროკინის დაქიმული სახის მიხედვით თუ ვიმსჯელებდით, იგი რალაცის თქმას აპირებდა.

— როგორ მოვიქცეთ? — წარმოთქვა მან ბოლოს ისე, რომ არავეისთვის მიუმართავს.

— რა, ანარხაის წარღვნა ხომ არ ემუქრება? — ღვარძლიანად გამოეპასუხა აბაკირი.

ამ სიტყვებზე სადაბეგი უჩუმრად ადგა და იურტიდან გავიდა. იმ ჩხუბის შემდეგ იგი აბაკირს არ ელაპარაკებოდა და ეტყობა არც ახლა უნდოდა ლაპარაკში ჩარევა. სადაბეგის ძმა, ესირკეპიც აპირებდა ადგომას, მაგრამ გადაიფიქრა და დარჩა.

არც ის და აბაკირი იყვნენ ერთმანეთთან კარგ განწყობილებაში, ერთხელ თხოვნით რომ თავი მოვაბეზრე, ესირკეპმა გუთანზე დამტოვა სადაბეგის ტრაქტორთან, თვითონ კი ჩემს წყალსაზიღზე დაჯდა. რა თქმა უნდა, წყლის მოტანა შეაგვიანდა და აბაკირის რისხვა დაატყდა, მაგრამ ესირკეპმა თავი არ

დააჩაგვრინა, მას შეეძლო სამაგიერო ეზლო კაცისთვის, ის ხომ ჩემზე სამი წლით უფროსი იყო.

აბაჯირს არავინ უპასუხა.

— რაა საფიქრელი, — დაუმატა მან. — ვინც სამუშაო ჩაშალა, პასუხიც იმან აგოს.

— არავის აინტერესებს ვინ არის დამნაშავე და ვინ არა! — თქვა სოროკინმა, ისე რომ მისთვის არც შეუხედავს. — აქ ახალგაზრდა ადამიანის ბედი წყდება, როგორ უნდა მოიქცეს იგი ახლა?

— ბედი და რა ბედი! — დამგესლა აბაჯირმა. — ასეთი აკადემიკოსების ბედი დიდხანია გადაწყვეტილია, უმაქნისი, არაფრის გამკეთებელი ხალხია! — დაუდევრად ჩაიქნია ხელი. — თვითონ განსაჯე, სოროკინ, სანამ ჩვენ ჯათით პური მოგვყავდა, ეგენი სწავლობდნენ, ზოგი ათ წელიწადს, ზოგი მეტსაც. ჩვენ ვაჭმევდით და ვაცმევდით, მერედა რა გამოვიდა, ისწავლეა რამე? მანქანა არ იცის, ცხენს მარტულელს ვერ დაადგამს, მოსართავს ვერ მოუქერს... რატომ უნდა ვაგო პასუხი მაგის მაგიერ! რა ჯანდაბად მინდა მაგის განსწავლულობა, გამომივიდა ქვის კერპების მცოდნე. საქმის თავი კი არა აქვს. რაკი ასეა, წავიდეს, სხეებს ნუ უშლის ხელს! შენ კი, სოროკინ, მე შემეშვი, ვირივით ვმუშაობ, შემცვლელის გარეშე, არც სხვას მოვასვენებ. თუ არ გკირდებით — ხვალიდან ჩემი ფეხი არ იქნება აქ. მაგრამ რასაც ვაპბობდი, ყოველთვის გავიმეორებ: სიამოვნებით მოვუვლიდი ყველა აკადემიკოსს...

— გეყოფა! — მკაცრად შეაწყვეტინა აბაჯირს სოროკინმა და ისევ არ შეუხედავს მისთვის. — უშენოდაც ვიცით ყველაფერი. თქვი, ქემელ, შენ რას ფიქრობ?

უცებ არ მიპასუხნია. როცა აბაჯირს ვუსმენდი, მომეჩვენა, რომ მის სიტყვებში საღდაც სიმართლის ნიშან-წყალი იყო. მაგრამ როგორ ლაპარაკობდა იგი, ბოროტად, მტრულად! რატომ? განა ასეთი უსაქმური და გამოთაყვანებული ვარ, რომ ვერასოდეს ვერ მივალწევ იმას, რასაც მან მიაღწია? ნუთუ განათლება შემიშლის ხელს? ვერაფერი გამეგო. მაინც შევეცადე რაც შეიძლება მშვიდად მეპასუხა სოროკინისათვის.

— მე აქ მოვედი, რომ საბმურის მიმბმელად შემუშავნა.

ეს ჩემთვის მნიშვნელოვანია. მარტულელსა და მოსართავეებში მე უკვე ვერკვევი, ეს ყველამ იცის და აბაკირმაც მათ შორის. შეიძლებოდა ასე მუშაობაც. მაგრამ არ მინდა, წყლისმზიდავად აღარ ვიმუშავებ. პრინციპულად არ მინდა.

— სხვა სამუშაო ჩვენ არ გვაქვს, — თქვა სოროკინმა

— მაშასადამე. უნდა წავიდე! — დავასკვენი მე.

კალიპამ შემომხედა და ნაღვლიანად ამოიოხრა:

— ქემელ, სიამოვნებით დაგიტომობდი ჩემს ადგილს, გადავჯდებოდი წყლისსაზიღზე. მაგრამ შენ თვითონ არ დათანხმდები...

ეს მოულოდნელი იყო. თავისი სიკეთისა, თუ იმის გამო, რომ მას მუდამ რცხვენოდა აბაკირის მაგიერ, როდესაც იგი მლანძღავდა, კალიპა ყოველთვის ცდილობდა შეემსუბუქებინა ჩემი ხვედრი, შეერბილებინა აბაკირის უხეშობა. იქნებ ამიტომაც თქვა ასე. მე კი დაუფიქრებლად წამოვიძახე:

— რატომაც არ დავთანხმდები!

იურტაში სამარისებური სიჩუბე ჩამოვარდა. მხოლოდ შეშა ატკაცუნდა და აშიშინდა. ყველა გაკვირვებით მომჩერებოდა. შეიძლება ელოდნენ, რომ გამოვერკვევი, უარს ვიტყვი? გამოდიოდა, რომ თვითონ ვუვარდებოდი კლანჭებში კაცს, რომელსაც ვძულდი და რომელიც ჩემთვის კარგს არ გაიმეტებდა. მაგრამ მე ვდუმდი. რადგან ვთქვი — გათავდა. სოროკინმა ერთხელ კიდევ გამომცდელად შემომხედა.

— გადაწყვეტილია? — მოკლედ მკითხა მან.

— ნამდვილად.

— ჩემთვის სულერთია! — ცეცხლში გადააპურჭყა აბაკირმა, — მაგრამ გაფრთხილებ, ცოტა რამ და მოგხვდება გვერდებში! მისი თვალები ჩამობნელებულ იურტაში ცივად, დამცინავად და გამომწვევად აელვარდნენ.

— რა ცოტა რამ? წინასწარ რატომ ემუქრები! — ველარ მოითმინა აქამდე გაჩუმებულმა ესირკეპმა. — დიახაც რომ მოახერხებს, დიდი ფილოსოფიაა თუ? მას ჩემს გუთანზე უმუშავნია.

— შენ არავინ გეკითხება. სხვის საქმეში ნუ ყოფ ცხვირს. თვითონ შევატყობ. ტრაქტორზე და საქმეზე პასუხს მე ვაგებ.

იმ ღამეს თითქმის არ მეძინა. როგორ შევეწყობი აბაკირს? აქამდე ხომ მასთან ჟამიდან ჟამად მიწევდა შეხვედრა, ხვალ-დან კი გამუდმებით ერთად უნდა ვიყოთ. მიმბმელის მოვალეობისა მე არ მეშინოდა, თუმცა ამტანობა და მოთმინება სჭირდებოდა. რა თქმა უნდა, შეჩვევა იყო საჭირო, უნდა შეგესწავლა მინდორი, რომ დროულად ამოგეწია და ჩაგეშვა სახნისი, წუთით არ დაგებრკოლებინა ტრაქტორის მოძრაობა. გარდა ამისა, მე ყველაფერში უნდა დავხმარებოდი ტრაქტორისტს. გაბედე და მიაწოდე აბაკირს შეცდომით სხვა გასაღები, ან სხვა ქანჩი და ქანჭიკი, განა ცოტა საქმეა მუშაობისას?

არ ეძინა თურმე აღღეისაც. იგი სიბნელეში მოვიდა ჩემთან, გვერდით მომიჯდა და თავზე ხელი გადამისვა.

— კარგად გეფიქრა, ქემელ. არ იქნება თქვენი ერთად მუშაობა. შენ უწყინარი ბიჭი ხარ. შეგქამს, ვერაფრით ვერ მოიგებ მის ვულს...

— არც ვფიქრობ მისი გულის მოგებას, ხოლო შეკმისა რა მოგახსენოთ, ჩემთვის ეგ ახალი ამბავი არაა.

— დაუკვირდი, შენ იცი შენი საქმისა, — წყნარად ჩაილაპარაკა მან, ამოიოხრა და თავისი ადგილისაკენ წავიდა.

III

ჩემი და აბაკირის ორთაბრძოლა პირველი დღიდანვე დაიწყო.

— თუ ჩაგეძინა, გადმოვარდები და სახნისებს ქვეშ მოხვდები, მე პასუხს არ ვაგებ! — მესროლა მან ერთადერთი ფრაზა ხვნის დაწყების წინ.

რა თქმა უნდა, ძილისთვის არ მეცალა. მთლად დაძაბული ვიყავი, მინდოდა ზუსტად და უნაკლოდ მემუშავა. თუ იმაზე ვიფიქრებდი, რომ სახნისებს ქვეშ მოხვდები, მაშინ ამ თავითვე უარი უნდა მეთქვა ყველაფერზე.

ღიახ, ჩემი ფეხების ქვევით, კრონშტიინებზე ფოლადის სახნისები იყო დამაგრებული. ისინი გვერდიგვერდ, ოდნავ დამრეცად, ერთიმეორის მიყოლებით გულს უხსნიდნენ და აბრუნებდნენ ყამირის აქამდე ხელუხლებელ ბელტებს. ტრაქ-

ტორი შეუჩერებლივ მოძრაობდა, გუგუნებდა, ახრჭიალებდა მუხლუხებს და მიწაში ტყეპნიდა გზად მოხვედრილ აბზინდებს.

აბაკირს ერთხელაც არ მოუხედავს უკან, არ დაინტერესებულა რას ვაკეთებდი. ვხედავდი მხოლოდ მის ჭიუტ, ჩამჭლარ კისერს და ამითაც კი ვხვდებოდი, რომ აბაკირი მანამდე გამაწამებდა, სანამ ხელს არ ავიღებდი საქმეზე, ანდა თვითონ არ დარწმუნდებოდა, რომ საქმის კეთების ძალა შემწვევს. და იქნებ იმიტომაც მიაქანებდა შეუსვენებლივ ტრაქტორს, რომ დავექანცე და იძულებული გავეხადე უარი მეთქვა. ვის ვის და მას კარგად უნდა ცოდნოდა, თუ რა ძნელია, როდესაც ზიხარ ფოლადის საჭდომზე, რომელსაც არავითარი ამორტიზაცია არ გააჩნია, სახეში კი გირტყამს მტვერი და ტრაქტორის მექანიზმიდან გამოყოფილი მხრჩოლავი გაზი. მაგრამ მე თავის დანებებას არ ვფიქრობდი. უკიდურესობამდე დაძაბული ნერვები, ხედვა, სმენა, გუთნის საკეს ჩაჭიდებული ხელები — აი რას წარმოვადგენდი მაშინ მე. მთელი ამ ხნის განმავლობაში სიტყვა არ დამცდენია, ხმა არ ამომიღია მაშინაც, როცა მას განსაკუთრებული გაბოროტებით მიჰყავდა ტრაქტორი ქვიან ნიადაგზე, გუთანს კვალიდან ვარდებოდა, სახნისები ქვებზე ღრჭიალებდა, ნაპერწკლებს ჰკვესავდა, 'მე კი ძლივს ვიმაგრებდი თავს. საღამოს აბაკირმა ტრაქტორი გააჩერა, ჩემს სიცოცხლეში არასოდეს დავდლილვარ ასე. ცხვირ-პირი, ყურები, თვალები — მტვრითა და ქვიშით მქონდა ამოვსებული. მინდოდა მიწაზე დავგდებულიყავ და დამეძინა, მაგრამ ადგილიდანაც არ დავძრულვარ, აბაკირის ბრძანებას ვუცდიდი.

— ამოსწი სახნისები, — დამიყვირა მან და კაბინიდან გადმომხედა, შემდეგ ტრაქტორი ხნულიდან გადმოიყვანა, მოტორი გამორთო და გუთანთან მივიდა. სახნისებთან დაიხარა, ხელით გასინჯა ისინი.

— დაჩლუნგებულა, გამოსაცვლელია. დილისთვის მზად იყოს! — მითხრა მან.

— გასაგებია, — ვუპასუხე მე, — ოღონდ სათადარიგო დანები დამიტოვე და ტრაქტორი გუთანს მოაშორე.

მან შეასრულა ჩემი თხოვნა და უჩუმრად წავიდა საველე ბანაკისაკენ. თვალი გავაყოლე და უცებ ვიგრძენი, რომ მე

არა მარტო არ ვბრაზობ, არამედ მშურს კიდეც მისი. მიდის თავისთვის, მხრების ქნევით, თითქოს არც დაღლილა. მე მართალია სიქა გამაძალა, მაგრამ თვითონაც ღომ არ დაუსვენია არც ერთი წუთით, არამზადას!

ამოვიოხრე და ძეძვის შეგროვება დავიწყე, კონებად ვალაგებდი გუთნის მახლობლად. მინდოდა კოცონი გამეჩაღებინა, რომ ღამითვე მომესწრო დანების გამოცვლა, ფიჩხი შევაგროვე და სავახშმოდ წავედი.

ძვირფასო, კეთილო აღდეი! როგორი სევდითა და მზრუნველობით მიყურებდი, რა სიამოვნებით და სწრაფად ვქამდი შენს მიერ ჩემთვის გადანახულ ბეშბარმაქს. მე ხომ დაჯდომის დროც არ მქონდა. მე ვითხოვე ფარანი, რომელიც მულამ კარავში გვქონდა, ყოველი შემთხვევისათვის.

— რად გიხდა? — მკითხა მან და მომაწოდა.

— მჭირდება, სახნისები უნდა გამოვეცვალო.

— სად გაგონილა ასეთი რამ, უფლებას არ მოგცემ, მასხარად აიგლო ქემელი! — აუყვირდა იგი აბაკირს.

— რა მენაღვლება, ნუ მომცემ, — შეუღრინა აბაკირმა და დასაძინებლად მოეწყო.

— ნუ ერევი! — დაუძახა ცოლს სადაბეკმა, — ქემელმა უკეთ იცის თავისი საქმე.

— არაფერია, ჩვენ მოგეხმარებით, ქემელ! წამოდი, ესირკეპი — კალიპა წამოდგა და წამოსასვლელად მოემზადა.

— არაა საჭირო, — ვთქვი მე. — ნუ შეწუხდებით. თვითონაც გავართმევ თავს. ამ სიტყვებით გამოვედი იურტიდან, გზას ფარნით ვინათებდი.

ღამე იდგა, მუნჯი და უნაპირო. წამით გადაეუხევიე წყაროსაკენ, მწყუროდა. ძლივს მოწანწყარე წყარო, სიმშვიდესა და სიგრილეს ასადგურებდა ირგვლივ. იგი მკრთალად მოჩანდა უძირო სიბნელეში. მართლაც რომ აქლემის თვალს ჰგავდა. მომაგონდა მწყემსი გოგონა. მაშინ ვერ მოვახერხე მისთვის სახელი მეკითხა. ნეტავ სად იყო იგი ახლა, თავისი ჩამოშლილი თამბიით?

გუთანთან მივედი და საქმეს შეეუღდექი. რამდენადაც მოვახერხე სახნისები მალლა ავწიე, ცეცხლი გავაჩაღე. ხანდახან

ფიჩხის შემატება მიხდებოდა. მხოლოდ. ფარანიც, რა თქმა უნდა, გამომადგა. ვხსნილი ქანჩებს, იმ წუთშივე ვამაგრებდი მათ ქანჭიკებზე და ვაწყობდი კეპში, რომ არ დამფანტოდა. მთელი დამე გუთანს ვუტრიალებდი. ქანჩების მოჭერა ძნელი და მოუხერხებელი საქმე გამოდგა. მიჭირდა ძნელად მისაწვდომ ღარებში მათი დატრიალება. კოკონი ხანდახან ქრებოდა და იძულებული ვხდებოდი გუთნის ქვეშიდან გამოვმძვრალიყავი, ფიჩხი შემემატებინა და ისევ გამეჩაღებინა ცეცხლი. არ ვიცი რამდენი ღრო გავიდა, მაგრამ არ დავმშვიდებულვარ, სანამ დანები არ გამოვცვალე. შემდეგ თითქოს ბურანში, ძლივს მივალწვი ტრაქტორამდე და კაბინაში გავიშლართე. ძილში მტესდა და მეწვოდა გადალღეტილი ხელები.

დილით ადრე კალიპამ გამაღვიძა. წყალი მოეტანა.

— რადიატორი უკვე ავავსე, მოდი პირს დაგაბანინებ, ქემელ, წყალს დავისხამ, — მითხრა მან.

მას ჩემთვის არაფერი უკითხავს და მეც მადლობელი დავრჩი. არ არის სასიამოვნო, როდესაც ადამიანები გიცოდებენ. პირისბანას რომ მოვრჩი, საჭმელი და ბოთლით ბურახი მომიტანა. რა სასიამოვნო იყო მოხალული პურისაგან დამზადებული მომყავო სითხე. რა თქმა უნდა, ალდემ იზრუნა ჩემზე.

აბაკირი მოვიდა. არაფერი უთქვამს. ვერც ვერაფერზე გამომედავებოდა. უთქმელად მოაყენა ტრაქტორი გუთანთან, მე გადავაბი და ისევ დავიძარით.

ამ დღეს უფრო მტკიცედ და დაჭერებულად ვმუშაობდი. ვირწმუნე ჩემი თავისა. რადგან პირველი განსაცდელი გადავიტანე, ბოლომდე გავძლებ!

კაბინის ფანჯრიდან თვალში მხვდებოდა ისევ ის ჭიუტი, მხრებში ჩამჭდარი კისერი. ისევ შეუსვენებლივ, ღრკიალითა და ღრიალით მიდიოდა ტრაქტორი, ისევ გაუნძრევლად ვიჭექა საჭეს ჩაქიდებული.

ნაშუადღევს აბაკირმა მოულოდნელად ტრაქტორი გააჩერა.

— ჩამოდი, — მითხრა მან. — შევისვენოთ.

ჩვენ მღუმარედ ვისხედით მიწაზე, ტრაქტორის ჩრდილში. აბაკირი ეწეოდა და ნერვიულად ღეჭავდა პაპიროსს. შემდეგ გაიხადა კომბინეზონი, ხალათი და ზურგი მზეს მიუშვირა.

ფართო მხრები ჰქონდა, კუნთებით დაბურცული. მეც მომინდა მზეზე ნებიერობა, გავიხადე ხალათი და მიწაზე გაფენა მოვიწყო, ამ დროს აბაკირმა თავი ასწია და მოთენთილი, დაბლვერილი სახით შემომხედა.

— მომთხანე ზურგი! — მიბრძანა მან, დარწმუნებულმა თითქოს იმ წუთში უნდა წამოვმხტარიყავი და მისი სურვილს შემესრულებინა.

ხმა არ ამომიღია.

— გესმის! — მან მრისხანედ შეათამაშა მხრები ისე, რომ თავიც არ აუწევია მალლა.

— არ მესმის!

— მე კი გეუბნები, რომ გესმის! — იგი ნახტომით წამოიწია მკლავებზე და სილა გამაწნა. — დიდხანს გელოდო კიდეც? ოღონდ უკან დავიხიე. ალბათ გაბოროტებამ გამხადა ასეთი მშვიდი.

— შენ ყოველთვის გულში მჭილს ირტყამ და ამბობ: მე მუშა ვარ! ყველას გარჩენთო! მუშა ხარ მხოლოდ იმიტომ, რომ მუშაობ! სული კი ეშმაკმა იცის რისი გაქვს. შენ ბაი უნდა ყოფილიყავი!

— ვიქნებოდი კიდეც! შენ კიდეც სულში ნუ მიძვრები! — და მოულოდნელად ცხვირში წკიპურტი წამკრა.

მუშტებზემართული წამოვვარდი და ვეცი. აბაკირიც თითქოს ამას ელოდაო. მთელი თავისი ბოღმა და სიძულელი ჩააქსოვა მან იმ დარტყმაში, რომელმაც მიწას დამანარცხა. ძღვეს წამოვდექი. ბრაზით დაბრმავებული ისევ ვეცი. თითქმის ყოველი დარტყმის შემდეგ მიწაზე ვვარდებოდი.

— მე შენ გიჩვენებ სეირს. ლაწირაკო. გიჩვენებ ჩემს სულს! — იმეორებდა იგი და მძიმე მუშტები თუჯივით მატყლდებოდა თავზე.

მაგრამ მე ისევ და ისევ ვდგებოდი და უხმოდ, თავდავიწყებით განვაგრძობდი ჩხუბს, ვუმზინებდი სახეში, მხოლოდ მხეცურ სახეში, ის კი ზუსტად და გამოზომილად მირტყავდა მუცელში, ნეკნებში, მკერდში.

აი მე ისევ წამოვდექი და ნელა დავიძარი მისკენ. მან ხელს ასწია და ზევიდან პირდაპირ კისერში დამიშვა უროსავილა

მუშტი. ვეგლე მიწაზე ტუჩებმოკუმული, რომ კენესა არ დამ-
ცდენოდა.

— იწეჟი, აკადემიკოსო! დაყნოსე, იქნებ გაიგო როგორი
სუნი ასდის მიწას! — იგი მძიმედ სუნთქავდა და აფურთხებდა
ტუჩებიდან გადმონადენ სისხლს. — ეს ლექციების კითხვო არ
გეგონოს ქვის კერპებზე. ისტორია ამ საქმეში ვერაფერს გიშ-
ველის.

იგი წავიდა ტანსაცმელისაკენ, რომელიც ჩვენი ფეხებით
იყო გათელილი, გაფერთხა და ჩაცმა დაიწყო. ამ დროს მას
ისეთი გრძნობა ჰქონდა, თითქოს დიდი ტვირთი მოიცილა
მხრებიდან. მაგრამ მე მაინც ვიცი, რომ ეს ბრძოლა მოვიგე.
ღიახ, მე არ ვიყავი დამარცხებული, მიუხედავად იმისა, რომ
მიწაზე ვეგდე. მივხვდი, რომ სიმართლისათვის მუშტებითაც
შეიძლება ბრძოლა და ეს არც ისე საშიშია. გავიგე, რომ შეიძ-
ლება და აუცილებელიცაა დაარტყა იმას, ვინც გირტყამს.
ჩემთვის ეს გამარჯვება იყო.

სანამ აბაკირი იცვამდა, კომბინეზონში ძვრებოდა, გონს
მოვეგე, ამოვისუნთქე. მოტორი რომ ამუშავა, ავდეჟი, სწრა-
ფად ჩავიცი და ჩემი ადგილი დავიკავე გუთანზე. ტრაქტორი
აღრიალდა და დაიძრა. ისევ ჯიუტი. მხრებში ჩამჭდარი კისერი
მოჩანდა კაბინიდან, მე ისევ ის მიმბმელი ვიყავი, გუთნის სა-
ჭეს ჩაჭიდებული.

IV

ჩვენს ცხოვრებაში ზოგი რამ შეიცვალა. ორცხენიანი საზი-
დარი გამოგვიგზავნეს თავისი ცხენებით თესლის გადასატა-
ნად. კიდევ ერთი კაცი ჩამოვიდა — მესაზიდრე. წყალმზიდავ-
საც გაუიოლდა საქმე. სადაბეჟი და ესირკეპი ახლა თესავდნენ.
მე და აბაკირი კი ისევ ვხნავდით.

მოხდა კიდევ ერთი მნიშვნელოვანი ამბავიც.

რამოდენიმე დღის წინ, სადილის შემდეგ მინდვრისაკენ
მივდიოდით საზიდრით, წყაროსთან ბატკნების მომვლელი გო-
გონა დავინახე. მე გადმოვხტი. მესაზიდრეს ცხენების შეჩე-
რება უნდოდა. მაგრამ აბაკირმა არ მისცა უფლება.

— ნუ მაგვიანებ! — უკმაყოფილოდ უბრძანა მან.

გოგონასაკენ გავიქეცი, მან ცხვრები მიატოვა და ჩემს შესახვედრად წამოვიდა. მე ბოლომდე აღარ მიმიღებენია, საზიდარს უნდა დაეწეოდი, სამუშაოს დაწყებისათვის რომ მიმესწრო. გავჩერდი:

— გამარჯობა! — დაუყუვირე შორიდან.

— გაგიმარჯოს! — მიპასუხა და ისიც გაჩერდა.

ძალიან გამიხარდა რომ დავინახე, მაგრამ არ ვიცოდი რა მეთქვა.

— რატომ არ ჩანხართ თქვენი წყალსაზიდით, სადა ხართ ახლა?

— ახლა ტრაქტორზე! — ამაყად ვუპასუხე მე. ჩვენ აგე-ე-ე იმ ნაკვეთზე ვმუშაობთ! მაპატიეთ, ძალიან მეჩქარება.

— გაიქეცი, გაიქეცი! — ხელი დამიქნია მან.

საზიდარს გამოვედევნე. მხოლოდ ერთხელ მოვიხედე უკან. გოგონა ისევ იმ ადგილას იდგა და მომჩერებოდა. საზიდარი სვლას არ უნელებდა. მაგრამ მე სირბილი არ მიჭირდა, მივრბოდი ლალად, თავისუფლად. ბედნიერი ვიყავი მან რომ ხელი დამიქნია, რომ მივრბოდი მკერდგაწლილ გაზაფხულის ტრამალზე.

მეორე დღეს იგი ჩვენს ნაკვეთზე გამოჩნდა. იდგა ბორცვზე, შორიანხლოს და თავის ფარას უთვალთვალებდა. მომინდა მივსულიყავი მასთან, თუნდაც წამით, მაგრამ განა აბაკირი ნებას მომცემდა? განა შეეძლო მას ასეთი კარგი საქმის გაკეთება? ხომ შეიძლებოდა დამეყენებინა სახნისები გარკვეულ სიღრმეზე და წავსულიყავი ერთი-ორი საათით. ჩვენ ხომ სწორად გავგქონდა კვალი და ტრამალიც სწორი, მოკრიალებული იყო. მაგრამ არაფერი მითხოვია.

მეორედ, როცა გოგონა გამოჩნდა, ჩვენ მოგუგუნე ტრაქტორთან ვიდექით, მოტორში ვამოწმებდით რაღაცას.

— რატომ მოუხშირა აქეთ სიარულს? — იკითხა აბაკირმა.

— არ ვიცი.

— რა ჰქვია?

— არც ეგ ვიცი.

— ეჰ, აკადემიკოსო, — დამცინავად გადააპურქვა მან და

გოგონასაკენ გაიხედა. — გემრიელი გოგო ჩანს, — ჩაილაპა-
რაკა და დაღუძდა. თითქოს გულში რაღაც ცუდი ჩაიხვიაო.

ბოროტად შეეხედე.

— დაჯექი შენს ადგილზე! -- მიყვირა და მუშაობა გაეაგ-
რძელეთ.

გოგონამ ამ დროისათვის ცხვარი ბორცვიდან გაშლილ
იღგილზე გადმორეკა, ჩვენი ნაკვეთიდან ასი ნაბიჯის მოშორე-
ბით. რა კარგი იყო გავეცეულებოდა, დავმჯდარიყავი მის გვერ-
დით. მელაპარაკა, უბრალოდ დავმტკბარიყავი მის შუბლზე
ლამაზად ჩამოშლილი თმების ცქერით.

უცებ ტრაქტორი გაჩერდა, აბაკირმა თავი გამოყო კაბი-
ნიდან: — დაამაგრე ბერკეტი! მოდი აქ!

გუთნიდან ჩამოვედი, გაკვირვებული გავემართე აბაკირი-
საკენ, იგი მუშაობის დროს კაბინას ახლოსაც არ მაკარებდა.

— დაჯექი, — დამითმო თავისი ადგილი, — ისწავლე მარ-
თვა!

პირდაღებული დავრჩი. ამას კი აღარ მოველოდი. რა და-
ემართა აბაკირს, ნუთუ გული მოუბრუნდა ჩემზე? დიდხანს
აღარ მიფიქრია, მოვემზადე სამუშაოდ.

— დააწევი პედალს. ჩართე გამომრთველი ქურო. ასე,
გაბედულად. ახლა ფრთხილად აუშვი პედალს. ფრაქციონების
ბერკეტს მოჰკიდე ხელი.

ტრაქტორი აგრუხუნდა, ადგილიდან დაიძრა. სუნთქვა შე-
მეკრა სიხარულისაგან. არაფერზე ვფიქრობდი, სხვა აღარაფე-
რი მაინტერესებდა ამ ქვეყნად. ერთი სურვილი მამოძრავებ-
და: დავვუფლებოდი ტრაქტორს, გავრკვეულიყავი მის მექა-
ნიზმში. მე ხომ დიდი ხანია ვოცნებობდი ამაზე. და აი მძლავრი
მანქანა დამჭერედ ემორჩილებოდა ჩემს ხელებს, მუხლუხების
ღრმადობით მიიკვლევდა გზას და მეც თითქოს იმ მექანიზმად
გადავიქეცი, რომლის ერთადერთი ამოცანაა — ზუსტად შეას-
რულოს საჭირო მოძრაობა.

ნაკვეთის ბოლოს კარგად მოვუხვით. მართალია, მიმბმელის
გარეშე მოსახვევში დიდი ხარვეზი დარჩა, მაგრამ ეს არცთუ
ისე დიდი უბედურება იყო: ცოტა მიწა ხომ არაა ანარხაიში!
სამაგიეროდ მე ტრაქტორის მართვას ვისწავლი.

ასე გავავლეთ რამდენიმე კვალი. გული უცვე ისე აღარ მიცემდა. უფრო დაჭერებულად ვგრძნობდი თავს.

— გაბედულად, აკადემიკოსო! — ყურში ჩამძახა აბაკირმა. — მე ცოტა ხნით წავალ. თუ რამე იყოს, გააჩერე.

იგი გადახტა მიმავალი ტრაქტორიდან, მტვერი ჩამოიბერტყა, ტანსაცმელი შეისწორა და გოგონასავე გაემართა მხოლოდ ახლა მივხვდი რა ჩაიფიქრა მან. თურმე ჩემი სიყვარული არ ამოძრავებდა, როცა საქე დამითმო.

აბაკირი გოგონას გვერდით იდგა და რალაცაზე უღარდელად ლაპარაკობდა. ჰქონდა კია საზრუნაუნი?.. სამუშაო მიიწევს, ტრაქტორიც აქვეა, თუ რამე მოხდა, ყოველთვის შეუძლია მოიბრინოს.

არ მომეწონა აბაკირის ოინი. ამავე დროს ბედნიერიც ვიყავი. მე ხომ ტრაქტორს ვმართავდი. ერთი სული მქონდა კაბინიდან ხელი დამეჭნია გოგონასათვის, დამეძახა რამე კარგი. ეჰ, აბაკირი რომ არ ყოფილიყო აქ! რას ეუბნება ნეტავ, ან გოგონა რას პასუხობს? აჯობებს ცოტა სიფრთხილე და მეტი სიმკაცრე გამოიჩინოს...

საათნახევარი ვმართავდი ტრაქტორს, სანამ ქალიშვილმა უკან არ გარეკა ცხვარი. აბაკირის სახეზე ვერ შევნიშნე ისეთი რამ, რაც მის წარმატებაზე მეტყველებდა. არაფერი, გარდა ჩვეულებრივი ბრიყვეული თვითკმაყოფილებისა.

— გადაბრძანდი, აკადემიკოსო, შენს ადგილზე! — მხარზე ხელი დამარტყა და თალლითურად ჩაიცინა.

არაფერი მითქვამს, ისე გადმოვხტი ტრაქტორიდან.

გოგონა მეორე დღესაც მოვიდა. აბაკირმა ისევ დამტოვა კაბინაში, თვითონ კი მასთან წავიდა. სჯობდა რომ სულაც არ მოსულიყო გოგონა. ტრაქტორის მიტოვება არ შემეძლო, არადა ასეც ვერ ვჩერდებოდი ადგილზე.

როგორ გავაფრთხილო, — ვფიქრობდი და შემფოთებულა ვიხედებოდი მათ მხარეს. მაგრამ შემეძლო ადამიანებისათვის ერთმანეთთან ლაპარაკი ამეკრძალა? ეს ხომ უნამუსობა იქნებოდა. ადამიანი თვითონ უნდა მიხვდეს ვისთან აქვს საქმე...

ამჯერად გოგონა მალე წავიდა და ძალიან გამიხარდა. სულ უფრო სწრაფად მიეოეკებოდა იგი თავის ცხვარს, გარ-

ბოდა შორს ტრამალში, უცანმოუხედავად. „მაპატიე, ძვირფასო, — გუნებაში ვებოდინებოდი მე. — კარგია რომ მალე წახვედი. ჩვენ კიდევ შეეხვდებით ერთმანეთს, მეორედ აღარ დავრჩები ტრაქტორზე, შენსკენ გამოვიქცევი. ახლა კი წაღი, ნუ შეჩერდები, კარგო გოგონავ, შუბლზე ლამაზად ჩამოშლილი თმებით... მე ხომ შენი სახელიც არ ვიცი...“

ტყუილად მქონდა იმედი მისი ნახვისა. ქალიშვილი აღარ გამოჩენილა. სამი დღე ველოდით ორივენი, რა თქმა უნდა, ერთმანეთს არაფერს ვეუბნებოდით. აბაკირი ჩვეულებრივზე ბრახიანი და უხეში იყო. იგი ისევ ძველებურად შეუფარავი სიძულვილით შემომტკეპროდა. მე მივხვდი, რომ მან რალაციით შეურაცხყო გოგონა. თავს დამნაშავედ ვგრძნობდი მის წინაშე, თითქოს ვერ მოვახერხე რალაც უკეთურისაგან დამეცვა იგი. ფიცი დავდე პირველივე შესაძლებლობისთანავე მომეძებნა და გულახდილად მეთქვა ყველაფერი. ვოცნებობდი ამ შეხვედრაზე, იმედი მქონდა და ველოდი.

სწორედ იმ დღეებში მინდორში მოგვისწრო წვიმამ. დაუშვა მოულოდნელად და ძლიერად. ეს იყო ტრამალის ბობოქარი ღვართქაფი, სეტყვით. პაერი ახმაურდა, მიწა მოთუხთუხე გუბეებით დაიფარა. აბაკირს ტრაქტორი არ გაუჩერებია, პირიქით აუჩქარა კიდევ, და ჩემსკენ არც ერთხელ არ გამოუხედია, მე ხომ წვიმა და სეტყვა მატყლებოდა თავზე.

დამბალი მიწა ამძიმებდა სახნისს, ტალახი ეკვროდა ყველაფერს, ძვრებოდა გუთნის ღარებში, ჩარჩოზე, ტალახში ვიღექი მეც. ალბათ, აბაკირი არც გაჩერდებოდა, მუხლუხებში ახელილი თიხა რომ არ გაჩხერილიყო. მან მოტორი გამოართო, პაპიროსს მოუკიდა და კაბინაში წამოგორდა, ალბათ, ფიქრობდა, რომ ვთხოვდი, მეც შემეფარე-თქო. მაგრამ ჩემთვის ახლა სულერთი იყო, უკვე ძვლებამდე ვიყავი დასველებული. ერთადერთი რასაც წყალს ვარიდებდი ეს იყო ბლოკნოტი, რალაც ჩანაწერებით, წაკითხული წიგნებიდან ამოწერილი საინტერესო თქმებით. მე იგი ჩექმაში ჩავიდე, ფეხსახვევის ქვეშ.

წვიმამ უცებ გადაიღო, თითქოს არც ყოფილაო. იმ წუთში ცამ პირი. გაღიხსნა და გამოჩნდა უძირო, მოკამკამე, გამქვირ-

ვალე ლაევარდი. იგი თითქოს იმ სისუფთავისა და სილამაზის
გაგრძელება იყო, რითაც ბრწყინავდა გაზაფხულის ღვართა-
ფისაგან გაღარეცხლი უაივრცო ტრამალი. ანარხაის უკიდუ-
განო სივრცეები კიდევ უფრო გაიშალნენ მხრებში, კიდევ
უფრო უსაზღვრონი გახდნენ. მთელ ცის კაბადონს გადაეკრა
მთრთოლავი ცისარტყელა. იგი გადაიშალა კიდიდან კიდემდე,
თითქოს თან აიტაცაო ამ ქვეყნად მოვლენილი ყველა ლამაზი
ფერი. აღტაცებული ვიყურებოდი აქეთ-იქით. ლურჯი, უსაზღ-
ვროდ ლურჯი, ჰაეროვნად მსუბუქი ზეცა, ცისარტყელაში
აცანცანებული უამრავი ფერი და მქრალ-მოწითალო იერ-
გადაკრული აბზინდებით დაფარული ტრამალი. მიწა სწრაფად
შრებოდა, მის თავზე კი სულ ზევით-ზევით დანაჯარდობდა
არწივი ფართოდ გაშლილი ფრთებით. თითქოს ფრთებმა კი
არა, მიწის ძლიერმა სუნთქვამ, აღმავალმა ნაკადმა აიტაცა იგი
ამ სიმადლეზე.

და ისევ ვიგრძენი ძალა, ისევ იფეთქა სულში სიხარულმა,
ფრთა გაშალა. ოცნებამ ანარხაის ზღაპრულ მხარეზე. დიახ, ახ-
ლა მე მყარად ვიდექი მიწაზე და უკვე არავის შეეძლო დაეჩრ-
დილა ჩემი ოცნება, წაერთმია ანარხაის დიდებული მომავლი-
სადმი რწმენა. მე პოეტი არასოდეს ვყოფილვარ, მაგრამ სკოლის
კედლის გაზეთში ხანდახან ჩემს პატარა ლექსებსაც აქვეყნებ-
დნენ ხოლმე. და აი ახლაც ჩექმიდან ბლოკნოტი ამოვიღე და
დავწერე პირველივე სიტყვები, რომლებიც თვითონ მთხოვდნენ
ქალადღზე გადატანას:

კურდაის გადაღმა გაწოლილ ტრამალს
ზამთრობით ქარბუქი გლეჯს,
ზაფხულში სიციხე წვეს ბალახს,
ხვატი დასწოლია ეელს,
ანარხაის ეელს...
მაგრამ მე მჯერა, რომ მალე,
მიწა მკერდს გადიხსნის ლაღი,
აბზინდებს დაიბნევს გულზე
ტრამალი — ზღაპრული ბაღი

არ ვწუხნდი, რომ ლექსი არ ვარგოდა, არ ვწუხნდი გაუმარ-
თავ სტრიქონებზე. მადარდებდა მხოლოდ ის, რომ ეს სტრი-

ქონები იმის მებასედსაც ვერ გამოხატავდნენ. რაც ჩემს გულში ბობოქრობდა. თავს ვიმტვრევდი, ვცდილობდი მეპოვნა სწორედ ის სიტყვები, რომლებიც ზუსტად გადმოსცემდნენ ჩემს განცდებს. ამ დროს ვიღაცამ ბლოკნოტი ხელიდან გამომგლიჯა. მოვიხედე.

სასიყვარულო წერილს ჯღაბნი! — ბოროტად გაიცინა აბაკირმა, — გინდა ლექსებით მოაწონო თავი?

— მომეცი! — მივევარდი აღშფოთებული. — ვინ მოგცა სხვისი ნაწერის წაკითხვის უფლება!

— შენ ნუ მასწავლი, რისი უფლება მაქვს, ჩემს უფლებებზე მე თვითონ ვიფიქრებ! მომშორდი!

— არ მაძლევ?! — ვიყვირე გაბრაზებულმა, ტრაქტორთან მივირბინე და რკინის ლოჯს წამოვავლე ხელი.

— გეყოფა, რას შერები! — შეერთა აბაკირი. — წაიღე, რად მინდა ეს სისულელე და ბლოკნოტი უკან დამიბრუნა, ერთი წუთის შემდეგ კი ახარხარდა, მისმა ქიხვინმა ტრამალი გააყრუა: — ზღაპრული ბაღი! ხა-ხა-ხა, ნამდვილად სულელი ხარ. აკადემიკოსო! სწორედ შენნაირები უნდა მორეკო აქ, ბუზებივით რომ იყუყუებოდეთ, თქვენი გიჟური ოცნებებით. ზღაპრული ბაღი! ხა-ხა-ხა, მოიცა ცოტაც და თვითონ მიხვდები რა ზღაპრულ ბალშიცა ხარ! დარჩი აქ ზამთარში — სხვა-ნაირად ამღერდები...

შენი საქმე არ არის დავრჩები თუ არა! უმჯობესია საკუთარ თავზე იფიქრო!

— მე რა მაქვს საფიქრალი, — პირქუშად ჩაიცინა აბაკირმა და ჩემსკენ წამოიწია. ჩემი ფიქრი მუდამ ჩემთანაა, თან დამყვება. ყველგან გავიტან თავს. განმერიდა. მაგრამ რაღაცა მიაგონდა, ახლოს მოვიდა და დაბალი ხმით მითხრა: — შენ კი, აკადემიკოსო, ის გოგო თავიდან ამოიგდე, იმედი ნუ გექნება... წაგაკლავ!

— ამას კიდევ ვნახავთ!

— მე შენ გეუბნები, რომ ნურც იფიქრებ!

უცებ შემეცოდა ეს გათავხედებული ადამიანი, გაშმაგე-

ბული. გაბოროტებული ყველაფერზე და ყველაზე და მშვიდად ვუთხარი:

— შენ ჩემზე უფროსი ხარ. ხანდახან ჰქვიანურადაც ლაპარაკობ. მაგრამ, ალბათ. ეს დაუკვირვებლობით მოგდის. ერთი რამ დაიმახსოვრე: არავის შეუძლია ადამიანს აუკრძალოს ფიქრი და ოცნება. ადამიანები ცხოველებისაგან იმითაც განსხვავდებიან, რომ მათ აზროვნების უნარი აქვთ.

არ ვიცი იმოქმედეს თუ არა ზემმა სიტყვებმა. მაგრამ ხმა არ ამოუღია. მხოლოდ პირქუშად მივიდა ტრაქტორთან და გახელებით დაატრიალა სახელური. ტრაქტორი აგუგუნდა. მუშაობის დაწყების დრო იყო.

ამ წუთიდან მოვიპოვე უფლება მეოცნება და ჩემს ოცნებებს აღარ გავშორებივარ. მე დავიბრუნე ისინი და მათ არასოდეს დავუტოვებივარ. ჩემთან იყვნენ ყოველთვის.

საღამოთი, როცა ყველა დასაძინებლად ემზადებოდა, მე იურტიდან გამოვედი და წყაროსკენ წავედი. რატომღაც გული იქით მეწეოდა. მინდოდა მარტო ვყოფილიყავი.

ვარსკვლავები ცაზე ვერ დატეულიყვნენ და ცის დასალიერს, ჰორიზონტთან მიწაზე ჩამოსახლებულიყვნენ. ბევრი მათგანი, თავზე რომ მადგა. ჩაძირულიყო წყაროში, პატარა მომრგვალებულ წყალსაცავში, რომელიც მე ახლა უძიროდ მეჩვენებოდა. ისინი ირეკლებოდნენ და კიაფობდნენ წყალზე, თითქოს შეგეძლო ნაწილ-ნაწილ ამოგეხაპა და ნაპირზე გადმოგეყარა აბრიალებული ნაკვერჩხლებივით. ცოტა ქვევით კი ნაკადულს მიყვებოდნენ. მასთან ერთად ნამსხვრევებად იფანტებოდნენ ქვიან ნაპირზე. მაგრამ იქ სადაც წყალი უძრავად იდგა. ისინი ისეთივე სხივოსანნი იყვნენ. როგორც ცაზე და მე გავიფიქრე, როგორ ჰგავს-მეთქი ეს წყარო ადამიანის სულს, ისიც ხომ მასავით სავსეა ნათელი ოცნებებით. ისიც ხომ შეიძლება იყოს ისეთივე ღრმა და უძირო, რომ მთელი სამყარო დაიტეოს.

ვიჯექი წყაროსთან. ვუცქერდი და ვუსმენდი, მთელი ჩემი არსებით ვგრძნობდი და განვიცდიდი ღამის გაყუჩებულ ტრამალს, იგი ჩემს ოცნებებში ოდნავ სხვანაირი იყო, თუმცა ისეთივე ლამაზი როგორც სინამდვილეში. ვისთვის მომეთხრო

ამაზე, ვისთვის შემეძლო გამეზიარებინა ეს განცდა? ძნელი ასახსნელია. მაგრამ სწორედ ის ქალიშვილი, შუბლზე ჩამოშლილი თმებით, მეჩვენებოდა ისეთ ადამიანად, რომელიც გამიგებდა. მიმიხვდებოდა და ჩემი ოცნებებისა და მღელვარების მოზიარე გახდებოდა. შეიძლება იმიტომაც, რომ ჩვენ აქ. წყაროსთან შევხვდით ერთმანეთს და აქლემის თვალი დავარქვით მას.

სად არის ნეტავ ახლა, იცის რომ მასზე ვფიქრობ? ჩქარა მოვათავებ ხენას და მაშინ წავალ, მოვძებნი, მოვიყვან წყაროსთან და მოვუყვები ზღაპრულ ქვეყანაზე, რომელსაც ანარხაი ჰქვია. მოვუყვები უბრალოდ, ლექსების გარეშე. ისე რომ არ დამცინოს. დავუხატავ ამ ტრამალის მომავალს.

წასვლის წინ ერთხელ კიდევ მოვავლე თვალი ვარსკვლავებით მოქედელ ცას. მახარებდა ყველაფერი; რასაც თვალი წვდებოდა. წარმოვიდგინე როგორ დგას ბორცვთან ახლა ქვის ქალი, ყველაფრისადმი გულგრილი და თავისი უსიცოცხლო, ბოროტად მოჭუტული თვალი სივრცისთვის მიუშტერებია.

მთვარე ამოვიდა და ნახნავის იქითა მხარეს მე გავარჩიე ორი ფრთხილად მიმავალი ლანდი. საით მიდიოდნენ ჭეირნები? ალბათ წყლის დასაღევად. ჭეირნები მინდვრის კიდეზე გამოვიდნენ და შეჩერდნენ, ვერ გაბედეს ფეხი დაედგათ ნახნავ მიწაზე. რომელსაც ნავთისა და რკინის სუნი ასდიოდა. დიდხანს იდგნენ ასე, გაუნძრევლად, მთვარის შუქით ოდნავ შევერცხლილები. ძუ დატოტვილი რქებით, ხვალი კი დაბალი ქედითა და ღამეში მოციმციმე, დიდი თვალებით. ხვალი ძუს მიჰკვროდა. ძუ ფრთხილად ყნოსავდა ჰაერს. ასე იდგნენ რაღაც უცნაურად გაქვავებულები. მათი სახე გაცეცხას გამოხატავდა: „რა დაემართა ტრამალს? სად გაქრა ძველი ბილიკი? რა ძალამ გაუხსნა მიწას გული?“

ჭეირნებმა მაინც ვერ გაბედეს გადმოესერათ ნახნავი და უხმაუროდ გაბრუნდნენ ჯკან, მათ მოქნილ ზურგებზე კი თითქოს მოკალათებულიყო მთვარის მოვერცხლისფრო ანარეკლი.

კიდევ ცოტა ხანს ვიჭექი, ჭეირნები რომ არ შემეშინებინა. იურტაში შევედი, ხელის ფათურით მოვძებნე ჩემი ლოგინი და დიდხანს ვიწექი გახელილი თვალებით.

სწორედ ამ დროს გავიგონე ჩურჩული. აბაკირი და კალიპა ერთად იწვნენ. შეიძლება ადრეც ასე იყო, მაგრამ მე არაფერი შემინიშნავს. კალიპა სლუკუნებდა, რაღაცას ამბობდა, მაგრამ ვერაფერი გავარჩიე.

— კარგი. გეყოფა, — წაილაპარაკა ძილმორეულმა აბაკირმა. — ქალაქში წავალთ და ყველაფერს მოვაგვარებთ. ერთ-ორ დღეს მოგიწევს დაწოლა. ტყუილად რატომ იკლავ თავს. კალიპამ ნაღვლიანად უპასუხა:

— ამიტომ კი არა, ჩემი თავი მეზიზღება. რამ შემაყვარა შენნაირი ადამიანი? რა ვნახე შენში, ვერ გამიგია... ოღესმე გაგიკეთებია კარგი ადამიანებისათვის? მე კი ძალღვივით აგეტმასნე...

— არც ინანებ, მოვრჩებით მუშაობას და წავიყვან.

— სწორედაც რომ ვინანებ, მთელი ჩემი ცხოვრება უნდა ვიღარდო და მაინც წამოგყვები. მარტო დარჩენა არ მინდა.

— ჩემად, გეყოფა! ახლოს მოიწიე. ასე არ სჯობს, თორემ რას ჰგავს, ბალიში მთლად დაასველე.

საბანში ჩავრგე თავი, მინდოდა მალე დამეძინა, მათი საუბარი რომ აღარ მომესმინა.

V

მზეს დღითილღე ემატებოდა მცხუნვარება. სოროკინი უფრო ხშირად იყო ჩვენთან. ვადები იწურებოდა. უნდა გვეჩქარა, სანამ მიწა სულ გამოშრებოდა. კიდეც ხუთი დღის სახნავი გვქონდა დარჩენილი, ამდენივე სამუშაო ჰქონდათ მთესავეებსაც.

სოროკინი ამბობდა, რომ შემოდგომაზე მზრალად მოვხნათ, ხოლო გაისად აქ უკვე ბევრი ტრაქტორი იქნება და რტს-ს ააშენებენო. მას ყველაფერი გამოთვლილი ჰქონდა. სულ ტრამალზე ტრიალებდა, იცოდა მისი ყოველი მიჯნა და ხევი, ქვიშის უკანასკნელ მარცვლამდე ჰქონდა შესწავლილი ყველაფერი.

უკვე დრო იყო შეწყვეტილიყო საკვების შემოზიდვა მანქანებითა და თვითმფრინავებით, როგორც ეს ხდებოდა ანარხაიში დიდი ზამთრობის დროს. სოროკინმა იცოდა როგორ მიეღწია ამისათვის.

ახლა მე და აბაკირი გვიან ღამემდე ვხნავდით. მინდორში ვიძინებდით და განთიადიდანვე ვიწყებდით მუშაობას. სამუშაო იმდენად მძიმე იყო, რომ აბაკირმა თავი დამანება. თითქოს ვერ დაძინებდა, ზედაც არ მიყურებდა. მაგრამ ჩემდამი ჩუმი, ფარული სიძულვილი ხანდახან მაინც იელვებდა ხოლმე მის თვალებში.

როცა სოროკინმა ხელფასი მოგვიტანა, აბაკირი დიდხანს ითვლიდა ფულს. უნდობლად იბღვირებოდა და ძლივს მოაწერა ხელი უწყისში. ეს რა მთელი ნამუშევრისა, უწყლობისა და სიშორისთვისაც?

— ყველაფერი აქაა, წაიკითხე, — თქვა სოროკინმა.

აბაკირი ქალაღზე დაიხარა, ერთხელ კიდევ შეამოწმა უწყისი. შემდეგ მე მომიბრუნდა.

— შემორჩი მაინც არა!? ლექსებსაც სწერ ანარხაიზე. სწორი ხარ, საცა ფულია, სამოთხეც იქაა.

არაფერი მიპასუხნია. დე ილაყბოს. ამისგან არც მცივა და არც მცხელა. მე ვაკეთებდი ჩემს საქმეს და ვცხოვრობდი ჩემი ოცნებებით. ველოდი იმ დღეს, როდესაც წავიდოდი მწყემსებთან, გადავივლიდი ბორცვებს და მოვქებნიდი გოგონას, რომელსაც ისე უხდებოდა შუბლზე ჩამოშლილი თმები.

იმ დღეებში ახალ დიდ ნაკვეთს ვხნავდით. კარგია ახლის დაწყება. როდესაც აკეთებ სასურველ საქმეს, რომელსაც შენთვის კმაყოფილება მოაქვს. ჭერ კიდევ სკოლაში მიყვარდა წერილის დაწყება ახალი სტრიქონიდან, ახალი სუფთა გვერდიდან. მიყვარდა სირბილი ქათქათა, გაუკვალავ თოვლზე, სადაც პირველი ვტოვებდი ნაკვალევს. გაზაფხულობით დავებეტებოდი მთისძირას და ვკრეფდი პირველ, ახლადშემოსულ ტიტებს. ამაში თავისებური გატაცებაა. სიახლითა და სიფაქიზით რომ გხიბლავს. აქ ანარხაიში უსაზღვრო ტრამპალზე გავლებული ახალი კვალი ჩემთვის პირველი სტრიქონი, პირველი თოვლი. ხელუხლებელი ტიტა იყო.

ვიჭექი გუთანზე და ვტკბებოდი იმით, როგორ ავლებდა სახნისი პირველ კვალს. იგი იჭრებოდა მიწის სიღრმეში და მსუბუქად ატრიალებდა ბელტებს.

უცებ კიდურა სახნისზე რალაც აელვარდა, თითქოს თევზი ოფართხალდაო ტალღაზე, ცეცხლივით აენთო სახნისის საკესავით ლაპლაპა ზედაპირი და მიწაში ჩაიძირა. ერთი ხელის დაკვრით გადავევლე გუთანს, მიწიდან მძიმე, წაგრძელებული ფორმის ლითონის ნატეხი ამოვიღე. ისეთი ლამაზი იყო, ისე ვიყავი აღფრთოვანებული, რომ სიხარულისაგან ხელები გავშალე და ვიყვირე:

— ოქრო!

აბაკირმა ჩემს ყვირილზე მოიხედა, ტრაქტორი გააჩერა და უცებ ჩამოხტა.

— რა იყო, რა იპოვნე?

— ოქრო! ნახე, აბაკირ, ოქრო!

იგი ჩემსკენ წამოვიდა, ჯერ დინჯად, მერე ნაბიჯს აუჩქარა. მე გავუწოდე ლამაზი ოქროსფერი ნივთი.

— აბა მაჩვენე?! — ურწმუნოდ აიღო ხელში ნაპოვნი—რა უნდა აქ ოქროს? — ჩაილაპარაკა მან დახშული ხმით და თანდათან ფერი დაკარგა, თითქოს რალაცის შეეშინდაო. — შეუძლებელია; — თავს ძალა დაატანა გაეცინა. ფრჩხილებით მოაცილა მიწა ნივთს და თვალეში ველარ შემომხედა ისე უკმაყოფილოდ დამიბრუნა ლითონის ნამტკრევი.

— რატომაც არა! — გულფიცხად შევეპასუხე მე. — ნახე რა მძიმეა, რეაასი გრამი იქნება. მეთორმეტე საუკუნეში აქ მონღოლები ცხოვრობდნენ, აქ მოსვლამდე მათ ჩინეთი დაიპყრეს და ბევრი ოქრო გამოზიდეს იქიდან. აი ასე შეიძლებოდა მოხვედრილიყო აქ ოქრო! — ამას იმიტომ ვამბობდი, რომ ძალიან მინდოდა ჩემი ნაპოვნი ნივთი ოქრო გამომდგარიყო. ამ სურვილით გატაცებული ვაგრძელებდი ფანტაზიორობას და ამით სიმართლეში ვარწმუნებდი ჩემს თავსაც და პირდაღებულ, გაშტერებულ აბაკირსაც. შენ იცი რამდენი საუკუნე დევს იგი მიწაში? სხვა ლითონს აქამდე ჟანგი შექამდა. ეს კი შეინახა, იმიტომ რომ სუფთა ოქროა. ანარხაიში ოდესღაც ერთმანეთს ეომებოდნენ მომთაბარე ტომები. იცი რა სისხლი იღვრებოდა აქ! ხანების ხმლები ოქროთი იყო მოქედილი. იმ დროისათვის ოქროს მარტო სამკაულად კი არ იყენებდნენ, არამედ ხმლებისათვისაც: მეტი სიმძიმე რომ მიეცათ, კაცისა-

თვის რომ ადვილად წაეთალათ თავი. ეს ნამსხვრევი ხანის ხმლის ვადაა. ნახე. რა კარგად მიჰიარავს.

აბაკირმა ნატეხი აიღო, ცოტა ხანს ეჰირა, ხელში აწონა.

— თუმც ოქრო არ არის, მაგრამ მაინც ვანახოთ მცოდნე ხალხს, უბრალოდ საინტერესოა. ნამტვრევი ჯიბეში ჩაიღო. — შენ გუთნიდან გადმოგივარდება; ჩემთან იყოს.

აბაკირი ტრაქტორისკენ წავიდა, თან დამძიმებულ ჯიბეზე ისევამდა ხელს.

მუშაობა გავაგრძელებთ. ვფიქრობდი როგორ წაუღებდი ნაპოვნს ჩემს მასწავლებელ ალდიაროვს. მას ხომ ბევრი ამნაირი ნივთი აქვს. იგი ამასთან დაკავშირებით აუცილებლად მომიყვებოდა საინტერესო რამეს. მერე დავიღალე და ოქრო სულაც გადაამევიწყდა. მაწამებდა ტრაქტორის არათანაბარი მოძრაობა. აბაკირს რალაც უცნაურად დაჰყავდა მანქანა. ხან გაუბედავად შეუწელებდა სვლას, ხან კი ადგილიდან მოწყვეტდა და მოტორის ღრიალით მაყრუებდა. შავი ბოლქვები ამოვარდებოდა ხოლმე მილიდან და მღვრიე, მყრალ ღრუბლად აწვებოდა ნახნავს. ძვრებოდა გუთნის, სახნისების ქვეშ.

ასე ვიმუშავეთ დღის ბოლომდე. მზე გადაიხარა, მაგრამ ჯერ კიდევ სინათლე იყო. აბაკირმა რამდენჯერმე გადმომხედა მხარს ზემოდან და რალაც გაურკვეველი მზერა მესროლა. ბოლოს ტრაქტორი გააჩერა.

— მოდი აქ! — დამიქნია ხელი.

კაბინაში ავძვერი. აბაკირს ფერი დაკარგვოდა, თვალები აქეთ-იქით გაურბოდნენ. შუბლიდან ოფლი მოიწმინდა და მოტორის ღრიალში მითხრა.

— ვერ გაგაგონე, ყვირილის თავი არ მქონდა წადი, ბერკეტები დაამაგრე, მერე დაბრუნდი, დაჯექი და თვითონ მართე ტრაქტორი, რალაც ცუდად ვარ, ჰაერზე გავივლი, შეიძლება გადამიაროს...

— წადი. ნუ ინალელებ, მე მოვეუვლი! — დავამშვიდე იგი.

სანამ გუთანთან მივირბინე და დავბრუნდი, აბაკირი კაბინიდან ჩამოსულიყო. იგი რალაც უცებ დაპატარავდა, ჩაქრა, თითქოს გამოსუნდაო. ჩუმად წავიდა, წელში მოხრილი.

„მართლაც რომ ავად გამხდარა, ალბათ, მუცელი ატკივ-
და“, — გავიფიქრე, მანქანა ავამუშავე და ადგილიდან დავძარი.

ტრაქტორი თანაბრად, მოზომილად მოძრაობდა. იგი ისევ ჩემს ნებას ემორჩილებოდა. ამჯერადაც ვლელავდი, ვცდილობ-
დი ზუსტად მემართა მანქანა. ნაკვეთის ბოლოში ტრაქტორი
მოვატრიალე. მიწაზე უკვე ჩამოწოლილიყო ბინდი, აგრძელდა.
კიდევ ორი წრე და სინათლის ჩართვა მომიწივეს-მეთქი, გა-
ვიფიქრე და წინ გავიხედე. შორს ფერდობის გასწვრივ ვილაცა
ჩქარი ნაბიჯით მიიკვლევდა გზას. უნაგირას მიაღწია, სწრაფად
ჩაირბინა ქვევით და მიიმალა. მე მხოლოდ მისი ზურგი დავი-
ნახე. აბაკირი იყო. რა დაემართა? საით გაიქცა? ვინმე დაინახა,
ალბათ. ნაკვეთის შუაგულს რომ მივალწიე, კაბინიდან გადმოვ-
ყავი თავი, წამოვდექი, აბაკირი ველარ დავინახე. სად დაი-
კარგა? ის ხომ ავად იყო. უცნაურია. ტრაქტორი გავაჩერე, მო-
ტორი მცირე ბრუნვებზე გადავიყვანე.

— აბაკირი! — დავიძახე. — აბაკირი!

ხმა არავის გაუცია. სულ გამოვრთე მოტორი, რომ რამე გა-
შეგონა.

— აბაკირ! სადა ხარ? ხმა გამე! — ვყვიროდი მე.

მაგრამ ბორცვები, რომელთაც სალამოს ჩრდილი დასდგო-
შოდათ თავზე, დუმდნენ.

იქნებ ცუდად გახდა? წარმოვიდგინე, რომ მოკრუნჩხული
მიწაზე აგლია და წამოდგომას ველარ ახერხებს. ტრაქტორიდან
ჩამოვხტი და რაც ძალი და ღონე მქონდა გავიქეცი. გაღვირბი-
ნე უნაგირა. მიმოვიხედე. არავინ ჩანდა. ავეარდი მალალ
ბორცვზე და აქედან დავინახე, იგი მიდიოდა, მიდიოდა უკან
მოუხედავად, უკვე ძალზე შორს იყო.

— აბაკირი! სად მიდიხარ? — ვყვიროდი მე, მაგრამ ის
ალარ იხედებოდა და ბოლოს სულ გაქრა, თითქოს მიწამ ჩაი-
ტანაო.

ცოტა ხანს კიდევ ვიდექი, შემდეგ შემოვბრუნდი. ცაზე
მქრქალ ლაქებად ქრებოდა სინათლის უკანასკნელი სხივები.
პირქუში სიბნელე წვებოდა ბორცვებსა და ვაკეზე.

მივდიოდი შეშფოთებული და დაბნეული. უცნაურად და
უჩვეულოდ მეჩვენა ეს სევდიანი, განაბული მყუდროება. თით-

ქოს ტრამალი უგდებსო ყურს ჩემს ნაბიჯებს, ჩემს ფიქრებს. მივდიოდი თავჩაქინდრული და ვფიქრობდი: „ნუთუ ოქროს ნატეხისათვის დაკარგა გონება? არა, ასეთები გონებას არ კარგავენ. იგი დიდიხანია მზად იყო გასაქცევად. მიხვდა, რომ ახლა სხვაა: ხალხი, სხვაა ცხოვრებაც, რომ ახლა უტიფრობითა და თავხედებით თავს ვერ გაიტან. აღარც ორსული კალიპა და მისი სიყვარული სჭირდებოდა. აქ კიდეც ოქრო ჩაუვარდა ხელთ და...“

ფიქრები კალიპას ხმამ შემაწყვეტინა:

— აბაკი-ირ! ქემელ! სადა ხართ?

მან წყალი მოგვიტანა რადიატორში ჩასასხმელად.

— სად დაიკარგეთ? — შეშფოთებით შემეგება იგი.—შემეშინდა, ვიცი, ვიცი, ტრაქტორი დგას და თქვენ კი არ ჩანხართ!

რა უნდა მეპასუხა. სიმართლე ვუთხარი:

— აბაკირი წავიდა. სამუშაო მიატოვა.

— როგორ? სულ წავიდა?

— სულ.

— კი მაგრამ... რატომ?.. ენის ბორძიკით იკითხა მან.

— არ ვიცი.

არაფერი ვუთხარი ოქროზე, მრცხვენოდა აბაკირის მაგივრად.

— მაშასადამე, წავიდა? — ცოტა ხანს იყუჩა, შემდეგ საზიდრიდან წყლიანი ბიტონი ჩამოიღო და ძლივს დადო მიწაზე. — რილასთვის მომაქვს ეს წყალი? — დაბნეულად ჩაილაპარაკა, არავისთვის არ მიუმართავს ისე.

ბიტონი რადიატორთან მივიტანე, კალიპა სახით მიეყრდნო კაბინას და მწარედ ატირდა.

ადგილს ველარ ვპოულობდი. არ ვიცოდი რითი დამემშვიდებინა.

— შეიძლება კიდეც შეხვდეთ ერთმანეთს, — გაუბედავად დავიწყე და კალიპასაკენ შევბრუნდი.

— მაგისტვის არ ვტირი, — ამოისლუკუნა მან და სწრაფად მოატრიალა ჩემსკენ ცრემლით დანამული სახე. — მწამდა, ვოცნებობდისი რა მწამდა? რაზე ვოცნებობდისი? — წამოიყვირა

მან ისეთი გაწამებული ხმით, რომ ტრამალი გამოეხმაურა მწუხარე ექოდ. — ვფიქრობდი, შრომისმოყვარე ბიჭია, გაუელის ბოროტება. სიკეთითა და სიყვარულით მინდოდა გამეთბო მისი გული. ის კი? ღირს კია ლაპარაკი... ცხენიც მუშაობს, ადამიანი კი, ადამიანს პირველ რიგში სული უნდა ჰქონდეს ადამიანური... მაშინაა შრომა ბედნიერება, მაშინ აქვს საქმეს აზრი... მან კი ვერაფერი გაიგო. როგორც იყო, ისეთივე წავიდა. მწყინს, ნეტავ ვინმემ იცოდეს როგორ მწყინს.

კალიბამ ეს სიტყვები წამოიყვირა და ლამეში ჩაქარგულმა ტრამალმა გაიმეორა: „მწყინს... ოხ, როგორ მწყინს!“..

ვღუმედი დამწუხრებული და გულდამძიმებული. კალიბა მეცოდებოდა, მის მაგივრად მტკიოდა გული. ვერ გამეგო, როგორ შეიძლებოდა ასეთი კაცის შეყვარება... მაგრამ აბაკირს რომ სცოდნოდა, რომ ჰქონოდა გაგების უნარი, თუ რა დიდი, ნამდვილი ბედნიერება დაქარგა კალიბა რომ მიატოვა, კალიბა კი არ იტირებდა, თვითონ ის აყმუვლდებოდა ხროვიდან გაგდებული, ცივ ზამთარში მარტოდ მოხეტიალე მგელივით.

კალიბა ხმისამოუღებლად ჩაჯდა საზიდარში და წავიდა. მშვიდად ეძინა ანარხაის ტრამალს. სადღაც შორიდან აბზინდებს თავზე გადაურბინა, ქოჩრები შეურხია და ისე მოაღწია ორთქლმავლის სუსტმა კივილმა. შეიძლება აბაკირი მიდიოდა საბარგო ვაგონზე ჩამომჯდარი. წაეთრიე, გარეწარო, ეშმაკისკენაც გქონია გზა. არ დაილუპება ანარხაი, გაეძლებთ უშენოდაც.

მე ის აღარ მომგონებია. საქმე იყო გასაკეთებელი. დიდხანს ვწვალობდი, ვიდრე ტრაქტორი არ ავამუშავე და ლამის მყუდროება არ დავარღვიე, კაბინაში ჩავჯექი და ფარები ჩავრთე.

ახლა ყველაფერზე მე ვაგებდი პასუხს. ძალიან მომინდა, რომ ჩემს გვერდით ყოფილიყო საყვარელი გოგონა, შუბლზე ლამაზად ჩამოსულილი თმებით და ერწმუნა ჩემი, დაეჯერებინა, რომ აქ, ველური აბზინდებით აფერადებულ ტრამალზე გადაიკიმება ზლაპრული ქვეყანა — ანარხაი.



УДК 62-91
УДК 62-91



ფართოდ ვაღებ ფანჯარას. ოთახი დილის გრილი ჰაერით ივსება. მოციმციმე აისის ბინდბუნდში ვათვალიერებ დაწყებულ სურათის ეტიუდებსა და ჩანახატებს. ბევრი დამიგროვდა, უკვე მერამდენიმეჯერ დავიწყე ყველაფერი თავიდან. ჯერ ძნელია იმის თქმა, თუ როგორი გამოვა სურათი. ჯერ კიდევ არ მიპოვნია მთავარი, ის რაც თავისით მოდის და რაღაც არაჩვეულებრივი სინათლით და სიცხადით დაგიყენებს თვალწინ საძიებელს, მოვა გულში ჩადგრილ გამოუთქმელ ბგერებად, ზაფხულის აღრიანი განთიადივით. დავდივარ და ვფიქრობ, ირგვლივ სიწყნარეა და მე ისევ. ვფიქრობ. ასეა ყოველთვის. მე ისევ და ისევ ვრწმუნდები, რომ ჩემი სურათი ჯერ მხოლოდ ჩანაფიქრია და მეტი არაფერი.

არა ვარ იმის მომხრე, რომ თვით ახლო მეგობრებსაც კი წი-

ნასწარ ველაპარაკო და გავაცნო ჩემი ჯერ დაუმთავრებელი სურათები. იმიტომ კი არა, რომ მე ეჭვის თვალით ვუყურებ ჩემს სამუშაოს, არა; მე მგონია, ძნელია წინასწარ იმის თქმა, როგორი გაიზრდება ბავშვი, რომელიც ჯერ აკვანშია. ასევე ძნელია მსჯელობა დაუმთავრებელ, ჯერ დაუწერელ ნაწარმოებზე. ამჯერად ვღალატობ ჩემს თავს — მინდა საჯაროდ განვაცხადო, უფრო სწორად, ადამიანებს გავუზიარო ჩემი აზრები დაუმთავრებელ ნაწარმოებზე.

ეს ჭირვეულობა არაა. სხვანაირად არ შემიძლია მოვიქცე. რადგან ვგრძნობ მარტოს გამიჭირდება ასეთი ტვირთის ზიდვა. ამბავი, რომელმაც გული ამიფორიაქა, ამბავი, რომელმაც მიიძულა ხელში ამელო ფუნჯი, ისე მნიშვნელოვნად მეჩვენა, რომ ვფიქრობ მარტო მე ვერ დავიტევ მას. მეშინია რომ ბოლომდე ვერ მივიტანო, მეშინია გზაზე უსარგებლოდ არ დავღვარო სავსე ფიალა. მინდა ადამიანები დამეხმარონ რჩევით, მიკარნახონ, როგორ განვახორციელო ჩანაფიქრი, თუნდაც წამით, ფიქრში მაინც, ჩემთან ერთად დადგნენ მოლბერტთან, ჩემთან ერთად აღელდნენ, განიცადონ.

ნუ დაიშურებთ გულის სითბოს, ნუ დაინანებთ ყურადღებას, მოდექით ახლო, მე ვალდებული ვარ მოგიტხროთ ეს ამბავი.

ჩვენი აული კურკურეუ ქედებთან ფართო პლატოზე მდებარეობს. აქ თავს იყრის ხეობებიდან მოხეტიალი შფოთიანი მთის მდინარეები. აულს ქვევით გადაშლილია ყვითელი ველი, უზარმაზარი ტრამალი ყაზახეთისა, შემოჯარული ჩამუქებული მთებითა და შემორკალული რკინიგზით, რომელიც დასავლეთით ჰორიზონტისაკენ იკარგება.

აულს თავზე წამოდგომია ბორცვზე აშოლტილი ორი დიდი ალვის ხე. ისინი ასე დგანან რაც თავი მახსოვს. რომელი მხრიდანაც არ უნდა უახლოვდებოდე აულს, პირველად ამ ორ ალვის ხეს დაინახავ. არ ვიცი რით ავხსნა — იქნებ იმიტომ, რომ ბავშვობის შთაბეჭდილებები განსაკუთრებით ძვირფასია ადამიანისათვის—ან იმიტომ, რომ ეს დაკავშირებულია ჩემს პროფე-

სიასთან, მაგრამ ყოველთვის, როცა მატარებლიდან ჩამოვდივარ და ტრამულით აულისაკენ მივდივარ, უპირველეს ყოვლისა თვალები თავისით ეძებენ ჩემთვის მშობლიურ ალვის ხეებს; როგორი მაღლებიც არ უნდა იყვნენ ისინი, რა თქმა უნდა, ყოველთვის ასეთი მანძილიდან მათი დანახვა ძნელია, მაგრამ მე მუდამ ვგრძნობ, მუდამ ვხედავ მათ.

რამდენჯერ დავბრუნებულვარ შორეული მხარეებიდან კურკურეუში, ყოველთვის სევდამორეულს მიფიქრია: „როდის შევავლებ თვალს ცაში ტყუპად აჭრილ ალვის ხეებს? ნეტავ მალე ჩავიდე აულში, ავიდე ბორცვზე ალვებთან, რომ შემდეგ დიდხანს ვიდგე მათ ძირში და ვუსმინო ფოთლების შრიალს“.

ჩვენ სოფელში რამდენიც გინდა იმდენი ხეა, მაგრამ ეს ალვები ყველასგან გამოირჩევა — მათ თავისი განსაკუთრებული ენა აქვთ, და იქნებ თავისებურად ამღერებული სულიც. როდესაც არ უნდა მოხვიდე აქ, დღისით, თუ ღამით, ისინი ირწყვიან, ქარი ეთამაშება მათ ტოტებს და ფოთლები სხვადასხვა ხმაზე შრიალით ამბობენ თავის გულისსათქმელს.

უფრო გვიან, რამდენიმე წლის შემდეგ, მე გავიგე ორი ალვის ხის საიდუმლო. ისინი დგანან ამაღლებულ ადგილას, რომელიც მუდამ ღიაა ქარისათვის და ჰაერის უმნიშვნელო მოძრაობასაც განიცდიან, მათი ფოთლები გრძნობენ და იჭერენ ნიავის ყოველგვარ შეთამაშებას.

ამ უბრალო ჭეშმარიტების ამოხსნამ, მე სულაც არ ამიცრუა გული და არ გამიქარწყლა პირველი ბავშვური შთაბეჭდილებები, რასაც სათუთად ინახავს ჩემი გონება. და დღესაც ბორცვზე წამომდგარი ორი ალვის ხე მე ისევ არაჩვეულებრივი, ცოცხალი არსება მგონია. იქ, მათ მახლობლად დარჩა ჩემი ბავშვობა, როგორც ნამსხვრევი ზღაპრული ფერადოვანი შუშისა.

სწავლის უკანასკნელ დღეს, საზაფხულო არდადეგების დაწყების წინ, ბავშვები კისრისტეხით მოვრბოდით ხოლმე აქეთ ჩიტის ბუდეების ასაოხრებლად. ყოველთვის, როცა არ უნდა ამოგვერბინა აქ, ამ ბორცვზე, გოლიათი ალვის ხეები

ისე ირწეოდნენ, თითქოს, გვესალმებიანო თავიანთი საამო ჩრდილებითა და ფოთლების მოალერსე შრიალით.

ჩვენ კი ფეხშიშველი, თავზეხელაღებული ბიჭები ერთმანეთის ზურგზე შემდგარნი ვებლოტიალეზობდით მის ტოტებს და ვაშფოთებდით ფრინველთა სამეფოს. ფრინველთა გუნდი ყივილ-ხივილით დაგვტრიალებდა თავს. მაგრამ ჩვენ არაფერს დაგიდევდით — ცა ქუდად მიგვაჩნდა და დედამიწა ქალამნად. მივიწვევდით სულ მალა (რა თქმა უნდა, ვინც უფრო ყოჩაღი და მარჯვე იყო), და დიდი სიმალლიდან, სადაც ჩიტთა სამკვიდრებელია, ჩვენს თვალწინ იშლებოდა სინათლისა და უსაზღვროების ზღაპრული სამყარო. ჩვენ გვაოცებდა მიწის სიდიადე. სულგანაბულნი და სუნთქვაშეკრულნი ვიჯექით ჩვენ-ჩვენ ტოტზე და გვაიწყებოდა ჩიტებიც და მათი ბუდეებიც. კოლმეურნეობის საჯინიბო, რომელიც დედამიწის ზურგზე ყველაზე დიდი შენობა გვეგონა, აქედან ჩვეულებრივ ხუხულას ჰგავდა. აულს იქით, სადღაც უსაზღვროდ შორს, მოწითალო ჰორიზონტზე იკარგებოდა მკერდგადაშლილი ტრამალი. ჩვენ ვაკვირდებოდით მის მოლურჯო-მოიისფრო სივრცეებს, სანამ თვალი მიგვიწვდებოდა და ვარჩევდით სულ ახალ, ჩვენთვის აქამდე უცნობ მიწებს, რომელთა არსებობაზეც არაფერი ვიცოდით. ვერცხლისფერი ძაფივით ბრწყინავდნენ ჰორიზონტზე მდინარეები. ჩვენ კი, ტოტებში გაყუჩებულნი, ვფიქრობდით: ეს არის ქვეყნის დასალიერი, თუ ამას იქეთ კიდევ არის ასეთივე ზეცა, ასეთივე ღრუბლები, ტრამალები და მდინარეები? ტოტებში გატრუნულებს, ჩვენ გვესმოდა არაამქვეყნიური შრიალი ნიავისა და ფოთლები საპასუხოდ ერთხმად გვეჩურჩულებოდნენ, საოცნებო, უცნაურობით. სავსე მხარეებზე, მოლურჯო-მოიისფრო ჰორიზონტს იქით რომ იყო მიმალული.

მესმოდა ხმაური ალვის ხეთა და გული მიცემდა სიხარულისა და შიშისაგან, ამ გამუდმებული შრიალის აკომპანემენტში ვცდილობდი წარმომედგინა თუ როგორი იყვნენ ეს უცნობი სივრცეები. მხოლოდ ერთზე არ მიფიქრია თურმე მაშინ, ვინ დარგო აქ ეს ხეები? რაზე ოცნებობდა, რას ამბობდა ეს უცნობი ადამიანი, როდესაც მიწაში რგავდა ამ ხეთა ფესვებს, რა იმედით ზრდიდა იგი მათ ამ ბორცვზე?

ბორცეს, სადაც ალვის ხეები იდგა, რატომღაც „დიუიშენის სკოლას“ უწოდებდნენ. მახსოვს, როგორ კითხულობდა დაკარგული ცხენის პატრონი:

„ჩემი წაბლა ხომ არ დაგინახავთ?“ — ყველაზე უფრო ხშირად იგი ასეთ პასუხს იღებდა: „აი იქ, ზევით, დიუიშენის სკოლასთან მოვკარი ღამით თვალი, შეიძლება შენი იყო?!“ უფროსების მიბაძვით, ჩვენც ხშირად გვითქვამს: „წავიდეთ, ბიჭებო, დიუიშენის სკოლისაკენ, ალვის ხეებზე ბელურებს ბლღვირი გავადინოთ“.

ამბობდნენ, რომ ოდესღაც ამ ბორცვზე სკოლა იყო. ჩვენ ჩვენი ნანგრევებსაც ვერ შევესწარიით. ბავშვობაში მე დიდხანს ვეძებდი მის ნაშთებს, ვეძებდი, დავებნებოდი, მაგრამ ვერაიერს მივაკვლიე. შემდეგ კი უცნაურად მეჩვენა, თუ რატომ უწოდებდნენ ამ მოტიტვლებულ ბორცეს „დიუიშენის სკოლას“, ერთხელ როგორღაც ვკითხე მოხუცებს, ვინ არის-მეთქი ეს დიუიშენი? ერთმა მათგანმა აგდებულად მიპასუხა:

„ვინ არის? ახლაც ცოცხალია. კოკლი ცხვრის მოდგმიდანაა. დიდი ხნის ამბავია, დიუიშენი მაშინ კომკავშირელი იყო. ამ ბორცვზე კი მიგდებული ფარდული იდგა. სწორედ აქ გახსნა დიუიშენმა სკოლა, ბავშვებს ასწავლიდა. რა სკოლა იყო, სახელი ჰქონდა მხოლოდ, ძალზე საინტერესო დრო იყო! ვინც კი ცხენისთვის ფაფარში ხელის ჩავლება და უზანგში ფეხის გაყრა მოახერხა — უფროსიც ის იყო. ასე მოიქცა დიუიშენიც. მოუვიდა აზრი და გააკეთა კიდევ. ახლა ქვასაც ველარ ნახავთ ფარდულიდან — მხოლოდ სახელწოდება დარჩა“.

დიუიშენს ცუდად ვიცნობდი. მახსოვს მხოლოდ, ეს იყო ხანში შესული, მაღალი, მოუხეშავი კაცი, არწივისებურად წინ წამოწეული წარბებით. იგი მდინარის გაღმა ცხოვრობდა, კოლმეურნეობაში მუშაობდა და ძნელად სანახავი იყო. ხანდახან ჩვენს ქუჩაზე ჩამოივლიდა ხოლმე ცხენით, თოხი უნაგირზე ჰქონდა გადებული, ცხენიც თითქოს პატრონს მოჰკავდა. შემდეგ დიუიშენი დაბერდა, ამბობდნენ, ფოსტალიონობა დაიწყო. ეს სიტყვამ მოიტანა. ჩემს მაშინდელ წარმოდგენაში კომკავშირელი — ეს იყო გულფიცხელი შრომასა თუ სიტყვაში, აულში ყველაზე მეტბრძოლი ადამიანი, რომელიც კრებაზე

სიტყვით გამოვა, გაზეთში ლოთებსა და მფლანგველებზე დაწერს. მე ვერაფრით ვერ წარმომედგინა, რომ ეს წვერმოშვებული წყნარი კაცი ოდესმე შეიძლებოდა კომკავშირელი ყოფილიყო და ყველაზე მეტად მიკვირდა, რომ, თვითონ თითქმის უწიგნური, ბავშვებს ასწავლიდა. არა, ამის დაჯერება არ შემეძლო! გულახდილად რომ ვთქვათ, ეს ერთი იმ მრავალრიცხოვან ზღაპართაგანი მეგონა, რომლებსაც ჩვენს აულში ჰყვებოდნენ. მაგრამ სინამდვილეში თურმე ყველაფერი სხვანაირად იყო...

შარშან შემოდგომაზე აულიდან დეპეშა მივიღე. თანამემამულეები ახალი სკოლის საზეიმო გახსნაზე მეპატიებოდნენ სკოლა კოლმეურნეობამ ააშენა თავისი სახსრებით. გადავწყვიტე ჩავსულიყავი, აულში ასეთი სასიხარულო რამ ხდებოდა დამე სახლში რა გამაჩერებდა. ის კი არა, რამდენიმე დღით ადრე წავედი. ვფიქრობდი, გავივლ-გამოვივლი, ახალ ჩანახატებს გავაკეთებ-მეთქი. მოწვეულთა შორის თურმე აკადემიკოსი სულაიმანოვაც იყო. მითხრეს, რომ იგი ორ-სამ დღეს დარჩებოდა და აქედან წავიდოდა მოსკოვს.

მე ვიცოდი, რომ ეს სახელგანთქმული ქალი ბავშვობისას წასულიყო ჩვენი აულიდან ქალაქად. გავიცანი, როცა მეც ქალაქის მცხოვრები გავხდი, მაშინ უკვე საკმაოდ იყო ხანშიშესული, ჩასუქებულს თმებში ბლომად გამორეოდა ჭალარა. ჩვენი ცნობილი თანამემამულე უნივერსიტეტში კათედრას განაგებდა, კითხულობდა ლექციებს ფილოსოფიაში, მუშაობდა აკადემიაში და ხშირად მოგზაურობდა საზღვარგარეთ. მას ერთის წუთით არ ჰქონდა მოცლა და ვერ მოვახერხებ ახლოს გავცნობოდი, მაგრამ როცა არ უნდა შეეხვედროდი, იგი აუცილებლად გამომკითხავდა ჩვენი აულის ამბავს, გამიზიარებდა თავის აზრს ჩემი ნამუშევრების შესახებ. ერთხელ გავბედე დავუთხარი:

— ალტინაი სულაიმანოვნა, კარგი იქნებოდა წასულიყავით აულში, მოგენახულებინათ თანასოფლელები. თქვენ ყველა გიცნობთ, ამაყობენ თქვენით, მაგრამ რაც იციან, მხოლოდ გავონილით, ხანდახან ამბობენ კიდევ, ჩვენი ცნობილი მეცნიერი, ალბათ, არ გკადარულობს, სულ რომ დაივიწყა ჩვენი სოფლის გზაო.

— უნდა ჩავიდე, რა თქმა უნდა, — ნაღვლიანად გაიღმა ალტინაი სულაიმანოვნამ.— მეც დიდი ხანია ვოცნებობ მოვინახულო კურკურეუ, თითქმის მთელი საუკუნეა იქ არ ვყოფილვარ. მართალია აულში ნათესაეები არა მყავს, მაგრამ ეს ხომ არ არის გადამწყვეტი, აუცილებლად უნდა მოვინახულო, მომენატრა მშობელი კუთხე.

აკადემიკოსი სულაიმანოვა სკოლაში მაშინ მოვიდა, როდესაც საზეიმო სხდომა ის-ის იყო უნდა დაწყებულიყო. კოლმეურნეებმა ფანჯრიდან დაინახეს მისი მანქანა და წამის უმალ ეამოცვივდნენ გარეთ. ნაცნობს თუ უცნობს, დიდსა და პატარას — ყველას უნდოდა ხელი ჩამოერთმია მისთვის. ალტინაი სულაიმანოვნა, ალბათ, არ მოელოდა ასეთ შეხვედრას და მომეჩვენა, რომ დაიბნა კიდევ, მკერდზე ხელები გადაიქლო და თავმოდრეკით ესალმებოდა ხალხს. თან ძლივს მიიკვლევდა გზას პრეზიდენტისაკენ.

ალბათ, ალტინაი სულაიმანოვნა არაერთხელ ყოფილა საზეიმო სხდომებზე და ყოველთვის სიხარულითა და პატივისცემით ხვდებოდნენ, მაგრამ აქ, უბრალო სოფლის სკოლაში, თანამემამულეთა გულმხურვალე შეხვედრამ იგი ააღელვა, გული აუჩუყა, ყოველნაირად შეეცადა დაემალა თვალებზე მომდგარი ცრემლები.

საზეიმო ნაწილის შემდეგ პიონერებმა ძვირფას სტუმარს წითელი ყელსახვევი გაუკეთეს, ყვავილები მიართვეს და მისი სახელი პირველი ჩაწერეს ახალი სკოლის საპატიო წიგნში. შემდეგ სასკოლო თვითმოქმედების კონცერტი გაიმართა საინტერესო და მხიარული, რის შემდეგაც სკოლის დირექტორმა ჩვენ — სტუმრები, მასწავლებლები, კოლმეურნეობის აქტივისტები — თავისთან მიგვიწვია სტუმრად.

აქაც ათანაირად გამოხატავდნენ ალტინაი სულაიმანოვნას სტუმრობით გამოწვეულ სიხარულს. ყველაზე საპატიო ადგილი მიუჩინეს — ნოხებით მორთული და ყოველნაირად ცდილობდნენ ხაზი გაესვათ თუ რაოდენ დიდ პატივს სცემდნენ მას. როგორც ყოველთვის ასეთ შემთხვევებში, ირგვლივ ხმაური იდგა, სტუმრები ლაპარაკობდნენ, წარმოთქვამდნენ სადღეგრძელოებს. ოთახში ბიჭუნა შემოვიდა და სახლის პატრონს

დებეშების შეკვრა მიაწოდა. დებეშები ხელიდან ხელში გადადიოდა: ყოფილი მოსწავლეები ულოცავდნენ თანასოფლელებს ახალი სკოლის გახსნას.

— დებეშები მოხუცმა დიუიშენმა მოიტანა? — იკითხა სკოლის დირექტორმა.

— დიახ, — უპასუხა ბიჭუნამ. — მთელი გზა მოვერეკებოდი ცხენს, რომ კრებისათვის მომესწრო, ხალხის თანდასწრებით წაგეკითხათო. ცოტა დააგვიანდა ჩვენს აკსაკალს, გულდაწყვეტილი მოვიდა.

— რას უდგას გარეთ, უთხარი ჩამოხტეს ცხენიდან, შემოიპატიე.

ბიჭუნა გარეთ გავიდა დიუიშენის შემოსაპატიებლად. ალტინაი სულაიმანოვმა, რომელიც ჩემს გვერდით იჯდა, რატომღაც აწრიალდა და უცნაურად, თითქოს უცებ მოაგონდა რაღაც, მე შემეკითხა, რომელ დიუიშენზეა ლაპარაკი?

— კოლმეურნეობის ფოსტალიონზე, ალტინაი სულაიმანოვმა. იქნებ იცნობთ კიდევ მოხუც დიუიშენს?

მან გაურკვეველად დამიქნია თავი, შემდეგ შეეცადა წამომდგარიყო, მაგრამ ამ დროს ცხენის ფლოკეები ახმაურდა, ყმაწვილი შემობრუნდა.

— ვთხოვე, აგაი, მაგრამ არ დაიცადა, წერილები მაქვს დასარიგებელიო.

— თუ ასეა, დაარიგოს, რატომ შევეუშალოთ ხელი. შემდეგ მოხუცებთან დაჯდება, — უკმაყოფილოდ ჩაილაპარაკა ვილაყამ.

— ო-ო, თქვენ არ იცნობთ ჩვენ დიუიშენს! იგი კანონის კაცია. სანამ საქმეს არ მოითავებს, არსად არ გადაუხვევს.

— სწორია, უცნაური კაცია. ომის შემდეგ ჰოსპიტალიდან რომ გამოვიდა, უკრაინაში ცხოვრობდა. ხუთი წელია, რაც დაბრუნდა. ჩემს მშობელ მიწაში მინდა დავიმარხოო. მთელი თავისი სიცოცხლე ასე ეულად ცხოვრობს.

— მაინც კარგი იქნებოდა, რომ შემოსულიყო... თუმცა... — და სახლის უფროსმა ხელი ჩაიქნია.

— ამხანაგებო, ოდესღაც ჩვენ, ვისაც ახსოვს, დიუიშენის სკოლაში ვსწავლობდით. — სოფლის ერთ-ერთმა ყველაზე პატივსაცემმა ადამიანმა ჭიქა ასწია. — თვითონ მან ალბათ, ანბანის ყველა ასო არც კი იცოდა. მოლაპარაკემ თვალები დახუჭა და თავი გადაიქნია. მისი სახე გაკვირვებას და დაცინვას გამოხატავდა.

— მართალია, სწორედ რომ ასე იყო, — გამოეხმაურა რამოდენიმე.

ყველას გაეცინა.

— რა სალაპარაკოა! რას არ იგონებდა მაშინ დიუიშენი, ჩვენ კი მას სერიოზულად ვთვლიდით მასწავლებლად.

როცა სიცილი მიწყნარდა, სოფლის პატივსაცემმა კაცმა განაგრძო:

— ახლა კი ხალხი ჩვენს თვალწინ გაიზარდა. აკადემიკოს ალტინაის მთელი ქვეყანა იცნობს. თითქმის ყოველ ჩვენთაგანს აქვს საშუალო განათლება, ბევრს — უმაღლესიც. დღეს აულში ახალი სკოლა გავხსენით, მარტო ეს ფაქტიც მეტყველებს, თუ როგორ შეიცვალა ცხოვრება. მოდით, სახლიკაცებო, შევსვათ სადღეგრძელო იმისა, რომ კურკურეული ქალიშვილები და ვაჟიშვილები ყოველთვის მოწინავენი ყოფილიყვნენ.

ახმაურდნენ, ყველამ ერთხმად დაუჭირა მხარი სადღეგრძელოს, მხოლოდ ალტინაი სულაიმანოვნა გაწითლდა, რაღაცით ძლიერ დარცხვენილმა ოდნავ მოსვა ჭიქა. მაგრამ მოზეიმე, ლაპარაკით გართულ ადამიანებს, ეს არც შეუმჩნევიათ.

ალტინაი სულაიმანოვნამ რამდენჯერმე დახედა საათს. შემდეგ კი, როცა სტუმრები გარეთ გამოვიდნენ, მე შევამჩნიე, რომ არხთან მდგარი დაყინებით მისჩერებოდა ბორცვს, სადაც შემოდგომისაგან წითელფერმიძალებული ორი ალვის ხე იდგა. მზე ჩადიოდა, იგი მწუხრჩამოწოლილი ტრამალის მოიისფრო პორიზონტიდან გვიგზავნიდა გამოსათხოვარ სალამს. მისი მიმქრალი სხივები მწუხარე მოწითალო გვირგვინს ადგამდნენ თავზე მოშრიალე ალვებს.

ალტინაი სულაიმანოვნასთან მივედი.

— ახლა მათი ფოთლები მიწაზე აფენია, თქვენ ეს ხეები გაზაფხულზე უნდა ნახოთ, ყვავილობის ყამს.

— მეც ამაზე ვფიქრობ, — ამოიოხრა ალტინაი სულაიმანოვნამ, მერე კი ცოტა ხნის დუმლის შემდეგ წყნარად, თითქოს თავისთვის დაუმატა: — დიახ, ყოველ ცოცხალ არსებას თავინი გაზაფხული და შემოდგომა აქვს.

მის მიმქრალ თვალებსა და ნაოკებით დაფარულ სახეზე სევდიანმა ჩრდილმა გაიელვა. იგი უცქერდა ალვებს, რაღაც ძალიან ქალურად, სევდიანად და უცებ დავინახე, რომ ჩემს წინ აკადემიკოსი სულაიმანოვა კი არა, ჩვეულებრივი ყირგიზი ქალი დგას, უეშმაკო თავის სიხარულსა და მწუხარებაშიც. ამ სწავლულ ქალს, ალბათ, ახლა თვალწინ დაუდგა თავისი ბავშვობა, ისეთი ჩვენს სიმღერებში რომ უმღერიან — უკან ვერაფრით დაიბრუნებო. მას რაღაცის თქმა უნდოდა ალვის ხეთა მაცქერალს, შემდეგ, ალბათ, გადაიფიქრა, სწრაფად გაიკეთა სათვალეები, რომელიც აქამდე ხელში ეჭირა.

— მოსკოვის მატარებელი აქ ვგონებ თერთმეტ საათზე ჩამოივლის, არა?

— დიახ, ღამის თერთმეტზე.

— მაშასადამე, უნდა მოვემზადო.

— რატომ ასე ჩქარა? ალტინაი სულაიმანოვნა, თქვენ ხომ რამდენიმე დღეს უნდა დარჩენილიყავით. ხალხი არ გაგიშვებთ.

— არა, სასწრაფო საქმე მაქვს, უნდა წავიდე.

ვერაფრით ვერ დაითანხმეს დარჩენილიყო, როგორ არ ევედრებოდნენ, ალტინაი სულაიმანოვნამ თავისი გაიტანა..

ამასობაში დაბნელდა კიდეც. დანალვლიანებულმა თანასოფლელებმა მანქანაში ჩასვეს და პირობა ჩამოართვეს, რომ სხვა დროს ერთი კვირით, იქნებ მეტითაც ესტუმრებოდა მშობლიურ აულს. მე ალტინაი სულაიმანოვნა სადგურამდე გავაცილე.

რატომ აჩქარდა იგი? თანასოფლელთა განაწყენება, ისიც ასეთ დღეს, მე არცთუ ისე გონივრულად მიმაჩნდა. გზაზე რამდენჯერმე მინდოდა მეკითხა, მაგრამ ვერ გავბედე. იმიტომ კი არა, რომ მეშინოდა უტაქტობა არ გამომეჩინა — უბრალოდ შივხვდი არაფერს მეტყოდა. მთელი გზა დუმდა, რაღაცაზე ჩაფიქრებული.

სადგურზე შინც შევეკითხე:

— ალტინაი სულაიმანოვანა, თქვენ რაღაც უგუნებოდ ხართ, ჩვენ ხომ არ გაგანაწყენეთ?

— რას ამბობ! როგორ მოგივიდა ასეთი აზრი. ვის უნდა ეწყენინებინა. შემეძლო მხოლოდ საკუთარ თავზე გაენაწყენებულეყავი, საკუთარ თავზე კი შეიძლება.

ასე წავიდა იგი. ქალაქში დავბრუნდი და რამოდენიმე დღის შემდეგ მოულოდნელად მისგან წერილი მივიღე. მატყობინებდა, რომ მოსკოვში უფრო დიდხანს შეყოვნდებოდა, ვიდრე ფიქრობდა, ალტინაი სულაიმანოვანა მწერდა:

„თუმცა ბევრი მნიშვნელოვანი და სასწრაფო საქმე მაქვს, მაგრამ გადავწყვიტე ყველაფერი განზე გადამედო და თქვენთვის ეს ბარათი მომეწერა. თუ თქვენ საინტერესოდ მოგეჩვენებათ, რასაც აქ ვწერ, გთხოვთ მოიფიქროთ როგორ შეიძლება გააცნოთ იგი ადამიანებს. ფიქრობ, რომ ეს სჭირდებათ არა მარტო ჩემს თანასოფლელებს, არამედ ყველას, განსაკუთრებით ახალგაზრდობას. ასეთ დასკვნამდე მივედი დიდი ხნის ფიქრის შემდეგ. ესაა ჩემი აღსარება. მე ჩემი ვალი უნდა მოვიხადო. რაც მეტი ადამიანი გაიგებს ამის შესახებ, უფრო ნაკლებად შემაწუხებს სინდისის ქენჯნა. ნუ მოგერიდებათ ჩემი უხერხულ მდგომარეობაში ჩაყენება. ნურაფერს დამალავთ...“

რამოდენიმე დღე დავდიოდი ამ წერილის შთაბეჭდილებებით დამძიმებული და ვერაფერი უკეთესი ვერ მოვიფიქრე, გარდა იმისა, რომ მომეთხრო ამაზე ალტინაი სულაიმანოვანას სახელით.

ეს იყო 1924 წელს. დიახ, 1924 წელს.

იქ, სადაც ახლა ჩვენი კოლმეურნეობაა, ღარიბი პატარა აული იყო. მე მაშინ თოთხმეტი წლისა ვიყავი და განსვენებული მამაჩემის ბიძაშვილთან ვცხოვრობდი. დედაც აღარ მყავდა.

შემოდგომით, როცა შედარებით მდიდრებმა გამოსაზამთრებელ ადგილებს მიაშურეს, ჩვენთან აულში უცნობი ახალგაზრდა ჩამოვიდა, მას ჯარისკაცის ფარაჯა ეცვა. დამამახსოვრდა მისი ფარაჯა, იგი რატომღაც შავი მაულისაგან იყო შეკერილი. ფარაჯიანი კაცის გამოჩენა ჩვენს აულში, რომელიც გზე-

ბისაგან მოშორებით, სადაც მთებშია მიყუებული, ნამდვილი მოვლენა იყო.

ჯერ ამბობდნენ, რომ იგი არმიაში ზეთაური იყო და აულშიც ალბათ უფროსად მოვიდაო, შემდეგ გამოიკვია: არსადაც არ ყოფილა მეთაურად, უბრალოდ იმ ტაშტანბეკის შვილი იყო, რომელიც ჯერ კიდევ შიმშილობის დროს, მრავალი წლის წინათ წავიდა ჩვენი აულიდან რკინიგზაზე სამუშაოდ, წავიდა და დაიკარგა. მისი შვილი დიუიშენი ჩვენს აულში მასწავლებლად გამოგზავნეს.

იმ ხანებში სიტყვები: „სკოლა“, „სწავლება“ ახალი ხილი იყო და მისი მნიშვნელობა ხეირიანად არც კი ესმოდათ. ვილაცას სჯეროდა ხმებისა, სხვებს მიაჩნდათ, რომ ყველაფერი ეს კორია და სკოლა იქნებ დავიწყებოდათ კიდევ, რომ ერთ დღეს ხალხი კრებაზე არ შეეკრიბათ. ბიძაჩემი დიდხანს ბუზღუნებდა: — „რა კრება გამოიგონეს, აუცილებლად საქმეს უნდა მოგწყვიტონ კაცი“, მაგრამ შემდეგ მაინც შეკაზმა ცხენი და კრებაზე ამხედრებული წავიდა, ისე როგორც შეჭვერის მამაკაცს, რომელიც თავს პატარს ცემს. მის კვალდაკვალ, მეზობლის ბავშვებთან ერთად გავსწიე მეც.

როცა აქლოშინებულებმა ავირბინეთ ბორცვზე, სადაც ჩვეულებრივ კრებები ტარდებოდა, იქ შეჭკუფულ ხალხს რაღაცაზე ელაპარაკებოდა შავფარაჯიანი ფერმკრთალი ყმაწვილი. ჩვენ მისი სიტყვები არ გვესმოდა და უფრო ახლოს მისვლა გვინდოდა, მაგრამ ამ დროს ერთმა დაქექილქურქიანმა მოხუცმა, თითქოს გამოერკვია, სიტყვა შეაწყვეტინა.

— ყური მიგდე, შვილო, — დაიწყო მან, თან სიჩქარისაგან ენა ებმოდა, — აღრე ბავშვებს მოლები ასწავლიდნენ. მამაშენს კი ჩვენ კარგად ვიცნობთ, იგი ისეთივე მშოიერტიტველი იყო, როგორც ჩვენ. ერთი ხეირიანად ამიხსენი, როდის მოასწარი მოლა გამხდარიყავი.

— მე მოლა არა ვარ, აქსაკალო, მე კომკავშირელი ვარ. — სწრაფად გამოეპასუხა დიუიშენი, — ახლა ბავშვებს მოლები კი არა, მასწავლებლები ასწავლიან. მე არმიაში ვისწავლე. მანამდეც ცოტა რამ ვიცოდი. აი როგორი მოლა ვარ!

— ეს სხვა საქმეა...

— ყოჩაღ! — გაისმა მოწონების შექაზილები.

— კომკავშირმა გამომგზავნა, რომ თქვენს ბავშვებს ვასწავლო. ამისათვის გვჭირდება შენობა. მე ვფიქრობ, რომ სკოლა, რა თქმა უნდა, თქვენის დახმარებით მოვაწყო, აი იმ საჯინბოში, ბორცვზე რომ დგას. თქვენ რას იტყვით, სახლიაკებო?

ხალხი შეშფოთდა. ყველას უნდოდა მიხვედრილიყო საით უმიზნებდა დიუიშენი. სიჩუმე დაარღვია სატიმკულმა, რომელსაც მეტსახელად მოდავეს უწოდებდნენ. იგი, უნაგირის ტახტას დაყრდნობილი, უსმენდა საუბარს და ყამიღანყამად იპურკყებოდა.

— მოიცა, მოიცა, ყმაწვილო, — წაილაპარაკა მან, თან თვალები მოკუტა, თითქო მიზანში იღებსო მოსაუბრეს. — შენ აჯოზებს ის გვიოხრა, რაში გვჭირდება სკოლა?

— როგორ თუ რაში? — დაიბნა დიუიშენი.

— სწორს ამბობს! — მხარი დაუჭირა ვილაყამ.

და ყველა ერთად ახმაურდა, ამოძრავდა.

— ჩვენი დღე და მოსწრება შრომით ვირჩენთ თავს. თოხბ გვაქმევს პურს. ჩვენი შვილებიც ასევე იცხოვრებენ, რაში ჭირდებათ მათ სწავლა. განათლება უფროსებისთვისაა საჭირო, ჩვენ კი უბრალო ხალხი ვართ. შეგვეშვი, თავგზას ნუ აგვირევ. ხალხი გაყუჩდა.

— როგორ, თქვენ წინააღმდეგი ხართ, რომ თქვენმა ბავშვებმა ისწავლონ? — იკითხა გაშტერებულმა დიუიშენმა, თან დაუინებით დააცქერდა მის ირგვლივ მყოფ ადამიანთა სახეებს.

— წინააღმდეგი რომ ვიყოთ ძალას დაგვატან? ის დრო წავიდა. ახლა ჩვენ თავისუფლები ვართ. როგორც გვინდა ისე ვიცხოვრებთ.

დიუიშენმა ფერი დაკარგა. აკანკალებული ხელით ფარაჯის საკინძეები დაიგლიჯა, გიმნასტურის ჯიბიდან ოთხად გაკეცილი ფურცელი ამოიღო, სწრაფად გაშალა და თავს ზევით ააფრიალა:

— მაშ, თქვენ წინააღმდეგნი ხართ ამ ქალაქისა, სადაც ნათქვამია, რომ ბავშვებმა უნდა ისწავლონ და რომელზეც საბჭოთა მთავრობის ბეჭედი დასმული? ვინ მოგცათ მიწა,

წყალი, თავისუფლება? ვინ არის საბჭოთა კანონების წინააღმდეგი, ვინ? ხმა ამოიღეთ!

„ხმა ამოიღეთ!“ ისეთი რისხვით იყო ნათქვამი ეს სიტყვები, რომ მან ტყვიასავით გაიხმაურა შემოდგომის სიწყნარეში და მოკლე ექოდ დაეჭახა კლდეებს. არავის სიტყვა არ უთქვამს. იღგნენ თავჩაქინდრულნი და დუმდნენ.

— ჩვენ ლატაკები ვართ, — უკვე წყნარად წაილაპარაკა დიუიშენმა, — მთელი ცხოვრება ფეხქვეშ გვთელავდნენ და გვამცირობდნენ. სიბნელეში ვცხოვრობდით. ახლა საბჭოთა ხელისუფლებას სურს სინათლე დაგვანახოს, წერა-კითხვა გვასწავლოს. ამისათვის კი ჩვენმა ბავშვებმა უნდა ისწავლონ...

დიუიშენი გაჩუმდა. და მაშინ ისევ იმ დაქეჩილქურქიანმა, რომელსაც აინტერესებდა როდის მოასწრო დიუიშენმა მოლად გახდომა, შემარიგებელი ტონით წაილაპარაკა:

— კარგი, ასწავლე, თუკი გსურს, ჩვენ რა...

— მაგრამ მე გთხოვთ დამეხმაროთ. ბაის საჯინიბო გორაკზე შესაკეთებელია, მდინარეზე ხილია გასადები, შეშაც მოსამარაგებელია.

— მოიცა, ჯიგიტო, რაღაც ბევრი მოინდომე ერთბაშად! — შეაწყვეტინა დიუიშენს გაჩუბებულმა სატიმკულმა.

მან გადააბურქყა, ისევ მოჭუტა თვალები, თითქმის უმიზნებლად და დაიწყო:

— მთელი აულის გასაგონად გაიძახი: სკოლას გავხსნიო! მაგრამ ერთი შენს თავზე დაიხედე — ქურქი შენ არ გაცვია, ცხენზე ვერ დამჯდარხარ, არ გყავს და როგორ დაჯდები, ხელისგულის ოდენა სახნავი მიწა არ გაბადია, საქონლის ჭაჭანება არაა შენს ეზო-მიდამოში. ერთი მითხარი, რითი აპირებ ცხოვრებას, ძვირფასო ადამიანო? იქნებ ფიქრობ სხვის ჯოგებს დაეპატრონო?

— თავს გავიტან როგორმე. ხელფასს მივიღებ.

— ა-ა, დროზე გეთქვა! — და სატიმკული თავისი თავით კმაყოფილი უნაგირზე შესწორდა. — ახლა ყველაფერი გასაგებია. ჯიგიტო, შენ შენი საქმე გააკეთე, ბავშვებს ასწავლე. ხაზინაში ფულები საკმაოდაა. ჩვენ კი შეგვეშვი, ღვთის წყალობით, საქმე თავსაყრელი გვაქვს.

ამ სიტყვებით სატიმკულმა ცხენი მოაბრუნა და შინისაკენ გასწია. მას სხვებიც გაჰყვნენ. დიუიშენი კი დარჩა ისე, როგორც იდგა, ხელში გაშლილი ქაღალდით. საბრალომ არ იცოდა რა ექნა.

დიუიშენი შემეცოდა. თვალმოუშორებლივ შეეცქეროდნენ ვიდრე ბიძაჩემმა არ მომადახა:

— ეი, შენ გაბურძენულო, რა პირდაღებული დგახარ, აბა გასწი სახლში — მე ბავშვებს გავეციდე. — ერთი უყურე, ამათაც ისწავლეს კრებებზე სიარული!

მეორე დღეს, როცა გოგოები წყალზე წავედით, მდინარის პირას დიუიშენს შევხვდით. იგი ფონით გადადიოდა მდინარის მეორე ნაპირზე, თან გადაჰქონდა ნიჩაბი, თოხი და ძველისძველი ვედრო.

ამ დღიდან მოყოლებული ყოველდღე ვხედავდით როგორ ადიოდა ბორცვზე დიუიშენი და მიემართებოდა მიტოვებული საჩინბოსაკენ. იგი მხოლოდ გვიან საღამოს ბრუნდებოდა უკან აულში. ხშირად ვხედავდით როგორ მიდიოდა ზურგზე მოკიდებული ფიჩხის ან თივის დიდი კონით. ხშირად მინახავს უზანგებზე წამოწეული მხედარი თვალზე ხელს მოიჩრდილებდა და გაკვირვებული ამბობდა:

— ეს ხომ მასწავლებელი დიუიშენია ფიჩხს რომ ეზიდება?

— ნამდვილად ისაა.

— ეხ, საცოდავი. გამოდის, რომ მასწავლებლობა ადვილი საქმე არ ყოფილა.

— შენ როგორ გეგონა, ხედავ რამდენს მიათრევს, ბაის მოსამსახურეზე ნაკლებს კი არა.

— მას რომ ყური უგდო...

— ეს იმიტომ, რომ ბეჭდიანი ქაღალდი აქვს, მთელი ძალა იმაშია.

ერთხელ ტომრებით მოგვექონდა წივა, რომელსაც აულის განაპირას ვაგროვებდით, უკან ვბრუნდებოდით და სკოლისაკენ შევუხვით. გვანტიერესებდა გვენახა რას აკეთებდა მასწავლებელი. ძველი თიხის ფარდული ადრე ბაის საჩინბო იყო. ზამთრობით აქ მას ფაშატები ჰყავდა, რომლებმაც უამინდობის

დროს მოიგეს კვიცები. საბჭოთა ხელისუფლების მოსვლის შემდეგ ბაი სადღაც გაჰქრა, საჯინიბო კი ადგილზე დარჩა. აღარავინ ამოდიოდა და აქაურობა ბირკითა და ეკალ-ბარდებით დაიფარა. ახლა ყველა სარეველა ძირფესვიანად ამოძირკული გვერდზე გროვად ეყარა, ეზო მთლიანად გაწმენდილი იყო. წვიმისაგან ჩამონგრეული და ჩამორეცხილი კედლები თიხით იყო შელესილი, ხოლო მუდამ მოჭრიალე, ცალ ანჯამაზე ჩამოკიდებული კარი — შეკეთებული და მორგებული.

როცა ტომრები მიწაზე დაედეთ, რომ შეგვესვენა, ყარებშია დიუიშენი გამოჩნდა, იგი მთლად თიხით იყო მოსვრილი. ჩვენ რომ დაგვინახა, ჭერ გაუკვირდა, შემდეგ ალერსიანად გაგვიღიმა და სახიდან ოფლი ჩამოიწმინდა.

— სად ყოფილხართ, გოგონებო?

ჩვენ მიწაზე ვიჯექით ტომრების გვერდით და შემცბარნი შევეყურებდით ერთმანეთს. დიუიშენი მიხვდა, რომ ვმორცხობდით და გამამხნეველად ჩაგვიკრა თვალი:

— ტომრები თქვენზე უფრო დიდია. კარგი ქენით, რომ შემოიხედეთ, აქ ხომ თქვენ უნდა ისწავლოთ. კაცმა რომ თქვას, სკოლა უკვე მზადაა. ეს-ესაა დავამთავრე ერთ კუთხეში ღუმელის ამოშენება, ხედავთ მილებს სახურავზე? ახლა შეშა უნდა მოვიმარაგოთ ზამთრისათვის. არც ესაა ძნელი საქმე. ირგვლივ ქვეყნის წივაა. შემდეგ იატაკზე თივის დაგება და სწავლის დაწყებაც შეიძლება. თქვით, გინდათ თუ არა სწავლა, ივლით სკოლაში?

მე ყველაზე უფროსი ვიყავი მეგობარ გოგონებში და გავბედე პასუხი:

— თუკი ბიცოლა გამომიშვებს, ვივლი.

— რატომაც არ გამოგიშვებს, გამოგიშვებს, რა თქმა უნდა. რა გქვია?

— ალტინაი, — ვუპასუხე და ხელი დავაფარე მუხლზე გადახეულ კაბას.

— ალტინაი — კარგი სახელია. ალბათ, შენც კარგი ხარ, არა? მან ისე კეთილად გამიღიმა, რომ გული გამითბა. — მაშ ასე, ალტინაი, სხვებიც წამოიყვანე სკოლაში. გასაგებია?

— გასაგებია, ძია.

— მასწავლებელი დამიძახე. არ გინდათ სკოლის ნახვა? შემოდით ნუ გერიდებათ.

— არა, წავალთ, სახლში გვაგვიანდება, — დავიმორცხვეთ ჩვენ.

— თუ ასეა, გაიქეცი. მერე ნახავთ, როცა სასწავლებლად მოხვალთ. მე კი დაბნელებამდე კიდევ მოვასწრებ ერთი ტომარა წივის მოტანას.

მან თოკი და ნამგალი აიღო და მინდვრისაკენ გასწია. ჩვენც ავდექით, ტომრები ზურგზე მოვიკიდეთ და აულისაკენ გავუდექით გზას. უცებ თავში მოულოდნელი აზრი მომივიდა.

— მოიცათ, გოგონებო! — დავუძახე მეგობრებს. — მოდი დავტოვოთ ეს წივა აქ, ზამთარში მეტი სათბობი გვექნება.

— სახლში ხელცარიელნი დავბრუნდეთ? რა ჭკვიანი ხარ!

— ჩვენ კიდევ მოვასწრებთ შეგროვებას.

— უკვე გვიანია, სახლშიც გაგვიწყრებიან.

და გოგონებს ჩემთვის აღარ მოუცდიათ, ფეხს აუჩქარეს.

აქამდე ვერ გამიგია, რამ გადამაწყვეტინა მაშინ ასეთი საქმის ჩადენა. შეიძლება მეგობრებზე გავნაწყენდი, რომ არ დამიკერეს და გადავწყვიტე უკან აღარ დამეხია, ანდა იქნებ იმიტომ, რომ იმ თავითვე ჩემი ნებისყოფა, ჩემი სურვილები უხეში ადამიანების მუჭლუგუნების ცემით იყო დასამარებულნი, ძალიან მომინდა რითიმე სამაგიერო მიმეზლო ფაქტიურად უცნობი კაცისათვის, იმ კეთილი ღიმილის გამო, რამაც გული გამითბო, პატარა ნდობისათვის, რომელიც გამომიცხადა. რამდენიმე კეთილი სიტყვისათვის. კარგად ვიცი, დარწმუნებული ვარ, რომ ჩემი ცხოვრება მთელი სიხარულითა და ტანჯვით დაიწყო სწორედ იმ დღეს ერთი ტომარა წივიდან. ამას იმიტომ ვამბობ, რომ პირველად ჩემს ცხოვრებაში არ შეუშინდი სასჯელს და გავაკეთე ის, რაც საჭიროდ მივიჩნიე. როცა მეგობრებმა მიმატოვეს, სირბილით მივბრუნდი დიუიშენის სკოლისაკენ, კარის წინ დავცალე ტომარა და რაც ძალი და ღონე მქონდა მოვკურცხლე ხევებსა და ღელეებში წივის შესაგროვებლად.

მივბრბოდი არც ფვიქრობდი საით, ძალა მომქარბდებოდა, გული ისე მიცემდა, თითქოს უდიდესი გმირობა ჩავიდინე. მე-

გონა მზემაც იცოდა ჩემი სიხარულის ამბავი. ყოველ შემთხვევაში, მე კარგად ვიცოდი რატომ მივრბოდი ასე მსუბუქად და ლალად. იმიტომ რომ გავაკეთე მცირე, მაგრამ მაინც კეთილი საქმე.

მზე ბორცვებისკენ იხრებოდა, იმალებოდა, მეჩვენებოდა, რომ იგი არ ჩქარობდა, უნდოდა ჩემი ცქერით დამტკბარიყო. იგი აღამაზებდა ჩემს გზას. შემოდგომის დამაზრალი მიწა წითელ, ვარდისფერ და მოლურჯო ხალიჩად მეგებოდა ფეხქვეშ. მოციმციმე სხივები ხტოდნენ გამხმარ ვაციწვერებზე. მზე ცეცხლივით ენთო ჩემი ათასგზის დაკერებული კაბის მოვერცხლილ ღილებზე. მე კი მივრბოდი, გულში ვზეიმობდი, შევძახობდი მიწას, ცას, ქარს: „შემომხედეთ! შემომხედეთ რა ამაყი ვარ! ვისწავლი, ვივლი სკოლაში და თან გავიყოლებ სხვებსაც!“

არ ვიცი რამდენ ხანს მივრბოდი, უცებ გამოვერკვიე: წივა უნდა შემეგროვებინა. და აი უცნაურობა: მთელი ზაფხული ბალახობდა აქ საქონელი და წივა თავზე საყრელად იყო, ახლა კი თითქოს მიწამ უყო პირიო. შეიძლება არც კი ვეძებდი? გადავდიოდი ერთი ადგილიდან მეორეზე და რაც უფრო შორს მივდიოდი, მით უფრო იშვიათად ვპოულობდი. მაშინ გავიფიქრე დაბნელებამდე ვერ მოვასწრებ ტომრის გავსებას-თქო და შემეშინდა, ავწრიალდი ბუჩქებს შუა, ავჩქარდი. როგორც იქნა სანახევროდ გავავსე ტომარა. ამასობაში მზე ჩავიდა და ხევებს სიბნელე წამოეპარა.

არასოდეს დავრჩენილვარ მინდვრად მარტო ასე გვიან. დადუმებულ ბორცვებს დამემ თავისი შავი ფრთა გადაათარა. შიშისაგან არ მახსოვს როგორ მოვიგდე ტომარა ზურგზე და მოვკურცხლე აულისაკენ. ძალიან მეშინოდა. იქნებ მეყვირა, ავტირებულებიყავი კიდევ, მაგრამ მაჩერებდა იმის აზრი, რას იტყოდა მასწავლებელი დიუიშენი ასე უმწეო რომ დავენახე. თავს ვიმაგრებდი, უკან არ ვიხედებოდი, თითქოს მასწავლებელი მართლაც მითვალთვალებდა სადღაც შორიდან.

აქლოშინებულმა, გაოფლილმა და დამტკერიანებულმა მივრბინე სახლში, ძლივს ვსუნთქავდი, ზღურბლზე რომ გადავა-

ბიჭე, ცეცხლთან მჭდარი ბიცოლაჩემი მრისხანედ წამოიშართა ჩემს შესახვედრად. იგი ბოროტი და უხეში ქალი იყო.

— სად ეგდე ამდენ ხანს? — მომიახლოვდა და სიტყვის თქმა ვერ მოვასწარი, ისე გამომგლიჯა ტომარა ხელიდან და გვერდზე მიაგდო — ეს არის შენი შევროვილი წივა?

ჩემმა მეგობარმა გოგონებმა თურმე უკვე მოასწრეს ჩემი გაქორვა — უჰ! შე გამურულო! რა მიგათრევდა სკოლაში? რატომ აქ არ ამოგძვრა სული! — ყურში ხელი ჩამავლო და რამდენჯერმე ჩამცხო თავში. — ძაღლის ნაშიერო! მგელი მგლობას არ მოიშლის. სხვის ბავშვებს სახლში შემოაქვთ, შენ კი სახლიდან გაგაქვს. მე გიჩვენებ სკოლას, გაბედე ახლოს მისვლა, ფეხებს მოგამტვრევ. აღარასოდეს დაგავიწყდება...

ვლუმდი, ვცდილობდი არ მეყვირა, შემდეგ, ცეცხლის პირას მიმჭდარი, დიდხანს ვტიროდი უხმოდ, ჩუმად, თან ნაცრისფერ კატას ვეაღერებოდი, თითქოს გულის ნაღებს ვუზიარებო. სხვათაშორის, კატამ ყოველთვის იცოდა, როდის ვტიროდი და ჩემს მუხლებზე მოიკალათებდა ხოლმე. ვტიროდი იმ. ატომ კი არა, რომ ბიცოლამ მცემა — ეს ჩემთვის ახალი ამბავი არ იყო, არამედ იმიტომ, რომ მივხვდი: იგი არაფრით არ გამიშვებდა სკოლაში.

ორი დღის შემდეგ აული ძაღლების ყეფამ გააყრუა, მოისმა ხმამაღალი გადაძახილი. თურმე დიუიშენი დადიოდა ეზო-ეზო და ბავშვებს აგროვებდა სკოლისათვის. მაშინ ჩვენს აულში ქუჩები არ იყო, ნახევრად ბნელი, მოთხუპნული ქოხები აქა-იქ იყო გაბნეული, ყველა იქ სახლდებოდა, სადაც მოისურვებდა. დიუიშენი და ბავშვები ჯგროდ გადადიოდნენ ერთი ადგილიდან მეორეზე.

ჩვენი ეზო განაპირას იდგა. მე და ბიცოლაჩემი ფეტვს ვფქვავდით ქვასანაყში, ბიძაჩემი კი ფარდულის მახლობლად ამოთხრილი ორმოდან ხორბალს იღებდა. ბაზარზე უნდა წაეღო გასასყიდად. ჩვენ მჭედლებივით რიგრიგობით ვურტყაოდით მძიმე ფილთაქვებს, თან ფარულად უკან ვინებდებოდი, ახლოსაა თუ არა მასწავლებელი-თქო. მეშინოდა, რომ ჩვენ ეზოდან ვერ მოაღწევდა. ვიცოდი ბიცოლა არ გამიშვებდა სკოლაში, მაგრამ, მიუხედავად ამისა, მინდოდა დიუიშენი მოსულიყო,

ენახა მაინც სად ვცხოვრობ. გულში ვევედრებოდი არ გაბრუნებულყო უკან.

— გამარჯობა, დიასახლისო, შეგეწიოთ ღმერთი! ღმერთი არ შეგეწევათ, ჩვენ დაგეხმარებით, ნახეთ რამდენი ვართ! — გაიხუმრა დიუიშენმა, ბიკოლაჩემს მიესალმა და თან თავისი მომავალი მოსწავლეები შემოიყოლია.

ბიკოლამ რაღაც წაიბურღლუნა საპასუხოდ, ბიძაჩემს ორ-მოოდან არც კი ამოუხედავს.

დიუიშენი ამას არ შეუშინებია. იგი საქმიანად ჩამოჯდა მორზე, რომელიც ეზოს შუაგულში ეგდო, ფანქარი და ქალაღი მოიმარჯვა.

— დღეს სკოლაში სწავლას ვიწყებთ, რამდენი წლისაა თქვენი ქალიშვილი?

ბიკოლას არაფერი უპასუხია, — გაბრაზებული ურტყამდა ფილთაქვას, მას საერთოდ არ სურდა ლაპარაკი. გული შემეკუმშა: რა მოხდება? დიუიშენმა შემომხედა და გამიღიმა. გული გამითბა.

— ალტინაი, რამდენი წლისა ხარ? — შემეკითხა.

ვერ გავბედე პასუხის გაცემა.

— რა შენი საქმეა, გამომივიდა შემმოწმებელი! — გაცხარდა ბიკოლაჩემი. — შეეშვი, სასწავლებლად არ ცალია. ასეთი უჯიშოები კი არა, დედ-მამა ადგათ თავზე და ისინი არ სწავლობენ. შეგიყრია მთელი ხროვა და გარეკე სკოლაში, აქ კი არაფერი გესაქმება.

დიუიშენი წამოხტა.

— დაუფიქრდით რას ლაპარაკობთ! განა იგი დამნაშავეა რომ ობოლია? ანდა არის კანონი ობლებმა არ ისწავლონო?

— შენი კანონები არ მაინტერესებს. მე ჩემი კანონები მაქვს, შენი რჩევა-დარიგება არ მკირდება!

— ჩვენ საერთო კანონები გვაქვს. თუ ეს გოგონა თქვენ არ გკირდებათ, ჩვენ გვკირდება, საბჭოთა ხელისუფლებას კირდება. წინააღმდეგი წახვალთ და გიჩვენებთ როგორ მოიქცეთ.

— საიდან გამომიტყვერი ასეთი უფროსი! — ბიკოლამ გამომწვევად დოინჯი გაიკეთა. — ვის აქვს, შენი აზრით, უფ-

ლება მასზე. მე ვაქმევ და ვასმევ თუ შენ, მაწანწალის შვილო, და თვითონაც მაწანწალავ?!
ვინ იცის, რითი დამთავრდებოდა ყოველივე ეს, რომ ამ დროს ორმოდან წელს ზემოთ გატიტვლებული ბიძაჩემი არ გამოჩენილიყო. იგი ვერ იტანდა, როცა ცოლი ერეოდა იმაში, რაც მისი საქმე არ იყო და ივიწყებდა, რომ ოჯახში არის უფროსი, ქმარი. იგი შეუბრალებლად ცემდა ხოლმე ცოლს ამისთვის. ამჭერადაც, ალბათ, გაბრაზდა.

— ეი, დედაკაცო! — დაიღრიალა მან და ორმოდან ამოვიდა. — როდის მერე გახდი ოჯახის უფროსი და განმკარგულებელი? ნაკლები ილაყბე და მეტი საქმე აკეთე. შენ კი, ტამტანბეკის შვილო, წაიყვანე გოგო და გინდა ასწავლე და გინდა წყალში გადააგდე. აბა, გაეთრიე აქედან!

— როგორ, ეგ სკოლაში ეთრიოს, სახლში საქმეს ვინ მიხედავს, მარტო მე? — ხმას აუწია ბიცოლაჩემმა, მაგრამ ქმარმა შეუყვირა: — ვთქვი და გათავდა!

ზოგი ჭირი მარგებელიაო. ასე წავედი პირველად სკოლაში.

ამ დღიდან მოყოლებული დიუიშენი ყოველ დღით ეზო-ეზო გვიყრიდა ხოლმე თავს.

როდესაც პირველად მივედით სკოლაში, იატაკზე გაფენილ თივაზე დაგვსვა, თვითთულს რვეული, ფანქარი და პატარა დაფა ჩამოგვირიგა.

— დაფა მუხლებზე დაიდეთ, მოხერხებულად რომ წეროთ, — აგვიხსნა დიუიშენმა.

შემდეგ რუსი ადამიანის სურათი გვიჩვენა, კედელზე რომ ჰქონდა გაკრული.

— ეს ლენინია! — თქვა მან.

სამუდამოდ დამამახსოვრდა ეს პორტრეტი. შემდეგში მსგავსი არსად შემხვედრია, მე მას დიუიშენისეული პორტრეტი შევარქვი. იმ სურათში ლენინი განიერ სამხედრო ფრენში იყო, გამხდარი, წვერმოშვებული. დაჭრილი ხელი კისერზე ჩამოკიდებულ სახვევზე ედო, კეპის ქვეშიდან ყურადღებით იცქირებოდა მშვიდი თვალებით. მისი ნათელი, თბილი გამოხედვა თითქოს გვეუბნებოდა: „რომ იცოდეთ, ბავშვებო,

რა მშვენიერი მომავალი გელით თქვენ!“ იმ წუთში მეჩვენებოდა, რომ იგი მართლა ჩემს მომავალზე ფიქრობდა.

დიუიშენი, ეტყობოდა, დიდი ხანია ატარებდა უბრალო ქალღმერთის დაბეჭდილ ამ სურათს — იგი გადასაკეცებში გაქეპილი იყო, კიდეები გაცვეთოდა. გარდა ამ პორტრეტისა, ჩვენი სკოლის ოთხ კედელში არაფერი არ იყო.

— ბავშვებო, მე თქვენ გასწავლით კითხვასა და თვლას, გიჩვენებთ როგორ იწერება ასოები და ციფრები, — ამბობდა დიუიშენი. — გასწავლით ყველაფერს რაც მე ვიცი...

მართლაც, გვასწავლიდა ყველაფერს, რაც თვითონ იცოდა და ამავე დროს იყო საოცრად მომთმენი. თვითეულ ჩვენგანს უჩვენებდა როგორ უნდა სკეროდა ფანქარი და შემდეგ გატაცებით გვიხსნიდა გაუგებარ სიტყვებს.

ახლა ვფიქრობ ამაზე და მიკვირს: როგორ გაბედა ამ მცირემცოდნე ქაბუქმა, რომელიც თვითონ ძლივს კითხულობდა მარცვალ-მარცვალ, რომელსაც ხელთ არ ჰქონდა არავითარი სახელმძღვანელო, ჩვეულებრივი ანბანიც კი, ხელი მოეკიდა ასეთი ნამდვილად დიდი საქმისათვის. ხუმრობა ხომ არ იყო გესწავლებინა ბავშვებისათვის, რომელთა მამა-პაპათ არავითარი წარმოდგენა არ ჰქონიათ სწავლა-განათლებაზე. რა თქმა უნდა, არც თვითონ ჰქონდა წარმოდგენა პროგრამაზე, სწავლების მეთოდიკაზე. უფრო სწორად, არც კი ეგონა, ასეთი რამ ქვეყნად თუ არსებობდა.

დიუიშენი გვასწავლიდა როგორც ახერხებდა, როგორც შეეძლო, როგორც მიაჩნდა საჭიროდ, იგი თვითონ იკვლევდა გზას. მე ღრმად ვარ დარწმუნებული, რომ მის წრფელ ენთუზიანტს, რომლითაც იგი საქმეს ეკიდებოდა, ამოდ არ ჩაუვლია.

მან თვითონაც არ იცოდა, ისე ჩაიღინა გმირობა. დიას, ეს იყო გმირობა, იმიტომ რომ იმ დღეებში, ჩვენ, ყირგიზ ბავშვებს, რომლებიც არასოდეს გავცილებივართ თჩვენს აულს, შვეებს, რომლებიც არასოდეს გავცილებივართ ჩვენს აულს, პირდაღებული კედლებიდანაც მოჩანდა მარადთოვლიან მთათა მწვერვალები, უცებ თვალწინ გადაგვეშალა ახალი, ჭერ არსმენილი და წინათ უხილავი სამყარო.

სწორედ მაშინ გავიგეთ, რომ მოსკოვი, სადაც ლენინი

ცხოვრობს, ბევრჯერ უფრო დიდია, ვიდრე აულიეტა და თვით ტაშკენტიც კი, რომ ქვეყნად არის ისეთი დიდი-დიდი ზღვები, როგორც თალასის ველია და რომ ამ ზღვებზე დასცურავენ მთასავით უზარმაზარი გემები. ისიც გავიგეთ, რომ ნავთს, რომელიც ბაზრიდან მოაქვთ, მიწიდან იღებენ. ჩვენ უკვე მაშინ გვწამდა, რომ როცა ხალხი უკეთესად იცხოვრებს, ჩვენი სკოლის შენობა იქნება დიდი, ნათელი და თეთრი, ფართო ფანჯრებით და რომ ამ შენობაში მოსწავლეები მაგიდებს შემოუსხდებიან.

ძლივძლივობით ვისწავლეთ პირველი ასოები, ჯერ არც კი ვიცოდით როგორ დაგვეწერა „დედა“, „მამა“ და უკვე გამოგვყავდა ქალაღზე პირველი სიტყვა „ლენინი“. ჩვენი პოლიტიკური ლექსიკონი შედგებოდა ისეთი ცნებებისაგან, როგორცაა „ბაი“, „მოჯამაგირე“, „საბჭოები“, ხოლო ერთა წლის შემდეგ დიუიშენი გვპირდებოდა, რომ „რევოლუციის“ დაწერასაც შევძლებდით.

ვუსმენდით დიუიშენს და ჩვენ გონებაში მასთან ერთად ვიბრძოდით ფრონტზე თეთრების წინააღმდეგ. ლენინზე იგი ისეთი მღელვარებით გვიამბობდა, თითქოს საკუთარი თვალით ენახოსო. ბევრი რამ, ამას მე ახლა ვხვდები, რასაც გვიამბობდა, იყო ხალხის მიერ შეთხზული თქმულებები დიდ ბელადზე, მაგრამ ჩვენთვის, დიუიშენის მოსწავლეთათვის, ეს იყო ისეთივე ჭეშმარიტება, როგორც რძის სითეთრე.

ერთხელ ჩვენ ყოველგვარი ეშმაკობის გარეშე ვკითხეთ:

— მასწავლებლო, თქვენ ლენინისთვის ხელი ჩამოგიერთმევიათ? და მაშინ ჩვენმა მასწავლებელმა მწუხარედ გადააქნია თავი:

— არა, ბავშვებო, მე არასოდეს არ მინახავს ლენინი.

მან დამნაშავესავით ამოიოხრა — ჩვენი რცხვენოდა.

ყოველი თვის დამლევს დიუიშენი თავისი საქმეებისათვის თემში მიემგზავრებოდა. იგი ფეხით მიდიოდა და ორი-სამი დღის შემდეგ ბრუნდებოდა.

ჩვენ მოუთმენლად ველოდით ხოლმე მის დაბრუნებას, ალბათ, ღვიძლი ძმა რომ მყოლოდა, იმას არ დაველოდებოდით ისე, როგორც დიუიშენს ველოდი. ფარულად, ბიცოლას რომ არ

შეეჩინა, გამოვდიოდი გარეთ და გავყურებდი გზას, რომელიც ტრამალში იკარგებოდა. როდის გამოჩნდებოდა მასწავლებელი ზურგზე მოკიდებული თავისი შულდაკით, როდის დავინახავდით მის ღიმილს, გულს რომ მითბობდა, როდის გავიგონებდი სიტყვებს, ცოდნას რომ გვძენდა?

ღიუიშენის მოწაფეებში მე ყველაზე უფროსი ვიყავი. შეიძლება ამიტომაც ვსწავლობდი სხვებზე უკეთესად, თუმცა ვფიქრობ მხოლოდ ამიტომ არა. მასწავლებლის ყოველი სიტყვა, ანბანის ყოველი ასო, რომელსაც იგი დაფაზე გვიწერდა, ჩემთვის წმიდათაწმიდა იყო. ჩემთვის არ იყო იმაზე უფრო მნიშვნელოვანი საქმე, ვიდრე გავრკვეულიყავი იმაში, რასაც ღიუიშენი გვასწავლიდა. მე ვუფროთხილდებოდი რვეულს, რომელიც მან მაჩუქა, ამიტომ მიწაზე საგულდაგულოდ გამომყავდა ხოლმე ასოები, ვწერდი ნახშირით ყორეებზე, ჯობით თოვლზე. ჩემთვის ქვეყნად არ იყო ღიუიშენზე კვიციანი და განსწავლული ადამიანი.

ზამთრის პირი იყო.

მანამ მიწას პირველი თოვლი დაფარავდა, კიდევ შეიძლებოდა ჰქონარეზე ფონით გადასვლა. შემდეგ კი ეს შეუძლებელი გახდა. ყინულივით ცივი წყალი ფეხებს გვწვავდა, განსაკუთრებით პატარები იტანჯებოდნენ, რამდენჯერ მინახავს ცრემლი მათ თვალებზე. მაშინ ღიუიშენმა გადაწყვიტა თვითონ გადაეყვანა ისინი მდინარეზე. ერთს ზურგზე შეისვამდა ხოლმე, მეორეს ხელში აიყვანდა და ასე რიგრიგობით გადაჰყავდა ხოლმე ყოველი მათგანი.

ახლა როცა ამას ვიგონებ, არც კი მჯერა, რომ ეს ასე იყო. მაშინ უვიცობისა თუ სხვა მიზეზის გამო ღიუიშენს ბევრად დაცინოდა. განსაკუთრებით მდიდრები, რომლებიც ზამთარს მთაში ატარებდნენ და მხოლოდ წისქვილისათვის ჩამოდიოდნენ ხოლმე ბარად. რამდენჯერ გამოუვლიათ მათ მდინარის პირას ცხენზე ამხედრებულთ, თავზე მელის ბეწვის ქუდით, ცხვრის ძვირფასი ქურჩით შემოსილთ. როგორ დამცინავად გადმოხედავდნენ ხოლმე ჩვენს მასწავლებელს, თვალმოკუტტულნი, სიცილით რომ იგულებოდნენ და თან უთითებდნენ:

— შეხედე, შეხედე, ერთი ზურგზე წამოუკიდებია, მეორე ილიაში ამოუჩრია!

მაშინ მეორე ცხენს მათრახს შემოჰკრავედა და ხმამალა იტყოდა:

— ეჰ, ჭკუა რომ მქონოდა, აღრე უნდა მომეფიქრებინა. აი ვისი მოყვანა ღირდა მეორე ცოლად.

ცხენის ფლოქვებით აშხეფებული წყალი და ტალახი გვასველებდა, ისინი კი ხარხარით გვეშორდებოდნენ.

როგორ მინდოდა წამოვწეოდი ამ გონებაჩლუნგ ადამიანებს, ჩამომეთრია ისინი ცხენიდან და მიმეხალა ამ პირუტყვთათვის: „როგორ ბედავთ ასეთი რამის თქმას ჩვენს მასწავლებელზე, თქვე უგუნურო, ბოროტო ადამიანებო!“

მაგრამ ვინ მიუგდებდა ყურს ჩემს ხმას. და მე ისლა დამჩენოდა, რომ ბოღმისაგან მომდგარი ცრემლები ჩამეყლაპა, დიუიშენი კი თითქოს არაფერს ამჩნევდა, არაფერი ესმოდა. რაღაცას მოიგონებდა, გაგვეხუმრებოდა სოღმე და ჩვენ ყველაფერი გვავიწყებოდა, გულიანად ვიცინოდით.

რამდენს არ წეალობდა, რომ ხე-ტყე ეშოვნა მდინარეზე ხიდის გასადებად, ვერაფერს გახდა. ერთხელ სკოლიდან უკან დაბრუნებულნი, როცა დიუიშენმა პატარები წყალზე გადაყვანა, მე და დიუიშენი მდინარის პირას დავჩიით. გადავწყვიტეთ წყალში დიდი ქვები ჩაგვეწყო, რომ მდინარეზე გადასვლისას ფეხი არავის დასველებოდა.

ჩვენი აულის მცხოვრებლებს რომ მოენდომებინათ სულაც არ გაუჭირდებოდათ მდინარეზე ორი-სამი ცალი ფიცრის გაღება და ხიდიც მზად იქნებოდა. მაგრამ მაშინ ამაზე არავინ ფიქრობდა, ხალხი არავითარ მნიშვნელობას არ აძლევდა სწავლას, დიუიშენი კი მიაჩნდათ უბრალოდ ახირებულ კაცად, რომელიც უსაქმობის გამო თავს ირთობდა. გეხალისება — ასწავლე, არადა როგორც გინდა. თვითონ ცხენით დადიოდნენ და ხიდიც არ სჭირდებოდათ. კი უნდა დაფიქრებულიყვნენ: რისთვის ითმენს ეს ახალგაზრდა კაცი, რომელიც არც არავისზე უჭკუო და ცუდი არ არის, ამდენ გაჭირვებასა და დაცინვას, ამდენ სიძნელესა და შეურაცხყოფას და ასწავლის მათ ბავ-

შეებს, ასწავლის ასეთი თავგამოდებით, ასეთი არაადამიანური მოთმინებით.

იმ დღეს, როცა ჩვენ მდინარეში ქვებს ვაწყობდით, მიწა თოვლს დაეფარა, ყინულივით ცივი წყალი სუნთქვას გვიკრავდა. ახლაც მიჭირს წარმოდგენა, როგორ მუშაობდა დიუიშენი, იგი ხომ ფეხშიშველი იყო და წუთით არ შეუსვენია. მე ძლივს ვაბიჯებდი ფეხს, ხმას ვერ ვიღებდი, თითქოს მდინარის ფსკერი ნაკვეთჩხლებით მოუფარავთო, უცებ კრუნჩხვამ ფეხები შემიკრა და ის იყო წყალში უნდა ჩავვარდნილიყავი, დიუიშენმა ქვა ხელიდან გააგდო, ამიყვანა და ნაპირზე თავის ფარაჯაზე დამსვა. იგი ხან გალურჯებულ ფეხებს მიზელდა, ხან გაყინულ ხელებს მითბობდა თავისი ხელისგულებით.

— ალტინაი, იჯექი, არ ადგე, გათბი, უშენოდაც გავწვდები.

როცა გადასასვლელი უკვე მზად იყო, დიუიშენმა ჩექმები ჩაიცვა, გაყინულ-გათოშილს შემომხედა და გამიცინა.

— გათბი, ჩემო თანაშემწევ? მოიხურე ფარაჯა, აი ასე! — ცოტა ხანს გაჩუმდა და მკითხა: — ალტინაი, შენ დატოვე მაშინ წივა სკოლის ეზოში?

— მე, — გავეცი პასუხი.

მან ოდნავ შესამჩნევად გაიღიმა, და თითქოს თავისთვის ჩაილაპარაკა: „მეც ასე ვფიქრობდი“.

მახსოვს როგორ წამომმენტო სახე: მაშასადამე, მასწავლებელმა ყველაფერი იცოდა და ახსოვდა. არ ივიწყებდა ამ უბრალო ამბავს. ბედნიერებისაგან მეცხრე ცაზე ვიყავი: დიუიშენმა გაიგო ჩემი სიხარული.

— ჩემო თვალისჩინო, — ალერსით მითხრა მან, — რა ნიჭიერი ხარ რომ იცოდე... ეჰ, რომ შემეძლოს შენი გაგზავნა დიდ ქალაქში, როგორი ადამიანი დადგებოდი!

იგი სწრაფი ნაბიჯით წავიდა მდინარისაკენ.

ახლაც თვალწინ მიდგას, მდინარის პირას მდგომი დიუიშენი, კეფაზე ხელები შემოუწყვია, გაბრწყინებული თვალებით შესცქერის თეთრ ღრუბლებს, ქარი რომ მთებისაკენ მიერეკება.

რაზე ფიქრობდა მაშინ? იქნებ ოცნებით მართლა მაგზავნი-

და სასწავლებლად დიდ ქალაქში? მე კი მის ფარაჯაში გახვეული ვფიქრობდი: „რა კარგი იქნებოდა მასწავლებელი ჩემი ძმა რომ იყოს, მაშინ მე მას კისერზე ჩამოვეკიდებოდი, მოვეხვეოდი და ვეტყოდი ყველაზე კარგ, ყველაზე საალერსო სიტყვებს. ღმერთო, აქციე იგი ჩემ ძმად!“

აღბათ, მაშინ ყველას გვიყვარდა ჩვენი მასწავლებელი მისი აღმინანობისათვის, კეთილი აზრებისათვის და იმისათვის, რომ იგი ჩვენს მომავალზე ოცნებობდა. თუმცა ბავშვები ვიყავით, მაგრამ უკვე მაშინ ვხვდებოდით ამას. განა რა გვაიძულებდა გვევლო ამ სიშორეზე, სასტიკ ქარში, აგვეარა თოვლით დაფარული ციკაბო აღმართი, ძალით ხომ არავინ გვერეკებოდა სკოლაში? ჩვენ თვითონ მივდიოდით. ვერავინ გვაიძულებდა ვმჯდარიყავით ცივ ფარდულში, სადაც ჩვენი ამონასუნთქი ჰაერი თეთრ ჭირხლად გვეფინებოდა სახესა და ტანსაცმელზე. ჩვენ ხომ რიგრიგობით ვთბებოდით ღუმელთან, ხოლო დანარჩენები ამ დროს ადგილებიდან უსმენდნენ დიუიშენს.

ერთ ასეთ სუსხიან დღეს, ახლა მე ვიცი — ეს იყო იანვრის მიწურულს, დიუიშენმა შემოიარა ყველა ეზო, შეგვეკრიბა და სკოლაში წამოგვიყვანა. ამ დღეს იგი იყო მღუმარე და მკაცრი, მიმინოს ფრთებივით მოეწურა წარბები, სახე თითქოს შავი, გახურებული რკინისაგან გამოედნოთ, მოდიოდა ხმის ამოუღებელივ. ასეთი არასოდეს გვინახავს ჩვენი მასწავლებელი. ჩვენც ვდუმდით, მივხვდით, რომ მოხდა რაღაც ცუდი.

ჩვეულებრივ, როცა ნამქერები გვხვდებოდა ხოლმე, დიუიშენი თვითონ გვიკვალავდა გზას, შემდეგ მე მივდიოდი, დანარჩენები უკან მომყვებოდნენ. ამჯერადაც ფერდობის ძირში ქარს ბლომად მოეხვეტა თოვლი. დიუიშენი წინ მიდიოდა, გზას მიიკვლევდა. თუმცა ზურგიდან ვხედავდი, მაინც ვამჩნევდი, დიდ წუხილს სანთელივით ჩამოედნო იგი, წელში მოეხარა, მიდიოდა თავჩაქინდრული, ძლივს მიათრევდა ფეხებს. ახლაც მელანდება, როგორ ირეოდა ჩემს თვალებში შავი და თეთრი: შავფარაჯიანი მასწავლებელი, თოვლით გადათეთრებული მიდამო, ფერდობებზე აქლემის კუზივით აბურცული ნამქერები, ქარს რომ მოეხვეტა და სულ ზევით — ამღვრეულ ცაზე ობლად გაწოლილი შავი ღრუბელი.

დიუიშენს ამჯერად ღუმელი არ დაუნთია.

— ფეხზე წამოდექით! — გვიბრძანა მან.

ავდექით.

— ქულები მოიხადეთ!

თვითონაც მოიხადა. ჩვენ არ გვესმოდა რა ხდებოდა. მაშინ დიუიშენმა დაიწყო, ხმა უწყდებოდა:

— გარდაიცვალა ლენინი! მთელს დედამიწაზე დგანან ახლა დამწუხრებული ადამიანები, პატივს სცემენ მის ხსოვნას. კარგად დააკვირდით ამ სურათს, დაიმახსოვრეთ ეს დღე.

ჩვენს სკოლაში ისეთი სიჩუმე ჩამოვარდა, თითქოს ზეავემა შთანთქაო იგი. მხოლოდ ქარი ხმაურობდა ქუქრუტანებში და ისმოდა როგორ ეცემოდა თოვლის ფანტელი თივის სახურავს.

იმ წუთებში, როცა დაღუმდნენ მუდამ ახმაურებული ქალაქები, დაწყნარდნენ აგუგუნებული ქარხნები, ლიანდაგებზე გაინაბენ ხმაურიანი მატარებლები, როდესაც მთელი სამყარო საყოველთაო გლოვამ მოიცვა, — იმ მწუხარე საათს, ჩვენც — ხალხის ერთი პატარა ნაწილი — სუნთქვაშეკრულნი სამგლოვიარო ყარაულში ვიდექით ჩვენს მასწავლებელთან ერთად, ერთ გაყინულ ფარდულში, რომლის არაებობაზეც არავინ არაფერი იცოდა და რომელსაც ჩვენ სკოლას ვუწოდებდით. ვეთხოვებოდით ლენინს და მიგვაჩნდა, რომ ჩვენ მისი ყველაზე ახლობელი ადამიანები ვიყავით, რომ ყველაზე მეტად განვიცდიდით მის სიკვდილს. ლენინი კი, სამხედრო ფრენიში გამოწყობილი, შემოგვცქეროდა კედლიდან. თითქოს გვეუბნებოდა თავისი ნათელი თვალებით: „რომ იცოდეთ, ბავშვებო, რა მომავალი გელით თქვენ“. მეჩვენებოდა, რომ იგი მართლა ჩემს მომავალზე ფიქრობდა.

შემდეგ დიუიშენმა სახელოთი მოიწმინდა ცრემლები და გვითხრა.

— დღეს მე თემში მივდივარ. პარტიაში უნდა შევიდე, სამი დღის შემდეგ დავბრუნდები...

ეს დღეები ჩემთვის დარჩა ყველაზე მკაცრ, სუსხიან, მძიმე დღეებად, როგორიც კი როდისმე გადამიტანია. თითქოს რაღაც ზებუნებრივ ძალებს სურდათ დაეკავებინათ ცხოვრები-

დან წასული დიდი ადამიანის ადგილი: გუგუნებდა, არ ცხრებოდა მძვინვარე ქარი, ჰაერში ატრიალებდა თოვლს, ყინვა მოძალებულყო... სტიქია ერკინებოდა დედამიწას, ბობოქრიბდა, ტირილით ეხეთქებოდა კლდე-ღრეს.

მიყუჩდა მთების ძირას განაბული, შავლრუბლებმოსხვეული ჩვენი აული. მილებიდან ცად წვრილ ნაკადად მიიწვედა კვამლი, ადამიანები გარეთ აღარ გამოდიოდნენ. გახელდნენ დანშეული მგლები, გათავხედდნენ, დღისით გზაზე ჩამოდიოდნენ, საღამოთი აულის ასლომახლო დაძრწოდნენ და განთიადამდე გულის ამაზრზენი ყმუილით აყრუებდნენ მიდამოს.

მაფიქრებდა ჩვენი მასწავლებლის ბედი. მას ხომ ქურქი არ ჰქონდა, გაუძლებდა განა ფარაჯაში ასეთ საცივეს? იმ დღეაკი, როცა უნდა დაბრუნებულყო, სულ თავგზა ამებნა. გული. აღბათ, რაღაც ცუდს მიგრძნობდა. გამოვეარდებოდი გარეთ და გავცქეროდი გადათეთრებულ, უკაცრიელ ტრამალს: ხომ არ მოჩანს-მეთქი სადმე? კაცის ჭაჭანება არ იყო.

„სადა ხარ, ძვირფასო მასწავლებლო? რატომ იგვიანებ? დაბრუნდი მალე, ჩვენ გელოდებით, შენი მოსწავლეები!“

ტრამალი არ პასუხობდა ჩემს უსიტყვო ძახილს და მე ცრემლად ვიღვრებოდი.

ბიცოლას თავი მოვაბეზრე.

დაეხსნები თუ არა კარებს? დაეგდე ადგილზე და სართავს მოჰკიდე ხელი. ბავშვები გამიყინე: გაბედე ერთი კიდევ! — დამემუქრა იგი. ღამდებოდა, არ ვიცოდი დაბრუნდა თუ არა მასწავლებელი და ადგილს ვეღარ ვპოულობდი. ხან იმით ვინუგეშებდი თავს, რომ დიუიშენი უკვე დაბრუნდა, მას ხომ ჯერ არასოდეს უღალატნია თავისი სიტყვისათვის, ხანაც მეჩვენებოდა, რომ იგი ავად გახდა და ამიტომაც უჭირს სიარული, ამოვარდება ქარბუქი და ტრამალში ღამით გზის დაკარგვას რა უნდა? ვერ ვმუშაობდი, ხელები არ მემორჩილებოდა. ნართი წამდაუწუმ მიწყდებოდა, ეს კი ბიცოლაჩემს აცოფებდა:

— რა მოგდის დღეს? რამ გაგიხევა ხელები? — სულ უფრო და უფრო ბობოქრობდა იგი. შემდეგ მოთმინების ძაფი

გაუწყდა: მიწა გაგისკდესო! — მომაწყველა და მითხრა: — ეს ტომარა მაინც წაუღე მოხუც საიკალს.

სიხარულისგან კინალამ შევხტი. დიუიშენი ხომ მოხუც საიკალთან ცხოვრობდა. საიკალი და კარტანბაი შორეულ ნათესავებად მომხვდებოდნენ დედის მხრიდან. ადრე ხშირად ვყოფილვარ მათთან, ხანდახან ღამის გასათევადაც დავრჩენილვარ. არ ვიცი თვითონ მოაგონდა თუ განგება მეხმარებოდა, ბიცილამ ტომარა შემომაჩეჩა და მითხრა:

— დღეს თავი ისე მომაბეზრე. როგორც ქუმელმა შიმშილობის დროს, წადი და თუკი მოხუცები ნებას დაგრთავენ იქ დარჩი, რომ ჩემმა თვალებმა აღარ განახონ...

გარეთ გამოვვარდი. ქარი მძვინვარებდა ბოროტი სულივით: შეისვენებდა წამით და შემდეგ ისევ განრისხებით დაეძგერებოდა მიწას, თოვლს ატრიალებდა ჰაერში. ტომარა ილღიაში ამოვიჩარე და სირბილით გავწიე აულის მეორე ბოლოსაკენ, ერთი ფიქრი მიტრიალებდა თავში: „დაბრუნდა თუ არა მასწავლებელი?“

მივირბინე. არ დამიხვდა. საიკალი შემფოთდა, როცა აქლოშინებული ზღურბლთან გაშეშებული დამინახა.

— რა დაგემართა? რაიმე უბედურება ხომ არაა შენს თავს?

— არაფერი, ისე, ტომარა მოგიტანეთ. შეიძლება თქვენთან დავრჩე?

— დარჩი, ჩემო კარგო! რა გული გამიხეთქე, ეშმაკის ფეხო! რა არი შემოდგომის აქეთ რომ აღარ გამოიარე. ცეცხლთან მოიწი.

— რა ბევრს ლაპარაკობ, ხორცი გადმოიღე. ბავშვს გაუმასპინძლდი, ამასობაში დიუიშენიც მოვა, — გამოგვეხმაურა ფანჯარასთან მჭდარი კარტანბაი, იგი ძველი თექის ჩექმებს აცრებდა. — აქამდეც უნდა მოსულიყო; თუმცა მოვა, დაღამებამდე ჭერ კიდევ დროა.

შეუმჩნევლად მოეპარა ფანჯრებს ღამე. გული თითქოს გუშაგიაო, ყოველგვარ ხმაურს აღიქვამდა, ჩერდებოდა, როცა ძაღლის ყეფა ან ადამიანის ხმა შემოესმებოდა. დიუიშენი

კი არ ჩანდა. კიდევ კარგი, საიკალის ლაპარაკში გადიოდა დრო.

ასე ველოდით ყოველ წუთს, ყოველ საათს, შუალამისას კარტანბაი დაიღალა:

— გაშალე ლოგინი, დედაკაცო, ალბათ, ამაღამ აღარ მოვა. გვიანაა. ასე ადვილია უფროსებიდან თავის დაღწევა? ალბათ, გააჩერეს, თორემ აქამდე დიდი ხნის მოსული იქნებოდა.

მოხუცი დასაძინებლად მოეწყო.

ღუმელის მახლობლად დამიგეს. ვერ ვიძინებდი. კარტანბაი ახველებდა, შფოთავდა, წრიალებდა, ჩურჩულებდა ლოცვებს, შემდეგ მოუსვენრად წაილაპარაკა:

— ნეტავ ცხენს ხომ არ გაუჭირდა რამე? ახლა გულითაც რომ გინდოდეს, ვერც თივას, ვერც ქერს ვერ იშოვნი.

კარტანბაის ჩაეძინა, მაგრამ ახლა ქარი აღარ მასვენებდა. დაძრწოდა სახურავზე, ეჯახებოდა ფანჯრებს, მიწანარევ თოვლს აყრიდა კედლებს.

არ მინდოდა დამეკვრებინა მოხუცისათვის; ვფიქრობდი დიუიშენი მაინც მოვიდოდა, მეჩვენებოდა, რომ იგი გზაშია, თოვლით დაფარულ უდაბნოში. არ ვიცი დიდხანს შეძინა თუ არა, უცებ რაღაცა ძალამ ამაწევინა თავი ბალიშიდან. საშინელმა ყმუილმა გააყრუა მიდამო. მგელი! და ერთი კი არა — მთელი ხროვა. ყოველის მხრიდან ისმოდა მათი ხმა, ეს ხმა ახლოვდებოდა, თანდათან ერთიანდებოდა და უკვე ერთიან გაბმულ ყმუილად ისმოდა, იგი ისმოდა ტრამალის ხან ერთ, ხან მეორე ადგილას; ქარს ხან შორს მიჰქონდა, ხან აახლოვებდა მას. ხანდახან იფიქრებდი, რომ იგი აქვე, აულის ბოლოდან ისმის.

— ქარბუქს უხმობენი — წაიჩურჩულა საიკალმა.

კარტანბაი ჩუმად იყო, ხმაურს ყური მიუვდო და შემდეგ წამოხტა ლოგინიდან:

— არა, დედაკაცო, ტყუილად არ ყმუიან, ვილაცას მისდევენ. ადამიანს თუ ცხენს არ ვიცი. ღმერთმა დაგვიფაროს, დიუიშენი არ იყოს. ხომ იცი რა უცნაურია, არაფრის არ ეშინია, — კარტანბაი აწრიალდა, სიბნელეში ქურქს დაუწ-

ყო ძებნა. სინათლე აანთე, დედაკაცო! ჩქარა, თუ ღმერთი გწამს!

შიშისაგან აკანკალებულნი წამოვხტივით, მაგრამ სანამ საიკალმა ლამპა მოძებნა და აანთო, მგლების ყმუილიც მიწყდა.

— წამოეწივნენ, წყეულები! — წამოიძახა კარტანბაიმი, — კაკეს წამოავლო ხელი და კარებისაკენ გაექანა, ამ დროს ძაღლები აყეფდნენ და ვიღაცამ გაირბინა ფანჯრებთან. ლანჩები აჭრიალდნენ თოვლზე და კარზე ძლიერად, მოუთმენლად დააკაკუნეს.

ოთახში ყინულის ორთქლი შემოვარდა. როცა იგი გაიფანტა, ჩვენ დავინახეთ დიუიშენი. ფერდაკარგულმა, აქლოშინებულმა, ბარბაცით გადმოაბიჯა ზღურბლზე და კედელს მიეყრდნო.

— თოფი! — ამოიხრიალა მან.

ჩვენ ვერაფერი გავიგეთ. თვალთ დამიბნელდა, მესმოდა მხოლოდ როგორ ბუტბუტებდნენ მოხუცები:

— შავ ცხვარს შემოგწირავთ, თეთრ ცხვარს მოგართმევთ მსხვერპლად! გფარვიდეს წმინდა ბაუბედინი! ნამდვილად შენ ხარ?

— თოფი, თოფი მომეცით! — გაიმეორა დიუიშენმა.

— არა გვაქვს, რა დაგემართა, სად მიხვალ?!

მოხუცები მხრებზე ჩამოეკიდნენ დიუიშენს.

— ჯოხი მომეცით!

ისევ გაისმა მოხუცებულთა ვედრება.

— არსადაც არ გაგიშვებთ ცოცხალი თავით! აქვე დაკვხოცე.

მე უცნაური სისუსტე ვიგრძენი და უჩუმრად ჩავწევი ლოგინში.

— ვერ მოვასწარი, ზედ სახლთან წამომეწიენ. — დიუიშენმა ამოიოხრა და მათრახი კუთხეში მიაგდო. ცხენი ჯერ კიდევ გზაზე დამივარდა, ძლივს მოაღწია აულამდე და დაეცა, მგლებისაგან შეშინებული. ახლა ისინი თავიანთი ნადავლით იყორავენ მუცელს.

— ცხენს ვინ დაეძებს, მთავარია შენ გადარჩი. ცხენი რომ არ დაგვარდნოდა, ვერც შენ დააღწევდი თავს! ბაუბედინს

მადლობა შეეწიროთ, მან გიხსნა განსაცდელისაგან. გაიხადე, ცეცხლს მიუჯექი, მოდი ჩექმებს გაგზი, — ფუსფუსებდა კარტანბაი, — მოგვეცი, დედაკაცო, თუ რამე გაქვს საჭმელი.

ცეცხლს მიუჯდნენ, კარტანბაიმ თავისუფლად ამოისუნთქა.

— რაც მოსახდენია, იმას ვერსად გაექცევი. მაინც რატომ დაგაგვიანდა?

— თემკომის სხდომა გაგრძელდა, კარაკე. პარტიაში შევედი.

— კარგი გიქნია. ხვალ წამოვიდოდი, ვინ მოგსდევდა.

— ბავშვებს დავპირდი, რომ საღამოთი აქ ვიქნებოდი. ხვალ დილით მეცადინეობა გვაქვს.

— ეჰ, სულელო! წამოხტა გაბრაზებული კარტანბაი, — გესმის, დედაკაცო, ცხვირმოუხოცელ ბავშვებს დაპირდა! რომ დაღუპულიყავი? გესმის, რას ლაპარაკობ?

— ეს ჩემი ვალია, ჩემი სამსახური, კარაკე. თქვენ სხვა რამე თქვით, აქამდე ფეხით დავდიოდი, ახლა რა ეშმაკი შემიჩნდა, რამ წამაყვანიხა ცხენი...

— მაგაზე ვინ რას ამბობს. ის ჯაგლაგი მაინც მგლის კერპი იყო, თავზეც შემოგვლებია! — ბრაზობდა კარტანბაი. — ჩემი დღე და მოსწრება უცხენოდ ვიყავი, არც ახლა მომივა არაფერი, საბჭოთა ხელისუფლება არაფერს გამიჭირვებს.

ისინი გაჩუმდნენ. წუთიერი ღუმილის შემდეგ კარტანბაიმ წაილაპარაკა:

— გიყურებ და თითქოს უჭკუო არ უნდა იყო, პირიქია! კვიანი კაცის შთაბეჭდილებას ტოვებ. ვერ გამოგია რა საქმე გაქვს სკოლაში, უგუნურ ბავშვებთან? იქნებ სხვა საქმე ვერ გიპოვნია? დაუდექი ვინმეს მწყემსად, თბილადაც იქნები და მამღრისადაც.

— მესმის, კარაკე, ჩემთვის სიკეთე გინდა. მაგრამ თუ უგუნურები შემდეგში ისეთივენი იქნებიან, როგორიც თქვენ, მაშინ მართლაც არაა საჭირო სკოლა, არც სწავლა, მაგრამ როგორღა იქნება საბჭოთა ხელისუფლების საქმე? განა შენ არ გინდა, რომ იგი უფრო მტკიცედ დადგეს ფეხზე? ამიტომაც მე სკოლა არ მამძიმებს, კარაკე. მე რომ შემეძლოს უკეთესად ვასწავლო ბავშვებს, მეტზე არაფერზე ვიოცნებებდი.

ლენინი ამბობდა...

— სიტყვამ მოიტანა... შეაწყვეტინა კარტანბაიმ დიუი-შენს, ცოტა ხანს იყუჩა და შემდეგ განაგრძო: — აი, შენ თავს იკლავ, დარდობ. ცრემლებით ლენინს ხომ ვერ გააცოცლებ?! ეხ, რომ იყოს ქვეყნად ასეთი ძალა... შენ როგორ ფიქრობ, სხვები არ დარდობენ? აბა ჩაიხედე ჩემს გულში, არ ვიცი როგორ ეთანხმება ეს შენს პოლიტიკას, თუმცა ლენინი სხვა რწმენის კაცი იყო, მე დღეში ხუთჯერ ვლოცულობ მისთვის. ხანდახან ვფიქრობ, დიუიშენ, ჩვენ ამოდ ვღვრით ცრემლს. მე ჩემი ჰკუთთ ასე განვსაჯე, რომ ლენინი ხალხში, მის გულში დარჩა და ასე გადავა იგი თაობიდან თაობაში, მამიდან შვილზე...

— გმადლობთ, კარაკე, დიდად გმადლობთ კეთილი სიტყვებისათვის! სწორად ფიქრობთ. იგი ჩვენგან წავიდა, მაგრამ ჩვენ ვიცხოვრებთ მისი მაგალითისამებრ, ისე როგორც მას სურდა.

მესმოდა მათი საუბარი და სადღაც შორეთიდან თანდათანობით ვუბრუნდებოდი საკუთარ თავს. დიდხანს არ მჭეროდა, რომ დიუიშენი უვნებელი დაბრუნდა. შემდეგ როგორც გაზაფხულის ნიაღვარი ისე შემოიჭრა ჩემს გულში დაუოკებელი სიხარული და ბედნიერების ამ ნაკადმა გაალხვო ის ყინული, რომელიც გულს მიყინავდა, მე ავტირდი. შეიძლება ჯერ არავის არასოდეს განუცდია ისეთი სიხარული, როგორიც მაშინ მე განვიცადე. ჩემთვის ამ წუთში არაფერი არ არსებობდა, არც ეს თიხით შეთხუპნული ქოხი, არც ქარბუქიანი ღამე, არც მგლების ხროვა და მათ დასაჯიჯგნად მიტოვებული კარტანბაის ცხენი. არაფერის მთელი გულით, გონებით ერთ დიდ სიხარულს, სამყაროსათვის უსაზღვროსა და უსასრულოს, მოვეცევი. ბალიშში ჩავემხე, რომ არავის გაეგო ჩემი ტირილი, მაგრამ დიუიშენმა იკითხა.

— ვინ ქვითინებს?

— ალტინაია, ძალიან შეეშინდა და ახლა ტირის, — უპასუხა საიკალმა.

— ალტინაი? — აქ საიდან გაჩნდა? — დიუიშენი ადვილიდან წამოხტა, ჩემს სასთუმალთან ჩაიჩოქა და მხარზე დამადო ხელი: — რა დაგემართა, ალტინაი? რატომ ტირი?

კედლისკენ გადაებრუნდი და ტირილს ვუმატე.

— ასე როგორ შეიძლება, ძვირფასო, რამ შეგაშინა? შენ ხომ უკვე დიდი ხარ... აბა შემომხედე...

მაგრად მოვეხვეიე დიუიშენს, გახურებული, სველი სახე მხარზე დავადე, ტირილს მაინც ვერ ვიმაგრებდი. სიხარულის ციებ-ცხელება შემყროდა და უძლური ვიყავი მელონა რამე.

— ნამდვილად გული გადაუქანდა! — აწრიალდა კარტანბაი, — დედაკაცო, მიდი, შეულოცე, ჩქარა.

ყველა აფუსფუსდა, საიკალი რალაცას ბუტბუტებდა და სახეზე ხან ცივ, ხან თბილ წყალს მასხურებდა და თვითონაც ტიროდა ჩემთან ერთად.

მათ რომ სცოდნოდათ: დიდმა სიხარულმა „გადამიქანა“ გული, მე არ შემეძლო ამეწერა, ან როგორმე გამომეხატა ჩემი გრძნობა.

სანამ არ დავმშვიდდი და არ დავიძინე, დიუიშენი ჩემს სასთუმალს არ მოშორებია და გრილი ხელით მიალერსებდა გახურებულ შუბლზე.

ზამთარი უღელტეხილისაკენ იხევდა უკან. შეუსვენებელივ მოერეკებოდა თავის ცისფერ ჯოგებს გაზაფხული. ბარიდან მთად მიიწევდა თბილი ჰაერი, თან მიჰქონდა გაზაფხულის მიწისა და ახლადმოწველილი რძის სურნელი. ლღვებოდნენ ნამქერები, მთაში ყინული დაიძრა, არაკრაკდნენ ნაკადულები, შემდეგ მომძლავრებულნი ერთიან თავშეუკაცებელ მდინარეებად დაიძრნენ და ხმაურით აავსეს ხევები.

შეიძლება ეს იყო ჩემი ქალიშვილობის პირველი გაზაფხული. ყოველ შემთხვევაში, იგი სხვაზე უფრო ლამაზად მეჩვენებოდა. ბორცვიდან, სადაც ჩვენი სკოლა იდგა, მოჩანდა მშვენიერი სამყარო, სადაც გაზაფხულს დაედგა ტახტი. მიწას, თითქოს ხელგაშლილი რომ მორბოდა მაღალი მთებიდან, თავი ვერ შეეკავებინა და იკარგებოდა უსასრულო ტრამალის ვერცხლისფერ სივრცეებში. სადღაც, ცხრა მთას იქით ლავარდს ეჯიბრებოდნენ სილურჯეში ყინულისაგან თავდახსნილი ტბები, ცხენთა ჭიხვინი სწვდებოდა ცას, ცხრა მთას იქით მიფრინავდნენ ზეცას თეთრი ღრუბლებივით გაკრული

წეროები. ვინ იცის, საიდან მოტრინავდნენ, ან საით მიუწევდათ გული?

გაზაფხულმა გაამხიარულა ჩვენი უფერული ცხოვრება. ათასგვარ თამაშებს ვიგონებდით, უმიზეზოდ ვიციინოდით, სკოლის შემდეგ სირბილით ვუახლოვდებოდით აულს, მთას და ბარს აყრუებდა ჩვენი ჟივილ-ხივილი. ბიცოლაჩემს არ მოსწონდა ყველაფერი ეს და შემთხვევას არ უშვებდა, რომ არ გაველანძღე:

— რა კვიცივით დახტიხარ, სულელო? არ გადარდებს გაუთხოვრად რომ ზიხარ? შენი ტოლები რა ხანია ბედს ეწიენ, ოჯახს ნათესავები მოუძრავლეს, შენ კი... იპოვნე გასართობად სკოლა... თუ ქალი ვარ, მოგივილი!

მე არცთუ ისე ახლოს მიმქონდა გულთან ბიცოლაჩემის ლანძღვა-გინება. ჩემთვის აქ ახალი არაფერი იყო. იგი ხომ მთელი თავისი სიცოცხლე ილანძღებოდა. ხოლო იმის თქმა, რომ გაუთხოვრად დავრჩი, უაზრობა იყო. განა რამდენი წლი-სა ვიყავი მაშინ? მე მხოლოდ ტანი ავიყარე იმ გაზაფხულზე.

— შენ ჯერ გაბურძგნული, თმადაუვარცხნელი გოგონა ხარ, — იცინოდა დიუიშენი, — თანაც ვგონებ წითურცი.

მისი სიტყვები სულაც არ მწყინდა. „რა თქმა უნდა, გაბურძგნული, — ვფიქრობდი მე, — მაგრამ არცთუ მთლად წითური. როცა გავიზრდები და ნამდვილი საპატარძლო გავზრდები, მაშინაც ხომ ასეთი არ ვიქნები? ნახოს ერთი მაშინ ბიცოლაჩემმა როგორი ლამაზი გავზრდები, დიუიშენი ხომ ამბობს თვალები ვარსკვლავებივით გიბრწყინავს და სახეც ნათელი გაქვსო“.

ერთხელ, როცა სასლში მოვიარბინე, ეზოში ცხენები შევნიშნე. უნაგირზე და მოსართავებზე შევატყვე — მათი პატრონები მთებიდან იყვნენ მოსულნი. წინათაც შემოუხგვევით ჩვენსკენ გზად წისქვილიდან, ან ბაზრიდან უკან დაბრუნებულებს.

ჯერ კიდევ ზღურბლზე ყური მომქრა ბიცოლაჩემის არაბუნებრივმა სიცილმა.

— ჩემო ძმისწულო, ნუ ძუნწობ, არ გაღარიბდები. სა-

შაგიეროდ, იმ მტრედს როცა ხელში მოიგდებ, კეთილი სიტყვით მომიგონებ.

ვილაცეები ხარხარებდნენ და კვერს უკრავდნენ. კარი გავალე, ხმაური უცებ შეწყდა. ქეჩაზე სუფრა გაეშალათ, სუფრასთან კუნძივით კაცი იჯდა, სახეწითელი და ძორძობი, მელის ბეწვის ქული ჩამოეთხატა ოფლიან შუბლზე, ჩაახველა და თვალები დახარა.

— ოო, შვილო, დაბრუნდი? შემოდი, გენაცვალე! — მომელაქუცა ბიცოლაჩემი.

ბიძაჩემი ქეჩის კიდეში იჯდა, ვილაც უცხო კაცთან. ისინი კარტს თამაშობდნენ, არაყს სვამდნენ და ბეშბარმაქს მიირთმევდნენ. ორივე მთვრალი იყო და უცნაურად აკანტურებდნენ თავებს, როცა კარტს ქეჩაზე ურტყამდნენ.

ჩვენი რუხი კატა ის იყო ქეჩას მიუახლოვდა, მაგრამ წითელსახიანმა კაცმა ისე გამეტებით ჩაართვა თავში, რომ იგი კნავილით გახტა და კუთხეში მიიკუნჭა. როგორ შემეცოდა საბრალო ფისო!

მინდოდა წავსულიყავი, მაგრამ არ ვიცოდი როგორ მომეხერხებინა. ბოლოს ბიცოლაჩემმა მიხსნა:

— შვილო, ქვაბში საკმელია, ჭამე, მანამ არ გაცივებულა. გამოვედი, მაგრამ არ მომეწონა ბიცოლაჩემის საქციელი. ავფორიაქდი, რალაცამ დამაეჭვა.

ორი საათის შემდეგ სტუმრები ცხენებზე შესხდნენ და მთებისაკენ გაუყვნენ ვზას. ბიცოლაჩემმა კი ისე გამომლანძღა, რომ გულზე მომეშვა: „ალბათ, მთვრალი იყო და იმიტომ მომიალერსა ასე“, — გავიფიქრე გუნებაში.

ცოტა ხნის შემდეგ საიკალი მოვიდა ჩვენთან, ეზოში ვიყავი, მაგრამ მაინც გავიგონე, ბიცოლას რომ უთხრა:

— ღმერთი არ გწამს? რატომ ღუპავ ბავშვს?

ერთმანეთს ლაპარაკს არ აცლიდნენ, გაცხარებულნი დაობდნენ რალაცაზე, შემდეგ მოხუცი განრისხებული გამოვარდა სახლიდან. გაბრაზებული, თანაც სევდიანი მზერა შემომამგება და სიტყვის უთქმელად წავიდა. გული გადამიქანდა: რატომ შემომხედა ასე, განა რა ვაწყენინე?

მეორე დღეს შევნიშნე, რომ დიუიშენი მოღუშული და რალაციტ შეწუხებული იყო, თუმცა ცდილობდა, არავის შეემჩნია ეს. ისიც შევნიშნე, რომ რატომღაც ჩემსკენ იყურებოდა. გაკვეთილების შემდეგ, როდესაც ყველანი ერთად გამოვედით გარეთ, მან დამიძახა:

— ალტინაი, მომიცადე, — მოვიდა, მხარზე ხელი დამადო, თვალბში ჩამხედა და მითხრა: — სახლში ნუ წახვალ. გამივე რასაც გეუბნები, ალტინაი?

შიშისაგან მკვდრის ფერი დამედო. მხოლოდ ახლა მივხვდი რას მიპირებდა ბიცოლაჩემი.

— მე ვაგებ პასუხს. ჭერჭერობით ჩვენთან იცხოვრებ. მარტო სიარულს ერიდე, შორს ნურსად წახვალ.

ალბათ ადამიანის ფერი აღარ მედო სახეზე. დიუიშენმა ნიკაპი ამიწია, თვალბში ჩამხედა და გამიღიმა, როგორც ყოველთვის:

— ნუ გეშინია, ალტინაი — გაიცინა მან. — როცა მე ვარ შენთან, ნურაფრის გეშინია. ისწავლე, წინანდებურად იარე სკოლაში და სხვაზე ნურაფერზე იფიქრებ... თორემ მე ხომ ვიცი, როგორი მშიშარა ხარ... ამაზე გამახსენდა, დინხანია მინდოდა მომეყოლა შენთვის. — ალბათ რალაცა სასაცილო მოაგონდა, ისევ გაიცინა. — გახსოვს, იმ დილით კარაკე უთენია ადგა და სადღაც გაქრა. ვხედავ, მოიყვანა — როგორ ფიქრობ, ვინ? — ექიმბაში, მოხუცი ჭაინაკის ცოლი. „რისთვის?“ — ვეკითხები. „შესალოცად, თორემ ალტინაის გული აღარა აქვს ალბათ ადგილზე“. ვეუბნები: „გააგდეთ აქედან, თორემ ერთ ცხვარზე ნაკლებს არ დაგჯერდებათ, ჩვენ არც ისე მდიდარი ვართ. ცხენის ჩუქებაც არ შეგვიძლია: მგლებს დავეუტოვეთ უკვე“... შენ ჭერ კიდევე გეძინა. ასე გავისტუმრე. კარაკე მთელი კვირა ხმას არ მცემდა, გაბრაზებული იყო: მაწყენინეო — მეუბნებოდა. ძალიან კარგი ხალხია, არაჩვეულებრივად კეთილი. ახლა კი წავიდეთ.

რანაირად არ ვცდილობდი თავი შემეკავებინა, მაგრამ არაფერი გამომდიოდა. უსიამოვნო ფიქრები აღარ მტოვებდნენ. ხომ შეიძლებოდა, ყოველ წუთს გამოჩენილიყო ბიცოლაჩემი

და ძალით წავეყვანე. შემდეგ იგი ისე მოიქცეოდა, როგორც მოისურვებდა, ვინ აუკრძალავდა ამას. მთელი ღამე არ მძინებია უბედურების მომლოდინეს.

ღიუიშენს კარგად ესმოდა, რასაც განვიცდიდი. შეიძლება ამიტომაც მან მეორე დღეს ორი პატარა ნერგი მომიტანა. გაკეთილების შემდეგ ხელი მომკიდა და განზე გამისმო.

— ალტინაი, ახლა ჩვენ ერთ კარგ საქმეს გავაკეთებთ, — იგი შეთქმულივით იღიმებოდა. — ეს ალვის ხეები შენთვის მოვიტანე. ჩვენ ერთად დავრგავთ. სანამ ისინი გაიზრდებიან, მომაგრდებიან, შენც გაიზრდები, კარგი ადამიანი გახდები. შენ კეთილი გული და მაძიებელი, ცოდნას მოწყურებული გონება გაქვს. რატომღაც მგონია, რომ სწავლული გამოხვალ. მე მჯერა ამის. აი ნახავ, შენ ასეთი ბედი გიწერია. ჯერ ამ ალვებსავით ნორჩი ხარ. მოდი ჩვენი ხელით დავრგოთ ისინი. და შენც სწავლაში ეძიე შენი ბედნიერება, ჩემო ნათელო ვარსკვლავო!

ისინი ჩემი სიმაღლისანი იყვნენ — იისფერი, ქორფა ალვის ხეები. როცა ჩვენ ალვები სკოლის მახლობლად, მიწაში ჩავრგეთ, მთებიდან მონაქროლი ნიავი პირველად შეეთამაშა მათ ფოთლებს. თითქოს სიცოცხლე შთაჰბერაო, ფოთლები ათრთოლდნენ, ალვის ხეები შეარხია, შეატოკა ნიავმა.

— შეხე რა კარგია! — გაიცინა ღიუიშენმა და უკან დაიწია. — ახლა იმ წყაროდან არხსაც გამოვიყვანთ. მერე ნახე, როგორ გალამაზდებიან, აიქოჩრებიან, ტანს აიყრიან! ისინი აქ იდგებიან ერთმანეთის გვერდით, როგორც ღვიძლი ძმები, ყველას დასანახად, კეთილი ადამიანების თვალისგასახარად. მაშინ ცხოვრებაც სხვანაირი იქნება, ალტინაი. ყველაფერი კარგი ჯერ კიდევ წინაა.

მე ახლაც არ შემიძლია ვიპოვნო სიტყვები, თუ როგორი გრძნობა გამოიწვია ჩემში ღიუიშენის კეთილშობილურმა ქცევამ. მაშინ მე უბრალოდ ვიდექი და შევცქეროდი მას. შევცქეროდი ისე, თითქოს პირველად დამენახოს მისი გაცისკროვნებული სახე, სიკეთით გაბრწყინებული თვალები, თითქოს არასოდეს მენახოს მისი მარჯვე და მოქნილი ხელები, წმიდა

და ნათელი ღიმილი; გულს რომ მითბობდა ხოლმე. მღელვარე ტალღასავით დაიძრა ჩემს გულში, ჯერ კიდევ შეუცნობელი სამყაროდან შემოქრილი ახალი, უცნობი გრძნობა. გული მიწევდა, მინდოდა მეთქვა: „დიდი მადლობა, ჩემო მასწავლებლო, რომ ასეთი ხარ, მინდა მოგეხვიოთ, გაკოცოთ!“ მაგრამ ვერაფრის თქმა ვერ გავბედე, შემრცხვა. შეიძლება საჭირო კი იყო მეთქვა...

მაშინ ჩვენ ვიდექით ბორცვზე, რომელსაც ნათელი გაზაფხულის ცა გადაჰფარებოდა თავზე, ამწვანებული ქედები, საამოდ ესალბუნებოდნენ თვალსა და თვითეული ჩვენგანი თავის ოცნებას ეთამაშებოდა. იმ წუთში სავსებით დამავიწყდა საფრთხე. რომელიც მელოდა. არ მიფიქრია რატომ არ მეძებს ბიცოლაჩემი, მე ხომ ორი დღეა არ გამოვჩენილვარ სახლში. შეიძლება დამივიწყეს კიდევ, თავი დამანებეს? მაგრამ თურმე დიუიშენი ფიქრობდა.

— ნუ იღარდებ, ალტინაი, ვიპოვნით გამოსავალს, — მითხრა მან, როდესაც აულში ვბრუნდებოდით. — ზეგ თემში წავალ. შენზე მოველაპარაკები ხალხს. შეიძლება მოვახერხო, რომ ქალაქში გაგზავნონ სასწავლებლად. გინდა წასვლა?

— როგორც მეტყვით, ისე მოვიქცევი, მასწავლებლო!

თუმცა მე წარმოდგენაც არ მქონდა როგორი უნდა ყოფილიყო ქალაქი, მაგრამ დიუიშენის სიტყვები საკმარისი აღმოჩნდა, რომ უკვე მეოცნება ქალაქურ ცხოვრებაზე. ხან მეშინოდა იმ გამოუცნობისა, რაც მომელოდა უცხო მხარეში; ხან კი უკვე ვემზადებოდი სამოგზაუროდ, ერთი სიტყვით, დიუიშენის სიტყვები ღრმად ჩამებეჭდა გონებაში.

მეორე დღეს სკოლისაკენ მიმავალი ისევ იმაზე ვფიქრობდი, როგორ უნდა მეცხოვრა ქალაქში. თუკი ვინმე შემიკედლებს, შეშას დავუჩეხავ, წყალს მოვუტან, სარეცხს გავუჩეხავ. გავუკეთებ ყველაფერს, რასაც მიბრძანებს. ვიჯექი გაკვეთილებზე და ვფიქრობდი: ხმაურმა გამომიყვანა ფიქრებიდან. გარედან ცხენის ფლოქვების თქარათქური შემომესმა. ეს ისე მოულოდნელი იყო, ცხენები ისეთი სისწრაფით მოქროდნენ, თითქოს სადაცაა ჩვენ სკოლას გადათვლავენო. ყველანი დავიძაბეთ, გავშეშდით.

— ყურადღებას ნუ აქცევთ, თქვენი საქმე აკეთეთ, — სწრაფად თქვა დიუიშენმა.

მაგრამ ამ დროს სკოლის კარები ხმაურით გაიღო და ზღურბლზე ბიცოლაჩემი დავინახე. მას სახეზე ბოროტი, გამომწვევი ღიმილი უთამაშებდა. დიუიშენი კარებთან მივიდა:

— რაზე შეწუხებულხართ?

— ეს შენ არ გეკითხება. გოგო უნდა გავატანო ქმარს. ეი შენ, უსახლკაროვ! — და ბიცოლაჩემი ჩემსკენ წამოვიდა, მაგრამ დიუიშენმა გადაუღობა გზა.

— აქ მხოლოდ მოსწავლეებია და გასათხოვარი ჯერჯერობით არავინ არის! — მტკიცედ და ღინჯად თქვა მან.

— ამას კიდევ ვნახავთ! ეი, კაცებო, გამოათრიეთ ის ძაღლის ლეკვი!

ბიცოლაჩემმა ხელით მოუხმო ერთ-ერთ მხედარს. ეს სწორედ ის წითური იყო მელის ბეწვის ქუდით. მასთან ერთად მძიმე კეტებით შეიარაღებული ორი მამაკაცი ჩამოქვეითდა.

მასწავლებელი ადგილიდან არ დაძრულა.

— შენ, უპატრონო ძაღლო, ვინ მოგცა უფლება სხვის შვილებზე რომ უფროსობ, თითქოს შენი ცოლები იყენენ? მამეცაღე გზიდან.

წითურსახიანი დათვივით წამოვიდა.

— შემოსვლის უფლება არა გაქვთ, აქ სკოლაა! — დიუიშენი კარებში ჩამდგარიყო და ხელები გაეშალა.

— ხომ ვამბობდი! — აწრიპინდა ბიცოლაჩემი. — ღიდიხანია უკვე თვითონ დაძვრება მასთან. ძუენა სატყუარზე მიიტყუა.

— მიმიფურთხებია შენი სკოლისათვის! — აღრიალდა წითურსახიანი და მათრახი მოიქნია.

მაგრამ დიუიშენმა დაასწრო. მთელი ძალით ჩაართვა წიხლი მუცელში, წითურსახიანმა ერთი ამოიხვნეშა და ადგილზე ჩაიკეცა. იმ წუთში კეტებით შეიარაღებული ორი კაცი ეცა მასწავლებელს. ბავშვები ყვირილით გამოიქცენენ ჩემსკენ, კეტების დარტყმებისაგან კარი ნაფოტებად იქცა. მე მოჩხუბრებისაკენ გავიწიე, თან მივათრევედი პატარებს, რომლებიც კაბაში ჩამფრენოდნენ.

— თავი დაანებეთ მასწავლებელს! ნუ ურტყამთ, არ მოკლათ, მე აქ ვარ, წამიყვანეთ.

დიუიშენი ჩემსკენ მობრუნდა. იგი მთლად სისხლში იყო მოსვრილი, გაბოროტებული, საშინელი შესახედავი იყო.

— ბავშვებო, გაიქეციეთ, აულში გაიქეციეთ! გაიქეცი, ალტინაი — ხმა ჩაუწყდა.

ჯოხებს ურტყამდნენ, ხელები დაამტვრიეს. ახლა უკვე თავდაცვის თავი არ ჰქონდა, მომხვდურნი კვლავ მხეცური გაბოროტებით სცემდნენ.

— დასცხე! არ დაინდო! თავში დასცხე! ისმოდა ღრიალი.

მე ბიცოლაჩემი და წითურსახიანი მომვარდნენ და ეზოში გამათრიეს. მთელი ძალით ვცდილობდი გავსხლტომოდი ხელიდან, წამით დავინახე ბავშვთა შეშინებული სახეები და კედელთან სისხლში მოსვრილი დიუშენი.

— მასწავლებე-ლო-ო-ო!

მას არაფრით შეეძლო ჩემი შველა. თვითონ ძლივს იდგა ფეხზე, მთვრალივით ბარბაცებდა, ურტყამდნენ განუწყვეტლივ, ცდილობდა თავი მალლა აეწია და ისევ ურტყამდნენ, ურტყამდნენ გამეტებით. მე წამაქციეს და ხელები შემიკრეს. დიუიშენი დაეცა.

— მასწავლე-ბე-ლ-ო-ო!

პირზე ხელი დამაფარეს და უნაგირზე შემავადეს.

წითურსახიანმა ამიტაცა, ის ორნიც დიუიშენს რომ ურტყამდნენ, ცხენებს მოახტნენ, ბიცოლაჩემი გვერდით მომდევდა, თავში მირტყამდა.

— მოვესწარი, მოვესწარი! როგორც ღირსი ხარ ისე გაცილებ! შენს მასწავლებელსაც გამოუვიდა წირვა.

არა, ეს დასასრული არ იყო; თავგანწირული ყვირილი მომესმა:

— ალტი-ნა-ა-იი!

ძლივს წამოვწიე თავი და გავიხედე. დიუიშენი მოგვდევდა. ცემით დაოსებული, დასისხლიანებული, მორბოდა — დი-

დი ქვა აეღო ხელში, მას ყვირილით მოყვებოდა მთელი ჩვენი კლასი.

— მხეცებო! გაუშვით! თავი დაანებეთ! ალტინაი! — ყვიროდა და ცდილობდა დაგვწეოდა.

მოდალადეები შეჩერდნენ, ორმა ცხენები დიუიშენის ირგვლივ დაატრიალა. მან კი კბილით დაიკავა სახელო, რომ გადამტვრეულ ხელს არ შეეშალა და ქვა ისროლა. ვერ მოარტყა. მაშინ იმ ორმა კიდევ დაუშინეს კეტები და ტალახში ჩაგდებული დიუიშენი გზაზე დარჩა. თვალთ დამიბნელდა. მხოლოდ იმის დანახვა მოვასწარი, როგორ მიიბრინეს ბავშვებმა და შეშინებული გაჩერდნენ მის წინ.

არ მახსოვს როდის და სად მიმიყვანეს. იურტაში მოვედი გონზე. ღია გუმბათიდან ვარსკვლავები დამცქეროდნენ, ისინი თითქოს მშვიდად მილიმოდნენ, ანდა რა ჰქონდათ სადარდებელი. სადღაც ახლოს მდინარე ხმაურობდა და ისმოდა მწყემსთა გადაძახილი, ღამის დარაჯად რომ უდგნენ ცხვარს. ჩამქრალ კერასთან პირქუში, ხის ქერქივით გამომშრალი, მოხუცი ქალი იჯდა. სახე მიწასავით ჩაშვებოდა. მზერა ავარიდევ. ო, რომ შემძლებოდა, ადგილზე გავაქვავებდი თვალებით.

— შავტუხავ, წამოაყენე ფეხზე, — უბრძანა წითელსახიანმა.

შავი ქალი მოვიდა და შემაჯანჯლარა, მაგარი, დაკორძილი ხელი მხარში ჩამავლო.

დააწყნარე შენი შემცვლელი, აუხსენი რაშია საქმე. არადა — სულ ერთია — მე ბევრი ლაპარაკის თავი არა მაქვს.

იგი იურტიდან გავიდა. შავი ქალი ადგილიდან არ დაძრულა, ხმაც არ ამოუღია. იქნებ მუნჯიც იყო? მისი ჩამქრალი ფერფლივით თვალები არაფერს გამოხატავდნენ. ხომ არიან მივიწყებული ქალები, ბოროტი ადამიანები გამუდმებით რომ ურტყამენ მათ, რაც ხელში მოხვდებათ და ისინიც თანდათანობით ეჩვევიან ამას. მათ მწერაში ისეთი უძირო სიცარიელე მოჩანს — გაგაყრყოლებს. ვუყურებდი შავი ქალის უსიცოცხლო თვალებს და მეჩვენებოდა, რომ აღარც მე დაედღივარ ამ ქვეყნად, რომ მეც სამარეში ვარ. მდინარის ხმაური

რომ არა, მე ვირწმუნებდი ამ ამბავს. წყალი დგაფუნით მიიკვლევდა გზას, იგი თავისუფალი იყო.

ბიცოლა, გულქვავე, ბოროტო ადამიანო, წყეულმც იყავ უკუნითი უკუნისამდე! ჩემმა ცოდვამ არ გაგახაროს!.. იმ ღამეს, დაბადებიდან თხუთმეტი წლისა, ქალად ვიქეცი. მე მოძალადის შვილებზე უმცროსი ვიყავი...

მესამე ღამეს გადავწყვიტე: გავქცეულიყავი რადაც არ უნდა დამქდომოდა. დაე, გზა ამებნეს, მღვეარი წამომეწიოს, ვიბრძოლებ უკანასკნელ ამოსუნთქვამდე, როგორც იბრძოდა ჩემი მასწავლებელი დიუიშენი.

უჩუმრად მივიპარე კარებთან, იგი მაგრად იყო დაკეტილი სქელი ქამანდით. თოკები ისე ეშმაკურად გაეკვანძათ, რომ სიბნელეში მისი გახსნა შეუძლებელი იყო. მაშინ მე შევეცადე ზევით ამეწია იურტის კალთა. იქნებ როგორმე გამოვმძვრალიყავი, არაფერი გამოვიდა, იურტა გარედანაც მაგრად იყო მიწაზე ქამანდებით დამაგრებული.

ერთი გამოსავალი იყო, როგორმე უნდა გადამეჭრა კარებზე მიმაგრებული თოკები. ძებნა დავიწყე, ვერაფერი ვიპოვნე სარის მეტი. გამწარებულმა მიწის თხრა დავიწყე იურტის ქვეშ. ეს, რა თქმა უნდა, უაზრობა იყო, მაგრამ მე არაფერს არ ვუწყვედი ანგარიშს. თავში ერთი აზრი მიტრიალებდა — გავქცეულიყავი ან მოვმკვდარიყავი, ოღონდ არ მესმინა ამ აუტანელი ადამიანის ხვრინვისათვის, ოღონდ აქ არ დავრჩენილიყავი და მოვმკვდარიყავი თავისუფალი, ბრძოლის დროს, ოღონდ არ დავმორჩილებულიყავი.

ტოკოლი — მეორე ცოლი. როგორ მეზიზღება ეს სიტყვა! ვინ და როდის მოიგონა იგი? რა შეიძლება იყოს მეორე ცოლის მდგომარეობაზე დამამცირებელი, იგი მონაა სულითა და ხორციით. წამოდექით, უბედურებო, წამოდექით საფლავებიდან, დაღუპული, შეგინებული, ადამიანურ უფლებააყრილი ქალების აჩრდილებო! ადექით, წამებულნო, დაე შეძრწუნდეს იმდროინდელი ბნელეთის სამეფო! ამას ვამბობ უკანასკნელი უქვენთაგანი, რომელმაც გაიზიარა თქვენი ბედი.

იმ ღამეს არც კი ვიცოდი თუკი ამ სიტყვების თქმას მოვახერხებდი ოდესმე. გაშმაგებით ვფხეკდი მიწას, ნიადაგი

ჭკრანი გამოდგა, ადვილად არ მნებდებოდა. ეთხრიდი ფრჩხილებით, ხელები დავისისახლიანე. როცა იურტიდან უკვე ხელის გამოყოფა შეიძლებოდა, გათენდა კიდეც. აყუფდნენ ძალები, გამოიღვიძა ხალხმა. ფრუტუნით ჩაირბინა ჯოგმა, გაიარა ფარამ. შემდეგ ვიღაც მოვიდა იურტასთან, გარედან ქამანდები შეხსნა და ქეჩის მოხსნა დაიწყო. შავი ქალი იყო.

მაშასადამე, აული სადგომს იცვლიდა. გამახსენდა: გუშინ ყური მოვკარი საუბარს, რომ დილიდან ჯერ უღელტეხილისაკენ უნდა დაძრულიყვნენ, შემდეგ კი საზაფხულოდ მთების სიღრმეში უღელტეხილს გაღმა. გული უფრო დამიმძიმდა, იქედან გამოქცევა პევრად ძნელი იქნება.

ადგილიდან არ გავნძრეულვარ. დავრჩი ისე. როგორც ვიჭექი, გათხრილ ადგილს ვფარავდი. რისთვის ვმალავდი, რა საჭირო იყო? შავმა ქალმა ყველაფერი შეამჩნია, მაგრამ ხმა არ ამოუღია, უჩუმრად აკეთებდა თავის საქმეს და, საერთოდ, ისე იქცეოდა, თითქოს მას არაფერი ეხებოდა. მან ქმრის გაღვიძება ვერ გაბედა, ვერ გაბედა ეთხოვნა მისთვის დახმარებოდა ბარგის შეეკრავში. ის კი დათვივით ხროტინებდა საბნებსა და ქურქებში გამოხვეული.

ქეჩები შეხვეული იყო, იურტა გაძარცვულივით გამოიყურებოდა, მე კი ვიჭექი ხალიაში და ვხედავდი როგორ კაზმავდნენ ცხენებსა და ჯორებს მდინარის პირას. მერე დავინახე, ამ ადამიანებს სამი მხედარი მიუახლოვდა, რაღაცა ჰკითხეს და ჩვენსკენ გამოსწიეს, ჯერ ვიფიქრე ხალხის შესაგროვებლად მოდიან, რომ გზას. გაუდგნენ-თქო, შემდეგ კარგად დავაკვირდი და გაეწეშდი. ეს იყო დიუიშენი, მას თან ორი მილიციელი ახლდა.

ცოცხალმკვდარი ვიჭექი და ყვირილის თავიც არ მქონდა. სიხარულმა თავბრუ დამასხა — ცოცხალია ჩემი მასწავლებელი! ამავე ჯროს გულში საშინელმა სიცარიელემ დაისადგურა. მე დაღუპული ვარ, შერცხვენილი...

დიუიშენს თავი ჰქონდა შეხვეული, დაბანდული ხელი კისერზე ჩამოეკიდებინა. იგი ცხენიდან ჩამოეტა. კარს ფეხი ჰკრა და იურტაში შემოვარდა, წითურსახიანს საბანი გადაადრო.

— ადექი — დაიყვირა მან მრისხანედ.

მან თავი ასწია, თვალეზე მოისვა ხელი და ის იყო დიუი-შენს უნდა სცემოდა, მილიციელების მიერ მისკენ მიშვერილი ორი ნაგანი შენიშნა და მოეშვა. დიუიშენმა კისერში ჩაავლო ხელი და თავისკენ მოქაჩა.

— ძაღლო! — წაიჩურჩულა მან გათეთრებული ტუჩებით. ახლა იქ ამოყოფ თავს, სადაც ჯერ არს! წამოდი!

იგი მორჩილად დაიძრა, მაგრამ დიუიშენმა ისევ მოსწია თავისკენ, თვალეში ჩახედა და წაილაპარაკა:

— შენ ფიქრობ, რომ იგი ბალახით გათელე, დალუპე? სტყუი, შენი დრო წავიდა, ახლა მისი დროა, შენი აღსასრულის დღე მოვიდა!

წითურსახიანს საშუალება მისცეს ჩექმები ჩაეცვა, ხელები შეუკრეს და ცხენზე შესვეს. ერთმა მილიციონერმა სადავეს მოჰკიდა ხელი და წინ გაუძღვა, მეორე კი უკან გაჰყვა. მე დიუიშენის ცხენზე დაეჯექი, იგი გვერდით მომყვებოდა.

როცა დავიძარით, უკნიდან არააღამიანური, ველური კივილი გაისმა. შავი ქალი მორბოდა ჩვენსკენ. იგი გიჟივით მივარდა თავის ქმარს, ქვა ესროლა და თავიდან მელის ბეწვის ქუდი წააძრო.

— ჩემი გაუბედურებული სიცოცხლისათვის, სულთამხუთავო! — ყვიროდა იგი. — ჩემი შავბნელი დღეებისათვის! ცოცხალს არ გაგიშვებ!

აღბათ, ორმოცი წლის მანძილზე ერთხელაც არ წაჰოუწევია თავი. ახლა კი იფეთქა და გადმოაფრქვია ყველაფერი, რაც სტანჩავდა და აწამებდა. მისი გამყივანი ხმა ექოდ გადადიოდა კლდიდან კლდეზე. იგი ხან ერთი მხრიდან, ხან მეორიდან მოსდევდა შიშისაგან წელში მოხრილ ქმარს, ესროდა ქვებს, ნაკელს, თიხის ბელტებს, ყველაფერს, რაც ხელში მოხვდებოდა და თან წყველა-კრულვას უთვლიდა:

— ბალახმაც არ იხაროს შენს ნატერფალზე! — ყვავ-ყო-რანთა საჯიჯგნი გახდეს შენი თვალეები, მიწამ არ მიიბაროს შენი ძვლები! ღმერთმა ნურასოდეს დამანახოს შენი თავი სულა ამოგძვრეს ჩემს თვალწინ, დამპალო მძორო! — იქოთ-

ქოთა მან და შემდეგ ყვირილით გაიქცა. გეგონებოდათ გაურბისო თავის გაწლილ თმებს, რომელსაც ქარი ათამაშებდა.

მეზობლები გამოედევნენ.

თავბრუ მესხმოდა, თითქოს ყველაფერი რაც განვიცადე საშინელი სიზმარი იყო. დაბეჩავებული, განაწამები ვიჭექეცხენზე. დიუიშენი ოდნავ წინ მიდიოდა, ხელში სადავე ეჭირა. ღუმდა, დაბანდული თავი დაეხარა.

კარგა ღრომ გაიარა, ვიდრე ავბედით ხეობას უკან მოვიტოვებდით. მილიციელებმა წინ გაგვისწრეს, დიუიშენმა ცხენი გააჩერა და პირველად შემომხედა განაწამები თვალებით.

— ალტინაი, მაპატიე, ვერ მოგიარე, — მითხრა მან, — შემდეგ ჩემი ხელი აიღო და ლოყასთან მიიტანა. — თუმცა შენ რომ მაპატიო, მე მაინც ვერასოდეს ვაპატიებ ჩემს თავს.

ავტირდი, ცხენის კისერზე დავემხე. დიუიშენი ღუმდა, იცდიდა როდის მოვათავებდი ტირილს.

— დამშვიდდი, ალტინაი, წავიდეთ, — მითხრა მან ბოლოს, — ყური მიგდე რა გითხრა: თემში ვიყავი, შენ ქალაქში წახვალ სასწავლებლად. გესმის?

როცა მორაკრაკე, ანკარა მდინარესთან გავჩერდით, დიუიშენმა მითხრა:

— ჩამოდი ცხენიდან, ალტინაი, დაიბანე. — ჯიბიდან საპნის ნაჭერი ამოიღო. — აილე. ნურათერზე იღარდებ. თუ გინდა მე ცხენს წავაბალახებ, შენ კი გაიხადე და იბანავე. დავიწყე ყველაფერი რაც იყო, ნულარ მოიგონებ. იბანავე, დარდი შეგიმსუბუქდება.

თავი დაუქნიე. როცა დიუიშენი წავიდა. გავიხადე და ფრთხილად შევედი წყალში. თეთრი, ლურჯი, მწვანე, წითელი ქვები შემომკეროდნენ ფსკერიდან. სწრაფი ცისფერი ნაკადი ათუხთუხდა ჩემს ფეხებთან. მუჭით ამოვხაპე წყალი და მკერდზე შევისხი. ცივი შხეფები ჩამოწყანწყარდნენ ტანზე, უნებლიეთ გამეცინა, პირველად ამ დღეების განმავლობაში. რა კარგი იყო სიცილი! მე ერთხელ კიდევ გადავისხი წყალი და შემდეგ ზვირთებში შეეცურე. დინება სწრაფად მიმაქანებდა თავთხელისაკენ, მე კი ისევ და ისევ ვუბრუნდებოდი აქაფებულ ზვირთებს.

წყალო, მომაშორე ქუჩყი და სიბინძურე ამ დღეებისა! გამ-
ხადე ისეთივე სუფთა, როგორც შენ ხარ! — ვიურჩულებდი
და თან ვიცინოდი, არ ვიცი რატომ.

რატომ არ რჩება სამარადეამოდ ადამიანთა ნაკვალევი
მათთვის ძვირფას ადგილებში. ახლა მე რომ იმ ბილიკის პოვნა
შემეძლოს, რომლითაც ჩვენ მთებიდან ვბრუნდებოდით, მიწა-
ზე დავემხობოდი და დავკოცნიდი ჩემი მასწავლებლის ნაფე-
ხურებს. ამ ბილიკმა ხომ ცხოვრების დიდ შარაგზაზე გამიყვა-
ნა. დაილოცოს ის დღე, ის ბილიკი, ის გზა. რომლითაც მე
დავუბრუნდი ცხოვრებას, ვიპოვნე ჩემი თავის რწმენა, რომ-
ლითაც გავიკვლიე გზა ახალი იმედებისა და სინათლისაქენ...
მადლობა იმ მზეს, იმ მიწას...

ორი დღის შემდეგ დიუიშენმა სადგურზე გამაცილა.

აულში დარჩენა, ყველაფერი იმის შემდეგ რაც მოხდა, მე
არ მინდოდა. ახალი ცხოვრება ახალ ადგილას უნდა დაემწყო.
თანასოფლელებმაც სწორად მიიჩნიეს ჩემი გადაწყვეტილება
საიკალი და კარაკეც მაცილებდნენ. ისინი ფუსფუსებდნენ,
ტიროდნენ ბავშვებივით, ათასგვარ რამეს მაჩეჩებდნენ ხელში
საგზაოდ. სხვებიც მოვიდნენ გამოსათხოვებლად, მათ შორის
სატიმკულიც იყო.

— ღმერთი გფარვიდეს, შვილო ჩემო, — მითხრა მან,
სინათლის შუქი ადგეს შენს გზას. არ შეკრთე, იცხოვრე ისე,
როგორც შენმა მასწავლებელმა დიუიშენმა დაგარიგა და არ
დაიკარგები. მეტი რა გითხრა, ჩვენც შევიგენით რაღაც.

ჩვენი სკოლის მოსწავლეები დიდხანს მოსდევდნენ ორ-
თვალას, ხელს მიქნევდნენ, მეთხოვებოდნენ...

მივემგზავრებოდი რამდენიმე ბავშვთან ერთად, რომლებიც
ჩემსავით ტაშკენტის ბავშვთა სახლში მადიოდნენ. სადგურზე
ტკავის ქურთუკში გამოწყობილი რუსის ქალი გველოდა.

რამდენჯერ გამივლია მას შემდეგ მთებში ჩამალული,
ჭადრის ხეებით დაჩრდილული სადგური! ასე მგონია ჩემი
გულის ნახევარი იქ დავტოვე სამუდამოდ.

გაზაფხულის საღამოს მოიასამნისფრო ბინდბუნდში იყო
რაღაც ნაღვლიანი, სევდის მომგვრელი, თითქოს თვითონ
მწუხრამაც იცოდა ჩვენი განშორების შესახებ. დიუიშენა

ცდილობდა არაფერი ეგრძნობინებინა, მე ვიცი რომ როგორ განიცდიდა იგი, მეც ხომ ასეთსავე დღეში ვიყავი: ცრემლი ყელთან მომბჯენოდა. დიუიშენი თვალებში მომჩერებოდა. მისი ხელები ეალერსებოდნენ ჩემს თმებს, ჩემს სახეს. ჩემი კაბის ღილებსაც კი.

— ალტინაი, მე შენ ერთის წუთითაც არ მოგიშორებდი, — მეუბნებოდა იგი, — მაგრამ უფლება არ მაქვს ხელი შეგიშალო, შენ უნდა ისწავლო. მე კი რა შემიძლია, თვითონაც ძალიან ცოტა რამ ვიცი. გაემგზავრე, ასე აჯობებს. იქნებ შენ ნამდვილი მასწავლებელი გამოხვიდე, მაშინ მოიგონებ ჩვენ სკოლას და გაგეცინება.. დაე ასე იყოს, დაე ასეც მოხდეს...

ხეობაში ექოდ გაიქრა ორთქლმავლის კივილი, მატარებელმა შემოანათა. სადგურზე ხალხი ამოძრავდა.

— აი ახლა შენ წახვალ, — შემკრთალი ხმით მითხრა დიუიშენმა, — ბედნიერი იყავი, ალტინაი. და რაც მთავარია — ისწავლე, ისწავლე...

არაფრის თქმა არ შემეძლო, ცრემლები მახრჩობდა.

— ნუ ტირიხარ, ალტინაი, — დიუიშენმა თვალები მომწმინდა და უცებ მოაგონდა: — ჩვენ რომ ალვის ხეები დავრგეთ, იმას მე მოვეუვლი. როცა ნასწავლ ქალად დაგვიბრუნდები, ნახავ როგორი ლამაზები დაგხვდებიან ისინი.

ამ დროს მატარებელიც ჩამოდგა. ღრქიალითა და ხმაურით დამუხრუჭდნენ ვაგონები.

— აბა, ნახვამდის! — დიუიშენი მომეხვია და მაგრად მაკოცა შუბლზე. — ბედნიერი იყავი, გზა მშვიდობისა, მშვიდობით, ძვირფასო... ნუ შეკრთები, იყავი გაბედული.

მე შევხტი საფეხურზე და მხრის ზევიდან უკან მოვიხედე. არასოდეს დამავიწყდება, როგორი დანიხლული თვალებით მიყურებდა ხელშეხვეული დიუიშენი, იგი წამოიწია, თითქოს უნდოდა ისეც შემხებოდა, მაგრამ სწორედ იმ წუთში მატარებელი დაიძრა.

— მშვიდობით, ალტინაი! ჩემო თვალისჩინო!

— მშვიდობით, მასწავლებელო! მშვიდობით, ძვირფასო მასწავლებელო!

დიუიშენი ფეხდაფეხ მოსდევდა ვაგონს, შემდეგ ჩამორჩა და ისევ მომესმა მისი ყვირილი:

— ალტინა-ა-იი!

იგი ისე ყვიროდა თითქოს დაავიწყდა ჩემთვის ყველაზე მნიშვნელოვანის თქმა და ახლა მოაგონდა მხოლოდ, თუშეკა კარგად იცის, რომ გვიანაა... ახლაც მესმის ეს ძახილი, გულიდან წამოსული...

მატარებელმა გვირაბი ჩაათავა, სწორ გზაზე გავიდა, სიჩქარეს მოუმატა და ყაზახეთის უსასრულო ტრამალებით გამაქროლა ახალი ცხოვრების შესახებდრად.

მშვიდობით, მასწავლებლო, მშვიდობით ჩემო პირველო სკოლავ, მშვიდობით ბავშვობავ, მშვიდობით ჩემო პირველო, გაუმხელებლო სიყვარულო!..

ღიახ, მე ვსწავლობდი დიდ ქალაქში, რომელზედაც ოცნებობდა დიუიშენი, ნათელფანჯრებიან დიდ სკოლაში, რომელზეც მოგვითხრობდა იგი. შემდეგ მუშფაკი დავამთავრე და მოსკოვში გამგზავნეს — ინსტიტუტში.

რამდენი სიძნელის დაძლევა მომიხდა სწავლის წლებში, რამდენჯერ ჩავვარდნილვარ სასოწარკვეთილებაში: ვერაფრით ვერ ვისწავლი-თქო, მაგრამ ყოველთვის. ჩემთვის მძიმე წუთებში თვალწინ მედგა ჩემი მასწავლებელი, იგი მამხნევებდა და მეხმარებოდა სიძნელეთა გადალახვაში. ის რაც სხვისთვის ადვილი იყო, ჩემგან უდიდეს შრომას მოითხოვდა, მე ხომ ანბანიდან დავიწყე.

მუშფაკში ვსწავლობდი, როცა მასწავლებელს წერილი მივწერე, სიყვარულში გამოვუტყდი, პასუხი არ მიმიღია. ამის შემდეგ ჩვენი მიმოწერა შეწყდა. მე ვფიქრობ მან უარი თქვა ჩემს სიყვარულზე იმიტომ. რომ არ უნდოდა ხელი შეეშალა ჩემთვის. შეიძლება მართალიც იყო... ან იქნებ, სხვა რამეც იყო მიზეზი? რამდენი განვიცადე, რამდენი ვიფიქრე მაშინ...

პირველი დისერტაცია მოსკოვში დავიცავი. ეს ჩემთვის დიდი, სერიოზული გამარჯვება იყო. ამ ხნის მანძილზე არც ერთხელ არ ვყოფილვარ აულში. ამასობაში ომიც დაიწყო. გვიანი შემოდგომით. მოსკოვიდან ფრუნზეში ევაკუირებული, სწორედ იმ სადგურში ჩამოვედი მატარებლიდან, საიდანაც

მასწავლებელმა გამაცოლა. ბედმა გამიღიმა. საბარგული შემხვდა, იგი საბჭოთა მეურნეობისაკენ მიეშურებოდა ჩვენი აულის გავლით.

ჩემო მშობლიურო მხარეე, ჩვენთვის ორივესათვის მძიმე წუთებში მოგიანახულე შენ. მიხაროდა, როცა ვხედავდი შენს განახლებულ მიწას, ახალ აულებს, გადახნულ ველ-მინდვრებს; ახალ გზებსა და ხიდებს. მაგრამ ომი მიშხამავდა ამ შეხვედრით გამოწვეულ სიხარულს.

ვუახლოვდებოდი აულს, ვლელავდი. შორიდან ვაკვირდებოდი ახალ უცნობ ქუჩებს, სახლებსა და ბალებს, შემდეგ გავიხედე ბორცვისაკენ. სადაც ჩვენი სკოლა იდგა და გული გამიჩერდა — ბორცვზე ერთმანეთის გვერდით ორი დიდი ალვის ხე იდგა. მათ ქარი არხევდა. და პირველად ადამიანს, რომელსაც მუდამ მასწავლებელს ვუწოდებდი, მივმართე უბრალოდ სახელით.

— დიუიშენ! — წავიჩურჩულე მე. — მადლობა შენ ყველაფრისათვის. რაც ჩემთვის გააკეთე! არ დაგვიწყნივარ, მამასადამე, ფიქრობდი... სწორედ ასეთს გიცნობდი მუდამ... მებარგულმა ჩემს თვალზე ცრემლი დაინახა და შემფოთდა:

— რა დაგემართათ?

— არაფერი, იცნობ ვინმეს ამ კოლმეურნეობაში?

— რა სათქმელია. ჩვენიანები არიან.

— დიუიშენს იცნობ, მასწავლებლად რომ იყო?

— დიუიშენს? ის ხომ არმიაში წავიდა, მე თვითონ ჩავიყვანე იგი ამ საბარგულით სამხედრო კომისარიატში.

აულის შესასვლელთან გავაჩერებინე ყმაწვილს საბარგული, ჩამოვხტი და დავეფიქრდი. ღირდა კია ასეთ შფოთიან დროს აულში მისვლა, ნაცნობების ძებნა, თავის მოგონება? დიუიშენი არმიაში იყო, გარდა ამისა, მე ფიცი მქონდა დადებული: არასოდეს დამედგა ფეხი იქ, სადაც ჩემი ბიძა და ბიციოლა ცხოვრობდნენ. ადამიანს შეიძლება ბევრი რამ აპატიო, მაგრამ ასეთი ბოროტება — არავის.

აღარც კი მინდოდა, რომ აულში ჩემი ჩასვლის ამბავი გაეგოთ. გზიდან გადავუხვიე და ალვის ხეებისაკენ გავწიე.

რამდენი დრო გასულა, ჩემო ალვის ხეებო, მას შემდეგ შე ხომ თქვენ სულ ნორჩები მახსოვხართ. ყველაფერი, რაზეც ოცნებობდა თქვენი დამრგველი და გამომზრდელი, ახლა. რატომ შრიალეობთ ასე სევდიანად, რაზე დარდობთ? იქნებ ის გაწუხებთ, ზამთარი ახლოვდება და ფოთლები დაგცვივათ? ან იქნება ხალხის წუხილი და ტკივილი გუგუნიებს თქვენს ყლორტებში?

ღიახ, მოვა ზამთარი, სიცივე, ქარბუქი იმძვინვარებს, მაგრამ დადგება გაზაფხულიც...

დიდხანს ვიდექი და ყურს ვუგდებდი შემოდგომის ფოთლების შრიალს. ვილაცას გაესუფთავებინა არხი. კამკამა წყალში ყვითელი ფოთლები ტივტივებდნენ.

ბორცვიდან მოჩანდა ახალი სკოლის შეღებილი სახურავი, ჩვენი კი უკვე აღარსად ჩანდა.

შემდეგ გზისკენ დავეშვი და სადგურისაკენ გავსწიე.

იყო ომი და მოვიდა გამარჯვება. რამდენ მწუხარებას გაუძლო ხალხმა. ბავშვები მამების საველე ჩანთებით დარბოდნენ სკოლაში, მშრომელის მარჯვენა ისევ შეეკიდა მიწას, ქვრივებს ცრემლი აღარ დარჩათ თვალში და თავის ბედს შეეგუენ. იყვნენ ისეთებიც, კიდევ რომ უცდიდნენ ახლობლებს, ყველა ხომ უცებ არ დაბრუნებულა სახლში.

არ ვიცოდი რა დაემართა დიუიშენს. თანასოფლელები, რომელთაც ვხვდებოდი, ამბობდნენ, რომ იგი უგზოუკვლოდ დაიკარგა, სოფლის საბჭოში მიიღესო ასეთი ცნობა.

— შეიძლება დაიღუპა კიდევ, უმატებდნენ ისინი, დრო გადის და მისი ასავალ-დასავალი კი არ ჩანს.

„გამოდის, რომ აღარ დაბრუნდება ჩემი მასწავლებელი,“ — ვფიქრობდი ხანდახან. — ასე ვერ მოვახერხებ მენახა იგი იმ დღიდან, რაც სადგურში დავშორდით ერთმანეთს.

ვფიქრობდი ხანდახან. როცა წარსულს ვიგონებდი და არც კი ვიცოდი რამდენ მწუხარებას იტევდა ჩემი გული.

ორმოცდაექვს წელში ტომსკის უნივერსიტეტში მივდიოდი სამეცნიერო მივლინებაში. ციმბირისაკენ პირველად მი-

წევდა მგზავრობა. მუქ კედლად აღმართულიყო ფანჯრებს იქით უღრანი ტყე. ალაგ-ალაგ გაიღვლებდნენ შავი სასურავები და მიღებიდან ამოსული თეთრი კვამლი. პირველ თოვლს დაეფარა მინდვრები, ყვავები დასჩხაოდნენ გადათეთრებულ მიდამოს. მოქუფრულიყო ცა.

კარგი თანამგზავრები შემხვდნენ. ყოფილი ფრონტელი, რომელსაც ყავარჩნები ეპირა ხელში, განუწყვეტლივ ხუმრობდა, ყვებოდა ანეგდოტებს ფრონტული ცხოვრებიდან. მოცებდა ამ კაცის უწყინარი გონებამახვილობა. იგი ვაგონში ყველას მოეწონა. ნოვოსიბირსკს იქით, პატარა გადასასვლელზე, ჩვენი მატარებელი წუთით შეყოვნდა. ვიდექი ფანჯარასთან და ვიციინოდი ჩემი მეზობლის მორიგ ოხუნჯობაზე.

მატარებელი დაიძრა, სიჩქარეს უმატა, მის წინ გაიქროლა ეულად მდგარმა პატარა სადგურის შენობამ. ისართან, წამით მოეწყდო ფანჯარას და ისევ მივეყარი: დიუიშენი დავინახე! იგი იდგა ჭიხურთან ალმით ხელში. არ ვიცი რა დამემართა.

გააჩერეთ! — ვიყვირე და გასასვლელისაკენ გავიქეცი, თვითონაც არ ვიციოდი რას ვაკეთებდი, მთელი ძალით გადმოვწიე დასამუხრუჭებელი სახელური.

ვაგონები ერთმანეთს მიეჯახნენ და მკვეთრად დამუხრუჭდნენ. ხმაურით გადმოცვივდა ბარგი თაროებიდან, აყვირდნენ ბავშვები და ქალები. ვიღაცამ არაადამიანურად დაიკივლა:

— კაცი ჩავარდა მატარებლის ქვეშ!

მე უკვე საფეხურებზე ვიყავი, ჩამოვხტი, არაფერს ვხედავდი და ვერაფერს ვამჩნევდი, არაფერი გამეგებოდა, მეისრის ჭიხურისკენ, დიუიშენისკენ. უკან კონდუქტორების სასტვენის ხმა მომყვებოდა. ვაგონიდან ჩამომხტარი ხალხი უკან მომდევდა

სულისმოუთქმელად ჩაეურბინე შემადგენლობას, დიუიშენი შესახვედრად მორბოდა.

— დიუიშენ, მასწავლებლო! — დავიყვირე და მას მივყარდი.

მეისრე შეჩერდა, გაოცებით შემომხედა. ის იყო ნამდვილად. მისი სახე, თვალები, მხოლოდ უღვაშები, იგი ხომ უღვაშებს არ ატარებდა, იყო სხვა და ოდნავ მობერებულყო.

— რა დაგემართათ, დაიკო, რა იყო? — შემეკითხა იგი ყაზახურ ენაზე. — თქვენ ნამდვილად შეცდით, მე მეისრე ჯანგაზინი ვარ, ბეინეუ მქვია.

— ბეინეუ?

არ ვიცი როგორ შევიკავე თავი, რომ არ ავყვირდი დარდის, სირცხვილისა და ტკივილისაგან. რა ჩავიდინე? სახეზე ხელები ავაფარე და თავი დავხარე. რატომ არ გამისკდა მიწა? ბოდიში უნდა მომეხადა უცნობ მეისრესთან, პატიება მეთხოვნა ხალხისთვის, მე კი ვლუმდი ქეასავით გაშეშებული. არც ხალხი იღებდა ხმას. მე ველოდი, რომ აყვირდებოდა, გამლანძღვენ. ყველა ღუმდა. ამ საშინელ სიჩუმეში გაისმა ვიდაც ქალის ქვითინი.

— საცოდავს, ძმა ან ქმარი ეგონა, შეეშალა.

ხალხი ამოძრავდა.

— რამდენი რამ ხდება, — წაიბუბუნა ვილაყამ.

— ყველაფერი შეიძლება, რამდენი გადავიტანეთ ამ ომში. მეისრემ სახიდან ხელები მომაშორებინა და მითხრა:

— წამოდით, ვაგონამდე მიგაცილებთ, სიცივეა.

ხელი მომკიდა, მეორე მხრიდან ვილაყ ოფიცერი ამომიღდა:

— წამობრძანდით, ქალბატონო, გვესმის თქვენი გულისტკივილი. — თქვა მან.

გზა დამითმეს, მე მივდიოდი, მივდიოდი ისე, თითქოს ყველაზე ძვირფას ადამიანს ვასაფლავებდი. შემხვედრი მგზავრებიც უჩუმრად უერთდებოდნენ ჩვენს ჯგუფს. ვილაყამ მხრებზე თბილი ღუნლიანი თავსაფარი მომახურა. ყავარჯნებზე შემდგარი ჩემი მეზობელიც გვერდით მომყვებოდა. მხიარული და კეთილი ადამიანი რატომღაც ქუდმოხდილი მოდიოდა და ვგონებ ტიროდა. მეც ვტიროდი. და ამ მსვლელობაში ტელეგრაფის მათულებზე აგუგუნებული ქარის ხმაურში მე სამგლოვიარო მარშის ხმა მესმოდა და ჩუმად ვიმეორებდი: „ველარასოდეს ველარ ვნახავ“.

ვაგონთან მატარებლის უფროსმა შეგვაჩერა. იგი რაღაცას ვყვიროდა, თითოთ მემუქრებოდა, ლაპარაკობდა სასამართლოზე, ჯარიმაზე. ხმას არ ვიღებდი. ჩემთვის ყველაფერი სულერ-

თი იყო. იგი რაღაც ქალაქს მაჩვენებდა, მოითხოვდა ხელი მომეწერა, მაგრამ ძალა არ შემწევდა გამომერთმია ფანქარი.

მაშინ ჩემმა მეზობელმა ქალაქი ხელიდან გამოგლიჯა, ყვარაჩნებზე დაყრდნობილმა წაიწია მისკენ და აყვირა:

— თავი დაანებე! მე მოვაწერ, მე დავამუსრუქე მატარებელი და პასუხსაც მე ვაგებ!..

ციმბირის მიწაზე. ძველთაძველ რუსულ მიწაზე მიიჩქაროდა დაგვიანებული მატარებელი. მწუხარედ ეღერდა ჩემი მეზობლის გიტარა. იგი ქვრივი ქალის მწუხარე სიმღერას მაგონებდა. გულით რომ დაქონდა ომით გამოწვეული დიდი ადამიანური სევდა.

მიდიოდა წლები. მიდიოდა წარსული და გვიხმობდა მომავალი, დიდი თუ პატარა საქმეები. გვიან გაეთხოვდი. კარგად ადამიანს შევხვდი. გვყავს ბავშვები, გვაქვს კარგი ოჯახი, მეგობრულად ვცხოვრობთ. ახლა ფილოსოფიის მეცნიერებათა დოქტორი ვარ. ხშირად მიწევს მგზავრობა. ბევრი ქვეყანა მოვიარე, აულში კი მეტად არ ვყოფილვარ. ამას თავისი მიზეზები ჰქონდა, მაგრამ თავს არ ვიმართლებ. თანასოფლელებთან რომ კავშირი გავწყვიტე, ძალზე ცუდია. ასე მოეწყო ჩემი ცხოვრება. მე წარსული არ დამვიწყებია, მისი დავიწყება არც შეიძლება, მაგრამ თითქოს დავმორდი მას.

მთებში არის ხოლმე ასეთი წყაროები: გაიყვანენ ახალ გზას და მისკენ მიმავალ ბილიკს ივიწყებენ. სულ უფრო იშვიათად უხევენ მისკენ მგზავრები წყურვილის მოსაკლავად, იგი თანდათანობით იფარება პიტნითა და მაცვლით. იშვიათად თუ გაიხსენებს ადამიანი და შარავზიდან გადაუხვევს, რომ მცხუნვარე დღეს წყურვილი დაიოკოს. მოვა ადამიანი, მოსძებნის ამ მიყრუებულ ადგილს, გადასწევს ბუჩქებს და განციფრდება: დიდი ხნის აუმღვრეველი, კამკამა წყალი გააოცებს თავისი სიფაქიზითა და სიღრმით. იგი აქ წყაროში დაინახავს თავისთავსაც, მზესაც, ზეცასაც მაღალ მთებსაც... და მაშინ გაიფიქრებს: განა ცოდვა არ არის, რომ სხვასაც არ ვუთმობ ამ წყაროზე? გაიფიქრებს და შემდეგ დაავიწყდება.

ასეთი რამ ცხოვრებაში ხდება... ამიტომაც არის იგი ცხოვრება.

მე ასეთი წყაროები სულ ახლახან გავიხსენე, აულში ყოფნის დროს.

თქვენ გაგიკვირდათ ჩემი მოულოდნელი წამოსვლა. განა არ შეიძლებოდა ყველაფერი ეს, რაც თქვენ გიამბოთ, იქვე მეთქვა ხალხისთვის, ადგილზე? არა. მაშინ მე აღელვებული ვიყავი, მრცხვენოდა, მრცხვენოდა ჩემი თავისა და ამიტომაც გადავწყვიტე წამოვსულიყავი. მე მივხვდი, რომ არ შემეძლო შევხვედროდი დიუიშენს, პირდაპირ შემეხედა მისთვის. უნდა დავმშვიდებულიყავი, გონება მომეკრიბა, მომეფიქრებინა ყველაფერი, რისი თქმაც მინდოდა არა მარტო ჩემი თანამემამულეებისათვის, არამედ ძალიან ბევრისათვის, ყველასათვის.

თავს დამნაშავედ ვგრძნობდი. დამნაშავე ვიყავი იმიტომ, რომ ჩემთვის კი არ უნდა ეცათ ასეთი პატივი, მე კი არ უნდა ვმჭდარიყავი საპატიო ადგილზე სკოლის გახსნისას, არა, ამის უფლება ყველაზე უპირველესად ჰქონდა ჩვენს პირველ მასწავლებელს, ჩვენი აულის პირველ კომუნისტს — მოხუც დიუიშენს. მოხდა პირიქით. ჩვენ საზეიმო მაგიდას ვუსხედით და ეს ოქროს გულის ადამიანი კი ჩქარობდა ფოსტა დაერიგებინა, უნდოდა სკოლის გახსნისთვის მოესწრო და მოეტანა მის კურსდამთავრებულთა მოსალოცი დეპეშები.

ეს ხომ გამონაკლისი არ არის. არაერთხელ შემინიშნავს. ამიტომ ვეკითხები ჩემს თავს, როდის დავკარგეთ უბრალო ადამიანისადმი პატივისცემის გრძნობა, ხომ ყველას გვახსოვს როგორ პატივს სცემდა მათ ლენინი?.. მაღლობა ღმერთს, რომ ამგვარ ამბებზე ახლა ჩვენ ვლაპარაკობთ ყოველგვარი ფარისევლობისა და მლიქვნელობის გარეშე. ეს ძალიან კარგია.

ახალგაზრდობამ არ იცის როგორი მასწავლებელი იყო დიუიშენი თავის დროზე. უფროსი თაობიდან კი ბევრი უკვე აღარ არის. დიუიშენის მრავალი მოსწავლე დაიღუპა ფრონტზე, ისინი ნამდვილი საბჭოთა მეომრები იყვნენ. მე ვალდებული ვარ მოვუთხრო ახალგაზრდებს ჩემს მასწავლებელ დიუიშენზე. ყოველი ადამიანი ასე მოიქცეოდა. მე აულში არ დავ-

დიოდი და აღარაფერი ვიცოდი მასზე და იგი ჩემთვის თანდა-
თან გადაიქცა რაღაც ძვირფას რელიქვიად, რომელსაც მუზეუ-
მის სიჩუმეში უპოვნია ბინა.

მე კიდევ მივალ ჩემს მასწავლებელთან, ანგარიშს ჩავაბა-
რებ, პატიებას ვთხოვ.

მოსკოვიდან დაბრუნების შემდეგ მე მინდა ჩავიდე აულში
და წინადადება მივცე ჩემს თანამემამულეებს ახალ სკოლა-
ინტერნატს „დიუიშენის სკოლა“ უწოდონ, უწოდონ სახელი
ამ უბრალო კოლმეურნისა, ამჟამად ფოსტალიონისა. იმედი
მაქვს, თქვენც იმ მიწის შვილი, მხარს დამიჭერთ. მე გთხოვთ
ამას.

მოსკოვში ახლა დამის ორი საათია. სასტუმროს აივანზე
ვდგავარ. გავსტკეპრ სინათლის ზღვით გაჩირაღდნებულ მოს-
კოვს და ვფიქრობ იმაზე, როგორ ჩავალ აულში, შევხვდები
მასწავლებელს და ვეამბორები მის ქალარით მოსილ წვერს.

ფართოდ ვალეფანჯარას. ოთახი გრილი ჰაერით ივსება.
მოციმციმე აისის ბინდბუნდში ვაკვირდები დაწყებული სუ-
რათის ეტიუდებსა და ჩანახატებს. ბევრი დამიგროვდა, უკვე
მერამდენეჭერ დავიწყე ყველაფერი თავიდან, მაგრამ სურათზე
მსჯელობა აღრცა. მთავარი ჭერ კიდევ არ მიპოვნია. დავდივარ
და ვფიქრობ, ირგვლივ სიწყნარეა და მე ისევ ვფიქრობ...
ვფიქრობ... ასეა ყოველთვის. მე ისევ და ისევ ვრწმუნდები,
რომ ჩემი სურათი მხოლოდ და მხოლოდ ჩანაფიქრია.

და მაინც მინდა გესაუბროთ ჭერ კიდევ დაუმთავრებელ
ტილოზე. რჩევა გკითხვით. თქვენ, რა თქმა უნდა, ხვდებით,
რომ სურათი ჩვენი აულის პირველ მასწავლებელს, პირველ
კომუნისტს მოხუც დიუიშენს მიეძღვნება.

მაგრამ ჭერ კიდევ არ ვიცი, მოვახერხებ თუ არა, საღება-
ვებით ავსახო ამ ადამიანის რთული, ბრძოლითა და გზნებით
აღსავსე ადამიანური ცხოვრება. როგორ მოვახერხო რომ წვე-
თიც არ დავღვარო პირამდე სავსე ფიალიდან, როგორ მოვი-
ტანო იგი თქვენამდე, ჩემო თანამედროვენო? როგორ მავალ-
წიო, ჩემი ჩანაფიქრი ისე გადმოგცეთ თქვენ, რომ იგი ჩვენ
საერთო ნახელავად იქცეს?

არ შემიძლია არ დავწერო ეს სურათი; მაგრამ რაოდენი

ფიქრი და მღელვარება ისადგურებს ჩემს გულში. ხანდახან მგონია არაფერი გამომივა, და მაშინ ვფიქრობ: რატომ მარგუნა ბედმა წილად მხატვარი გავქმნადარიყავი? რატომ ვეწამებო ასე? ხან კი ისეთი ძლიერი მგონია თავი, რომ ვფიქრობ მთებს დავძრავ ადგილიდან. მაშინ ჩემს თავს ვეუბნები: დააკვირდი, შეისწავლე, შეარჩიე. დახატე დიუიშენისა და ალტინაის ალვის ხეები, ხეები, რომელთაც ამდენი უბედნიერესი წუთი გარგუნეს ბავშვობაში, თუმცა მათი ისტორია არ იცოდი. დახატე მზემოკიდებული, ფეხშიშველა ბიჭი, რომელიც სულ მალამალა აცოცებულა და ალვის ხის ტოტზე შემომჭდარი, მოხიბლული თვალებით გასცქერის მისთვის უცნობ სივრცეს.

ანდა დახატე სურათი და „პირველი მასწავლებელი“ დაარქვი. უჩვენე როგორ გადაჰყავს დიუიშენს მდინარეზე ბავშვები და იქვე ცხენზე შემჭდარი მისკენ დამცინავი სახით მომზირალი მელის ბეწვის ქუდიანი ბოროტი, უგუნური ადამიანები.

თუ არადა, ჩვენ როგორ გააცილა ქალაქში მასწავლებელმა ალტინაი. გახსოვს, უკანასკნელად რომ დაუძახა?! დახატე ისე, რომ ის ძახილი, რომელიც ახლაც ესმის ალტინაის, ყოველი ადამიანის გულში ახმაურდეს.

მე ამას ჩემს თავს ვეუბნები. ბევრ რამეს ვეუბნები ჩემს თავს და ყველაფერი არ გამოდის. ჭერ კიდევ არ ვიცი როგორი იქნება სურათი, მაგრამ მტკიცედ მჯერა, რომ იგი დიდძიების ნაყოფი უნდა იყოს.

ს ა რ ა ზ ე ნ ი

ჩემო წითელთავსაფრიანო ჩინარო	5
ჯამილა	125
აქლემის თვალი	185
პირველი მასწავლებელი	227

Чингиз Айтматов
Повести гор и степей
(На грузинском языке)

Государственное издательство
«Сабчота Сакартвело»
Тбилиси — 1963

რედაქტორი ც. ბუაჩიძე
მხატვარი ზ. ფორჩხიძე
მხატვრული რედაქტორი დ. ღუნდუა
ტექნიკური რედაქტორი ით. იბღუშელიშვილი
კორექტორი თ. ცინცაძე

ხელმოწერილია დააბეჭდად 14/XII—63 წ.,
ქაღალდის ზომა 84 × 108¹/₃₂. ნაბეჭდი თაბახი 14,76.
სააღრ.— საგამომც. თაბახი 12,98 სააქტორო თაბახი 12,69
ტირაჟი 10,000 შეკვ. № 591.

ფასი 54 კაპ.

მე-4 სტამბა, თბილისი, მედქალაქი.
Типография № 4, Тбилиси, Медгородок.